

清代傳記叢刊·綜錄類⑦
周 駿 富 輯

國朝耆獻類徵初編(四六)

卷三三〇至
卷三三九

(清)李 桓 輯



明文書局印行

國朝耆獻類徵初編卷三百三十目錄

材武四

路平甫

范雲龍

龍電

黃廷雄
余光輝

蔡得耀

周耀光
郁廷彪

馮光陞
黃金標

李文耀
李永譽

秦華
鄭國太

嚴鎬

富禮善

全德

鄧宏升

盧植

黃廷育
陳藝

蔡榮恩
周宏恩

劉成業

蔡興福
徐大鏞

施大發
王福

李成隆

托爾托保

黃勇

劉炳洪
鄭國威

蘇秀邦
周國泰

陳國琳
蔣魁雄

鄭勇

國朝耆獻類徵初編卷三百三十目錄

趕興 常山福祿

新保

曾榮 巫山李定邦

林一枝 詹茂山

蔡龍香 盧光國

邵隆 傅權陞

楊大壯

何文翰

張永祥

阿林布 許天元張觀文

胡佐朝 李源玠

丁永安

黃廷珠

孟光爵

蘇清阿

劉天保

彭宏澍

彭廷椿

唐宗聖 向鼎暹張文儒

楊自唐 子大業

國朝耆獻類徵初編卷三百三十

通奉大夫前署江西巡撫江西布政使司布政使湘陰李桓輯

材武四

路平甫

班笥卿之友路君平甫隸武弁屢從征伐識要略年老歸休園於
息機班笥卿詣郡輒寓其園一夕披衣謁笥卿曰子文士也知讀
書之道而未諳用兵之策試酌酒一語子子其通於兵乎凡兵之
道雄兵與精兵戰則精兵勝貪兵與義兵戰則義兵勝鬪兵與備
兵戰則備兵勝追兵與伏兵戰則伏兵勝無一不勝與如不自勝
之兵戰則如不自勝之兵勝夫如不自勝其勝神矣藏於無形攻

於不意隱地於天隱天於地無首無尾若滅若生若行無地若入
無人戰之統也其迅其捷如張弩如發機如轉圓石於千仞之山
如決積水於千仞之谿戰之勢也其步其伐有截無迂如鞭龍蛇
如搏兕虎立於必死是以無死戰之情也鞞鞞鞅鞅周列成文揮
之如羽縱之如焚眴然四分如風捲雲搖旗息鑿寂若無聞窺我
無隙破我無門迷離惶惑萬敵紛犇戰之形也長戈利戟銳卒輕
車迺乘其亂進攻其瑕一呼百應勇氣倍加曾不頃刻而敵已滅
威已賒及於奏凱而旋置戍畱守所過謹踊卒以無譁戰之完也
兼此數善是謂如不自勝之軍然而其法泥之者窘襲之者傷犯
之者全敗佳之者不祥昔有馬服君之子讀之而不能通之安平

君武安君輩通之而不能盡之漢諸葛君則躬盡之勢未能施之神乎神乎其惟鷹揚之老叟與運籌之帝師乎今吾子上明三光之次下察九區之宜中習先王仁誼之教吉凶賓嘉之禮而旁及於百家陰陽形術方名象數之奇獨未變而合之使熟於戎內廷一旦發詔遣師命吾子咎兵督遠封子其階前稽顙期期不奉邪抑白函飛奏咄咄書空耶則吾未識所從矣班筭卿曰君言信善但吾雖未典軍其所以軍則亦默運之心而熟按之於傳於經矣平甫笑曰否否此正書生紙上之兵非繕兵也夫行兵有策不知策焉知兵且不知兵其又烏乎保國

右記張九鍵撰

--	--	--	--	--	--	--	--	--

范雲龍

范雲龍桂陽人家貧落魄投廣西某營從征逆苗以奮勇拔行營外委旋以首功卽眞 賞戴藍翎緘險獲紅衣礮升千總宵劫苗寨苗蜂起攢刺之刀箭傷如蝟身浴血卒馘苗酋首以歸經略壯之爲上其事遷都司 賜頭等巴圖魯 賞戴花翎凱旋補廣西慶遠營中軍都司教匪亂河南陝西雲龍復自請奮勇身先士卒所向披靡嘗與教匪戰弩洞要害拔矢益厲又中鳥槍腋擊飲子各一瞋目大呼短兵接決賊首無算賊卻乃已所飲子竟附著不可出云事平遷廣西提標後營游擊時兩廣總督百齡與副將劉不協劉舉雲龍能百齡故撓之命與其曹角射雲龍慷慨前日游

擊以奮勇名咩血百戰取寸進知殺賊而已射非所習也百齡怒
降雲龍千總雲龍負氣欲棄官會百齡解任繼百齡者知雲龍屈
奏復職令人 覲 上閱其功籍念雲龍數瀆死爲國家出力久
不宜以附苛因詰責百齡而遷雲龍江西九江鎮游擊未幾升饒
州營參將考滿擢袁臨副將又以忤總兵楊爲巡撫所奏雲龍遽
繳花翎 上猶念前勞還其翎給半俸原品休致雲龍日不知書
性驕直無所屈下驍勇健戰喜深入蹈危機意氣不少挫亦會有
天幸得脫死暇輒拊髀太息恨不得畢命封疆居江西時年且老
常咄咄顧影嗟語人曰武夫遭遇太平身閒無所事事空受 朝
廷豢養耳其壯志不衰若此雲龍之始至廣西也覲依其叔父程

甫程甫不禮焉乃投軍程甫者隨故全州州同宗機任贅土人康
姓因家廣西雲龍貴程甫家日落雲龍撫其二子爲之娶妻雲龍
功名起廣西其致仕也亦歸廣西有子十卒時年七十有三

太史氏曰雲龍戰將也入死地卒全歸彼鋒鏑何能死人哉太平
久物眾地大稂莠閒槩身文吏貪偷釀亂武夫臨難率瑟縮如雲
龍何可多得雍正乾隆間有宋和貴者亦邑人也起卒伍從征歷
百戰得官事與雲龍類檢志乘僅傳其名而勳階弗具問其子孫
微矣弗克徵予因次雲龍事而爲之三歎焉

石傳何慶元撰

三十三卷之三十一

龍電 黃廷雄 余光輝

龍電廣東高要人由行伍於乾隆四十八年拔督標中軍額外外委五十一年補前營外委五十二年七月隨征臺灣九月燬大崙等莊十一月赴諸羅救援圍解尋克復大埔林庵等處要隘十二月首逆林爽文就擒電在事有功五十三年正月擢新塘營右哨把總六月凱撤回營五十五年升左哨千總五十六年升新會右營守備尋署順德協右營都司嘉慶三年三月偕惠來營千總黃廷雄黃岡協右營千總余光輝隨征湖南教匪六月攻馬鞍山中槍傷十二月抵火麻沖營病歿廷雄先於六月染瘴歿光輝於五月進攻全壁嶺克之尋克馬鞍山收復乾州俱在事有功並於平

隴要隘奪獲木城石卡旋於十月病歿先後事 聞均 賜卹如
例電光輝廕監生電子高元襲光輝子金銘襲廷雄廣東惠來人
由行伍洊升是職光輝餞平人由行伍拔黃岡協右營外委旋擢
左營把總乾隆五十二年隨征臺灣於南北兩路殲戮多名燬賊
寮百四十開進攻柴頭港中槍傷尋隨總兵梁朝桂克復鹿仔草
等處升是職

右 國史館本傳

蔡得耀

周耀光

馮光陞

李文耀

秦華

郁廷彪

黃

金標

李永譽

鄭國太

嚴鎬

蔡得耀浙江定海人由行伍於乾隆五十一年七月拔昌石營外委五十七年正月升本營把總十一月升定海鎮標左營千總五十九年四月升甯海鎮標左營守備嘉慶元年二月奉 上諭黃巖鎮總兵孫全謀帶領兵船在玉環洋面攻擊盜匪蔡得耀殺死二賊各弁兵等隨奮勇登船生擒首夥多名蔡得耀著以游擊超補二年三月補黃巖鎮標左營游擊嗣因疎防洋盜連劫四案部議革職五年六月閩浙總督玉德奏得耀在洋捕盜奮勇熟諳水師數年以來管駕兵船衝風破浪屢次擊獲首夥盜犯請將原議革職處分准其開復奉 旨著加恩降一等補用是年十月於小

門洋陡遇颶風沈沒六年三月玉環右營把總署千總周耀光帶兵船在東西柱外洋追擊艇匪九年六月温州鎮標左營把總馮光陞捕匪於閩省浮鷹洋復追戰於水粵洋俱遭風淹沒先是四年八月定海鎮標右營外委李文耀管駕同安船捕匪於山盤洋遭風淹沒五年八月麗水營外委秦華隨捕洋匪遭風漂出外洋淹沒嗣是八年十月定海鎮標左營外委郁廷彪捕匪於大盡山洋九年二月温州鎮標中營外委署左營把總黃金標捕匪於百畝礁洋俱遭風淹沒十年正月定海鎮標右營外委李永譽追匪至山東黑水洋擊沈其船行至江南蛇山洋遭風淹沒六月乍浦營外委鄭國太捕匪於大盡山洋九月乍浦營外委嚴鎬捕匪於

大盡山洋俱遭風淹沒先後事 聞得 旨蔡得耀馮光陞均著
咨部議卹 恩賞雲騎尉世職襲恩騎尉世襲罔替周耀光廕把
總李文耀等俱 賞卹如例得耀子長謀襲耀光子裕龍襲光陞
姪國勝襲耀光永嘉人光陞耀光同縣人前任把總以疎防船戶
革職畱營緝捕復拔外委升把總文耀廷彪永譽國太鎬得耀同
縣人華麗水人金標耀光同縣人

右 國史館本傳

國朝通志卷之三十一

一

--	--	--	--	--	--	--	--	--	--

富禮善

富禮善達呼爾鄂濟氏黑龍江滿洲正黃旗人乾隆四十三年由領催署筆帖式四十七年補驍騎校四十九年遷佐領五十年上幸木蘭舉行秋獮富禮善射麋鹿一賞戴花翎五十五年升副總管五十六年廓爾喀賊匪擾後藏隨將軍福康安往討疊克礪卡殲賊無算五十七年以收復濟隴功授額外總管五十九年補總管嘉慶二年八月川陝楚教匪不靖上命副都統烏爾圖納遜率師赴楚協剿富禮善隸焉十一月襄陽白號首逆高均德偷渡漢江竄川境我兵分路追剿殺賊千餘旋駐甯羌州堵禦三年七月高逆與通江藍號首逆冉文濤據渠縣大神山富禮善隨

參贊大臣德楞泰馳往攻擊率吉林索倫馬隊由火箭子進抵清池子山口截殺千餘八月賊竄營山縣之箕山巴州白號首逆羅其清與之合恃險拒守時襄陽黃號首逆樊人傑等嘯聚鳳凰寺亦與羅逆相犄角大軍分敗其眾十月進剿箕山克之十一月賊退據青觀山燬其巢追擒羅逆於山坪四年正月敗冉文儔於通江之麻壩寨二月敗達州青號首逆徐添德於高家壩適東鄉白號首逆冷添祿竄至黃城寨大兵分路追擊擒斬二千富禮善皆有功 賞扎福空阿巴圖魯名號七月隨德楞泰追賊入楚五年二月復追冉逆餘匪於川境之黃茅嶺擒賊目陳錕倅箭殪冉添恆克包家溝擒賊渠冉添元於陣論功下部議敘六年正月移師

入陝四月偵知襄陽白號賊日高二馬五圍竄龍安我兵輾轉追擊偏近荒耳山富禮善於山坳設伏賊至稍礮齊發斃賊三百復合力兜擊敗之於龍峒溝二逆悉就擒捷入 賞副都統銜十月卒於軍營 命照軍營病故例賜卹子晉通官驍騎校

右 國史館本傳

國朝通志卷之二十一

本

--	--	--	--	--	--	--	--	--	--

全德

全德瓜爾佳氏吉林滿洲正黃旗人乾隆三十四年由馬甲隨征
緬甸三十八年平金川均著戰績五十二年補驍騎校五十四年
升防禦五十七年擢佐領五十九年升防守尉旋升協領嘉慶二
年川陝楚三省教匪煽亂全德隨吉林副都統賽沖阿赴川勦辦
三年正月擊敗襄陽白號首逆高均德於王家山師次陝西洋縣
之安子溝賊乘夜撲營我兵突出殲賊千餘三月追襄陽黃號首
逆齊王氏姚之富於楚之鄖西大軍三面環攻獲賊目王如英等
於三岔河齊姚二逆墜巖斃擒斬餘匪甚夥六月高逆奔渠縣之
大神山與通江藍號首逆冉文儔合七月大兵分路進攻克之八

月達州青號首逆徐添德巴州白號羅其清句結襄陽黃號樊人傑擾及觀柴場等處我兵分剿四晝夜斃賊四千餘四年追冉逆至東會山梁賊夜犯大營我兵設伏嚴備大敗之全德均有功五年正月移師入楚剿襄陽藍號餘匪於十佛溝賊蜂擁迎拒全德領兵截殺斃賊三十餘賊據山梁下撲全德直前衝出槍斃賊二官兵乘之大敗其眾捷入 諭曰全德於賊匪撲下山梁直前衝出一槍斃賊二名尙爲奮勇如再有出力之處著奏明酌加升擢三月剿賊於林江鋪全德由杜家坡進擊斃賊無算四月復敗賊張漢倫於兩岔河事 聞 賞噶爾薩圖魯名號六年四月敗冉逆於隴州之草白峪乘勝分道追剿復敗之於楊溝經略額勒

登保上其功 賞加副都統銜八年卒子和特恩保防禦富拉特
恩保佐領富隆額驍騎校

右 國史館本傳

鄧宏升

吾楚鳳凰廳有鄧君諱宏升字雲階者古之剛介君子也乾隆末辰州苗匪蠢動上命文襄公福康安督師征剿迄嘉慶八年事平時鳳凰廳城外諸廟被焚辰沅永靖兵備道傅公簡以諸廟載在祀典例宜修發白金二千檄君購辦木料君謹筦出入令家人無敢私用公項一錢一日晨出買菜備過門君妻就取數十錢子菜值未及償而君遽歸察知大罵將遂杖之君妻屏息弗敢出一語子萬鍾長跽請代母受杖徐徐怒稍解乃得免杖君有姊適田氏居恆事之甚謹日者偶語君弟受二千金辦公得毋少霑溉下君氣慙面赤厲聲應曰所言胡至吾耳姊豈弗知我者而亦爲此

言耶絕不與語其姊跼踖弗自甯卽日言歸余謂君以一言故至
欲與姊絕良過顧其律己之正治事之嚴不肖絲毫自苟於茲可
信矣軍興以來主將之能與士卒其甘苦者固不乏人而貪利自
肥剋滅軍精者或亦弗免矣儻悉如君之絲毫弗苟能使士卒用
命賊豈真不能滅哉卽君一節之善有足令人慨然長歎欷歔太
息於不容已也君善騎射苗匪之變在戎行八載大小數十戰然
酬不稱庸以是又見當時敘功之嚴且慎若此在軍當奉檄稽察
奸細同事多以無辜邀賞君遇鄉人從賊中逃歸者廉實心力請
於主者釋之嘗云取人頭以博富貴吾不忍爲也事父母最謹鄉
族稱其孝性雖嚴厲遇善人君子必屈抑相從溫語終日人有告

貨者輒傾所蓄以應或竟不責償此又君之內行厚德有足紀者
年五十矣始生萬鍾萬鍾雖武人通文史嚴正雅類君歷官新化
縣把總寶慶協千總軍功保舉守備署寶慶協都司所莅能服其
下始至新化凡舊沿陋規悉裁汰敬禮士大夫有加邑人翕然稱
之蓋其稟承先訓者素矣萬鍾頃持君狀請爲墓表因揭其大者
著於文以爲士大夫勸且以塞萬鍾哀慕之思

右墓表鄧瑤撰

盧植 黃廷方 蔡榮恩 陳燕 周宏恩

盧植山西朔州人乾隆四十九年武進士五十二年選福建汀州鎮標左營守備五十六年調臺灣北路協右營守備嘉慶八年升鎮標中營都司旋護理北路協副將九年逆匪蔡牽竄淡水洋植帶兵堵禦奮勇前擊被礮傷奏入得旨以副將超升遇缺卽補十年出洋巡哨傷發病歿先是二年廣東萬州營左哨把總黃廷育出洋協緝生擒賊目受重傷歿七年浙江定海鎮標右營千總蔡榮恩擊賊於羊山洋傷亡嗣是十一年福建福甯鎮標右營千總陳燕擊賊於鹽水港傷亡浙江定海鎮標右營額外委周宏恩擊賊於漁山洋傷亡先後事聞均賜卹如例植得旨廕

子弟一人以六品官用廷育榮恩藝賞雲騎尉世職襲次完時均
以恩騎尉世襲罔替植子步蟾襲廷育子仁襲榮恩子興福襲藝
子元輝襲宏恩照馬兵例賞卹廷育贛東僑州人藝福建南平人
榮恩宏恩俱浙江定海人

右 國史館本傳

劉成業 蔡興福 施大發 徐大鏞 王所

劉成業浙江鎮海人由行伍於乾隆五十四年三月拔鎮海左哨外委五十七年十一月升定海左營把總五十八年八月升定海中營千總嘉慶四年二月升乍浦右營守備八年九月超擢温州鎮標中營游擊十年正月署乍浦營參將十月在盡山洋面追剿逆匪蔡牽遭風漂沒十一年四月 諭劉成業追剿蔡逆陡遇颶風漂失無蹤情殊可憫著加恩照陣亡例給予卹典先是十年九月隨營學習雲騎尉蔡興福黃巖鎮標左營千總施大發在盡山洋擊賊遭風淹沒十二年正月温州鎮標中營把總署千總徐大鏞中營外委署左營把總王福追捕竄匪至廣東惠來縣田心礁

外洋遭風漂沒先後議卹得旨成業廕雲騎尉世職襲次完時
給予恩騎尉世襲同替與福廕衛千總大發大鏞廕把總俱賞
卹如例福賞卹如例成業子炳日襲與福弟興仁襲大發子必
顯襲大鏞子印章襲與福定海人羊山洋傷亡千總蔡榮恩子由
難廕本職大發與福同縣人大鏞永嘉人福樂清人

右 國史館本傳

李成隆

嘉慶間平閩浙海盜李壯烈伯實爲首功太平參將李成隆亦有勞焉龍王堂松門之役成隆婦新產風雨破其屋驚死不顧立率師往勦安南夷匪及鳳尾幫盜皆以此舉就擒時亦稱成隆小李將軍

右紀聞陳康祺撰

通志卷之三

卷三十三

六

托爾托保

托爾托保滿洲鑲藍旗人居黑龍江之墨爾根城乾隆三十七年
以上駟院司鞍從征金川尙書福隆安奏請 賞戴空金頂藍翎
帶兵進剿三十八年三月將軍溫福參贊海蘭察奏大兵會攻昔
嶺賊蟻聚死守因分兵先攻功卡爾桂山口托爾托保偕都司曹
順帶領瓦寺鄂克什士兵七百名越眾先登近偪賊卡殺千餘人
官兵繼進痛殲之得 旨嘉獎 賞大緞二匹十一月授藍翎侍
衛三十九年三月 賞戴花翎八月大兵攻該布達什諾色湖普
山下石礮木城托爾托保潛越賊礮後路占據山梁奏 聞授佐
領旋擢三等侍衛十月攻圍遜克爾宗賊乘夜率兵劫我礮臺石

平侍衛額爾特等禦之托爾托保潛從礮臺左側應援與官兵夾
攻大敗之十一月以攻克默格爾山梁及凱立葉等處礮寨 賞
揚達克巴圖魯名號四十年升二等侍衛四十一年擢頭等侍衛
加副都統銜 賜氏達瑚哩四十五年凱旋補授上駟院司鞍總
管以母老無人侍養陳請解侍衛總管各職任降補本處四品佐
領等官 上許之四十六年回黑龍江補佐領嘉慶四年授呼倫
貝爾總管五年七月率黑龍江官兵赴湖北軍營勦辦邪匪九月
隨總督倭什布迎擊徐萬富股匪於遠安縣屬之紫山坪殲擒解
散者三百餘名賊合藍黃白三號竄擾當陽我兵追至觀音寺山
梁生擒執旗賊目張啟武又屢創之於界嶺獅子溝東湖屬之交

戰垣等處六年三月借副將孫清元吉林泰禦賊於熊藏山礮斃賊首張允壽五月由向家壩緊躡賊蹤至銅魚峽痛殲之六月兜勦徐添德股匪於六子坡借參將楊安游擊三福併力仰攻斃賊三百餘名七月率兵由平渡河西進遏賊匪龍紹周由向家壩入州之路賊勢日蹙七年正月折竄巴巫河托爾托保帶領馬隊躡淺過河殺賊甚夥三月賊首曾芝秀王國賢等攻雙和天星兩寨托爾托保與孫清元分兵往援天星寨圍解四月賊復於霧渡河襲孫清元營托爾托保截賊後路敗之又敗賊於梨子坪馬髮嶺四方寨等路七月賊匪偽先鋒賴姓復攻圍三保天星兩寨擊敗之追殺三十餘里斃賊七十餘名十一月參贊德楞泰奏令帶兵

入山於房縣一帶老林搜查餘匪八年隨總督吳熊光截賊於東
蒿坪又偕總兵慶溥追擊零匪於四腦垣前後以軍功得 賞銀
緞荷包燧囊佩刀等物有差七月賊平帶黑龍江兵凱旋十二年
五月卒

右 國史館本傳

黃勇劉炳洪 蘇秀邦 陳國琳 鄭勇 鄭國威 周國
泰 蔣魁雄

黃勇廣東南澳人由行伍洊升吳川營都司嘉慶六年署南澳鎮
標右營游擊十三年署海門營參將十五年乘駕米艇巡緝至甲
子外洋颶風壞舟溺於海同時遭風者廣海寨把總劉炳洪溺於
白沙洋龍門協左營外委蘇秀邦溺於碣洲洋陳國琳溺於海口
內洋先是六年碣石鎮標左營把總鄭勇大鵬營外委鄭國威平
海營外委周國泰捕盜於放雞外洋十年行營外委銜蔣魁雄捕
盜於三墩洋俱遭颶風淹歿事聞得 旨黃勇照參將例議卹餘
賜卹如例勇秀邦國琳 賞雲騎尉世職襲次完時以恩騎尉世
襲罔替勇子慶元襲秀邦弟秀望襲國琳子泰襲餘嗣襲無考炳

國朝軍機處檔
卷之三十三
付武四

洪 實恩騎尉世職未襲炳洪廣東新甯人由行伍洊擢香山協
左營把總因盜案奪職嘉慶十四年復拔是職秀邦合浦人由行
伍拔是職國琳魁雄俱欽州人國琳由行伍巡捕於汲水洋擊沈
盜船繼賊渠張萬清敘功以外委用嘉慶十四年補是職魁雄由
行伍洊升廣海寨守備緣事奪職嗣以巡緝出力給是銜鄭勇陸
豐人由行伍洊升是職國威新安人國威由行伍拔是職國泰歸
善人

右 國史館本傳

趕興 常山 福祿

嘉慶癸酉九月十五日午京南宋家莊教匪首林清謀爲不軌太監楊進忠等引清黨李五祝見等闖入宮禁余與諸王大臣聞變馳入神武門鎮國公奕瀨率火器營兵千餘入余督後兵自武英殿複道進有理藩院員外郎岳祥海蘭察之壻路遇余願從殺賊賊有迎拒者鑲藍旗護軍校常山以槍擊之墜御河山卽入河擒之余與之手絹以爲識眾愈踊躍時天已昏黑余念西華門爲賊突入之所恐其乘夜奪門出遂率兵數百屯門側義烈公慶祥亦率兵至慶固多才其營參領趕興爲滇中失節之德森保子亦勇健思幹父蠱因與余露宿馳道上十六日天始明南薰殿人報其

中有賊余率兵十數人入柵內余立土墩上指揮其眾有正紅旗
火器營護軍校福祿者冒險入擒數賊出賊有攀樹踰垣者亦爲
弁兵所獲至日落巡兵聞御書處石隙人語出呼兵入慶公命趕
與持刀直入余往拒其門賊出與鬪官兵擒捕凡二十四人首謀
之蘇拉亦與焉十七日忽傳上自燕郊回鑿逾時徧禁城皆知
之久之聲跡杳然蓋從逆獨石口都司曹倫之子福昌黨所爲也
余方假寐聞之不及著鞞趨出慶公曰事關艱鉅我等有守城責
不可擅離恐有他故余心是其言莊王率兵出巡九門歸人心稍
定晚間驟聞禁城外誼譁聲俄徧滿街巷言太平湖在城西已接
戰又云西長安門已破徧都城人聲沸騰科爾沁貝勒鄂爾哲依

聞有母喪聞變遂縗守神武門外紀律頗嚴俄有冠五品翎頂人
駛至云欲調官兵出禁城禦賊鄂詢之卽趨去又有騎白馬人沿
街傳呼有賊蓋卽福昌之黨羽期於是夜舉事者時大僚有欲啟
神武門出兵幸爲莊王所阻是夜余聞變亦愀然變色賴慶公撫
御士卒列隊以待命岳祥趕輿上城瞭望謂余曰此隊文武二員
殊可嘉也至夜半人聲漸息實無一賊焚掠可詫者是夜倡亂惟
擒曹福昌一人餘皆不爲究詰福昌臨刑時告劄子曰我是可交
之人至死不賣友以求生也

右錄宗室昭棟撰

新保

新保都拉喇氏滿洲鑲白旗人世居黑龍江乾隆五十六年廓爾喀賊匪擾後藏新保由領催隨將軍福康安勦辦攻克寨礮屢著戰績五十七年以收復濟隴敘功 賞戴藍翎嘉慶二年八月川陝楚教匪不靖 上命副都統烏爾圖納遜帥師赴楚協勦新保隸焉十一月襄陽白號首逆高均德由漢中偷渡漢江我兵分道馳勦殺賊千餘截賊入川旋駐川省甯羌堵禦三年七月高逆竄入川境合通江藍號首逆冉文偉據渠縣大神山新保隨參贊大臣德楞泰馳往攻擊大敗之賊欲竄營山官兵蹙之於黃渡河斃賊無算賊竄營山縣之箕山與巴州白號首逆羅其清合恃險拒

守時襄陽黃號首逆樊人傑太平黃號首逆龍紹周嘯聚鳳凰寺
與羅逆爲犄角大軍直前衝殺敗其眾十月進勦箕山克之十一
月敗賊於雙山子賊退據青觀山我兵兩路進擊燬其巢斃賊甚
眾尋追擒羅逆於方山坪四年正月冉文偉屯通江之麻壩寨官
兵乘夜圍攻擒其渠獲牛馬軍械無算七月各股匪竄楚大軍追
至竹山之大禾田痛殲之八月復敗之於紅坪以功補驍騎校五
年二月追勦冉逆夥匪於川境黃茅嶺擒線號賊目陳得俸箭殪
賊目冉添恆復克馬蹠岡擒賊目冉添元於陣四月襄陽白號首
逆張添倫等竄雒南之麻坪大軍自兩岔河進勦斬獲無算尋敗
之於黃柏岔捷入 賞換花翎六年正月移師入陝四月偵知襄

陽白號賊日高二馬五竄龍安之二郎壩我兵分伏荒耳山殲賊
三百餘復敗之於龍峒溝馬五就擒論功 賞庫爾庫巴圖魯名
號八年凱撤回旗升佐領九年擢副總管十五年授打牲總管十
七年 上幸木蘭舉行秋獮新保射虎一 賞副都統銜十八年
卒子訥謨慎驍騎校

右 國史館本傳

國朝通志卷之三十三

三

會榮

巫山 盧光國

林一枝

傅權陞

蔡馥香

邵窿

李定邦

詹茂山

會榮廣東新安人由行伍洊擢南澳鎮右營游擊署海門營參將
 嘉慶十九年出海巡緝於錢澳尖山外洋遇風淹歿 命照參將
 陣亡例賜卹廕雲騎尉世職子授綸襲先是十七年水師提標中
 營守備巫山以巡緝遭風歿於三竈洋面其後二十三年龍門協
 署右營把總林一枝額外外委蔡馥香遇風溺於南沙外洋二十
 四年陽江鎮右營額外外委邵窿遇風溺於南澎洋二十五年吳
 川營把總李定邦於南江頭洋面緝捕遇風海口協左營把總詹
 茂山海安營外委盧光國於徐聞洋面遇風海安營額外外委傅
 權陞於鑾墩洋面遇風俱淹歿先後事 聞山弟輝龍以千總用

定邦子鍾奇茂山弟紹忠以把總用餘皆 賜卹如例山廣東陸
豐人一枝權陞俱合浦人馥香欽州人隆電白人定邦光國俱吳
川人茂山瓊山人俱由行伍歷本職

右 國史館本傳

楊大壯

楊大壯字貞吉一字竹庵甘泉人昭武將軍之裔也以世襲起家官至安徽參將病卒回籍日讀古經注疏尤精於麻算律呂之學
右漢學師承記江藩撰

--	--	--	--	--	--	--	--	--	--	--

三ノ宮 西ノ宮 寺ノ宮 大ノ宮 中ノ宮 小ノ宮 東ノ宮

何文韜

何公名文韜號渭亭貴州施秉人父飛龍任台拱營參將公少而端凝好讀書嫻弓馬參將公年老公先意承歡以孝稱乾隆丁酉應武試舉於鄉效力鎮遠鎮標乾隆五十四年拔補上江協右哨把總上江民苗雜處漢奸多潛匿誘苗爲匪公倣陽明先生十家牌式就居民編甲乙書十戶丁口牌中每戶輪挂三日責以稽查事簡便而奸無所容巡方者見而嘉之飭州縣倣照辦理六十年調征鎮筸黑苗公從攻克鴨保天星貴魚石隆各險寨嘉慶二年黔省興義狝家苗傾巢爲變公奉檄從征水淹坪魯溝一帶苗巢要地大帥派協領保性率兵數千人分掘之紮卡倫十六公與焉

公領百人紮山包剗山四面令陡削如壁掘池蓄水於山頸路口植堅木爲柵部署甫畢會狎酋合數萬人蜂擁而來衝迤東八營同時皆陷次日苗架梁下撲西營公厲眾曰賊勢重壯士當死中求生否則胥成捨死無名令兵十人張旗幟空壘分餘兵作三疊三十人爲一層伏木柵中戒賊近百步槍礮始施放賊攻七營胥潰散直前撲公營不虞柵中伏銳師自午至酉槍斃礮轟死亡山積我兵未傷一人天且黑賊吹角拔隊走次日大帥親領兵來援行視戰地大驚異稱公勇健不異趙北平漢水拒魏師也公擒獲首逆王狀元拔授盤江汎千總五年領黔兵入川勦賊分隸七提軍麾下提軍激賞公甚遇賊勢重輒以屬公戰大橋水次左股受

才傷挫首逆張士龍前後殺賊千餘拔補鎮遠鎮右營守備未至
任升授陝西陝安城守都司當五六年間各元戎分途勦賊日追
逐百數十里山路險遠糧運不繼提軍得士心所帶川黔兵衣藍
縷跣足追賊風雪中氣彌厲提軍緣他事被劾分兵他隸士忿曰
我輩感軍門恩忍飢寒殺賊未蒙厚賞軍門今被議我輩義不他
屬張旗且分走公諭以大義反覆開導始收隊會經略威勇額侯
來視師各兵迎經略哭訴經略亦泣提軍事得白而心嘉公之能
義服眾也興安新兵多降匪頗獷悍經略慮其生事八年正月檄
公由軍營赴本任公馭新兵推誠布公訓導如家人父子軫其飢
寒時大禮米斗銀二兩公預辦兵糧按日支放兵不得食貴又買

營田收租課定津墊章程新兵大和輯十一年秋甯陝新兵王麻子蒲跛子等二百餘人倡亂各營蠢起興安新兵獨守義不動公之力也制軍檄公署甯陝中營游擊公單騎至甯陝眾軍見公至大喜公激以忠義皆矢殺賊自效十三年繼勇侯德制軍長撫軍方會奏移甯陝鎮安設漢中軍府初闕百務維新公偕南鄭令楊大坦繕兵房建衛署設教場武庫位置井井遇水旱先爲兵籌米穀規畫如興安時朔望講行軍紀律捐立義學訓兵家子弟著誠而行弁兵愛戴服教提軍楊公倚重如左右手十八年冬岐郿廂匪滋事總兵吳廷剛領重鎮兵勦賊萬五苦戰蓋屋甯陝閒另股吳抓抓由洋縣城固趨褒沔略陽沿途裹脅眾至數千鎮兵壯健

胥從征存老弱三四百人城洋褻告急賊焚掠至南鄭之新集火
光照郡城公偕守令勵兵壯張聲勢賊不敢犯事定長制軍奏
聞 賞戴花翎公積勞成病數請告楊提軍心憫公而念新營之
難得人也調公署畱壩營游擊俾少休息而公病卒不起以二十
二年六月十二日終於署享年六十有六漢中陝安兩鎮兵聞之
罔不哭兩鎮士民亦多泣下有子三人長應奎次應烜州吏目分
發直隸次應懋太學生讀書能文

論曰子宰洵陽始識公公被服儒素性寬和無急言遽色僚屬以
非禮干公坦懷待之四座皆古格言喜臨池工書有二王家法士
大夫挾縑素求書者盈門公應接無倦從容揮霍皆稱其意而去

史稱卓太傅犯而不校祭征虜雅歌投壺公其庶乎而臨大敵處
大事決策權奇赴義慷慨烈烈類古豪傑勇力振世守之以怯信
乎賢者之不可測歟

右傳嚴如煜撰

張永祥

嘉慶中阮芸臺協揆撫浙時海氛不靖有張永祥者英勇過人號張鐵槍協揆之治盜也多資其力後屠琴隲太守倬宰儀徵協揆以此人薦之故太守之緝捕有聲於江南

右筆記梁紹王撰

國家圖書館藏書

IFN

阿林布 許天元 張觀文

阿林布滿洲鑲黃旗人嘉慶時任乾州協副將勦城垣建戎署定營制置汛地規畫盡善卒營中立祠祀之時又有許天元孟津人任保靖營參將治軍嚴明有紀律營伍肅然遇征調尤有濟變才爲大府所推重後擢永州協副將張觀文連城人任鎮溪營游擊營地新城傾圮觀文領帑修葺工甫竣苗復叛觀文伏阮城外置火器苗夜至火發苗驚潰多墜阮死者自是不敢至境

右傳李元度撰

								111
--	--	--	--	--	--	--	--	-----

胡佐朝 李源玠

胡佐朝字珠峰湖南桃源人乾隆乙卯舉武鄉試第一嘉慶己未進士廣東羅定協守備領兵禦海寇身入重洋獲匪三十餘人散其黨事平 賞戴花翎引 見擢山東梁山營都司晉曹州游擊卒於官同時李源玠字君錫瀘溪武生乾隆乙卯春苗變總督畢沅莅辰州主軍事檄源玠率六堡團勇守洪水坳遇賊下竄辰州恃以無恐源玠嘗率百人巡上茅庵遇賊數千則先以五六十人分伏旁近山林爲疑兵而自督其餘逆戰甫交鋒賊見伏兵起恐合抄其後卽退走源玠追躡斬渠魁二人餘賊數百人論功保千總一日苜復分兩大隊出犯一攻縣城一攻洪水坳源玠憑高據

險堅拒一晝夜會武舉張尙林率鄉勇出賊後謀夾擊甫至而賊
退遂並追奔二十餘里斬馘無算而賊之攻城者聞洪水劫賊敗
亦舍去總兵袁敏追賊至潭溪被圍源玠聞卽馳援敏得脫出論
功擢守備嗣勅平當齊把天等砦又破賊於羊斌在事平借補提
標把總卽駐防邑城旋遷千總授左營守備凡二十餘年卒於任
源玠幼讀書通曉方略巡道傅爾辦善後事宜源玠上綏邊策數
千言多見施行

右傳李元度撰

丁永安

丁永安四川成都人乾隆六十年由行伍隨征苗疆歷拔建昌營把總嘉慶五年升梁萬營千總時三省教匪滋事永安隨經略額勒登保出師陝西追擊股匪伍金柱殲擒無算 賞戴藍翎六年升夔州協標右營守備七年五月偵聞逆匪苟文明由南溝竄入苟家溝永安偕守備馬起龍徒步入林奮力抄截七月匪眾竄花石巖老林我兵乘勝仰攻合力兜擒斬苟文明永安在事有功 賞換花翎八月殲淨苟逆股匪永安身先士卒敘功居最 命以都司升用九月補松潘鎮右營都司十二年升陝西鞏昌營游擊十三年軍政卓異 賞加一級十八年十月河南教匪李文成倡

亂陷滑縣城據之 上命陝甘總督那彥成率兵進勦那彥成檄
永安帶領陝西提標馬隊兵五百名固原精兵一千名來豫協勦
屢著戰績十二月升撫標中軍參將官兵圍滑城既久永安等潛
掘地道置地雷擊之城破殲其眾捷入 命以副將用先換頂帶
十九年正月陝西岐山縣三才峽饑民聚眾焚掠永安隨總兵吳
廷剛率兵勦撫賊目萬五竄入盤屋山內我兵乘夜夾擊追蹙至
寬溝地方設伏以捉其要賊勢窮蹙疊有斬獲事竣永安下部優
敘三月升甘肅金塔寺協副將二十一年丁母憂二十二年服闋
引 見發往甘肅以副將用二十三年補大通協副將二十五年
署涼州鎮總兵道光二年五月青海口外野番不靖永安率領官

兵入山搜捕悉就殲擒得 旨賞加總兵銜九月卒子世賢二品
廕生奏畱甘肅以千總用

右 國史館本傳

廣東省立第一師範學校

圖書部

黃廷珠

君諱廷珠字殿光姓黃氏其先安徽人曾祖成遷徐州宿遷縣祖以龍生仕忠仕忠三子君其長也自曾祖以下 贈如君官君起家行伍河督徐公分巡淮徐時陰識君稍擢至守備時裏河數潰決五年之中文武被議者七相國蔣公以爲非君不辦徐公聞之歎曰黃某才幹兩河無雙然此極弊區深爲憂之君受事數年卒無事嘉慶十七年河決睢入湖湖大漲剷七堡以洩旣築而圮數十丈大帥惶急面詢君君曰得半月保爲了之未期而完二十四年河大決蘭儀灌湖湖壩畢啟已而馬營壩潰黃流北徙湖不竭如盂水下若建瓴君築束清壩以資收蓄功尤鉅君敏果精物理

尤長治湖每豫河決而南必歸湖湖不支則潰過洩則竭潰病民竭病漕是二役微君幾殆道光三年遷淮揚游擊明年權參將又明年而有武家墩之役時奇寒西風大壯螿石崩泐君馳往湖陂雨下冰著體如鑄士卒無不一當百然猶旬日之中塞五壩檔內堵息浪庵缺口者四五幾獲濟泊大吏被罪去君例得罰猶畱工旋奉檄探海絲網濱風駛船驟從兵雨泣君神色自若六年春東河督張公奉命至當是時黃驕清懦禦壩不啟張疏力陳茹良口之議而節使琦善主開減壩張執議後不敢堅對依違其閒君兩陳其不可且言河北生靈百萬縱放河有功公何以堪之言甚危切卒弗聽既而委咎君落一官非其罪也復爲裏河守備臨湖

舊無石工公建議得請自嘉慶十三年裏河數十決君始居是職至是而告成前後幾二十年無蟻子之漏誰居君之力焉君天性孝友贈公疾未嘗解帶撫寡妹數十年如一日貧而好客客大至嘗除日召諸子前曰逋負了未對曰已辦君大笑曰飲酒故事同知官過境必齎銀物爲餽一無所受以是人皆笑君子女九人婚無顯者曰華族無再盛其達識雅致皆此類也配孫恭人佐君孝養雖產孽侍疾不衰總櫛泐頰皆親爲之撫君弟妹如同產生嫁女薄其匱曰毋使過諸姑蓋非是不足以配君之德君以道光十年六月二十五日卒年六十有四恭人先君三年卒男子子五人長斌東河縣丞候補通判次佩淮徐營游擊次宣從九品次戊安

徽南陵縣丞候補知縣次晉漕務千總候補守備女子子三人孫
四人以某年月日葬於某原自君歿之八年一同始獲交於君之
長子斌聞君事尤詳又七年而以狀來乞文其隧道之石表君之
風風於有位雖不文其敢辭銘曰

湖水清君則濬之湖水濁君則渠之既濬既渠既奠厥居是宜尸
之下相鬱鬱我公歸今之人兮公不來

右某傳魯一同撰

孟光爵

孟光爵字達軒湖南城步人初由行伍入武岡營以馬兵拔外委
乾隆六十年鎮草苗變光爵解餉至營從總督福甯勦賊衝鋒陷
陣不避危險補武岡營外委嘉慶元年從征湖北教匪苦戰數十
次斬賊甚眾生擒首逆覃加耀 賞戴藍翎四年擢永州鎮守備
賞換花翎十年升永州協都司十六年遷山西平垣營游擊又二
年以傷疾復發致仕仍給祿養時年四十八至六十六歲道光十
一年卒

右傳李元度撰

國朝書目考卷之二十一

三十一

蘇清阿

蘇清阿格吉拉氏滿洲正黃旗人嘉慶二十二年由護軍投藍翎侍衛道光元年升三等侍衛六年遷二等侍衛十二年揀發兩湖以參將用十五年八月湖廣總督訥爾經額疏言湖北襄陽隨州棗陽一帶與豫省南陽等處犬牙相錯民風犷悍向有搶匪成羣結黨搶劫販私前委揀發參將蘇清阿往來躡緝先後緝獲命盜各犯一百二十二名梟犯四十七名私鹽四萬八千餘斤匪徒聞風斂迹蘇清阿係候補人員冒署銜塞不避艱苦而約束兵丁尤爲嚴肅一載以來民情愛戴洵爲武職中不可多得之員應請賞加升銜以示鼓勵得旨以參將儘先補用仍下部優敘十月

補湖北撫標中軍參將十六年正月鎮守鎮兵丁鍾潮棟及練勇
滕嘉明等赴鎮道兩署挾借銀兩糾眾滋事蘇清阿奉派拏辦寓
居城外之傅公祠明查暗訪三月鍾潮棟怙惡懼罪糾同夥匪黎
明持刀進寓蘇清阿猝不及防被斫多傷尋卒事 聞 諭曰湖
北撫標中軍參將蘇清阿奉委訪拏滋事首犯慘遭毒害實堪憫
惻著照陣亡例賜卹尋 賜祭葬 賞雲騎尉世職子玉山襲授
監翎侍衛

右 國史館本傳

劉天保

劉天保河南睢州人也幼無賴習奔命法能閉氣行四十里始一喘雨隨其後不能及年二十販鹽山東界上與羣梟鬪解其魁一臂肩之行梟夥期復仇天保應期獨身往羣梟怪之拔刀出天保笑曰餓矣速具酒肉飽乃公解衣盤礴連盡數巨碗一人刃舉大嚙咤曰吞天保張口從刀尖上吞肉大嚼羣梟愕眙相率推排拜庭中請長其羣曰今日乃服公天保笑而起久之折節讀書應童子試督學使者疑其文擯之天保怒投牒試弓馬遂入武庠河南巡撫楊公國楨聞其名招置麾下爲材官連擒巨盜撤千里桴鼓累功至光州營都司道光二十一年英夷陷甯波天保慨然思一

甯大敵會兩江總督牛鑑檄天保守上海而揚威將軍奕經亦奏
調天保赴浙天保至浙見官兵不可用白幕府請回光州募健兒
五百人異軍特起當是時天保氣銳甚思生擒渠酋俾之返侵地
自贖奏而赦之沿海可保無事若徒爲甯波驅除非永靖海疆計
也吳祥爲甯波語聒門者入甯波裴小狗夜半躍城入與祥會畱
三日畫圖條列賊守狀取鼓樓上夷字書還以爲左驗小狗者息
縣滑賊吳祥者固始白役皆天保所遣也於是天保上狀將軍請
爲前鋒取甯波而將軍已於十月中潛結陸心蘭心蘭本倡家受
英夷官將軍亦賞心蘭花翎五品銜約夜半舉火獻城又用術者
言須五虎以次年正月二十八日始進兵五虎者年月日辰皆寅

領兵官亦寅命也軍中惟段帥永福寅命故以甯波委段帥而令天保與山東都司聶某取鎮海期久謀洩心蘭以情輸賊賊使心蘭給將軍不可舉礮將軍乃下令人攜刀繩各一有攜火器者按軍法以故軍覆段永福與三百人免選而天保隔六十里未之知天保所將鄉兵皆舊捻子中奇材劍客也練火器昇擡礮四十鳥銃百聶某以將軍令難之天保不得已置鎮海西十里廟中夜半抵西關候至黎明無火裴小猗登城瞰城內列銃如林喊曰鬼子有備語未絕而火銃及小猗跳免山東鄉兵遁天保令縛大石二千斤三百人舉之撞門門破而火銃排出天保率眾匿兩廂簷下相持未決趣使二百人取擡礮賊忽啟南門出數百人自西關外

夾攻之天保與眾登屋走至駱駝橋火器亦至列陣再戰追賊至城下人少不敢攻旋聞甯波敗信還於是將軍以敗賊入奏而令天保屯慈谿與參贊爲犄角參贊以非戰期火藥不時發無何賊大至天保飛騎告藥匠身發礮擊賊賊至山下有死者不敢上天保亦不敢連擊持拒閒飛騎還白參贊全軍去矣眾遂潰二月初四日也天保嘗言賊大礮無準不足畏足畏者連環排銃也然銃五發必熱須冷再用而五百人故善避銃望煙則伏聞響則起無一傷者天保好讀書終日靜坐長鬚偉然下筆灑灑數千言立就待士卒如子弟人樂爲死嘗從余問漢書十志三誦無不熟者其論將貴賤曰賡出於識識出於學不讀書惡得爲名將哉升參將

病免卒不獲一效以道光二十四年卒於家余訪其月日不詳軼
事尙多因据所知者書之俟得其狀再補爲傳

右書事蔣湘南撰

彭宏澍

彭宏澍字海泉永順土司也順治四年甯南大將軍恭順王孔有德臨辰州宏澍遣使獻輿圖投誠八年高李餘黨偏境宏澍簡兵遊擊賊夜遁十三年經略洪承疇以永順久經投誠請給印信詔從之並加太保 賞坐蟒等物

右傳李元度撰

234 11

11

172 - 086

彭廷椿

彭廷椿字梁卿永順土司也元錦季弟元鉦子初土司彭允植立不以次廷椿父子恐爲所基遠避桑植數月允植卒土舍把等乃迎歸立之吳逆踞湖南廷椿領勁兵三千屯王邨控賊上游由高望抵辰州游騎駱驛賊不敢犯吳逆平廷椿率先投誠並獻雷公嘴鐵廠等地事 聞 頒給印信嗣因采木助工加十級

右傳李元度撰

國朝詩林卷之三十四

李

唐宗聖 向鼎暹 張文儒

唐宗聖湖南桑植人土經歷也雍正初土司向國棟殺兄國柱而奪其官殘忍嗜殺民不堪其虐宗聖數規諫不聽四年宗聖與向朝先國佐國柄國梓等閒出赴湖北訴請改土歸流總督傅敏入奏五年 詔追繳國棟印篆安置於河南分其地爲十四里改設縣宗聖等羈武昌年餘至是始歸國佐土知州國柄國梓國棟弟也傅敏爲奏請並授把總職同邑向鼎暹下峒土司良佐從弟也舊爲土司副印沈深有幹略鄰司懾服之不敢攻抄其境設縣後歷三十年足不入城市耄猶嗜學矜恤困窮所在周洽鄉人呼爲生佛張文儒亦桑植人舊爲茅岡司土千總所轄苦竹河等地軍

民錯處往往兩不相能易滋爭擾文儒綏御有方皆安輯無事改
土後請以其地歸桑植平生器宇和易有儒雅之風

右傳李元度撰

楊自唐 子大業

公諱自唐字翊清姓楊四川天全宣慰使也客死南昌旅邸十餘年不克葬其子老且貧號泣於人無或助者既賣一宅乃得以乾隆八年五月葬於南昌東郊桃花塘天全爲蜀後戶西通西壩烏思北徑董卜韓胡吐番雜種中有三關險隘諸夷出入貢道所由經自漢以來屬楊氏稱外藩若古諸侯相傳以及於公蓋已數十世矣天全在萬里外風聲渺茫而楊氏世有其地控制夷落以擁護中國更千餘歲不衰至公而始絕公先世太原漢赤泉侯楊喜之裔元封中從將軍郭昌討定西南夷畱守靈關沈黎諸道及後漢有逢從武侯平南詔有功授封食其土歷魏晉至唐爲靈關道

世襲刺史宋爲瑯門安撫使入元易靈關曰天全遂以可大爲天全招討使明允忠晉廣漢帥愷以平巖州雜番克西蠻詔入覲愈以從軍戰死於播州贈宣慰使崇禎末張獻忠陷蜀之明以義師率進士朱倬伊舉人鄭延爵戰沒及順治壬辰常以天全歸命授都督僉事能輯其界內衛越數歲先桂襲職於公爲父其後以公功 贈榮祿大夫方大夫受襲獻黨高承恩與郝承裔兵躡始陽將壓境大夫遣壯士力禦大敗之賊悉入數戰不支退守巖砥關關潰太公逸深箐中李太母已爲賊俘大夫仰天嘆曰本欲取魚通三十六種滅此賊今休矣遂折弓示邱夫人反走求太公及隘遇賊與馬擁去當是時邱夫人有孕侍李太母羈雅州寺數月

公生於寺中先夜有婢夢大木僵臥於庭有龍縈之蠕蠕然木漸立少復旋旋下木僵如故越日乃生公公少翹邁六七齡喜馬射大夫爲小鞍鞵使服大羝部中兒亦執鞞其羯以從嬉公指示羣兒悉有部伍見者驚以爲異稍長益豪舉自任日召麾下健卒射獵平林峻麓大言曰男子自奇耳斗大印於我取之奚爲賊賊促促老死窮塞爲眾皆躍起比公襲以所居邊陲當扞蔽唯簡練士卒精繕芻糗優遊坐鎮以待有用嘗用兵韓胡六邨與沃酋呢嘛乾參戰於鐵圍又自烏思萬里致朗札子卒定董卜韓胡嗣邊夷震服西墟在瀘河西荒蠻雜處其大者號稱鍋莊莊皆自雄分統百數碉樓率不相下唯明正一莊內附得授符調康熙庚辰黃帽

喇嘛與紅帽喇嘛以相爭擊死明正遂入寇掩殺戍兵渡瀘謁岳州州堡爲內外之交於天全相屬時大雪大師出征公率死士出岳遇賊於火草坪奮雪力戰斬其魁賊大挫巴復營上渡夜半銜枚奪龍豬關及達岡岡頂木石危巖一徑蜿蜒而上蟻援及半遇機發木石聲如雷益奮厲直上躋其巔掀帳舉旗賊遁去逐北數十里至壚明正妻工哈率部來迎官兵亦集各分校進略木鴉而還慰撫壚蠻安堵如故西壚復是役也公功最著 命下授宣慰使 封榮祿大夫從軍 賞給有差丁酉 王師將有事西藏調千夫轉粟於松茂公命嗣子大業督餉不輟至庚子兵大進諸道並出公簡閱其眾以半從大軍出塞兼護戰馬及藏以半餉瀘河

饒凡二路西自灌縣歷汶川威州保縣茂州而峙積於松潘南自
雅州歷榮經縣小相嶺飛越嶺而峙積於瀘定橋其徑崎嶇人日
五斗往復肩負雨暘風雪晝夜不得息疲弱者率不繼更番補益
又多瘴疫死傷火酒藥精力於自進乃克濟凡五歲西藏平當是
時屯戍萬里調遣如雲西蜀當其衝力役轉輸相屬不絕公力爲
多天全舊有茶徭又有官山雜稅能苦民公悉汰去閒居飲酒賦
詩拓落不羈卽窮荒能以文章與士大夫相往復京師聞名人多
稱道之及雍正丁未川陝總督岳某召公入成都三日收印綬十
日出羈梵刹待命且不測公恬然退聽神色自若天全父老來唁
公曰吾世祿已遠苟無以用自不能長爲邛雅守戶之犬君輩無

爲我念其善事後人先是粵西泗城及滇迤東威遠阿迷迤西鄧川迤南烏蒙悉以故改土黔楚秦隴亦然於是岳請蜀邊世土應從例爲郡縣天全亦在譴中故有是役明年安置公於江西之南昌冬十月乃自萬里橋買舟出峽公有女適徐氏者自臨邛攜持至新津江口候七日見公哭曰何爲至此邪其焉逝邪母有墓在青溪吾未死吾尙埽祀之語畢抱公哭兩弟侍旁大哭舟中人皆哭兩岸不忍聞公默然良久乃別去自蜀如楚凡三月及江夏時大風雪登黃鶴樓西望顧謂二子曰江流其遂南乎吾不復矣命取黃柑酒痛飲數日夜遂得疾不下食至南昌四十餘日竟卒楊氏系可考者元可大傳管管傳嘉始嘉始傳樂魯樂魯傳藏璞藏

瑛傳允忠允忠傳欽欽及璽璽傳顯昭顯昭傳懷懷及愷愷傳文
全文全傳方方傳世仁世仁傳泰泰及合合及愈愈傳時和時和
傳之鼎之鼎及之明之明絕常以序襲焉常爲愷之裔愷攝政十
二年授文全愷生子文忠文忠生鼎鼎生世珊世珊生詔詔生時
輝時輝生都督常常生大夫先桂都督夫人李氏大夫夫人邱氏
並以公 贈初大夫羈雅州時郝承裔於賊有隙大夫乃令其客
聳承裔殺賊以降已而承裔復叛大夫急遣使馳聞密發精銳破
賊於蘆山復於紫石關擒其兵將高思宸等十七人賊遂潰其後
墟蠻燒掠沈村猴子坡大夫躬率兵討定及大將軍趙良棟興師
伐吳逆大夫發勁卒出雅黎窅路潛斷其後逆不得逸事聞 賜

一品服色蓋自逢受胙以來累世立功能順時向風得以自固至公父子閒功尤盛褒崇顯榮軼於前代而祀竟覆公生於順治己亥以雍正己酉三月二十二日卒娶招討使高一柱女 封夫人子二長曰大業原襲宣慰使次日振業原授都司女二適臨邛貢士徐陶麟榮經諸生程業孫三壑壑屋曾孫鶴毓鶴年天全故屬天末專戎備不治文史公獨積書嗜學教其二子二子卒以詩鳴屋又有才爲東南佳士至今稱楊氏者以文章世其家可謂盛矣人皆以爲其氣盡故不土食謨獨謂諸邊土其同楊氏以徙者二十餘家而楊氏獨能如此蓋亦幸甚公仲子於謨有交以公行述走書幣數百里徵謨銘謨蓋嘗讀其靈和志而知風土世襲甚詳

者故不敢辭而爲之銘銘曰

西梁和夷禹跡所揜沫水漂疾溷崖絕險遐矣靈關相如始通朝
貢古道煙雨蒙龍楊侯佐蜀厥有藩籬田田相承中土是維渡瀘
不毛蠻種實荒唯此瑯門乃規其吭羅岳據要火井沈熒度索尋
檀熟戶夜扁諸番獻豚賚以香茶舉手於額歡呼薜翁桓桓大夫
克忠克武殲厥逆醜庶保茲土逮公之季勗屬戎馬拓我邊疆曰
錫純嘏旣耄旣倦適彼南國岳陽廢餐遂以不克豫章之野風寒
雨苦荒茅所覆公其永主

右墓誌銘盛大謨撰

樸大業

楊君富文諱大業四川天全宣慰使自唐公冢子也其地先世受封於漢母高氏招討使一柱之女 封夫人楊與高皆邊陲楊司牘門高司始陽若古荒服寓兵於農其民善戰習知西北情形夷險又土著田屋妻子相保有警則出死力以禦故能世食其土擅生殺予奪之權聽命於中國而二司地犬牙入數爭功構累一柱父子尤喜事益連禍累歲不得息卒以沈覆君生於始陽有奇質高司熟視久之曰楊氏乃有此兒稍長與母弟都司振業爲學不假師承岸然自異嘗讀兵書有所進退損益類爲要妙之言皆可用霍邱都尉李石能兵尤精劉綖袖箭及徐達賈力法以氣雄人無當意乃獨喜君君故善射射百步外紙鳶數射數中鳶壞不

可射與諸將校射立馬上手十石弓左右射急不得瞬霍邱壯之
遂盡以傳君而君雍容弟兄聞文章揖讓彬彬若儒素高司益忌
之蠻司木坪朗結亂死亂無主高招討與沃日司謀妄襲蠻益亂
朗結亂有子雍中七立已入烏思爲喇嘛君曰繼絕義也亂其襲
何以靖邊土請於宣慰以千金使壯士往取之而高招討已別誘
蠻司瓦寺坦朋吉卜弟踞木坪鐵圍以襲請於是 上命中貴人
來定襲宣慰及招討皆如成都比宣慰行一柱乃陰令沃日瓦寺
兵襲礮門時君守礮門方年少有選卒以高謀告君不爲意日設
酒饗文武吏聚飲爲樂左右輟洞開高氏飭蠻兵入境犯邊吏吏
醉不禁高乃夜揚旆出女騎導沃日瓦寺兵鳴角以進圍其署斬

門爭入大索良久縛一爨婢出白首伏階下言長公子奉夫人登
岩盡室去三日矣既火發爭出金鼓聲四起鄉兵雲集矢如注馳
突掩擊高軍自亂沃日瓦寺傷北高氏大慚岩壁立危險四山懸
絕中劈一徑委蛇上人不及盤旋高氏率精兵尾沃日瓦寺軍圍
其砦力攻之久不能升食且盡又恐鄉兵益至軍中乃夜驚數擾
亂而蠻俗畏雷聞雷聲則披襦禴走雨淋漓大呼逐之聲已乃止
君居砦與弟都司飲酒賦詩歌聲震空谷上下草木錚錚然又領
將較射中的的墮一軍歡呼會風雨沃日瓦寺蠻聞之以爲雷皆
驚呼散走及數月木坪襲定君乃振旅還闕門天全古靈關西北
通諸夷出入所由經軍輸力役旁午待命西墟兵起宣慰以先鋒

扼岳州君畱守治軍糧竟日夜不息及王師將征西藏諸道飛
輓如雲君督輸其間與士卒同辛苦一飢寒見星光吹角輒起所
過肅然有秋毫犯者箭貫耳前行一軍震懾無敢亂諸道糧或坐
愆期高招討卒皆驕頑數鼓譟而君輸先至高氏卒有醉而譁散
走君請以令箭追之誅一二人慰其眾糧以濟糧道多高山艱林
俗雜番獠氣候失常遇大風雖盛暑披重絮栗栗然天蚤莫不可
知多毒霧人不酒則道僵或墮手足指而礮門卒無寒凍道死凡
數歲西藏平役乃罷邊司襲以嫡傳君初取侯孺人無子高招討
一柱死若璠立若璠亦側室子都司以請乃聘唐貢士女生屋高
氏既數仇害又疾君有才幸其無傳以爲慶及屋生宜慰大喜屋

生六年宣慰乃南遷時天全思延鄉有叛吏高廷仁者殺人宣慰
緩其死高司陰誘廷仁以黃金牛酒餌思延民揭竿訟宣慰而若
璠亦出金結死士力撼之以聞已按其事不實招討亦坐訟落職
上方以邊土當隸郡縣宣慰及招討者如例安置江西宣慰有二
子君長都司其次也都司征壚有功善詩與君酬詠甚盛君尤富
所著有文集五十卷天全之有文蓋自君兄弟始天全以戰守世
其功爲中國藩衛中國聽其自治已千有餘年君負才恢奇思欲
以自效卒禍於高氏沈離播遷怏怏無所用竟鬱悒死君自南遷
絕口不言邊事閒語屋曰往與朗結虬子夜坐酒半侍者進燭燭
滅忽忽有光如電雍中七立呼吾出袖箭中其光隙燭至吏兵環

集無所得地下血如豆箭乃著東牖上則高氏刺客也君原襲天
全宣慰使以雍正乙巳閏九月五日卒葬於某山年六十一嫡配
侯氏雅州騎尉王選之女筵室唐氏茂州貢士雍女子一屋南昌
府學生取危氏孫一蜀年君死屋尙幼及屋爲子門人以都司命
具狀乞予銘于讀君詩蓋奇傑人也銘曰

以君之欽奇英磊又有其地而止於此豈非命也而君固長於諷
詠悲愉失得勃然於中若不能以已讀其詩於以知其所有也噫

台墓誌銘盛大謨撰

國朝耆獻類徵初編卷三百三十一目錄

忠義一

特音珠 阿巴泰等

阿蘭珠

佟養正 子佟豐年

席爾泰 朗格等

滿達理 西佛等

納爾察

達音布 子岱袞

穆克譚

勞漢 尹布等

覺羅拜山 子顧納岱
孫莫洛渾

覺羅鄂博惠

覺羅阿賚

綽和諾

卓納 子羅洛
多貝等

納海 塔納略等

努三 和托諾等

巴篤理

固山 信錫等

黃廷元 弟廷儒

廷柏

納密達 炳山等

書甯阿 慈濟泰等

阿爾休 穆虎等

國朝詩林卷之三十一

十一

國朝耆獻類徵初編卷三百三十一

通奉大夫前署江西巡撫江西布政使司布政使湘陰李桓輯

忠義一

特音珠 阿巴泰等

特音珠滿洲鑲藍旗人姓完顏 國初偕阿巴泰來歸阿巴泰姓
覺爾察屬滿洲正白旗 太祖高皇帝始編佐領以特音珠兼管
六佐領事設扎爾固齊十人阿巴泰預焉乙未年特音珠從額駙
揚古利征輝發部奪塔思哈橋掌燾士中礮仆佐領五岱代舉燾
前傳城爲飛石所中歿於陣額駙托柏佐領和羅俱戰歿特音珠
先登克其多壁城授騎都尉世職己亥年從征哈達城上矢石如

兩佐領耶陳奮勇登被戕特音珠在事有功庚戌年阿巴泰從內
大臣額亦都招撫東海窩集部之那木都祿綏芬甯古塔尺瑪察
四路降其長康古哩等復取雅蘭路阿巴泰力戰陣亡辛亥年特
音珠從揚古利攻呼爾哈路扎庫塔城三等待衛貝和佐領貴三
松阿里戰歿特音珠負創戰益力三等待衛阿達海先登克其城
阿達海額亦都第五子也癸丑年烏拉貝勒布占泰負恩叛大兵
討之布占泰率兵三萬由富哈城而東特音珠阿達海率護衛業
中額等邀擊之阿達海業中額及閒散米拉渾均歿於陣大兵敗
布占泰遂平烏拉國特音珠授副都統尋以創發卒師旋議卹特
音珠子多貝襲騎都尉世職多貝自有傳阿巴泰子新泰襲騎都

尉世職天命六年從大兵攻遼陽有功授輕車都尉旋擢護軍統領十一年從攻甯遠戰歿子葛思海襲職和羅滿洲鑲白旗人姓伊爾根覺羅 贈雲騎尉孫鄂錫襲五岱滿洲正白旗人孫瑚什塔爾任七品官托柏滿洲正白旗人姓他塔喇贈廕無考耶陳滿洲正白旗人姓舒穆魯從征鴻石薩爾巴有功 贈三等輕車都尉從子沙渾襲貝和滿洲鑲白旗人姓墨爾哲勒 贈雲騎尉孫布爾泰襲貴三滿洲正黃旗人姓哲爾德 贈騎都尉子福達理襲松阿里滿洲正黃旗人姓興嘉子鄂能以軍功授騎都尉世職什至奉天將軍阿達海子阿哈尼堪襲佐領世職擢護軍參領崇德三年從攻中後所擊明兵歿於陣業中額滿洲鑲黃旗人姓瓜

皇朝通志卷之三十三

勒佳孫哈實戶自有傳米拉渾滿洲鑲紅旗人姓棟鄂 贈雲騎尉

右 國史館本傳

阿蘭珠

阿蘭珠先世居棟鄂以地爲姓父阿格巴顏初與兄對齊巴顏並爲屯長 太祖高皇帝征杭佳城時阿格巴顏適在城中守城者爲阿格巴顏之妻父屬其助已拒守阿格巴顏不可曰以德誅亂宜也吾安能助亂而拒有德乎尋同對齊巴顏各率所屬來歸隸滿洲鑲紅旗授對齊巴顏之子噶爾瑚濟及阿蘭珠皆爲佐領分轄所屬阿蘭珠旋擢理事大臣從征烏拉布占泰直前衝擊中創且傷馬下馬步戰弗稍卻遂歿於陣 太宗文皇帝天聰八年 于三等輕車都尉世職以其弟布爾堪襲布爾堪初任佐領尋兼參領天聰四年同參領武賚哈甯阿等奉 命率精兵百人略明邊境

國朝通志卷之三十三
生擒間諜三人馳獻復渡大凌河斬級四十餘俘獲百六十人八年重定各佐領所屬人戶以新附瑚爾哈百人增蘇布爾塔尋駐防牛莊追獲蒙古逃人晉世職爲二等輕車都尉崇德元年卒以兄之子坦泰襲坦泰卒子圖哩襲三遇 恩詔晉世職至三等男順治十三年 世祖章皇帝追敘 太祖朝據忠效力著績行閒諸臣視一品大臣例 賜諡立碑阿蘭珠與焉諡曰順毅

右 國史館本傳

佟養正 子佟豐年

佟養正遼東人其先爲滿洲世居佟佳以地爲氏祖達爾哈齊以貿易寓居開原繼遷撫順遂家焉天命初佟養正有從弟佟養性輸誠太祖高皇帝於是大軍征明克撫順佟養正遂挈家併族屬來歸隸漢軍六年從征遼陽以功授三等輕車都尉世職奉命駐守朝鮮界之鎮江城時城守中軍陳良策潛通明將毛文龍詐令謀者稱兵至各堡皆呼謀城中大驚良策乘亂據城叛佟養正被執不屈死之長子佟豐年並從者六十人俱被害 詔以次子佟圖賴襲世職

右 國史館本傳

席爾泰 朗格等

席爾泰滿洲正白旗人姓棟鄂父綸布 國初率四百人來歸
賜名魯克素編佐領使席爾泰統之席爾泰從征數有功授輕車
都尉世職預十六大臣之列其同族有朗格者屬鑲紅旗亦以佐
領累立戰功授騎都尉明都司毛文龍寤撫順席爾泰朗格擊卻
之天命六年偕騎都尉瑪爾圖防禦綽納雲騎尉巴雅爾圖從征
瀋陽克其城明兵敗走追擊之渾河席爾泰朗格先登均歿於陣
巴雅爾圖從大兵攻遼陽奪其橋克之授騎都尉世職時遼陽瀕
海居民多逃島中文龍籠絡其民爲兵分布哨船據皮島明授文
龍總兵以皮島爲重鎮時窺我邊界鎮江城軍陳良策潛通文

龍令別堡之民詐稱文龍兵至大譟城中驚擾良策乘亂執城守
遊擊佟養正及領催佟恆年鴨綠江守堡官高守官報附文龍養
正自有傳恆年守官俱不屈死之 上命遷鎮江沿海居民於內
地遷金州民於復州文龍失援戰輒敗七年大兵攻廣甯筆帖式
書穆魯戰歿於沙嶺明巡撫王化貞棄城遁師大潰十年大兵攻
錦州瑪爾圖及護軍參領翁克力戰歿於陣十一年圍甯遠明檄
文龍赴援不至監軍道袁崇煥設城守巴雅爾圖率士卒攻城天
寒土凍鑿城已穿而不禦崇煥發西洋巨礮傷我軍巴雅爾圖及
綽納俱歿師旋席爾泰之妻違禁屠馬祭夫例當死其兄席漢求
削世職贖罪 允之子拉都由軍校從征崇德五年擊敗杏山援

兵七年戰於松山有功進攻甯遠陣亡 贈騎都尉弟巴都襲明
格 贈三等輕車都尉子棟世祿襲瑪爾圖滿洲鑲白旗人姓扎
庫塔子烏庫禮襲騎都尉世職巴雅爾圖滿洲正黃旗人姓伊爾
根覺羅子阿賽襲綽納滿洲鑲紅旗人書穆魯滿洲正黃旗人姓
瓜勒佳翁克滿洲正白旗包衣佟恆年正藍旗漢軍 贈騎都尉
從子國坤襲高守官鑲黃旗漢軍 贈騎都尉子題名襲

右 國史館本傳

滿達理 西佛等

滿達理滿洲正黃旗人姓納蘭世居布顏舒護得任佐領天命六年偕參領西佛隨額駙揚古利攻瀋陽明總兵陳策以川兵二萬渡渾河來援長矛大刀鎧冑重鎬氣甚銳西佛先登歿於陣滿達理繼進鏖戰久之策大敗明總兵李秉誠率三千人守奉集堡以兵來襲三等輕車都尉彥布禮布哈佐領廷都聞散旺格俱戰歿秉誠敗走追至河橋聞散菴扎齊巴彥陣亡明將效死者無算諸援師悉潰揚古利令滿達理與驍騎校回三先登遂克瀋陽旋隨揚古利攻遼陽明經略袁應泰急注太子河水於隍閉西關環城列守具我兵至軍其城東南秉誠暨總兵侯世祿以兵五萬出城

五里而陣擊走之佐領岱蒙阿陣亡明兵三萬出東門外力拒槍礮齊發回三戰歿我軍奪橋進從小西門緣梯登城遂拔之滿達理歿於陣子舒書襲騎都尉世職西佛滿洲正白旗人姓他塔喇贈騎都尉子禪泰襲彥布禮滿洲鑲藍旗人姓瓜勒佳世居瓦爾喀初任佐領兼騎都尉屢立戰功 贈二等輕車都尉子葉勒慎襲布哈滿洲正藍旗人姓舒穆魯由佐領累立功授三等輕車都尉子華善襲旺格孫扎齊巴彥俱滿洲鑲紅旗人姓棟鄂旺格贈騎都尉子哈爾薩襲孫扎齊巴彥 贈三等輕車都尉子阿勒東阿襲廷都姓錫克特哩岱蒙阿姓賴布俱滿洲正黃旗人無襲回三滿洲鑲紅旗人姓瓜勒佳 贈雲騎尉子珠瓦尼襲

右 國史館本傳

國史館本傳

納爾察

納爾察姓鈕祜祿氏世居蘇克蘇呼河之安圖 國初來歸授騎
都尉世職隸滿洲鑲紅旗後改隸滿洲鑲黃旗戊申歲從 太祖
高皇帝征烏喇攻伊罕阿林城先登克之由參領擢副都統列十
六大臣後攻沙嶺不待大軍獨進歿於陣以長子佛索里襲騎都
尉順治十二年 世祖章皇帝追念納爾察宜力行閒著有勞績
衝冒鋒鏑盡瘁捐軀 特賜諡端壯視一品大臣例立碑墓道次
子瑚沙初任佐領 太宗文皇帝天聰六年從征明入大同與前
鋒參領圖魯什等偵敵遇敵四百人瑚沙彎弓躍馬馳入陣敵皆
披靡略地至崞縣屢擊敗敵眾崇德三年隨貝勒岳託征明同參

領鼇拜先驅遇明騎兵三百突出搏戰以八騎擊卻之復率左翼前鋒兵過燕京界山東明總兵黃某及太監高起潛率眾來拒瑚沙同佐領羅什等連戰皆捷追北數十里先是佛索里以不勝任革世職至是命瑚沙襲父騎都尉職任前鋒參領六年從征錦州轉戰松山杏山閒屢有斬獲七年加一雲騎尉世職是年十月貝勒阿巴泰征明上命瑚沙隨右翼大軍行俟入邊還報軍事十一月大軍入界嶺口屢敗敵瑚沙還奏明年春同前鋒統領勞山等率兵九十赴界嶺口偵迎大軍俘獲敵卒無算順治元年四月隨睿親王多爾袞征流賊李自成率本旗前鋒敗賊將唐通於一片石追擊自成至望都與前鋒統領席特庫誘賊來戰夾擊

破之六月同都統葉臣征山西至汾州同參領道喇圖爾賽等破賊將白輝兵二千隨英親王阿濟格征陝西攻克綏德州及延安府有佐領哈爾漢俄班駐守南山爲賊所襲戰歿瑚沙率數騎突入取屍以還會白成奔湖廣追勦至安陸府擊敗賊將邵章獲其船東至九江口與席特庫率前鋒二十人破賊營追敗之於九宮山復同參領蘇拜希爾根捕勦賊黨斬首二千餘級是年敘功晉世職三等輕車都尉三年隨肅親王豪格征流賊張獻忠過漢中擊敗叛鎮賀珍兵獻忠自西充引眾迎戰瑚沙奮擊敗之五年敘功晉二等輕車都尉六年隨鄭親王濟爾哈朗征湖南時明桂王朱由榔據廣西其總督何騰蛟守湘潭我兵旣克長沙渡江攻之

前鋒兵薄城敵分三門出戰瑚沙與席特庫破其城西生擒騰蛟
 敵潰散遂下湘潭於是衡州寶慶永州辰州諸郡縣以次攻克遇
 恩詔晉爵為二等男九年九月擢鑲黃旗蒙古副都統奉 命同
 學士蘇納海往朝鮮鞫獄十一年兼任工部侍郎明年擢本旗蒙
 古都統列議政大臣十五年隨信郡王多尼征雲南十六年追勦
 明桂王朱由榔於永昌十七年凱旋以永昌初下時弗畱兵守門
 聽軍士入城擾民降爵為三等男康熙三年卒 賜祭葬分世職
 為二以第五子瑚彌圖襲一等輕車都尉次子碩伯海襲騎都尉

右 國史館本傳

按沙嶺之戰在天命七年見忠義二薩蘇喀傳

達音布 子岱麥

達音布姓他塔喇氏世居扎庫木天命三年來歸隸滿洲正白旗任佐領隨太祖高皇帝征伐輒爲前鋒多所斬獲授騎都尉世職時諸部歸順者爲蒙古所誘致逃去達音布同副都統楞額禮率兵追至達岱塔敗蒙古步騎兵俘獲逃人無算六年太祖親統兵征明奉集堡達音布先驅擒斬謀卒擊敗敵眾果功晉三等輕車都尉先是蒙古扎魯特貝勒昂安執我使臣送葉赫爲所害又數遣兵虜劫我使奪牲畜八年太祖命貝勒阿巴泰等統兵三千往征之時達音布任前鋒統領率精銳五十人乘夜渡遼河縱兵疾趨先至厄爾格勒知爲昂安所屬地遂馳百餘里與參領

雅希禪侍衛博爾晉合兵進攻搆其巢昂安以二十餘人挽牛車載妻子遁達音布與雅希禪等引三十餘騎疾馳躡昂安及之騎士皆環立昂安直趨達音布迎擊昂安敗走達音布彎弓注矢將射之昂安從者猝以小槍迎刺達音布中口墮馬創甚而歿雅希禪等縱騎擊之斬昂安盡殲其眾師還命以所俘獲分賞從征將士恩卹陣亡者以達音布長子阿哈尼堪襲職卒無嗣天聰八年太宗文皇帝追錄勳臣賜敕復以達音布次子阿濟格尼堪襲別有傳三子岱袞累從征伐授一等侍衛崇德二年從圍錦州攻明總督洪承疇第三營力戰陣亡卹贈騎都尉世職子伊密遜襲

右 國史館本傳

國史館本傳

三

Table with 10 columns and 10 rows. The rightmost column contains the number '111'. The table is mostly empty.

									111

穆克譚

穆克譚姓戴佳氏世居哈達之杭澗後隸滿洲鑲藍旗方 太祖
高皇帝未滅哈達穆克譚隨父率眾來歸授佐領屢從征伐所向
陷陣先登 賜巴圖魯號初在河可色之叛歸哈達也穆克譚同
父及兄追之父兄俱歿於陣從子厄爾諾亦叛往哈達穆克譚單
騎追斬之天命元年同諸利征瓦爾喀孟庫噶哈進戰敗走舒賽
阿爾虎達幾被擒穆克譚與燕布里等八人衝入敵陣敵眾披靡
遂救之出師還 太祖治孟庫噶哈罪盡奪其所獲以 賜穆克
譚六年從征明耀州奮勇登城克之尋奉 命駐防耀州有蒙古
人叛去我兵追之與戰不利穆克譚策馬直前衝突大呼刺殺首

逃者海色餘皆潰散敘功授二等男世襲 太宗文皇帝卽位擢居十六大臣之列理鑲藍旗事天聰元年四月隨征朝鮮有功六月阿達海等叛歸明大貝勒阿敏乘夜追之穆克譚以矢射阿達海阿達海接戰刃斫穆克譚穆克譚以本旗兵隨宗室偏古圍城西南敵兵出城挑戰穆克譚率先徑抵城濠舍騎步戰欲迫敵追入壕城上礮矢齊發敵兵復出奮擊力戰歿於陣 太宗聞之曰我舊臣陣亡殊爲可惜 贈一等男世襲順治十二年追諡忠勇立碑墓道子愛音塔木襲爵別有傳次子溫察官郎中兼佐領第三子那桑阿任五品官以軍功授雲騎尉世職

右 國史館本傳

按穆克譚公名譚一作坦

勞漢 尹布等

勞漢滿洲正藍旗人姓他塔喇世居扎庫木 國初來歸從攻撫順以第一人先登克其城授佐領旋偕筆帖式尹布閒散球從征額黑庫倫有功尋征烏拉球隨阿蘭珠等下馬步戰所向無當其鋒者明總兵毛文龍遣部將率千餘人潛犯我汛地勞漢球率騎十八步卒二十邀擊殲之球追逃人至敖漢及之同葉臣大破其眾同雍舜等攻旅順口麾眾進遂取之球授騎都尉勞漢得 賚賚天聰元年勞漢及佐領固吉納孟健從征朝鮮攻義州副都統西達爾翰衝陣流矢傷目猶手刃數人始仆勞漢夜登城戰歿二年大兵征瓦爾喀什孟健先登歿於陣四年大兵征葉赫固吉納

奮勇陷陣被戕八年球尹布追勦索倫部之喀木尼哈葉雷多斬
獲九年球加一雲騎尉崇德二年尹布授雲騎尉三年尹布隨貝
勒岳託征明攻望都穴其城克之四年尹布晉世職爲騎都尉從
都統索海薩穆什征黑龍江獲三十餘人復隨副都統羅濟進擊
杜俄兵羅濟中創歿尹布援之亦歿於陣六年球從大兵攻錦
州松山杏山城明總督洪承疇遣兵六千夜犯我營球力戰陣亡
勞漢 贈騎都尉子薩喇奇襲尹布滿洲鑲紅旗人姓甯古塔子
宜爾特赫襲騎都尉世職球滿洲鑲紅旗人姓棟鄂固吉納與球
同旗姓洪鄂球弟糾禪固吉納弟伊勒穆並襲騎都尉世職孟健
滿洲鑲藍旗人姓戴佳西達爾翰滿洲人入漢軍正白旗羅濟滿

洲鑲藍旗人贈廕俱無考

右 國史館本傳

國史館本傳

正

身者用類之不一

三

覺羅拜山 子顧納岱 孫莫洛渾

覺羅拜山滿洲鑲黃旗人 景祖翼皇帝第五弟寶耶阿之曾孫也天命六年從 太祖高皇帝征明攻瀋陽斬其驍將號禿尾狼者明兵自城南采眾來戰復斬一副將降其眾既克遼東授三等輕車都尉世職天聰元年從攻錦州不下環守之復移師往攻甯遠錦州兵潛出躡我軍後拜山與佐領巴希爭先還擊奮戰歿於陣 太宗文皇帝親臨其喪酌酒哭之 賜人戶牲畜 贈三等男子顧納岱襲爵崇德三年從征明擊敗明兵於山海關追奔至豐潤又敗之時我軍有出取芻束者爲敵所乘顧納岱馳往奮擊援眾以歸至山東敗明內監馮永盛總兵侯應祿軍攻博平克之

晉爵一等男 世祖章皇帝順治元年四月顧納岱以護軍統領
隨睿親王多爾袞入山海關擊流賊李自成兵十月復隨豫親王
多鐸追流賊至陝州賊據山爲陣顧納岱與護軍統領圖賴率兵
馳擊斬獲過半二年二月賊將劉元亮以兵千餘值夜窺我營中
有備出擊敗之於 正鑲黃正藍白三旗兵協力進攻賊騎奔竄遂
克潼關賊遁西安敘功加一雲騎尉三月隨豫親王徇河南乘勝
渡淮四月至揚州與護軍統領伊爾都齊等軍於城南獲船二百
餘明日合師薄城下七日拔之又敗明帥黃得功舟師於蕪湖貝
勒博洛徇蘇州顧納岱破敵於江涇還克崑山攻江陰大兵以紅
衣礮擊破其城顧納岱先登移兵趨浙江敗明守將水陸兵於平

湖收其戰艦進攻嘉興明兵悉眾出戰背城結陣顧納岱與都統
思格圖漢岱等合擊之三戰三捷七月旋師明年敘功晉三等子
會蘇尼特部騰機思等叛奔喀爾喀顧納岱隨豫親王率兵往剿
騰機思等遁走分遣蒙古追擊敗之於歐特克山復自土喇河西
行擊敗喀爾喀兵於查濟布喇克尋以 恩詔晉二等子世襲五
年隨征南將軍譚泰討叛鎮金聲桓至九江大破逆將吳將軍進
攻南昌中礮歿於陣 卹贈一等子 命其子莫洛渾襲莫洛渾
歷官一等侍衛順治十七年授參領從安南將軍達素討海寇鄭
成功攻廈門力戰死康熙二年 聖祖仁皇帝念拜山顧納岱皆
陣亡莫洛渾又以戰歿嘉其世篤忠貞 特贈莫洛渾爵三等伯

立碑墓側諡剛勇無嗣從弟諾爾遜席特庫分襲世職

右 國史館本傳

覺羅鄂博惠 覺羅阿賚

覺羅鄂博惠滿洲鑲紅旗人 興祖直皇帝之元孫覺羅阿賚滿洲鑲黃旗人 景祖翼皇帝之曾孫也並爲佐領隨征有功天聰三年大兵征明十月鄂博惠阿賚從貝勒岳託克大安口十一月大兵趨遵化明巡撫王元雅嬰城守 上命分旗環攻之鑲紅旗西之東鑲黃旗西之南鄂博惠阿賚等分領前隊正藍旗南之西護軍校布爾機等屬焉正黃旗北之西三等輕車都尉烏爾坤騎都尉額爾機根護軍校阿海台彌善屬焉正白旗東之北雲騎尉卓爾糾領催膝應元間散音達護齊屬焉元雅列兵城上矢石如雨我兵轉戰薄城阿海出不意躍登堞招後進者明人大驚攢刺

之阿海被害我兵乘其恟急攻東北音達護齊以第二隊雲梯未
至率第三隊雲梯奮登中創卒軍繼進遂克其城明總兵趙率教
來援卓爾糾方奉檄督糧猝與遇力戰死 上以阿海倡登城捐
軀盡節授其父阿邦爲騎都尉 賜蟒緞一緞十九布二百馬牛
各十大兵圍明都明廣甯巡撫袁崇煥以援師二萬屯廣渠門外
伏兵其右 上令我軍入隘盡趨右敗其伏兵追至壕台弼善戰
歿十二月大貝勒代善等率護軍及火器營至薊明山海關援兵
五千營城外代善等衝入阿賚額爾機根擊其騎烏爾坤擊其步
俱歿大軍連進殲其衆遂趨永平至沙唐山有蒙古兵拒守鄂博
惠中創歿四年正月至永平 上命副將阿山等選所部三十四

人夜攻城布爾機與焉薄城樹雲梯冒槍礮矢石奮戰城上礮忽裂明兵亂布爾機登城克之及我兵駐永平明山海關援兵來犯布爾機先陷陣死之五月明監軍道張春等以我兵在灤州來襲大兵自永平赴援突圍進擊以三鼓入其城應元力戰陣亡師旋議卹烏爾坤姓瓜勒佳先以騎都尉從征遼陽有功授三等輕車都尉 贈二等輕車都尉無子以兄孫科魁襲額爾機根姓舒穆魯 贈一等輕車都尉兼雲騎尉子額爾彌赫襲鄂博惠等俱授騎都尉世職鄂博惠子溫託慧阿賚子蘇蘭並襲音達護齊姓伊勒根先以功得騎都尉世職緣事革職復 贈原官以其兄安塔慕襲阿海姓博爾濟吉特其父阿邦襲職後旋卒孫六十一襲卓

爾糾姓托科羅子圖那襲順治十六年從征李定國陣亡台弼善
姓扎庫塔所給騎都尉世職以子幼未襲視其秩 賜以金布爾
機子索勒敏襲騎都尉世職

右 國史館本傳

綽和諾

綽和諾姓那木都魯氏世居東海窩集部父明安圖巴顏與其族人康古哩等並領部眾最繁歲庚戌 太祖高皇帝命巴圖魯額亦都往招明安圖巴顏遂來朝 賜金帛以還未幾綽和諾率百人來歸 上嘉其輸誠效順賚予甚厚授綽和諾佐領隸滿洲鑲紅旗自是屢從 上征討每臨陣服棉甲奮勇直前所向披靡歲辛亥隨額駙何和哩征呼爾哈部攻克扎庫塔城天命四年擊明總兵馬林於尙閒崖六年取瀋陽遼陽並有功 予三等輕車都尉世職嘗奉 命率兵駐防科木索地甯古塔有就善者殺守吏率眾攜輜重遁綽和諾追及海濱斬之並殲其黨 命以所獲輜

重盡賚之 太宗文皇帝嗣位綽和諾列十六大臣任鑲紅旗副都統天聰五年大軍征明圍大凌河城明監軍道張春總兵吳襄等率兵萬餘自錦州來援綽和諾先眾迎擊冒礮矢力戰歿於陣詔優卹其家晉世職爲一等輕車都尉無子以其兄翁格尼襲職仍授佐領轄綽和諾所屬人戶復益以新附呼爾哈百人八年因翁格尼不勝佐領任以其子富喀禪代之並襲世職富喀禪別有傳

右 國史館本傳

卓納子羅洛多貝等

卓納滿洲鑲藍旗人姓納喇哈達國貝勒萬之孫也 國初來歸
太祖高皇帝以十五戶人編爲佐領使統焉 賜姓覺羅氏天聰
五年七月 上證明卓納與二等輕車都尉朱三備禦多貝佐領
拜桑武騎都尉尼馬禪護軍校愛賽管武備院事達穆布雲騎尉
瓦爾喀從八月至大凌河夜圍城 上以攻城恐傷士卒掘壕築
壘困之乃分八旗兵四面合圍明人出城誘戰大兵合擊多貝戰
歿九月明太僕寺少卿監軍道張春總兵吳襄宋緯等率馬步軍
四萬來援趨大凌河距城十五里 上與諸貝勒率兩翼騎突之
不動礮震天地矢下如雨右翼兵衝敵營襄先敗逐北三十餘里

春復收潰眾立營時風起黑雲見春縱火率眾繼之風順火熾將
偪我軍卓納身先士卒奮勇攻擊與達穆布朱三拜桑武尼馬禪
愛賽瓦爾喀俱歿於陣天忽雨反風我軍乘之緯敗走生擒春六
年議卹卓納 贈騎都尉世職子羅洛襲多貝滿洲鑲藍旗人姓
完顏加 贈三等輕車都尉世職弟鄂特渾襲達穆布滿洲正藍
旗人姓覺爾禪 贈雲騎尉世職朱三漢軍鑲藍旗人 贈一等
輕車都尉世職子萬策襲拜桑武蒙古鑲黃旗人姓扎拉理 贈
雲騎尉弟賽音布襲尼馬禪滿洲鑲黃旗人世居馬佳卽以地爲
氏初襲兄赫東額一等男緣事革爵後復授騎都尉子溫都理襲
愛賽滿洲鑲藍旗人姓納喇 贈騎都尉世職孫和色襲瓦爾喀

滿洲正黃旗人姓薩克達 贈雲騎尉世職子岱松阿襲

右 國史館本傳

漢書卷之九十四

三

納海 塔納喀等

納海滿洲正黃旗人姓瓜勒佳信勇公費英東之次子也初以佐領駐防千山時新附之眾有逃者納海追之斬其隊長一人卒一人俄聞葉克舒有警率眾往援殺敵四十人天命六年偕騎都尉塔納喀攻遼陽沿河力戰俱有功塔納喀旋奉命往收卦爾察巴第家口攜三百人以歸天聰五年七月塔納喀從征大凌河破明監軍道張春兵面被創齒落其三得一等賞養七年明參將孔有德耿仲明由登州泛海來降上命貝勒濟爾哈朗率納海塔納喀等以兵迎之有德仲明至旅順口明總兵黃龍以水師截擊將至鎮江納海塔納喀等列陣江岸勢甚整龍望之氣懾斂兵退

有德仲明乃率眾登岸六月貝勒岳託攻旅順口納海塔納喀及
參領岳樂順佐領額伊們護軍校額德千總程國輔各以兵從岳
託令塔納喀等率本旗兵先導遇伏額伊們戰歿塔納喀奮勇登
城中礮歿納海岳樂順額德程國輔以舟師衝擊岳樂順程國輔
俱歿於陣納海額德冒矢石進薄城戰歿大兵乘之遂克旅順口
龍自剄死九月議卹納海 贈三等輕車都尉子固喇哈襲塔納
喀滿洲鑲紅旗人姓錫克特理子珠喇喀襲騎都尉世職岳樂順
滿洲正紅旗人姓兀札喇 贈騎都尉弟雅穆善襲額伊們滿洲
鑲藍旗人子額里赫襲騎都尉世職額德滿洲鑲紅旗人姓完顏
贈雲騎尉子赫爾蘇襲程國輔山東人隸鑲藍旗漢軍 贈雲騎

尉子小五襲

右 國史館本傳

國史館大藏書目録

一四七

四庫全書

四

--	--	--	--	--	--	--	--	--	--

努三 和托諾等

努三滿洲正白旗人李佳氏世居李佳和羅地方任佐領天聰八年五月 上親征明由宣府至大同八月 命貝勒阿濟格多爾袞等略朔州努三從至五臺山攻土壘不下多爾袞再令攻之努三立雲梯越眾先登被殺多爾袞給衣馬收葬之賞銀三百兩明總兵曹文詔守大同驍勇善戰明人倚爲重我兵分道攻之文詔亦隨備禦我兵氣益銳攻沙城佐領和托諾歿於陣攻興普輕車都尉海色麾眾薄城下先登戰歿時又有海色者以閒散從征攻王家莊力戰死之準泰亦以閒散從征嘗以別隊克遙城至是攻城外土堡先登克之轉戰至深井歿於陣文詔戰屢敗將校死者

無算退守左衛我兵四面合圍文詔猶支拒親軍校瑚什布破其關甯薄城下文詔礮擊之聞散額爾碧赫躍登文詔刺之墮文詔夜犯大營護軍校巴岱中流矢仍擊退之瑚什布額爾碧赫巴岱俱以創卒阿濟格命諸軍番攻雲騎尉多禮善驍騎校喀爾哈那佐領鈕成憲聞散邁格先後奮戰歿明士卒斬馘殆盡文詔力不支敗走遂克左衛師旋分議卹贈和托諾烏爾古宸氏滿洲鑲黃旗人 贈騎都尉子哈爾蘇襲兩海色俱蒙古正紅旗人其以輕車都尉陣亡者未及贈以閒散陣亡者扎魯特氏 贈騎都尉子海薩亥襲準泰薩克達長滿洲鑲白旗人 贈騎都尉子葉爾蘇襲湖什布額爾碧赫俱瓜勒佳氏滿洲正白旗人並 贈騎都尉

瑚什布子富達禮額爾碧赫子松鄂托各襲爵巴岱完顏氏滿洲
鑲紅旗人 贈雲騎尉子景柱襲後加騎都尉兼一雲騎尉多禮
善吳扎庫氏滿洲正白旗人初從攻遵化力戰克其城其歿也阿
濟格深惜之 贈騎都尉弟伊塞庫襲喀爾哈那滿洲正白旗人
贈雲騎尉鈕成憲鑲白旗漢軍包衣 贈騎都尉子維世襲邁
格瓜勒佳氏滿洲正藍旗人 贈雲騎尉子鄂海襲

右 國史館本傳

國語日報 卷三十一

三

巴篤理

巴篤理其先世爲滿洲居佟佳以地爲氏天命初與弟蒙阿圖等率眾來歸太祖高皇帝命編所屬戶爲二佐領使巴篤理與蒙阿圖分領其眾隸滿洲正白旗巴篤理莅事有能與十大臣之列積戰功授三等輕車都尉世職天命十年明發兵航海至旅順口葺城駐守巴篤理從貝勒莽古爾泰攻克之盡殲明兵十一年明將毛文龍遣兵夜截薩爾滸城城中礮矢交發明兵退而結營巴篤理率兵從山而下大呼乘之敵潰走追斬二百餘人天聰三年從太宗文皇帝征明指揮本旗兵攻克遵化城有功晉二等輕車都尉太宗親酌金卮勞之四年正月大軍克永平巴篤理隨

貝勒濟爾哈朗等統兵鎮守復赴遷安招撫明侍郎郭某比至已遁去執其孥至永平贍養之三月副將張宏謨率兵來侵巴篤理與前鋒統領屯布祿以兵百人迎之遇伏兵截擊屯布祿敗北巴篤理殿後接戰其弟課約馬中矢巴篤理斬敵兵奪馬與課約連斬三十餘人敵遂遁五月明兵圍灤州時大貝勒阿敏鎮守永平不卽赴援城垂破乃遣巴篤理率兵進擊乘夜突圍入城方議並力拒守敵發巨礮攻擊城樓焚守將納穆泰等度力不能支相率棄城依阿敏阿敏亦棄永平遂從歸事 聞集廷臣議請將棄城罪以巴篤理突圍赴援釋之五年任禮部承政六年奉 上命往朝鮮定職貢額數八年八月 太宗親統六師征明至應州

命隨貝勒阿巴泰等往取靈邱縣之王家莊巴篤理督眾攻其堡
既被創猶鼓勇奮擊中流矢卒 太宗聞之泣下曰此我舊臣效
力多年致命疆場深可惜也 卹贈三等男以其子卓羅襲爵順
治十三年追諡敏壯

右 國史館本傳

佟昭毅公巴篤理爲忠正公養正之族姪 國初時隨忠正來歸
從征朝鮮北京遵化大凌河諸戰皆有功天聰甲戌爲明曹忠果
文詔所害 文皇帝甚惜之 贈三等昭毅伯世其家近日太宗伯
永慶是其裔也因思北周時有斬齊將高敖曹者周人歲賜其帛
至周亡猶未已曹忠果乃能摧斬大將實爲明將中難能者莊烈

帝不惟不賞其功乃反以恇怯論成吳興化姓屢救之不報賞罰顛倒若此欲國不亡烏可得也

右錄宗室昭榘撰

固山 僧錫等

固山滿洲正黃旗人姓哲爾德世居界凡初任佐領天聰三年

上親征明固山偕驍騎校僧錫閒散達蘭從額駙揚古利爲前哨
攻永平遵化達蘭先登授佐領大兵圍明都固山步戰於大紅門
上下高坡騰躍如飛明人望之奪氣擊涿州援兵敗之崇德元年
復隨揚古利征明攻順義僧錫先登克之 賜號巴圖魯授騎都
尉十二月 上親征朝鮮豫親王多鐸等先驅圍其國都固山等
從屢斬敵朝鮮國王李侖遁南漢山城追圍之丁酉 上至臨津
江渡口時冬暖冰泮多鐸令僧錫等潛測江水欲浮馬以濟僧錫
等夜至大風冰復堅還報大軍安驅而渡庚子 上親統大軍直

抵南漢山城西二年正月丁未朝鮮全羅忠清兩道巡撫總兵來
援 上命多鐸與揚古利迎戰時霧晦不見敵營揚古利率僧錫
等先馳奮擊朝鮮兵敗走復依山列陣矢石如雨僧錫與雲騎尉
鄂海參領特穆爾佐領弼雅達阿和都敏俱力戰歿於陣我兵進
逼山頂敵營朝鮮兵棄馬遁達蘭率二十人乘夜用雲梯襲南漢
山城先登中槍創重卒 上命分兵攻江華島壬戌我兵渡江朝
鮮兵船百餘分兩翼我舟師從中衝入固山手發紅衣礮朝鮮兵
潰竄我軍登岸朝鮮烏槍手千八列岸拒固山力戰陣亡我軍繼
進盡殲其岸兵遂克江華島李倬降大兵凱旋八月議卹固山給
騎都尉世職子傅達理襲僧錫滿洲正藍旗人姓瓜勒佳給雲騎

尉世職子僧住襲鄂海滿洲正藍旗人姓瓜勒佳雲騎尉邁格之子邁格附見努三傳特穆爾蒙古鑲紅旗人姓科爾柏蘇給三等輕車都尉世職子查木素襲阿紐滿洲正黃旗人姓甯古塔弼雅達滿洲正白旗人姓巴雅拉俱無襲都敏滿洲正黃旗人姓伊爾根覺羅子蘇赫襲騎都尉世職

右 國史館本傳

--	--	--	--	--	--	--	--	--	--

黃廷元弟廷儒廷柏

黃廷元正白旗漢軍與弟廷儒廷柏並以閒散從征天命六年大
兵攻濟陽廷元先登陷陣敗明兵 上嘉其勇授寬甸守備天聰
五年從攻大凌河六年從征察哈爾七年從征旅順口江華島俱
有功崇德元年從征朝鮮二年四月從恭順王孔有德征皮島明
總兵沈世魁陣海口廷元以小舟從北衝入明兵礮碎之廷元與
家丁六人歿於海巨艦繼進遂克皮島七月兵部言皮島陣亡將
士骸骨莫能辨識今合葬於通遠堡 賜廷元祭葬銀六百兩廷
儒積功爲大同守備順治五年大同總兵姜瓖謀叛以廷儒善騎
射勇略過人爲士卒所畏愛憚不敢遽發乃佯以宴射誘廷儒至

署徐語之曰山西將弁多我舊屬我振臂一呼皆響應公若助我則大事可成無憂富貴廷儒怒罵曰逆賊汝受國家厚恩不思報乃萌逆志萬死不足盡汝罪我今卽手刃汝拔佩刀與賊鬪賊羣執之廷儒罵不絕口賊剖其腹支解之併其子開國等及男婦二十七人俱被害嗣絕無可廢特贈昭武將軍祭葬如例廷柏初任驍騎校崇德五年從征明圍錦州同參領孫有光擊松山步兵敗之又敗杏山騎兵七年又與有光擊敗閩洪山守兵明兵自松山夜犯我壕塹廷柏用紅衣廠卻之進攻塔山城敘功列二等又擊杏山城敘功列一等授佐領八年從攻前屯衛中後所等城皆以紅衣廠克之順治元年授雲騎尉世職二年加騎都尉從豫

親王多鐸南征破流賊定河南五月克揚州六月克平湖嘉善取
嘉興府廷柏俱在事有功時明魯王朱以海據紹興大兵營錢塘
江上以海所署督師大學士張國維以兵九千人夜劫我營廷柏
從都統吳守進敗之六年從鄭親王濟爾哈朗征湖廣明總督何
騰蛟招流賊李錦等連營拒廷柏從副都統金維城率兵至馬河
力戰歿於陣 詔贈騎都尉加一雲騎尉子振國襲九年 恩詔
加二等輕車都尉世襲振國仕至瓜洲總兵官

右 國史館本傳

172-172

172-172

納密達 炳圖等

納密達滿洲鑲白旗人姓索綽羅世居吉林天聰八年從大兵征
明攻雄縣梯城首登崇德元年授雲騎尉 上親征朝鮮明總兵
沈世魁副總兵金日觀駐皮島爲朝鮮援納密達偕閒散扈習從
攻南漢城有功二年正月朝鮮降世魁等不能救先是明帥毛文
龍據皮島欲牽制我師旣而文龍爲巡撫袁崇煥所殺世魁代領
其眾失士卒心勢益弱猶乘閒擾我邊三月 命武英郡王阿濟
格貝子碩託率恭順王孔有德智順王尙可喜等攻皮島以納密
達及護軍參領炳圖爲前隊佐領巴雅爾圖務爾格以大臣子弟
從征巴雅爾圖額駙揚古利之從子務爾格宏毅公額亦都之孫

內大臣圖爾格之子也師攻鐵山頭等侍衛拜音台柱佐領珠三先登克之世魁遁入石城四月阿濟格令納密達等乘小舟攻皮島西北隅日觀列兵堡上納密達等衝入將及岸巴雅爾圖務爾格躍登明人辟易納密達炳圖並登而後隊金玉和等不進日觀見師少復進戰務爾格陣亡納密達巴雅爾圖炳圖往來衝突拜音台柱珠三及護軍校彰吉泰急棹小舟登岸援之明人空城出戰納密達巴雅爾圖炳圖拜音台柱珠三彰吉泰並戰歿有德等乘巨艦攻北隅日觀殊死鬪有德等部將洪文魁等多戰死阿濟格麾八旗騎兵賊之護軍參領瑚什雲騎尉果科暨扈習奮勇先入歿於陣太兵繼之陣斬日觀追擊世魁戮之是役也敗明兵一

萬七千有奇俘三千餘自是明不敢復守皮島矣 上以得皮島
可比大郡 命優卹七月 加贈納密達一雲騎尉以其弟和托
襲和托附見阿爾休傳巴雅爾圖 贈三等輕車都尉子巴哈連
襲務爾格 贈雲騎尉以其弟之孫寶色襲炳圖滿洲鑲紅旗人
姓納蘭 贈騎都尉弟畢理克圖襲拜音台柱滿洲正白旗人姓
納喇烏喇國貝勒滿泰之孫 贈雲騎尉子阿古蘭襲珠三滿洲
正白旗人姓李佳 贈騎都尉弟努三襲彰吉泰蒙古正黃旗人
姓恭努 特贈騎都尉弟諾雷襲瑚什滿洲正藍旗人 贈騎都
尉子瑚雅祿襲果科滿洲正白旗人包衣姓索絡羅 贈騎都尉
子齋達襲扈習滿洲鑲白旗人姓趙佳 贈佐領以子扈扎祿襲

玉和等以後期議罪革職八月 命議卹有德可喜等部下陣亡
將校備禦洪文魁正紅旗漢軍 贈一等輕車都尉弟文升襲佐
領李繼功鑲藍旗漢軍 贈三等輕車都尉子春培襲三等輕車
都尉馬城張國棟程三省李應春並正紅旗漢軍俱 贈一等輕
車都尉城子傑國棟子承先三省子希孔應春子一茂皆襲職

右 國史館本傳

青爾阿 感濟秦等

青爾阿滿洲正黃旗人姓扎庫塔三等男宜爾格德之從父也由
晚時校兼佐領崇德三年八月 命睿親王多爾袞統左翼兵貝
勒岳託統右翼兵分道證明青爾阿及騎都尉感濟秦參領扈敏
等屬右翼九月攻鴉子嶺感濟秦力戰歿於陣我師入青山口殺
明總督吳阿衡明北京大震以尙書盧象昇督援師太監高起潛
監軍州縣多望風下象昇猶力戰大兵攻豐潤護軍校扈護巴雅
拉擊敗明兵戰歿攻靈壽聞散噶普碩戰歿攻南皮騎都尉阿延
圖梯登中礮卒攻獻縣聞散彰泰先登攻深州聞散巴林先以雲
梯登戰歿時起潛兵屢敗以豐潤靈壽南皮獻縣深州俱破誘過

象昇降秩爲侍郎仍督師岳託進攻欒城象昇來援書甯阿乘其未至麾眾徑薄城護衛袞布躍登城樓有火藥自然袞布創重卒書甯阿復衝入克其城象昇至轉戰至慶都書甯阿奮勇陷陣爲所戕十二月兩翼兵連營大戰於鉅鹿之賈莊象昇戰死劉宇亮代之惟懼不敢戰起潛望風輒遁於是兩翼兵分徇山東四年正月左翼兵克濟南右翼分兵略地破荏平護軍三晉陣亡破臨清佐領花應春戰歿破館陶佐領佟桂歿於陣攻膠州扈敏先登克之攻濟甯佐領祖大春戰歿扈敏持雲梯攀堞登明兵潰走克其城攻鄒縣佐領尙安福陣亡攻滕縣騎都尉傅察歿於陣二月大兵凱旋扈敏復攻破首陽及順德負重傷戰益力還至永平與扈

護巴雅拉及佐領察巴海烏納海遇伏戰歿八月議卹書甯阿
贈加一雲騎尉子穆成額襲感濟泰蒙古正紅旗人子瑪尼襲騎
都尉職扈護巴雅拉蒙古鑲黃旗人姓濟爾濟錦 贈騎都尉子
阿喇納襲後邁 恩詔加至二等輕車都尉噶普碩滿洲鑲藍旗
人姓薩馬爾吉 贈騎都尉弟西奇納襲阿延圖滿洲鑲白旗人
姓兀扎喇 贈雲騎尉子傅達襲巴林滿洲鑲黃旗人姓瓜勒佳
贈加一雲騎尉子岳占襲衮布滿洲鑲白旗人姓兀扎喇 賜巴
圖魯號 贈騎都尉子扎爾海襲三晉蒙古鑲黃旗人姓勒特
贈騎都尉子篤爾瑪襲花應春鑲黃旗漢軍無襲佟桂滿洲鑲藍
旗人 贈騎都尉子傅喇塔襲傅喇塔自有傳祖大春大壽之弟

也 贈騎都尉子澤源襲尙安福正黃旗漢軍 贈騎都尉弟安祿襲傅察滿洲正黃旗人 贈騎都尉從子蘇拜襲察巴海滿洲鑲紅旗人姓棟鄂 贈騎都尉子察達海襲烏納海滿洲正黃旗人姓郭爾羅特無嗣以其叔父桑噶爾齊襲扈敏滿洲正黃旗人姓賴布 賜巴圖魯號加一雲騎尉旋以創潰卒同時彰泰亦以創發卒授雲騎尉世職後以曾孫查郎阿官 誥贈光祿大夫大學士

右 國史館本傳

阿爾休 穆虎等

阿爾休滿洲正黃旗人姓那穆都魯世居瓦爾喀綏芬 國初從其兄蘇爾修率五十人來歸蘇爾修授騎都尉世職天聰九年卒阿爾休襲職崇德三年九月從睿親王多爾袞征明入青山口越明都而南連下州縣獨吳橋拒守圍之三日阿爾休攻東門射殺其守陴官劉廷訓吳橋破徇山東十二月攻濟南明布政張秉文遣人四出請援多爾袞令雲騎尉和託佐領穆虎穆爾驍騎校瑯圖分旗列屯明太監高起潛總兵祖寬等擁援師不敢進四年正月礮轟堞阿爾休躍登我師畢登遂克濟南秉文赴水死四月師旋敘功阿爾休加一雲騎尉十一月從承政索海等征索倫至呼

瑪爾河索海分旗進勦阿爾休和託穆虎屬左翼穆爾瑯圖屬右翼攻雅克薩城穆爾先舉火焚城南關廂和託率嚮先入大兵繼之克其城索倫聚兵於烏庫爾阿爾休等黎明邀戰暮敗之進攻鐸陳城聞博木博果爾來援索海令瑯圖設伏烏拉兵六千襲我後瑯圖戰歿索海白殿擊卻之時俘獲甚眾鐸陳城中以兵四百邀輜重且煽誘降卒使叛我軍馳之斬首五十級擒百餘人阿爾休穆爾陣亡降卒行至三屯果叛和託諭之不從率部卒三十七人力戰盡歿穆虎已先發聞知謂章京雅巴克日和託旣死吾等亦當死戰遂衝入被賊雅巴克率六人戰脫索海前勦撫之事始定五年七月議卹阿爾休 贈三等輕車都尉子阿庫里襲職穆

虎滿洲鑲白旗人姓烏蘇 贈騎都尉子摩羅襲穆爾滿洲鑲藍
旗人姓完顏 贈騎都尉子穆爾賽襲瑯圖滿洲鑲黃旗人姓費
摩 贈騎都尉子阿拉喜襲和託滿洲鑲白旗人姓索綽羅以其
兄羅薩襲雲騎尉世職議政大臣以雅巴克棄穆虎而走應鞭責
貫耳 上以雅巴克救出六人免治罪

右 國史館本傳

皇清宣統元年...

...

國朝耆獻類徵初編卷三百三十一目錄

忠義二

護穆薩 覺羅蘭泰等 猛庫魯 鄂推等 同阿爾 僧格等

洛哩 巴賴都爾莽奈 趙哈爾

勞薩 于程尼 喀爾護吉 巴希等 索爾和諾 額貝等

索羅岱克 索羅岱山等 敦達里 安達里 覺羅雍貴 塔海等

薩蘇喀 金玉和 常鼎 李應選等

濟三 祖應元等 五納哈賚 阿布圖等 馬御輦 王家瓚等

甘他哈 國法等 巴雅思胡朗 李變龍 趙文光等

覺羅登西克 昂錦等 張棟 官撫漢等

國朝三才圖會卷之二十一

--	--	--	--	--	--	--	--	--	--

國朝耆獻類徵初編卷三百三十二

通奉大夫前署江西巡撫江西布政使司布政使湘陰李桓輯

忠義二

護穆薩 覺羅蘭泰等

護穆薩滿洲正黃旗人姓賴布世居佛阿拉崇德五年五月乙巳以武備院卿從大兵征明距錦州城五里列陣以礮攻城北瞭馬土鞏克之七月乙酉睿親王多爾袞遣卒刈城西北禾稼明兵突出槍礮並施護穆薩與護軍參領覺羅蘭泰署護軍參領溫察力戰明兵大潰追至濠掩殺之克臺九及小凌河西岸臺二先是錦州外城蒙古貝勒諾木齊等見我兵困城志必得謀來降遂持書

縋城下約內應信洩我軍至明總兵祖大壽出拒戰城內蒙古縋
繩我軍援之登吹角夾攻護穆薩躍上被創卒覺羅爾泰前鋒參
領宏科俱陣歿鏖戰久明師退守內城我兵入外城明年五月乙
亥明總督洪承疇率六總兵兵六萬來援屯松山北岡我師擊斬
二千其兵猶勁騎都尉且岱參領彰庫善三等侍衛博胡岱陷陣
死八月壬戌大軍駐松山杏山閒立營截大路承疇率馬步兵十
三萬營松山城北亂峰岡癸亥犯我汛地輝蘭同參領囊古擊卻
之參領阿福尼越眾衝突負重傷猶斬將奪幟諸軍繼之敵奔塔
山我兵移營松山城外十二月甲寅承疇以兵六千夜至輝蘭奮
殺既出復進擊與溫察啟心郎邁圖皆沒我兵沿濠射之殺四百

餘人敵退入松山城濬濠圍之明總兵曹變蛟欲突圍出至正黃旗汛地佐領彰古力戰死變蛟亦中創奔還七年二月辛酉克松山擒承疇及明巡撫邱民仰總兵王廷臣變蛟等時明總兵吳三桂猶駐塔山鄭親王濟爾哈朗率兵至城下列紅衣礮攻之佐領崔應泰被創死參領邁色力戰陣亡城壞二十餘丈諸軍悉登遂克塔山覺羅蘭泰滿洲正紅旗人 贈雲騎尉溫察滿洲鑲藍旗人姓赫舍里宏科滿洲正白旗人世居那木都魯以地爲氏邁色任護軍參領俱額駙康果理之子旦岱滿洲鑲黃旗人姓伊喇理世居葉赫投佐領率護軍越明北京攻取邊城又梯攻安肅城克之授雲騎尉至是 贈一等輕車都尉子達哈塔襲三遇 恩詔

加至二等男彰庫善蒙古正黃旗人 贈雲騎尉弟猛色禮襲博
胡岱蒙古正黃旗人姓拜葉特 賜銀五百兩遣官致祭輝蘭滿
洲鑲藍旗人姓舒舒覺羅由閒散於天聰五年隨攻大凌河擊明監
軍道張春兵隨轟大敗其眾六年圍明大同略五臺山土堡克之
八年復入明邊略其地出邊時偕希爾根殿兩敗阿爾沙蘭兵
贈騎都尉子色赫襲阿福尼滿洲正黃旗人初襲勳舊佐領天聰
三年大兵越明北京於欒州遇敵獲我兵三人阿福尼與兄扎福
尼奮勇救出授騎都尉世職崇德六年從征錦州因事罷職明年
承疇降 上召問兩軍情勢承疇奏有一衣黃甲乘花馬者奮矛
衝入眾莫敢撻遂 命諸將各乘馬披甲如初使承疇識之承疇

指阿福尼以對 上大悅復其官尋創發卒依陣亡例廕卹彰古
蒙古正黃旗人姓翁果特 贈雲騎尉弟孟格色珥襲邁圖滿洲
正黃旗人姓納喇世居布顏崔應泰漢軍鑲黃旗人子世榮官至
廣東瓊州鎮總兵

右 國史館本傳

猛庫魯 鄂推等

猛庫魯滿洲鑲紅旗人姓納喇世居烏喇崇德三年授副理事官
五年管副都統事六年睿親王多爾袞率師征明入青山口猛庫
魯及佐領祖大權閒散鄂推隨焉猛庫魯攻虜都縣城克之鄂推
於玉田縣斬參將一生擒把總一大兵凱旋至邊明太監高起潛
總兵祖大壽以兵來追猛庫魯殿同納爾賽等破敵步兵千人旋
隨和碩鄭親王濟爾哈朗圍錦州城敵迎戰城南猛庫魯率本翼
兵奮勇殺敵轉至我壕射斃艾度禮公下監牧牛羊人猛庫魯沿
壕射敵歿於陣鄂推被創卒祖大權孫應時俱戰歿八年敘山東
錦州功猛庫魯 贈騎都尉子拜殷達襲准再襲一次鄂推滿洲

正黃旗人姓納喇世居哈達 贈騎都尉子察庫襲祖大權漢軍
鑲白旗人天聰五年率其子明副將澤遠來歸 贈騎都尉澤遠
襲孫應時漢軍鑲紅旗人任佐領 贈雲騎尉弟應聘襲又有查
蘇喀者滿洲正藍旗人姓烏蘇世居甯古塔通文學初以佐領兼
文館辦事加巴克什號與敵戰於裏紅山色勒與查蘇喀同旗姓
傳察世居葉赫於七年隨肅親王豪格征錦州俱歿於陣無襲

右 國史館本傳

同阿爾 僧格等

同阿爾蒙古鑲紅旗人世居巴林以地爲氏授驍騎校崇德三年多羅貝勒岳託征叫同阿爾與焉當我師出邊時副都統席喇命同阿爾率護軍防守七晝夜敗敵者再六年五月隨睿親王多爾袞圍錦州明總督洪承疇率兵十三萬來援我兵沿城掘壕困之承疇以三營步兵出犯我左翼三旗護軍不能勝奔壕塹同阿爾僧格阿桑布嚴守汛地奮勇抵戰死之覺羅錫翰拜渾岱薩穆唐阿哈慕嘉步戰破其眾明兵復沿山來犯俱力戰歿阿布喇庫大呼衝入陣斬其執纛者奪之而歸旋偕瓦音布隨內大臣伊爾登攻外城陣亡瓦音布執纛陷陣被創卒先是蒙古兵有降於明者

特穆德格執而戮之及兩師酣戰時復有訥木奇突出驪陣乘馬衝入睿親王之爾袞營將行刺特穆德格隻身奮殺相抱持急遂遇害奇圖倫巴吉布齋威陣歿同阿爾 贈騎都尉子珠嘉哈襲僧格與同阿爾同旗同族世居喀爾喀父康喀隨征囊努格爲嚮導有功授二等輕車都尉世職僧格襲爲佐領至是 贈三等輕車都尉弟多爾濟襲遇 恩詔晉爲二等覺羅錫翰滿洲鑲紅旗人 襲祖直皇帝曾孫 贈騎都尉子舒書襲拜渾岱蒙古正紅旗人姓烏梁海世居喀喇沁任佐領 贈雲騎尉子巴雅思呼朗襲哈慕嘉滿洲鑲藍旗人世居長白山 贈騎都尉子哈爾薩襲阿布喇庫蒙古正黃旗人姓巴林世居科爾沁 贈騎都尉兄阿

理瑪襲瓦音布滿洲正黃旗人姓伊爾根覺羅世居赫門 贈雲
騎尉弟艾音布襲特穆德格滿洲正黃旗人姓博爾濟吉特世居
克爾倫 國初同噶爾瑪葉爾登率部屬來歸 贈騎都尉子察
漢襲奇圖倫滿洲正藍旗人姓庫雅拉世居興堪 贈騎都尉子
哈福襲布齋蒙古鑲黃旗人任護軍校 贈雲騎尉阿桑布蒙古
鑲紅旗人薩穆唐阿滿洲鑲紅旗人巴吉驍騎校滿洲鑲黃旗人
俱無襲

右 國史館本傳

庚子年正月

八

洛哩

洛哩姓鄂爾沁氏初爲察哈爾林丹汗護衛天聰六年 太宗文
皇帝親統大軍征察哈爾林丹汗驚懼率部眾西渡黃河自竄土
默特部尋竄唐古特部而及洛哩攜元初巴斯巴喇嘛所鑄嘛哈
噶拉金佛並率百餘人來歸隸正黃旗蒙古授一等輕車都尉世
職崇德三年隨貝勒岳託證明由牆子嶺毀邊牆入擊敗明總督
吳阿衡自密雲迎戰兵六年隨大兵圍明錦州敵眾出城拒戰我
左翼三旗護軍擊之失利退入壕內敵眾環逼洛哩汛地洛哩奮
力拒戰歿於陣 賜卹晉三等男以其兄沙濟襲洛哩之弟一名
烏班和碩齊一名沙哩岱烏班和碩齊亦於林丹汗歿時自察哈

爾率七十人來歸授三等輕車都尉世職既卒沙哩岱襲沙哩岱
初任佐領 世祖章皇帝順治元年隨睿親王多爾袞入山海關
以步戰擊敗流賊李自成三年隨豫親王多鐸征蘇尼特部騰機
思擊敗土謝圖汗及碩類汗兵敘功晉二等輕車都尉十五年沙
濟卒沙哩岱併襲三等男合爲二等子世襲罔替尋授散秩大臣
十八年十二月 聖祖仁皇帝加恩諸大臣之舊自察哈爾來歸
者沙哩岱與內大臣噶爾瑪散秩大臣扎木素等並 賜莊田奴
僕康熙元年卒以其從弟之子達爾扎襲

右 國史館本傳

巴賴都爾莽奈

巴賴都爾莽奈蒙古察哈爾人姓烏彌氏初爲察哈爾大臣林丹汗敗走唐古忒巴賴都爾莽奈率戶口二百三十餘駐哈屯河逾一載來歸 太宗文皇帝隸正黃旗崇德元年授爵一等男三年隨貝勒岳託征明敗明總兵吳國鎮及內監馮永盛兵敵犯前鋒統領席特庫營率眾擊卻之明年隨大兵攻甯遠城中騎兵出戰迎擊之破其眾六年從征錦州敗明總督洪承疇兵於松山杏山閒敵屢犯鑲紅旗營擊之俱潰是年掘壕圍錦州城城內兵突出奮勇逆戰中流矢沒於陣 卹贈三等子越明年以其子哈岱襲爵哈岱年十七時隨父擊甯遠兵敵射巴賴都爾莽奈馬斃哈岱

不及介冑馳入陣以所乘馬掖其父騰上步從擊敵偕還 上聞而嘉之 賚予甚厚至是襲爵從大兵征明敗敵兵於密雲進攻易州順德克之遂略地至山東臨清 世祖章皇帝順治元年哈岱隨睿親王多爾袞入山海關擊敗流賊李自成二年大兵既定江南哈岱隨貝勒博洛征浙江敗敵於海甯縣進攻杭州大破敵兵師還得 優賚三年隨豫親王多鐸征蘇尼特部騰機思敗土謝圖汗兵及碩羅汗兵四年晉二等子六年隨英親王阿濟格征大同叛鎮姜瓖賊出犯正黃旗汛哈岱率所屬兵擊卻其眾又與都統鼇拜從壕內擊其後隊有斬獲九年 恩詔予世襲十二年隨定海大將軍伊爾德征舟山海賊十三年師次定海縣僞總制

陳六御僞伯阮思於海島列戰艦以待哈岱同護軍參領桓達理率兵進攻賊眾敗北追至衡水洋口連斬賊渠俘其餘黨舟山平十四年晉一等子康熙十四年 聖祖仁皇帝命爲內大臣明年以討逆藩吳三桂奉 命同侍衛阿喇尼往喀喇沁翁牛特蘇尼特諸部察閱兵馬調駐大同河南兗州等府事竣還朝十九年以疾卒年六十有三 賜祭葬諡勤壯立碑墓道孫阿喇納襲雍正元年 世宗憲皇帝追念巴賴都爾莽奈功 詔祀昭忠祠

右 國史館本傳

172-204

A large, empty rectangular frame with a thick border, possibly representing a redacted section or a placeholder for content.

超哈爾

超哈爾滿洲鑲黃旗人姓鈕祜祿氏額亦都第十三子也少從太祖高皇帝征伐授佐領 太宗文皇帝天聰八年以克副任使予騎都尉世職九年同任佐領納海巴雅彰屯等齎國書赴喜峰口潘家口董家口諸處 諭明守邊將吏選遇戍卒邀戰擒斬百餘人擢護軍參領崇德元年隨武英郡王阿濟格征明將入邊遇敵哨卒迎拒超哈爾擊之擒二人獲馬四至燕京城北奪取紅衣礮敗敵兵百餘轉戰至盧溝橋再與敵遇皆敗之二年列議政大臣三年七月授禮部參政九月隨睿親王多爾袞征明由青山口入邊會師涿州超哈爾分率所部攻任邱縣指揮軍士穴地道墮

其城趨趙北口明兵毀橋梁我師不得渡乃自河西乘馬襲敵後大敗敵遂略山東克濟南府明年春旋師出邊超哈爾殿敗敵於太平寨五年轉兵部參政六年隨鄭親王濟爾哈朗圍明錦州城內兵出戰超哈爾率兵奮擊敗之追入其郭力戰沒於陣年四十有一 太宗軫悼 賜白金六百一十兩晉世職爲二等輕車都尉以其長子格黑禮襲 世祖章皇帝順治十二年追諡超哈爾曰果壯視一品大臣例立碑墓道額赫里超哈爾次子也初任佐領順治二年格黑禮卒額赫里襲職五年以參領隨鄭親王濟爾哈朗征湖廣至荊州擊敗流賊一隻虎兵復與參領博爾惠追躡僞侯郭某擊敗之七年凱旋先是京師五城設清洲理事官至是

以額赫里任中城明年遷都察院理事官三遇 恩詔晉爵至二等男九年奉 命率兵五百赴江甯駐防會平南將軍金礪以海賊鄭成功侵踞海澄縣請增兵進剿 上命撥江甯杭州兵各五百令額赫里合所部兵同參領烏庫理等統之赴福建至則賊兵千餘踞海岸毀橋拒戰額赫里與金礪率兵進擊大敗賊眾遂攻海澄鄭成功率賊十餘萬奪我紅衣儼額赫里同金礪連戰皆捷復擊敗其餘賊撫降甚眾十二年擢兵部侍郎敘擊敗海賊功晉爵一等男十六年鄭成功糾眾突犯江南陷鎮江偪江甯給事中楊雍建疏劾樞臣疏於運籌致賊狂逞額赫里坐降級畱任明年甄別部院諸臣 上以額赫里於部務弗任勞怨 命解任降爵

三等男授光祿寺卿尋改通政司通政使 聖祖仁皇帝康熙二
年遷副都御史五年復任兵部侍郎七年擢工部尙書十年卒
賜祭葬如典禮以其子英素襲爵

右 國史館本傳

勞薩 子程尼

勞薩姓瓜爾佳氏其先世居安褚拉庫 太祖高皇帝征瓦爾喀
取安褚拉庫路降其眾勞薩來歸後隸滿洲鑲紅旗天命六年從
征明克遼東授三等輕車都尉世職天聰二年從 太宗文皇帝
征多特羅部有功晉二等輕車都尉三年從征明北京敗敵於德
勝門外斬級五十餘獲馬數十晉世職一等授前鋒統領四年同
參領圖魯什等偵明邊境有俘獲五年八月大軍圍大凌河城同
都統阿山率兵二百赴錦州偵敵敗松山援兵二千隨斬百餘級
獲三蘇明兵自錦州踵至我參領覺善被圍幾困又有佐領與敵
交戰敵揮刃將及勞薩直前奮擊悉出之還奏 行營 上親酌

金卮以賜九月明監軍道張春等合兵四萬由小凌河移營拒戰
勞薩遵 上方略領薩前進破敵營十月與圖魯什往錦州松山
偵軍事斬明兵執纛奔甯遠者十餘人十一月率精兵百人偵察
哈爾兵所在會已引遁追擊之遂興安嶺弗及獲甲仗馬駝之委
棄於道者六年四月大軍次博羅額爾吉勞薩率兵先進獲蒙古
之流散者二百餘人以獻五月與阿山復率兵百人至喀喇莽柰
遇察哈爾哨卒四人追至益圖斬其一我師偵敵者劉哈爲敵所
困敵兵近百人勞薩選七騎大呼直前拔之出重圍敵眾敗走尋
奏言察哈爾汗棄地遠遁追之無及 太宗遂自布龍圖旋師至
祐橐勞薩還與大軍會七年奉 命與圖魯什等率兵三百人往

略甯遠迤西路分其兵爲兩翼突入沙河所斬獲無算初貝勒大臣等征明山海關旣克忽遠引兵還僅畱圖魯什及勞薩哨兵殿後敵軍數追至勞薩等以寡敵眾敵兵卻走於是 太宗召責貝勒大臣而嘉獎勞薩等八年二月巡略錦州松山邊地俘斬甚眾尋復往錦州齋書與明總兵祖大壽懸於十三站山坡而還五月同承政圖爾格率護軍出邊渡遼河沿張古台河駐防以衛蒙古扼敵兵敘功晉三等男 賜碩翁科洛巴圖魯號十二月率將士百人往迎察哈爾部眾來歸者明年隨貝勒多爾袞收降察哈爾林丹汗子額哲師還略明朝州界於長城勞薩乘夜前進敗明羊房口及甯武關兵遂毀關入略代州進略忻州軍至黑峰口遇明

哨卒四十人悉斬之獲其馬崇德元年偕參領吳拜等齋書入邊諭明松棚路潘家口諸守將尋率甲士偵明邊隘口並多斬獲上親征朝鮮命同戶部承政馬福塔等率兵三百先行爲賈人裝晝夜疾馳將至朝鮮國都其守將合眾以禦我軍力戰盡殪其眾國王李侖遣使迎勞於郊外爲緩兵計遂潛遁南漢山城勞薩追敗城中出戰兵復殲其援兵二百餘二年充議政大臣部議征朝鮮時勞薩不嚴設偵哨以致李侖潛遁又約束不嚴士卒離伍應削世職罰鍰得旨免削職三年二月從征喀爾喀同都統席特庫等齋書諭明宣府各官及還因曾獲喀爾喀四十餘人收其財物牲畜縱之去法司鞠實論死特命宥之七月隨貝勒岳

託征明巡燕京略山東率前鋒兵駐邊外隘口多俘斬自牆子嶺入累敗敵獲其馬及礮明兵以馬步卒八千迎拒正紅旗蒙古阿蘭泰旁卻勞薩同護軍統領圖賴等奮勇直入明兵敗北夜復犯我營勞薩擊卻之並破其營又率前鋒軍追敵哨騎生擒九十斬百七十餘級獲馬百三十有奇晉二等男五年二月同吳拜率兵往偵廣甯邊境由中後所入傍海而南斬二百級獲牲畜十二月以圍錦州時伏兵高橋縱敵弗擊降世職并削巴圖魯號六年七月隨鄭親王濟爾哈朗圍錦州設伏誘擊松山兵獲馬百甲九十月明總督洪承疇赴援我師未集勞薩敗其兵二隊諸貝勒軍繼至協力迎擊大敗敵眾於城壕旋往塔山之東偵敵生擒騎兵一明

兵之退走松山也勞薩追之見援軍將至力怯使騎馳問鄭親王
 曰敵至矣若之何至是議罪應罰請旨上以勞薩此次雖無
 大功而效力行間勤勞素著且身被重創不宜復懲其小過賜
 敕復世職及碩翁科洛巴圖魯號尋任副都統隨睿親王軍與洪
 承疇力戰歿於陣加贈三等子明年命其子程尼襲爵世
 祖章皇帝時三遇恩詔晉程尼一等伯任議政大臣尋隨敬謹
 親王尼堪出征湖廣陣亡卹贈加一雲騎尉十二年九月賜
 祭葬追諡勞薩曰忠毅諡程尼曰誠介立石墓道以勞薩弟羅璧
 襲爵

右 國史館本傳

喀爾護吉 巴希等

喀爾護吉滿洲鑲紅旗人姓棟鄂天命中任護軍統領 詔以喀爾護吉辦事有能不違指使授三等輕車都尉天聰元年五月大兵征明錦州分三隊喀爾護吉及騎都尉巴希機穆庫懋海屬中隊佐領瑚爾翰富克察參領桑固理驍騎校孟庫護軍明蓋屬左隊佐領穆錫屯驍騎校覺羅喇達賽必漢屬右隊擊敗明兵於大凌河喀爾護吉擒哨卒二人明潰兵遁入錦州城圍之明兵自山海關來援 上命貝勒代善率師迎擊巴希機穆庫力戰有功明總兵滿桂結營甯遠城外爲聲援 命貝勒阿濟格分擊之桂敗走瑚爾翰襲破其伏兵機穆庫被創卒錦州兵乘我師分攻甯遠

潛犯我營大兵還擊復遁入城巴希不待大兵至奮勇先登歿於陣師旋上親臨其喪酌酒哭之三年大兵攻薊州喇達陣亡五年五月都統冷格里征南海島明人以舟師來援穆錫屯乘小舟衝陣舟覆溺死我兵奮擊盡沈其舟九月明監軍道張春等率兵援大凌河擊破之瑚爾翰富克察歿於陣十月攻錦州桑固理被戕明總兵祖大壽來降八年攻左衛明蓋先登陣歿孟庫以第三人登克之授雲騎尉世職大壽既降縱入錦州復拒守崇德六年大兵進攻懋海賽必漢歿於陣明兵自松山來犯喀爾護吉擁纛揮兵直前擊之轉戰而歿孟庫擢至副都統旋戰歿於懷來議卹喀爾護吉贈二等輕車都尉子朔色襲巴希滿洲鑲黃旗人姓

富察 贈二等輕車都尉子鄂納襲機穆庫滿洲鑲紅旗人姓尼
瑪察子瑪爾圖襲騎都尉世職懋海滿洲鑲藍旗人姓通顏覺羅
贈二等輕車都尉子蒙古爾岱襲瑚爾翰滿洲鑲紅旗人姓費摩
子瑚世禮襲佐領世職後以孫溫達官大學士 贈瑚爾翰如其
官桑固理滿洲鑲紅旗人姓完顏 贈二等輕車都尉子赫錫密
襲孟庫滿洲鑲紅旗人姓鄂濟襲無考明蓋滿洲正藍旗人姓瓜
勒佳 贈雲騎尉後以孫查克丹官工部尚書 贈明蓋如其官
穆錫屯與桑固理同族 贈騎都尉子瑚敏襲賽必漢滿洲鑲藍
旗人贈廕無考覺羅喇達滿洲正黃旗人 贈騎都尉富克察滿
洲正藍旗人姓查拉里 贈三等輕車都尉子喀喇襲

右 國史館本傳

索爾和諾 額貝等

索爾和諾滿洲鑲紅旗人姓科奇理世居瓦爾喀少孤兄瑚禮納撫之瑚禮納爲讐所害索爾和諾手刃讐二人祭兄墓宗黨義之崇德三年來歸授佐領六年偕佐領額貝從征錦州直抵明營破其柵門額貝復破明兵於松山七年三月征明甯遠索爾和諾額貝往視濠塹遇明兵擊敗之追斬哨卒十五獲三人十月 命饒餘貝勒阿巴泰爲奉命大將軍征明索爾和諾率驍騎校佟噶爾爲前隊次黃崖口阿巴泰使三等輕車都尉齋薩穆佐領綽克托護軍多羅岱圖爾噶圖伏隘口夜半舉火明兵驚潰遂入薊州總兵白廣思拒戰擊敗之額貝齋薩穆綽克托及參領五達納護軍

校渾達善歿於陣分攻霸州多羅岱先登攻定州圖爾噶圖先登俱克之並以創重卒閏十月次河閒明分守參議趙珽知府顏允紹城守兵進攻允紹發礮擊我軍參領署都統陳維道陣亡礮裂毀城堞護軍薩爾納冒火躍上明兵死鬪薩爾納被戕允紹完堞拒守馳檄四出請援阿巴泰連營圍之時明於山海關內外分設總督復設昌平保定二總督又有甯遠永平順天密雲天津保定六巡撫甯遠山海中協西協昌平通州天津保定八總兵皆擁兵壁旁縣懾不敢進索爾和諾曰河閒不下者恃外援也破其一營皆瓦解矣阿巴泰從之遣將襲明總兵薛敵忠營敵忠遁諸援師悉潰使人諭速降允紹等守益力急攻之索爾和諾梯登師繼進

破其城琿允紹並死索爾和諾亦戰歿十二月大兵徇山東諸州
縣各設城守攻臨清閒散瑚通格中流矢卒攻泗水護軍校務珠
克圖戰歿攻新泰閒散特庫殷歿於陣攻冠縣閒散特穆慎梯城
先登戰歿攻館陶閒散東阿陣亡攻滕縣閒散赫圖富義歿於陣
攻鄒縣閒散貴穆臣戰歿攻費縣閒散索羅岱以登城第一陣亡
進圍兗州佟噶爾及驍騎校屯岱登堞歿克其城斬知府鄧藩錫
臨清泗水新泰館陶冠滕鄒費俱下乘勝至海州八年五月凱旋
七月議卹索爾和諾 賜巴圖魯號 贈騎都尉子佛尼勒襲額
貝滿洲正黃旗人姓納喇 贈騎都尉子華善襲佟噶爾蒙古鑲
藍旗人姓巴林 贈佐領子珠扎漢襲齋薩穆蒙古鑲藍旗人姓

吳努古秦 贈一等輕車都尉子俄木布襲索羅岱蒙古鑲紅旗
人姓洪鄂羅特 贈騎都尉弟拉護襲圖爾噶圖滿洲鑲藍旗包
衣姓佟尼果特 贈騎都尉子巴達穆蘇襲五納達滿洲鑲藍旗
人姓鈕祜祿 贈騎都尉子瑚世屯襲渾達善滿洲正白旗人贈
襲無考貴穆臣滿洲正紅旗人 贈佐領子尼戡襲薩爾納滿洲
鑲紅旗人姓完顏 贈騎都尉子巴琳襲陳維道漢軍鑲藍旗人
贈騎都尉子奇策襲瑚通格滿洲正白旗人姓奇塔喇 贈騎都
尉子克楚襲特庫殷滿洲正黃旗人姓瓜勒佳 贈騎都尉無嗣
以其兄瑪甯阿襲特穆慎與索爾和諾同旗同族 贈騎都尉子
瑚紐襲東阿滿洲鑲藍旗人姓兀扎喇 贈騎都尉子福拉塔襲

赫圖滿洲鑲黃旗人 贈騎都尉弟克錫圖襲富義姓無考滿洲
鑲黃旗人 贈騎都尉無襲屯岱姓無考滿洲正白旗人 賜男
婦各一馬七匹綽克托蒙古鑲藍旗人姓烏朗罕濟勒們 贈騎
都尉子俄慕納襲

右 國史館本傳

索羅岱克 索羅岱等

索羅岱克滿洲鑲藍旗人崇德七年十月從奉命大將軍阿巴泰
證明時錦州諸城已克大軍前鋒分兩翼一由界嶺口一取雁門
關進克邊牆向薊州明兵望風潰直抵兗州府旋師至牆子嶺將
斬關出索羅岱克與蒙古鑲藍旗索羅岱並先登戰歿 詔索羅
岱克 贈雲騎尉索羅岱 贈佐領先是六年大兵圍錦州明經
略洪承疇赴援屯松山北岡大兵駐松山杏山閒明騎兵潛犯我
紅衣礮營虛銜章京哈爾漢擊敗之復設伏殲其眾次年仍圍錦
州明兵復來奪紅衣礮佐領恩克伊擊敗之復敗其塔山臺兵遂
圍松山有佐領劄圖者環城掘濠以困敵城內兵夜半突圍出劄

圖沿濠截殺敵敗退欲入城門閉不得入盡擒之松山既克錦州
 塔山杏山以次平順治元年大兵入山海關哈爾漢恩克伊劄圖
 皆從時李自成眾二十萬恩克伊戰歿於山海關劄圖追至望都
 被創卒哈爾漢從英親王阿濟格追入陝至延安府率甲士四十
 人守南山賊眾來犯力戰死同時從入關者護軍校瑪納海巴拜
 驍騎校布爾賽並擊賊於昌平陣亡哈爾漢滿洲鑲黃旗人姓佟
 佳 贈騎都尉子噶林襲恩克伊蒙古正紅旗人姓巴林 贈騎
 都尉子額爾弼赫襲劄圖滿洲正黃旗人姓他塔喇 贈騎都尉
 子班璣襲瑪納海滿洲鑲紅旗人姓錫林覺羅巴拜蒙古鑲黃旗
 人姓額爾圖特布爾賽滿洲正黃旗人姓伊爾根覺羅

石 國史館本傳

石國史館本傳

敦達里 安達里

宗德八年癸未八月庚午 太宗文皇帝賓天時章京敦達里安達里二人願殉敦達里滿洲人幼事 太宗分隸肅親王豪格及太宗賓天後敦達里以幼蒙恩養不忍永離遂以身殉諸王貝勒等甚義之以敦達里志不忘君忠忱足尙 贈甲喇章京子孫永免徭役儻干犯重典應赦者卽與開釋不應赦者仍減等官爵世襲勿替安達里葉赫人自來歸時 先帝憐而養之由微職沐殊恩授官職亦請殉諸王貝勒等亦甚義之子衣一襲豫議卹典加 贈牛录章京爲梅勒章京子孫世襲其免徭宥罪一如敦達里例既定議召安達里諭之安達里臨殉時謂諸王貝勒等曰若

先帝在天之靈問及後事將何以應諸王貝勒等對曰 先帝肇興鴻業我等翊戴 冲主嗣位承基務當實心輔理儻邀在天之靈垂鑒呵護是所願也

右東華錄王先謙編

覺羅雍貴塔海等

覺羅雍貴滿洲正白旗人崇德三年從睿親王多爾袞征明下山東雍貴擊明兵先馳入陣敗之復偕佐領塔海設伏斬明兵二人擒一人四年師旋偕閒散振特賚通州河岸兵塔海復隨恭順王孔有德運紅衣礮攻杏山戰歿礮轟堞俱毀明副總兵金國鳳死守會暮罷攻國鳳夜以繩繫木雜覆土石築之比明城固我師進攻先登者不能入振特躍登被戕五年雍貴偕驍騎校伊明阿從圍錦州伊明阿以雲梯攻松山被創戰益力歿於陣雍貴敗其兵復破其援師於杏山七年大兵復圍錦州明兵來奪我紅衣礮雍貴同覺羅薩哈連迎戰閒散阿什譚直前衝陣大敗其眾內院龍

西陣歿明總督洪承疇以十三萬兵來援薩哈連戰歿雍貴同護軍統領伊爾德連敗之乘雨備松山擊走其馬軍復率本旗兵攻塔山明總兵曹變蛟夜犯鑲黃旗汛地雍貴隨伊爾德擊走之旋破松山克錦州八年九月雍貴隨鄭親王濟爾哈朗征甯遠抵中後所移軍城北填壕塹騎都尉佟圖占佐領猛嘉巴圖劉漢以紅衣礮攻附近諸臺礮裂佟圖占猛嘉巴圖俱歿雍貴同護軍參領額爾碧赫衝入敵陣拔其城劉漢擊明兵於中後所戰歿十月進攻前屯衛阿什譚先登被創卒雍貴以第五人登中礮歿大兵繼進遂克之雍貴 贈騎都尉以其兄穆成格襲塔海滿洲鑲白旗人姓伊爾根覺羅 贈騎都尉弟庫巴海襲振特滿洲正黃旗人

姓伊爾根覺羅 贈騎都尉弟聶克色襲伊明阿滿洲正紅旗人
姓他塔喇薩哈連滿洲鑲黃旗人贈襲均無考阿什譚滿洲正黃
旗人姓馬佳 贈騎都尉以其兄綏蘭襲龍西滿洲正紅旗人
贈二等輕車都尉佟圖占正藍旗漢軍子惠福襲騎都尉世職猛
嘉滿洲鑲藍旗人劉漢鑲白旗漢軍贈襲無考巴圖滿洲鑲黃旗
人姓瓜勒佳 贈騎都尉兼一雲騎尉弟布達禮襲

右 國史館本傳

薩蘇喀

薩蘇喀滿洲鑲紅旗人姓吳扎庫氏世居噶哈里 太祖高皇帝時與其兄洪尼雅喀攜族屬來歸任護軍參領天命七年從上征明廣甯至沙嶺敵列陣拒戰我軍有都爾根者馬蹶敵騎三人兩刃交下薩蘇喀馳入敵陣躍馬大呼斬一人排一人撲地遂翼之出無敢偪者天聰三年從 太宗文皇帝征明北京先驅偵敵有俘獲五年大軍圍明大凌河城城內敵兵突出薩蘇喀率兵追擊及壕而還敵尋復出又戰敗之八年二月往略明前屯衛與前鋒統領勞薩擊敗甯遠兵獲馬二十有二六月師至大同薩蘇喀率三十人偵明左衛有敵兵三百營城外十里掩擊皆潰追走至

城下斬獲甚眾九年隨貝勒多爾袞招撫察哈爾林丹汗子額哲
進略明邊境都統圖爾格設伏挫敵賊奔逸薩蘇喀躡其後斬戮
無算敘功授雲騎尉尋任禮部參政崇德二年同參領丹岱等率
護軍繞騎各四十略明邊境次清河敵兵七百踞守與戰大捷奪
其二羸獲馬二十餘五年圍錦州取來降蒙古蘇班代之孛於杏
山擊潰拒戰明兵旋守木魯河再卻錦州兵破其城外援師六年
進圍松山隨肅親王豪格敗明總督洪承疇兵於郭外時敵援兵
夜犯鑲黃旗營薩蘇喀以兵馳擊敗敵去八年從鄭親王濟爾哈
朗征明甯遠取中後所前屯衛有功 世祖章皇帝順治元年正
月擢鑲紅旗滿洲副都統四月大兵入山海關討流賊李自成薩

蘇喀同副都統和託突入敵營中殿歿事 聞贈三等輕車都尉
長子阿素喀次子苗齊納先 襲

右 國史館本傳

--	--	--	--	--	--	--	--	--	--

金玉和

金玉和遼東人後隸正黃旗漢軍 太祖高皇帝天命四年征明
取開原還軍界凡玉和時爲明千總與同官王一屏戴集賓等率
二十餘人來降授參領 予三等男爵 太宗文皇帝天聰五年
擢禮部承政六年 上幸演武場閱兵王和同額駙佟養性等率
所轄漢軍擐甲列陣試殿得 賜鞍馬八年考績晉二等男崇德
元年都察院劾奏玉和與吏部承政李廷庚互舉子弟事坐徇私
罷任降世職爲三等輕車都尉二年從 上征朝鮮旋隨武英郡
王阿濟格證明皮島以前進之水師失利玉和不趨援論死 上
以其有率眾投誠功免死革世職四年復授參領六年隨大軍圍

錦州屢擊敗明兵時明總督洪承疇部眾分踞松山南三臺玉和
率兵攻克之盡殲其眾敵乘夜犯我壕塹奮擊卻之斬級五十七
年錦州下復率兵攻克塔山城敘功 子騎都尉世職八年隨鄭
親王濟爾哈朗征明甯遠攻克前屯衛中後所二城 世祖章皇
帝順治元年正月擢工部參政二月敘甯遠功晉三等輕車都尉
八月以副都統隨征河南署懷慶總兵官時流賊李自成爲大軍
追逐竄陝西其黨二萬餘劫掠河南十月犯濟源縣城玉和統兵
往援至則城已陷夜半遇賊力戰中流矢歿於陣事 聞下部議
追卹晉二等男以其子維廷襲雍正七年入祀昭忠祠

右 國史館本傳

常鼎 李應選等

常鼎鑲紅旗漢軍順治元年以副將隨懷慶總兵金玉和討流寇時李自成竄陝西其黨二萬餘來河南圍濟源攻孟縣蔓延鄧州內鄉縣及清化鎮鼎隨玉和援濟源至則賊已陷城戕典史李應選鼎夜半遇賊力戰與玉和俱陣歿玉和詳見大臣傳時懷慶鎮標同日陣亡者守備則白忠順佗國諫陳應傑石斗耀康虎千總則宋國俊趙國相李中王國臣楊虎劉奉相高友才把總則張進仁張光裕陳廷機張景泰許養和党中直廖得仁薛貴賊旋圍孟縣知縣王曰俞參將陳國才嬰城守賊攻七晝夜不能下將引去會大雨城壞賊入曰俞國才率兵巷戰國才被戕執曰俞脅降不

屈死賊又圍鄧州道標中軍鄭國泰戰死大兵救鄧州賊解圍去
轉攻內鄉縣執知縣胡養素索金帛不應死之賊分兵犯清化鎮
署事同知史燦麟莅任甫兩月執法嚴奸民憾之引賊入執燦麟
怒罵不屈賊忿磔其屍妻高氏及婢僕同日殉事 聞 詔常鼎
廕鑾儀衛指揮僉事子啟侯襲國才廕鑾儀衛百戶子其忠襲餘
卹如例應選浙江永康人曰俞山西陽城人明崇禎癸未進士養
素直隸貢生燦麟河南祥符舉人餘籍無考嗣後土賊剽亂者二
年有輝縣寇據北山大伍谷諸險列三十一寨官兵仰攻賊以死
拒不克登久之乞降官兵防其他逸也把總田貴羅思明守呂後
寨口賊乘夜斫寨門遁貴與思明倉卒出關皆遇害五年寇起武

陟之甯郭驛驛接太行山爲盜藪舊設捕盜通判駐其地賊僞稱
獵者馳入驛西郭門騎百餘披甲持刀仗焚劫入通判張可舉署
可舉力鬪遇害十四年睢州賊婁三嘯聚沙窩乘夜登郟城縣城
開北門引眾入知縣荆其惇督家丁眾役守庫印力禦賊受刃傷
會典史樊世亨率牌甲奔救賊乃遁其惇創重死庫印卒無失先
後事 聞並 賜卹如例可舉奉天貢生其惇江南丹陽人順治
己丑進士貴與思明籍無考

右 國史館本傳

濟三 祖應元等

濟三滿洲正黃旗人姓扎庫塔崇德六年以佐領從大兵圍錦州
破明經略洪承疇軍順治元年十月定國大將軍和碩豫親王多
鐸南征濟三與騎都尉色勒布雲騎尉祖應元參領金應得驍騎
校西來聞散達魯哈薩門岱納並從十二月多鐸追李自成至陝
州賊將偽汝侯劉宗敏據山爲陣濟三與色勒布拔賊營斬獲過
半自成親率馬步賊來戰多鐸調鑲黃正藍正白三旗並進濟三
色勒布奮勇入殲其步兵賊分兵躡我師後濟三色勒布祖應元
隨都統恩格圖率殿後軍又敗之自成遁二年四月大兵渡淮十
八日薄揚州城應元應得岱納以紅衣礮攻城城頽岱納先登中

傷死應元應得亦中礮陣亡二十五日克揚州城大兵渡江令左翼舟師留泊北岸備敵敵駕舟來犯色勒布迎擊中礮死時分兵攻江陰縣薩門以雲梯先登被戕達魯哈繼進亦陣歿六月多鐸定南京令多羅貝勒博洛等率大兵進徇蘇州下之擢濟三爲副都統駐守明福王總兵黃蜚潛納蘇州城內叛卒襲我師濟三聞變率兵擒勦敵合圍濟三力戰死大兵至浙攻嘉興礮毀其城西來率所部先登克之旋回兵取崑山縣城被礮死師旋議卹詔贈濟三騎都尉子哈山襲應元騎都尉子朝鳳襲應得雲騎尉以父國祚任其官岱納雲騎尉以從弟布勒庫襲色勒布三等輕車都尉子額色襲薩門騎都尉子克涉襲達魯哈雲騎尉子尼雅漢

襲西來雲騎尉子色勒襲應元應得俱正黃旗漢軍岱納滿洲正
白旗人姓巴雅拉色勒布西來達魯哈俱滿洲正紅旗人色勒布
姓兀扎喇西來姓赫舍里達魯哈姓他塔喇薩門蒙古鑲白旗人
姓博爾濟吉特

右 國史館本傳

國朝者麻痺初編

卷三百三十一

三

五納哈賚 阿布圖等

五納哈賚滿洲正紅旗人姓佟佳崇德五年以護軍參領從大兵圍錦州有功順治元年四月從睿親王多爾袞入山海關敗流寇追至望都十一月從豫親王多鐸至潼關設伏連破流寇二年隨征江南敵營於江甯橋五納哈賚入其壘擊走之敘功加騎都尉世職六月隨多羅貝勒博洛征浙江敗敵於平湖尋攻江陰城中礮發同時阿布圖以虛銜章京隨大兵駐杭州值明馬士英擁殘兵渡江欲謁魯王朱以海以海諸臣拒之乃投以海將方國安聯兵窺杭州阿布圖戰歿大兵尋敗國安軍以海遁入海士英亦被擒誅以海復爲鄭成功所害其餘黨據浙江舟山十二年 命甯

海大將軍伊爾德穆勒之賊將陳六御於海島望江口下列戰艦以
待伊爾德穆勒之追至衡水洋斬六御遂取舟山三等輕車都尉
海拉布署參領祁塔海署章京巴爾哈驍騎校噶穆爾護軍校博
林署護軍校昂阿孟葵哈代俱方戰陣歿先後議卹五納哈賚加
贈三等輕車都尉子齊納罕襲阿布圖雲騎尉以從兄額圖襲海
拉布二等輕車都尉子揚古岱襲祁塔海雲騎尉子沙里襲巴爾
哈雲騎尉以從弟耨德襲噶穆爾雲騎尉子龍華襲博林雲騎尉
兄蘇赫襲昂阿孟葵哈代俱雲騎尉餘卹如例阿布圖蒙古正黃
旗人姓求綽特海拉布滿洲鑲白旗人姓賽密勒博林滿洲正藍
旗人姓伊爾根覺羅

右 國史館本傳

國史館本傳

三三

--	--	--	--	--	--	--	--	--	--

馬御輦 王家瓚等

馬御輦陝西涇陽人明天啟年舉人順治二年五月和碩豫親王定揚州奏以御輦爲如皋縣知縣閏六月故明漕運巡撫田仰總兵朱宗轍副將明萬里等招集海灘民及鹽徒二萬餘人以白布裹頭出海爲亂通州如皋海門相繼失守明總兵方允珂秦良憲等復率川兵萬餘來據險要以拒我師我鳳陽巡撫趙福星同都統準塔副都統譚布等迎敵至定海鎮追殺四十餘里奪其船至如皋縣入城安撫而御輦已爲亂兵所害典史王家瓚同日殉時仰與宗轍萬里等同據通州知州李翹以不受僞命死七月五日大兵用雲梯攻復其城仰等遁入海而海門縣賊黨亦聞風逃知

縣李都產已先死於賊時秦興叛民朱永慶聞如皋亂遂知縣陳
棐嘯聚城中偽稱王號縣丞景文瑞主簿徐必遇力戰死之永慶
率眾至如皋備戰車火礮將攻城適官兵由通州至乘勝進剿賊
乃奔潰事 聞御輦都產 贈按察司僉事翹布政司右參議廕
一子入監文瑞必遇經歷餘卹如例翹都產皆奉天舉人必遇家
瓚俱浙江會稽人文瑞籍無考

右 國史館本傳

甘他哈圖法等

甘他哈滿洲正白旗人姓瓜勒佳崇德八年署護軍參領從多羅貝勒阿巴泰征明有功順治元年隨靖遠大將軍英親王阿濟格擊流賊於陝西敗之綏德州又敗之延安府二年追至湖廣武昌偽汝侯劉宗敏等率眾四千來戰克之追至九宮山復破其第二營五月與參領圖法隨定遠大將軍鄭親王濟爾哈朗征湖廣流賊李錦會山東土賊據曹縣十月移師往剿甘他哈圖法俱以攻城中礮歿事 聞俱 贈雲騎尉甘他哈子噶思海襲圖法滿洲正藍旗人姓嵩佳子湖什布襲其以駐防山東死事者爲佐領讓喀偏珠讓喀滿洲鑲紅旗人順治元年從睿親王多爾袞進山海

關擊賊有功李自成敗走西安都統葉臣奉命赴山西招撫其眾賊黨據太原用紅衣服攻城讓喀先登克之三年又從揚威大將軍豫親王多鐸征蘇尼特部騰機思等敘功授雲騎尉世職偏珠滿洲正黃旗人崇德三年從多羅貝勒杜度統右翼征明與左翼合兵於臨清有克城功順治五年與讓喀並隨都統圖占駐東昌府擊賊陣亡俱贈騎都尉偏珠兄渾珠襲同時護軍校卦當蒙古正紅旗人以隨大兵征山東遇土賊戰歿騎都尉西奇納滿洲鑲藍旗人姓薩馬爾吉順治二年從都統馬喇希平定河南江南屢立戰功三年隨都統覺善勦山東土賊力戰中箭歿贈雲騎尉弟噶普噶襲騎都尉綽諾蒙古鑲白旗人亦從征山東錄攻

城功 賜號巴圖魯順治七年 思加雲騎尉九年累加至二等
輕車都尉旋以傷發卒子索諾木襲

右 國史館本傳

巴雅思胡朗

巴雅思胡朗滿洲鑲黃旗人姓吳訥虎沁氏世居察哈爾初任參領署副都統從征江西至吉安府城東北有賊三千餘掘壕立營與城中賊相應巴雅思胡朗直前突擊破走之剗其壕賊兵千餘復出城來援迎擊又敗之遂定吉安江西諸城次第皆下進略地湖廣武昌至白鷺洲遇乘船賊五百餘來援巴雅思胡朗曰賊謂我不利水戰故乘船來我當出其不意急擊之賊遠來疲乏非我敵也以十艘衝入其隊火銃烏槍並發賊殲焉遂與都統巴查爾副都統碩塔進擊關廂賊營追至城下巴雅思胡朗中流矢卒議卹贈騎都尉世職以其子鄂齊泰襲

國朝三才集卷之三十一

右傳王鳴盛撰

三十一

李變龍 趙文光等

李變龍正紅旗漢軍人順治二年任固原鎮標中軍遊擊初董學禮鎮陝時令總兵何世元與副將武大定防守固原大定驕悍世元不能制學禮知之檄大定以兵五百赴鳳翔養馬大定志甚乘賀珍之變煽眾叛是年十二月擁兵千餘夜款固原城詐言欲議軍事世元令開門納之變龍疑其有異志力陳不可世元不聽門甫啟賊鼓譟入世元不知所爲死賊手城中大擾左營守備趙文光前營守備董師吉戰死於南關漢羌鎮標中軍遊擊萬時選守備張永年均力戰死變龍與左營遊擊周存德右營遊擊馬應熊赴救俱被執變龍誓不絕口賊殺之並殺存德應熊先是總督孟

喬芳令右營遊擊魏尙忠統兵千協防固原及變起尙忠挺身獨
鬪亦死於草場門外三年大定踞西和縣之三寨山我師奮擊大
定遁都司雷蛟戰歿先後事 聞 詔贈變龍參將廕雲騎尉子
占春襲文光師吉 贈都司存德應熊尙忠俱 贈參將各錄其
子弟一人餘卹如例部議世元雖死無功不與卹文光等籍無考

石 國史館本傳

覺羅登西克 昂錦等

覺羅登西克滿洲鑲黃旗人官散秩大臣順治二年隨揚威大將軍豫親王多鐸追流賊李自成師至潼關自成親率馬步賊據山列陣以拒大兵趨拔賊營殲其步卒雲騎尉昂錦中箭歿自成敗奔西安大兵追勦戰於天沙山登西克奮勇進擊中槍陣亡同時佐領達爾瑪以追賊黨一隻虎亦中箭歿先是 上命和碩英親王阿濟格由邊外趨延綏斷自成歸路至是自成棄西安趨商州上命多鐸取江南而以阿濟格勦流寇時賊多聚延安大兵進勦侍衛察瑪海騎都尉嘉龍阿參領折爾特護軍校胡瑪俱力戰陣亡事 聞 詔贈覺羅登西克一等男子願色襲昂錦滿洲鑲黃

旗人姓富察 贈騎都尉兼一雲騎尉達爾瑪蒙古正藍旗人姓
薩爾圖特 贈雲騎尉子格梅襲察瑪海滿洲鑲紅旗人姓完顏
贈雲騎尉以兄子羅思漢襲嘉龍阿滿洲正白旗人姓瓜勒佳
贈三等輕車都尉以弟子嘉珠襲折爾特滿洲正藍旗人朝瑪滿
洲鑲紅旗人姓瓜勒佳

右 國史館本傳

張慄 官撫澳等

張慄山東掖縣貢生順治二年任紹興知府時海賊鄭成功倡亂紹興奸民潛應之鼓眾猝起城陷慄死之執會稽縣知縣官撫澳百計脅降撫澳怒罵自剄死賊支解其屍殺其家屬九人生員王業鞏聞寇負父逃賊殺其父憤罵斷舌劓耳鼻死四年明魯王朱以海將程煌聚眾二千餘據龍泉關督標守備張文科擊之敗遁追至木衢嶺力戰陣歿旋陷泰順知縣張聯標死之八年以海與其英毅伯阮思定西侯張名振等遁踞舟山乘風潮聯鯨越重洋犯汛大兵分路盪勦抵舟山克之浙江提標千總毛祿督標把總楊彪俱陣歿十二年名振等復率鯨七百餘夜乘風潮至上海之

東溝登陸蘇松參將張祥瑞擊走之提標材官朱金中礮破十三
年名振等眾數萬復犯浙入岑江登岸營於紫薇嶼距舟山三十
里舟山陸營中軍守備陳彪率步兵一千名戰馬百出擊左右馳
突中槍死先後議卹 詔贈懷太僕寺卿撫澳按察司僉事各廕
一子入監餘卹如例撫澳湖廣蘄水人業鞏浙江人聯標直隸玉
田人餘籍無考

右 國史館本傳

國朝耆獻類徵初編卷三百三十三目錄

忠義三

宋永譽

焦安民

曲良貴

侯嘉允等

瑚密色

色赫等

葉璽

漢楚哈

達蘇等

張思孟

李邦彥等

楊鑛

童士勤等

袁生芝

靳榜等

宋人望

張俊等

倭合納

色爾敏等

格布庫

西特庫等

陳六禮

子駮

袁捷

漆尙友等

李應宗

王紹基等

戴光升

賀朝賓等

傅世烈

方重朗等

王德教

王維新等

高咸臨

錢嘉倫等

吳允焯

潘際昌等

李可愛

子化春
密念啟等

阿囊阿

費揚住等

西事三行及行不事
四
三
三
三
三
三
三
三

國朝耆獻類徵初編卷三百三十三

通奉大夫前署江西巡撫江西布政使司布政使湘陰李桓輯

忠義三

宋永譽

公諱永譽字葆恥汗驩其別號也中前明崇禎壬午科鄉試父學韶萬厯壬午科舉人伯學道萬厯庚戌科進士世爲廣平府永年人其事蹟載在家乘者不復贅公家學淵源淹貫博洽性復豪爽不事生業闢精舍於洛水聰明山下寓意詩酒雅有范希文先憂後樂之志人未之知也 本朝定鼎乙酉歲入都謁選授鳳翔府郿縣令受命之日單車就任郿俗素悍且近終南稱盜鼓頗難治

公莅任後日夜焦勞感以誠人皆勸凡征輸斷獄課士諸務雖倥
偬搶攘中井井有條本年分校秋闈得士六人極一時之選人望
歸焉時賀逆蓄異志久公憂之豫戒城守具躬率邑之慕義有膽
識者畫戰守策紳士謂邑無重兵度不能禦公曰臣子之義誓與
此土共存亡戰或不克守則無虞也亡何賀逆令賊黨持牌誘降
給以重祿公立碎其牌禁錮賊役次夕賊遂薄城下攻五日夜公
多方禦之勢不支城陷賊執公不忍殺復溫言勸公降公挺立罵
不絕口索縣印不予賊怒手刃公督府孟公喬芳稱其一死盡節
忠烈可憫撫軍雷公興稱其爲國盡忠死賢於生會議上其事請
卹典得 旨追贈陝西按察司僉事廕一子入監讀書

右傳魏象樞撰
按賀逆攻郢城
係順治二年

國朝文獻通考卷三百三十三

--	--	--	--	--	--	--	--	--	--

焦安民

焦安民漢軍正紅旗人初授吏部啟心郎崇德九年甄別各部院官安民列二等 賜人戶牲畜八年考滿授佐領順治元年遷山西雁平道二年四月擢甯夏巡撫疏言雁平村舍凋零寇盜充斥守備上官清都司鄭應亨晝夜巡緝士民得安請攜二人隨往甯夏委用 從之十一月 上諭督撫等宣力封疆躬勤勞苦茲值嚴寒尤深注念 賜安民絛裘貂褂各一十一月疏言臣巡歷河東諸營堡惟靈州營水灌沃壤兵多務農餉或不足猶可藉農養贍其餘營堡兵皆鶻衣百結鵠立難支查靈營西南有民堡八向招人耕種屯糧以供兵馬需近因花馬與武等營歲荒將此項屯

糧通融分給以資接濟伏思守土在軍足食在農斯時有荒可墾
苦無牛隻見存耕牛六十一隻堪給兵開墾又原任總兵南一魁
將舊存馬價銀二百兩製弓矢攜去應追原價入庫甯驛久廢稽
延公務請將此銀買鹽發附郭等驛稍供走遞庶齎奏無誤又
言甯兵月餉見在屯課征收者支放殆盡貧民逋欠者追比難完
三軍枵腹待哺請撥秦餉三萬兩以濟飢兵下部議如所請三年
三月副將王元馬德以營兵趙銳等罪責入獄乘機統眾突入撫
署安民遇害元德等尋伏誅安民 贈右都御史廕一子 賜祭
葬如例

右 國史館本傳

曲良貴 侯嘉允等

曲良貴直隸獻縣人由貢生知陝西興安州事順治三年四月叛賊孫守法糾流賊劉二虎等圍州城良貴與州判侯嘉允參將康國安率眾捍禦賊攻兩月不克而城內亦糧盡援絕攻益急奸民內應五月晦啟門納賊執嘉允不屈殺之良貴亦罵賊死并殺國安及中軍鄔鳴雷都司姚永燾陳光斌千總郭君敬金國華守禦所千戶尤英百戶張爾謀等八人邑紳陳正道梁時煌蔣玉衡唐醇儒舉人單興詩等五人生員吳錦譚達文東調鼎王者輔等五十餘人興安陷遂及石泉縣主簿胡孟遊典史夏德化皆死之是年十二月賊胡向宸聚黑水谷倚蕎麥山之險四出剽掠都司張

偉勦之次年正月遇於桃園溝力戰陣亡又鳳翔土寇李啟陽與
向宸同時倡逆據麟游清涼寺嘯聚數千人掠村堡道府集鄉勇
守禦聞鳳翔武生李增廣多勇略俾督其眾屢與賊戰多斬獲一
日賊大至增廣迎敵馬蹶遇害四年議卹 詔贈良貴布政司參
議廕一子入監嘉允孟遴俱 贈經歷德化 贈主簿餘卹如例
嘉允陝西人永燾直隸宣化人父熙吾官興安州知州隨至任值
鄰邑洵陽失守民多赴興安避亂永燾訓練保障全活甚眾參將
康國安薦其才授興安中營都司至是與國安並及於難興詩明
天啟丁卯舉人餘俱無考

右 國史館本傳

瑚密色 色赫等

瑚密色滿洲鑲黃旗人姓佟佳世居加哈天聰初來歸以佐領銜駐防天瑞山斬逃卒六十級擒五十人崇德元年隨貝勒阿濟格證明設伏昌平敗明騎五百趨通州斬哨兵百人偵盧溝橋敗侯卒前後獲馬百餘匹還取紅衣大廠道遇明太監郭某及總兵祖大弼戰卻之旋率八旗前鋒薄明都敗其兵東略遵化擒哨騎二十復西至盧溝明師自保定來援擊敗之生擒十三人九月隨貝勒多爾袞攻明松山敗其總兵祖大壽四年攻杏山斬獲甚眾額爾克岱青部卒有陷於陣者力援出之五年從圍錦州左翼兵猝遇敵瑚密色先登奮擊明師退又敗之於杏山敘功授雲騎尉七

年從奉命大將軍阿巴泰伐明次豐潤破明督師范志完兵追至
玉田明千總二人率兵夜窺我師擊走之八年大兵下山東從攻
青州取其芻卒復敗敵於德州城北明將司馬獻來擾偕騎都尉
色赫擊之退我兵有科爾沁二人中刃爲敵所困瑚密色躍馬直
入挾之出師旋至桑乾河結浮梁以濟志完躡我後偕副都統納
爾特還擊生擒遊擊一人明師潰因與阿爾布尼鄂碩及副都統
鄂羅賽臣殿志完復遣將追襲連卻其眾順治元年從入山海關
擊流賊敗僞總兵唐通於一片石追至安肅斬獲無算先驅至望
都再殲賊復同都統譚泰逐北數十里二年擢佐領授雲騎尉世
職十月瑚密色色赫及參領王元爵隨豫親王多鐸出征取潼關

時賊結陣於山瑚密色同鄂碩奮登賊下山遁遂據其山賊騎散而復合率前鋒兵乘勢馳下賊皆披靡別隊犯圖賚軍復助擊破之又設伏敗賊馬步兵數千三年五月大兵下江南色赫王元爵俱在事有功瑚密色破明兵二千餘於句容明兵復合進偪我軍瑚密色直前衝突明兵大敗色赫擊敗明總兵黃蜚等於蘇時明魯王朱以海踞紹興浙江列郡多應之六月多羅貝勒博洛征浙令王元爵徇湖州土兵蜂至元爵戰歿博洛次杭州魯王遣其督師侍郎孫嘉績熊汝霖渡錢塘江來犯瑚密色色赫等擊敗嘉績兵擒其隊帥追至江中汝霖兵殊死鬪瑚密色中槍戰歿色赫從定浙江旋下福建還過平湖遇土寇亦以中槍陣亡色赫蒙古鑲

藍旗人姓墨勒濟世居哈達以佐領從圍錦州敗明總督洪承疇
騎兵遂遷騎都尉王元爵漢軍正紅旗人以軍功授佐領擢參領
議卹瑚密色 贈二等輕車都尉子薩碧圖襲色赫王元爵並
贈雲騎尉元爵子秉恭襲職從子秉政以佐領擢陝西駐防參領
順治八年從征四川明桂王朱由榔所署總督龍名揚據敘州擊
之陣亡 贈雲騎尉

右 國史館本傳

葉璽

葉璽滿洲鑲白旗人姓果羅洛氏祖常舒爲沾阿寨長 太祖高皇帝勅業時同其弟揚舒率眾來歸從征尼堪外蘭及誅諾察納皆在事有功尋擢任大臣以其子布哈圖察哈喇並爲佐領葉璽布哈圖之子也 太宗文皇帝崇德三年以護軍參領隨睿親王多爾袞征明由青山口毀邊牆入破薊遼總督吳阿衡軍五年圍錦州擊敗杏山騎兵及松山步兵 世祖章皇帝順治元年隨英親王阿濟格征流賊李自成二年正月至延安府賊兵出犯葉璽同左翼兵奮擊大敗之李自成尋遁走湖廣大兵進擊抵安陸府獲賊船四復同護軍統領哈甯阿自大江追擊流賊至富池口奪

其戰艦賊復列陣岸上又擊敗之尋還京三年四月蘇尼特部騰
機思騰吉特等叛奔喀爾喀葉璽隨豫親王多鐸貝子博和託等
征之屢擊敗賊眾追至布爾哈圖山擒斬七人招降喀爾喀二十
五戶七月師自圖拉河西行至扎濟布拉克遇喀爾喀土謝圖汗
兩子率兵二萬來犯葉璽力戰歿於陣 賜卹 贈護軍統領子
騎都尉世職世襲罔替無子以弟之子額爾遜襲 世宗憲皇帝
雍正二年建昭忠祠以葉璽入祀葉璽兄之子辰部錄初任佐領
兼工部理事官崇德三年隨睿親王多爾袞征明山東攻克陽信
縣城順治三年隨定南大將軍和洛輝擊敗賊賀珍兵於漢中又
隨肅親王豪格征流賊張獻忠同護軍參領達素鄂摩克圖等屢

控賊鋒師還賊躡其後復同前鋒參領錫卜臣還擊敗之兩遇
恩詔予騎都尉世職十一年從征海賊鄭成功至浙江舟山與署
護軍統領巴雅達敗偽總制陳六御等敘功晉世職爲三等輕車
都尉十七年卒子瑪晉襲

右 國史館本傳

漢楚哈 達蘇等

漢楚哈滿洲正紅旗人姓他塔喇世居安楚拉庫父哈甯阿以軍功授騎都尉見其次子希福傳漢楚哈其長子也襲騎都尉世職順治三年五月豫親王多鐸征蘇尼特部騰機思以漢楚哈及署前鋒統領達蘇護軍校珠達色並列前隊七月營隲爾察克山聞騰機思屯袞噶魯台多鐸卽分兵出其後據險大軍繼之賊宵遁達蘇率輕騎先敗之於歐特克山漢楚哈珠達色從鎮國將軍瓦克達等渡土喇河大破賊於博爾哈都山乘勝逐北抵扎濟布拉克達蘇戰歿喀爾喀部落土謝圖汗向與騰機思相結多鐸使二等待衛布岱往諭之旋偵知騰機思已奔喀爾喀乞援土謝圖汗

遣其子率兵二萬橫列上游我師嚴陣而前奮勇進擊漢楚哈先
 登被五創珠達色中長槍戰益力同歿於陣大兵合勢進擊喀爾
 喀賊眾敗走自是騰機思潰亡四年三月議卹 贈漢楚哈騎都
 尉合其父世職為三等輕車都尉時希福已為二等護衛乃以哈
 爾阿第三子班楚哈襲職遇 恩詔加二等輕車都尉班楚哈旋
 卒乃以希福襲職達蘇滿洲鑲黃旗人 贈三等輕車都尉子忻
 珠襲珠達色蒙古正紅旗人姓薩爾珠特世居巴林 贈雲騎尉
 子車勒克圖襲布岱蒙古鑲黃旗人姓韋默特世居翁牛特其使
 於喀爾喀也途遇賊戰歿 賜銀四百兩卹其家

右 國史館本傳

張思孟 李邦彥等

張思孟鑲黃旗漢軍人天聰初以閒散管佐領事大兵攻明錦州
敵犯我正黃旗汛地思孟率本旗兵擊退之攻塔山杏山思孟皆
在事有功授雲騎尉世職大兵越明燕京略地山東由渾河造橋
明弁督兵來奪思孟以參領率兵截擊之後又以紅衣殿攻克前
屯衛中後所二城擢騎都尉順治二年授山東河防右營遊擊防
河護運迭著勞績先是土寇李西吾周魁軒等嘯聚東平州東阿
諸處有騎兵五百步兵七千勢甚猖獗三年十月思孟以防河兵
二百偕左營遊擊范瑯赴東平邀剿一戰於張家樓再戰於張城
集皆勝之後數日又增募鄉勇捕賊於梁山賊分三隊來犯官兵

亦分三隊逆擊思孟所統新募兵見賊皆驚潰范邦收其兵求思孟不獲久之思孟弟思盛得其屍於湖葦中始知爲賊所剖裂而棄於此其旁一屍則從死之僕人也思孟死事後二日賊從梁山過運河薄汶上縣城環城爲六營乘日暮併力攻之訓導李邦彥招募鄉兵偕城中縣令丞倅等官守兩日夜賊踰城入令丞等逃匿塔中免或勸邦彥亦逃去邦彥叱之曰我職官殉難分也率僕從力戰斃賊十餘力竭被執死之時東平賊蔓延四出其羽黨又分掠甯陽縣之張村甯陽典史种起鳳率兵赴援策馬奮呼入賊營攫其馬羸牲畜歸賊遮奪自日中戰至晡起鳳中槍落馬死張村圍亦解 朝廷惜思孟之死 命卽以思盛代領其眾加世職

爲二等輕車都尉子遵聖承襲 賜祭葬銀五百立碑銀三百以
示優異邦彥起鳳並 贈卹如例邦彥益都廩貢生起鳳陝西華
州人

右 國史館本傳

楊鑛童士勤等

楊鑛河南祥符縣人任湖北襄陽府知府有政聲順治三年總兵王光恩結流寇叛劫府庫鑛率民壯禦之轉戰至北門力不敵遂被殺時有童士勤者宛平舉人任竹山縣知縣以事至襄被執不屈死襄陽推官李實發知縣潘朝佑同日遇害及光恩被逮其弟光泰成遂復煽眾寇鄖陽光泰即賊所稱王二也下荆南道劉開文率知府董有聲同知劉璇張有芳口推官孫揚聲鄖陽知縣趙丕承保康知縣薛溥典史雷之縉禦之城陷俱死房縣教諭王奠國以赴任中途被殺五年議卹 詔贈開文光祿寺卿鑛太僕寺卿有芳按察司副使揚聲實發丕承溥士勤朝佑按察司僉事各廕

一子入監餘卹如例開文山東鄒平人初任江西南瑞道調下荆
南道子鵬翀以廕官知州璇直隸永年縣人順治元年由貢生知
山西沁源縣沁源多盜兼好鬪璇招撫流亡著循良聲縉鄖陽同
知被執揖揚聲曰勉之遂死揚聲山東萊陽舉人投鄖陽府推官
挺身力戰罵賊死實發河南汲縣舉人子隣廕官金壇知縣丕承
直隸藁城縣拔貢溥直隸大城縣恩貢生朝佑河南杞縣人順治
三年進士子理以廕官訓導之縉 贈山陽縣主簿奠國以未抵
任無卹有聲有芳籍貫無考

右 國史館本傳

袁生芝 新榜等

袁生芝直隸良鄉人明崇禎丙子舉人順治初官陝西商雒道三年山寇賈珍遣其黨劉體純率眾數萬攻商州生芝誓死守城破自經其父亦戰死闔門盡節者凡三十二人 詔贈光祿寺卿廕一子入監珍初據漢中時諸路賊多竊發二年正月郃陽土寇魏天命犯澄城奸民內應啟門納賊知縣靳榜死之踰月流寇劉文丙寇白水知縣索應運悉力捍禦賊數千攻城城陷殺胥役劉廷漢及鄉勇董蒙郭景旦高文興王光玉張拱等應運巷戰被害又同州土寇李鶴子陷州城知州李遇知不屈死延安同知張有芳駐防龍山賊猝至力戰死流寇倚終南山爲逋逃蔽郿縣距山近

知縣宋永譽練鄉勇爲備寇不敢倡然終以賀珍在漢慮其出擾與邑紳盡戰守策僉云邑無重兵難守永譽曰能戰則戰不能戰則守不能守則死今與此城俱存亡矣未幾珍出棧道破寶雞縛主簿鄧邦憲陸諸城下死之將攻西安道過郿使其黨持僞檄招永譽永譽碎其檄縛置獄明日賊大至永譽親發礮石擊之凡五晝夜城陷典史傅宏憲被戕邑諸生安尼恭晉賊寸磔之執永譽誘降不從遇害賊遂連陷西安鄠縣華州長安貢生田佳運及佳運子陷鄠縣生員王圻華州生員趙文明華州民郭汝甯俱以城陷不屈死議卹應運 贈按察司僉事遇知布政司參議有芳按察司副使永譽按察司僉事各廕一子入監餘卹如例榜直隸邢

州歲貢生應運山東德州拔貢生遇知正黃旗漢軍永譽直隸永
年人明崇禎壬午舉人有芳邦憲宏憲籍無考

右 國史館本傳 按篇中宋公永譽殉節在順治二年有傳見是編卷首張公有芳前傳殉節陽

城此傳延安同知
戰死龍山存疑

國朝通志卷之三十三

一

宋人望 張俊等

宋人望浙江錢塘人由貢生任福建連江知縣順治三年鄭芝龍降子成功遁入海據南澳族人鄭彩據廈門互掎角屢掠沿海郡縣兵至連江人望嬰城守賊環攻不能下援絕糧盡死之後五年有敏諭張俊縣丞袁養民典史焦汝振俱以鄭彩陷城死九年成功來攻城遊擊倪光友禦之裏創累戰力盡而殉十二年縣丞袁用相亦以成功陷城死俊用相俱江西人養民山西人汝振光友俱江南人十三年楊繼生知連江縣賊帥楊又衡以同籍同姓誘降繼生不爲動及聞成功兵至閩安鎮乃集士紳於明倫堂誓死守持鐵鞭日夜登陴賊萬餘攻城援不至城陷繼生走益觀音閣

妻劉氏殉繼生四川閬州人明舉人賊之攻閩安也鎮無城築土
堡爲固賊猝破之副將胡希孔守備李琚等與賊戰於教場琚陣
亡希孔敗走懼爲賊所及投江死希孔福建漳州人琚江南丹徒
人十七年江南江甯人劉從勛爲連江遊擊擊成功歿於陣先後
議卹 詔贈繼生按察司僉事琚都司僉書餘卹如例

右 國史館本傳

倭合納 色爾敏等

倭合納滿洲鑲藍旗人姓他塔喇初以戰功授雲騎尉順治二年從平南大將軍多羅貝勒勒克德渾征流寇至湖廣常德敗賊有功三年賊黨劉長晉據武岡列木城拒守倭合納從副都統卓羅往擊與護軍校色爾敏俱戰歿賊旋攻荊州勒克德渾遣尙書覺羅郎球等先伏荊州南岸盡收賊艦自統大兵疾馳至賊潰走偽將袁宗第竄會同縣護軍校博托理追擊陣歿護軍校圖渾追至彝陵亦戰死賊李孜田見秀皆降四年賊復煽護軍校達爾禪力戰歿於陣五年李定國擾湖廣副都統金維城進征戰於馬河佐領高杰步戰死六年王進才據寶慶定遠大將軍和碩鄭親王濟

爾哈朗往勦賊二千來犯前鋒侍衛諾門達賴擊走之賊復帥萬人窺營諾門達賴以槍傷陣歿驍騎校珠鞞何天福攻賊之木城賊發礮二人並死副將馬成功擊馬進忠陣歿於湘潭輕車都尉麥圖侍衛兼佐領銜柏天儲及驍騎校李天寵擊李錦於岔路口皆力戰歿十年孫可望寇衡州一等輕車都尉鄂克綽特巴委署佐領互梯通政司參議鍾貴俱沒於陣先後議卹倭合納加 贈一雲騎尉子尼雅漢襲色爾敏博托理圖渾達爾禪高杰諾門達賴珠鞞何天福馬成功俱 贈雲騎尉柏天儲 贈三等輕車都尉李天寵 贈雲騎尉鄂克綽特巴 贈三等男互梯鍾貴俱 贈雲騎尉麥圖贈卹無考色爾敏滿洲正白旗人弟色特襲博托

理滿洲鑲紅旗人姓佟佳子標哈襲圖渾蒙古正黃旗人姓巴林
關達爾禪滿洲鑲藍旗人姓索齊勒子哈爾松噶襲高杰正白旗
漢軍子可仰襲諾門達賴蒙古鑲白旗人姓烏朗罕濟勒們子巴
朗襲珠轍滿洲正黃旗人姓舒穆祿兒子塔庫襲天福鑲藍旗漢
軍子仲魁襲成功鑲黃旗漢軍子思寶襲麥圖滿洲正黃旗人姓
瓜勒佳天儲正黃旗漢軍弟天佑襲天寵正黃旗漢軍子弼襲鄂
克綽特巴蒙古人隸滿洲正藍旗人姓博爾濟吉特子根敦襲瓦
梯蒙古鑲藍旗人姓烏朗罕濟勒們兒子舒書襲鍾貴滿洲正藍
旗人姓納喇子費揚古襲

右 國史館本傳

皇朝通志卷之三十三

一

格布庫 西特庫等

格布庫滿洲正白旗人姓伊爾根覺羅世居雅爾虎嶺治元年以參領從睿親王多爾袞入山海關剿流賊李自成追至慶都復隨英親王阿濟格貝勒尼堪敗之二年議功授騎都尉世職三年肅親王豪格征流賊張獻忠格布庫及參領西特庫隊長古朗阿巴揚阿烏巴什隨焉十一月獻忠遣賊黨環營抗我格布庫奮勇戰破賊第一營步兵賊分兩翼豪格遣格布庫偕佐領蘇拜攻右翼都統準塔巴圖魯攻左翼賊自右翼下山來犯格布庫率本旗兵衝擊之旋從準塔翦其左翼賊圍我正藍旗兵格布庫偕佐領阿爾津噶達渾西特庫烏巴什往援格布庫中箭卒西特庫烏巴什

俱沒於陣賊退時僞將高汝勵據三寨山豪格遣古朗阿擊之大破其眾獻忠發大隊迎敵古朗阿直衝其陣賊奔潰未幾復合古朗阿偕瑚里布破之賊率馬步兵分三路來犯古朗阿奮勇進擊與巴揚阿均陣亡西特庫滿洲正藍旗人姓扎拉里世居瓦爾喀國初來歸由護軍參領從大兵三圍錦州破明總督洪承疇三營步兵敘功授雲騎尉烏巴什姓烏蘇世居巴彥喇與西特庫同旗古朗阿滿洲鑲黃旗人二年從英親王阿濟格擊流賊於延安府賊兵犯正白旗汛地古朗阿偕希爾根擊走之追至湖廣復偕希爾根圍承天府敗賊於江奪船五百巴揚阿滿洲正紅旗人與古朗阿後先擊賊於延安承天等府和碩額駙都統杜雷剿賊於江

西小池口巴揚阿在事有功五年六月議卹格布庫加一雲騎尉
子觀布襲西特庫 贈騎都尉弟辛泰襲巴揚阿古朗阿烏巴什
贈雲騎尉子揚古孫穆成格阿世圖各襲職

右 國史館本傳

--	--	--	--	--	--	--	--

陳六禮 子駘

陳六禮諸生湖南攸縣人順治元年張李餘黨自袁吉寇攸六禮
團鄉勇禦之三年山賊應輔作亂有眾萬餘六禮力戰被執不屈
而死妻朱氏同時自縊子駘亦死於陣順治中奉 旌建坊乾隆
六十年補給恩騎尉世職祀鄉賢

右傳李元度撰

四三二一
三二一

三二一

袁捷 漆尙友等

袁捷順天大興人歷官至湖廣掌印都司順治四年四月襄陽總兵王光恩有罪被逮其弟光泰舉兵叛令逆黨王昌說捷降捷大罵曰吾頭可斷志不可屈恨不磔賊以報 國耳昌怒縛至三元宮殺之參將漆尙友被挾至祿米倉亦罵賊死委署總兵楊文富奉檄入城賊突於通衢中刺殺之遊擊李顯功入援被縛越日遇害賊僞用明桂王年號僭稱鎮武伯民間則呼爲王二也其眾四出焚掠犯浙川河南巡撫吳景道檄鄖陽鎮前營遊擊尤現擊卻之七月侍郎喀喀木奉 命討鄖陽逆黨奔竄追至大岷破之是年瀘溪亦有叛兵姚啟唐之亂啟唐素不法弟啟聖黨惡密煽苗

眾殺劫暴骨如莽甚至剝人皮示虐阻險出沒辰沅靖道中軍守
備瞿應頡家故沅陵與瀘溪密邇向稔啟唐啟聖以軍騎馳諭連
撫四十六寨賊悉解散至密登有苗酋恨應頡之解其黨也許聽
約束誘而執之應頡罵賊死居民服其義共爲殮葬亂尋定而王
二等尙肆侵掠七年春王二糾巴東賊姚黃等窺南漳保康界尤
現進勦賊竄遠安縣由鹿苑寺馬家坪至五爪寨抄掠荊州總兵
鄭四維遣都司僉書署遊擊呂養蛟等往討乘夜越山進天明賊
連營爲犄角勢別屯營於下茅坪馬步合計千餘大軍衝入賊窟
山中逐至上茅坪王二率萬餘人奄至養蛟深入中槍沒官兵奮
勇進擊槍箭齊發斬其僞總兵熊應泰王二亦受傷遁九年十月

賊黨劉馬踰等再犯南漳尤現赴援與知縣姚延儒部署防守翌日現獨勒兵出郭邀賊賊未至日暮復入城詰朝賊突至雲梯礮火四面合圍守禦一晝夜賊增萬餘攻益急城破現將殘卒死戰皆盡單騎轉鬪出東門猶斃數賊力竭而殞中軍張先琇千總吳鎮邦張騰鳳把總閻貴尤國楚張文通皆陣歿十二月王二等復出掠黃鶯鋪鄖陽協把總劉源清戰死方王二姚黃之糾黨肆擾也川賊劉二虎郝搖旗亦先後陷房縣十年官兵征房縣襄陽鎮標中營把總籍國泰戰死於茅塔寨十七年鄖陽協把總閻三才復擊郝劉二賊於茅塔河之梯子巖戰歿康熙二年十二月西安將軍傅喀禪副都統杜敏等俘郝搖旗等斬之鄖陽諸邑始平先

後議卹 詔贈捷參將尙友副將文富都督僉事顯功參將養蛟
遊擊各錄用子弟一人餘卹如例現陝西人積功至副將應頡湖
南沅陵人尙友等籍俱無考

右 國史館本傳

李應宗 王紹基等

李應宗順治四年任福建建甯鎮總兵是年夏僞鄖西王朱常湖僞軍師王祈陷政和進犯古田應宗遣兵援賊偵知鎮兵弱直僞建甯城應宗與甌甯知縣王紹基及副將曹允吉募民夫分門守兩月餘賊益集城內糧垂盡紹基謀突圍不果七月四日天未明四面火起賊聚攻甯遠門應宗令允吉率兵出戰方酣允吉中槍墜馬死應宗憤前鋒之勦怒馬繼進亦中槍陣亡城破執紹基殺之建甯同知沈夢鯨之子時宜率家丁巷戰死於是建陽崇安松溪相繼陷崇安建陽二令奔浦城獨松溪知縣張朝國挺身出戰兵敗殉焉賊乘勢遂圍延平福建巡撫佟國鼎檄遊擊王鳳岐由

福州趨救九月鳳岐舟師至漳湖坂遇賊登岸逆擊大破之燬賊寨二寮數百擒賊將陳洪等次日至茶洋又破賊數千燒艇百餘又次日至金沙鋪賊水陸邀截鳳岐畱兵半阻水守而自率精銳聞道襲殺賊無數既而鳳岐中礮殞於陣家丁從死者吳正登李友鄭福王強鄧星余德朱文王國用盧光九人方是時明魯王朱以海亦遣將鄭彩從海道窺福州破連江閩清諸邑彩以兵扼連江之北山斷省城援路署連江營參將桂顯督孤軍奮戰力竭死之閩清守備洪自新以縣無城難守挺刃入賊營被礮死先後事聞 詔贈卹如例紹基奉天舉人時宜山東蓬萊人朝國江西金谿人餘籍無考

右 國史館本傳

清月等法東漢力庸
卷之三十一 忠義

三

									1000
									900
									800
									700
									600
									500
									400
									300
									200
									100
									0

1000 900 800 700 600 500 400 300 200 100 0

100

戴光升 賀朝賓等

戴光升浙江山陰人順治四年任龍南縣典史是年春土賊劉耀中反先是楊細徠聚眾寇掠官兵討平之細徠伏誅耀中其黨也遁去至是閩粵寇閩某擁眾攻定南因與通復煽諸匪列旗據寨龍南知縣呂應真往諭耀中不受撫肆劫略應真乃命各鄉出夫爲兵名營曰義勇與光升統之命邑紳賀朝賓諸生廖乾彝謝賜廩謝竝陳魏崑葉茂然許蘭吉曾世章曾世迪曾汝宮分領其隊遇賊於黃沙堡乾彝拔戟先入賜廩繼之賊敗走賜廩等議擣賊巢耀中窮蹙乞救於閩賊閩賊率眾猝至夜襲光升營乾彝賜廩奮身出殺數十人賊蜂擁至鄉兵素未習戰蒼黃出鬪賊往來衝

突軍遂潰乾彜賜糜力戰死光升等先後沒於陣應夏僅以身免
明年閩賊復來攻應夏被執不屈死別有傳朝賓由監生任浙江
湯溪縣縣丞遷温州府經歷致仕歸謝竝武勇絕倫茂然年最少
有文行賜廩狀貌魁梧每戰多斬殺其沒也所乘馬逸歸悲鳴不
食死顯撫劉武元總兵柯永盛遣兵誅耀中龍南定事

聞

右 國史館本傳

傅世烈 方重剛

傅世烈奉天人順治元年充內院副理事官二年投山東曹縣知縣三年五月擢江南松江府知府明長興伯吳易聚兵太湖遙奉魯王朱以海分擾州縣遂平王朱紹鯤入其軍中與故官方楊謨陳索等相結世烈甫蒞任易遣其黨窺松江西倉城勢甚熾世烈請援於蘇松總兵官吳勝兆不應勝兆故以明副將迎降從下江南擢總兵驕恣不法屢見責讓陰懷異志世烈知不足恃卽遣子鎮國鎮邦偕提標中軍詹世勳遊擊郭文舉率兵往襲之十一月擒紹鯤楊謨等世烈以功遷徽甯道未行四年以海踞浙江之石蒲遣兵窺吳江勝兆使其部將乘勢肆掠閩浙總督張存仁劾之

勝兆謀益急時明給事中陳子龍家居以海授以部院銜使募兵勝兆乃因子龍通表於以海復遣人至舟山請總兵黃斌卿赴援斌卿貳於以海兵不發以海授勝兆平江將軍遣其督師侍郎沈廷揚翰林學士張煌言等率舟師赴之至崇明次鹿苑颶風大作舟覆軍殲廷揚死煌言走經略洪承疇謀知子龍等謀發兵捕之子龍死勝兆知事泄假議勦太湖爲名邀同城官至署脅以叛推官方重朗不從殺之羈華亭縣知縣潘必鏡驅眾出城世烈聞變卽率世勳等攻其署勝兆陰養死士困鬪甚力世烈冒鋒刃直前眾披靡盡殺賊黨及勝兆妻孥勝兆入城反鬪世烈麾眾擊之擒勝兆送江甯承疇斬之世烈受重創遇必鏡逸出屬以城守事遄

時卒八年十一月其子鎮邦疏請 賜卹下部臣議九年四月
贈太僕寺卿廕一子入監

右 國史館本傳

王德教 王維新等

王德教奉天人順治三年任河間知府四年土賊起河間東至天津及渾河左右俱擾蠡縣賊率眾徧河間府城德教與河間兵備道王維新嬰城守委守備王丕承章羽泰分汛抵禦丕承羽泰潛通賊乘大雨引寇自南門入叛卒著白盔白甲雜寇中躍馬入市殺人德教聞變率家丁巷戰死於南門內巡檢潘柱典史邵鯤咸隨戰同日死維新縊於署後之火神廟天津賊莽寒等聚眾唐官屯肆掠天津鎮標中軍副將周天命率兵抵賊巢力戰身被刀箭面受重傷死有薛承所者亦莽寒黨居灣頭天津鎮標中軍遊擊王應春往捕獲其黨三人馬一匹行近唐官屯賊偵知之率眾出

劫槍矢並發傷應春馬首馬驚入村被鉤落馬死又土賊羅洪宇亦乘機謀攻天津先犯海防營遊擊趙成功躍馬出殺賊百餘身中三矢賊引去越數日賊三千餘復來攻成功裹創出戰力竭陣亡洪宇復糾合德平賊至甯津縣天津鎮右營遊擊孔道興駐防吳橋聞報赴援遇賊於張官店奮勇衝殺受傷落馬死又滄州盜李祥羽肆劫吏目王廷貴率捕役鄉兵出捕至王官村馬賊二十餘步賊百餘驟至廷貴指揮鄉兵截殺鄉兵失利廷貴亦遇害次年秋土賊劉東坡肆掠渾河左右東安縣典史陶宏才奉檄會剿率民兵三百餘馳至武清界西奮力抵禦手殺數賊身中八矢被執不屈死先後事 聞 詔贈德教太僕寺卿維新光祿寺卿各

廕一子人監天命廕都司經歷道興 贈參將餘卽如例雜新奉
天人饒所江紹興人天命直隸天津人宏才浙江會稽人餘籍無
考

右 國史館本傳

Table with 8 columns and multiple rows, mostly empty.

Vertical text/number in the right margin of the table area.

Small vertical text/number near the bottom right corner of the table.

高咸臨 錢嘉倫等

高咸臨浙江仁和貢生順治三年貝勒博洛征浙東未下郡縣駐師杭州咸臨及同縣舉人錢嘉倫並在軍營司冊籍五月浙東底定大兵下福建咸臨嘉倫及董潏胡天湛並從潏江南江都人天湛四川井研人也博洛師至福州明唐王朱聿鍵擒於汀州福建郡縣俱下博洛以咸臨知永安縣嘉倫知順昌縣潏知沙縣天湛知大田縣四年二月大兵凱旋未幾土寇竊發梁欽及妖僧米逢年等分道劫掠閩大擾總督張存仁以將樂當衝要檄錢楞署縣事楞浙江嘉善拔貢生以軍功擢用者也咸臨豫設守禦民恃以無恐潏善撫字流亡漸集四月逢年攻沙縣潏多方拒之閩三月

不懈一日賊攻東門潯併力捍禦縣丞黎某陰通賊啟西門賊大至潯急率子亦舒壻張思治家丁五十三人巷戰皆死潯被執罵賊甚厲賊怒叢射之復斷其首而去賊攻大田天湛調鄉兵爲備城孤援絕賊突破其城天湛被執不屈死七月賊黨吳長文等攻將樂榜斬奸民通賊者晝夜登陴九月城陷榜闔署被害時三縣連破賊勢益張梁欽使其黨林士擁眾犯永安大呼脅降咸臨率從弟其翰從子顯宗迎戰顯宗其翰並戰死時錢塘吳之璜赴淳平教諭任咸臨知其有謀招入城之璜爲咸臨設策出賊不意擊破之賊憤甚去攻順昌嘉倫身擐甲胄日坐城樓典史周世榜生員劉元鼎分運礮石城不能不欽遣其黨何引祐設長圍以困永

安而併力攻順昌掘地道城摧賊盜入世榜元鼎俱死嘉倫搏賊
不中踞坐大罵賊割其舌罵猶不絕聲賊支解之引祐攻永安益
亟十一月糧盡城陷引祐執咸臨脅降至再不屈罵賊死之璜亦
被殺九年巡撫張學聖上其事 詔贈咸臨嘉倫璜天湛福建按
察司僉事 賜祭葬廕一子入監部議以榜係署篆官未及贈廕
雍正六年榜孫以增官禮部左侍郎具疏以請 諭曰錢以增所
奏甚是伊祖錢榜以委署知縣能盡節殉難尤爲可嘉從前未加
恩卹乃部議疏漏著將所請交部查明議奏尋議照例 贈福建按
察司僉事廕一子入監 賜祭葬璜孫鼎以廕任沙河知縣累官
馬湖府知府世榜浙江義烏人與元鼎並從祀順昌忠義祠

國史館本傳

右 國史館本傳

三

吳允焯 潘際昌等

吳允焯浙江仁和人由貢生授知縣先是順治三年六月征南大將軍貝勒博洛定杭州允焯與邑人潘際昌胡萬鑑錢塘沈孚建上虞周祖唐及浙江人戴眞學蘇州人周星炳並投軍效用時博洛幕中已有錦州郭之秀咸陽許國枏及湖廣貢生劉泰陽等俱挈入閩九月博洛抵福州奏請各授知縣於是永焯知壽甯際昌知永春萬鑑卽爲其縣訓導孚建知政和眞學知漳平泰陽卽爲其縣教諭星炳知永福之秀知福安國枏知漳浦祖唐爲海澄縣教諭當是時明唐王朱聿鍵雖削平而山海多寇永福縣城再陷知縣翁日賓甫受事卽殉難其明年星炳繼之城復破被繫絕食

死時下游山賊亦響應際昌偕萬鑑同守永春城凡四閱月城破
際昌赴水死萬鑑率諸生誓賊死孚建罵賊死國柙投井死皆以
官守就義時海上寇氛南則鄭成功陷海澄北則魯王朱以海陷
福甯成功初誘祖唐同入海祖唐不從成功繫歸廈門脅之降祖
唐勵聲斥其背親逆命賊怒殺之之秀守福安中流矢卒而允焯
之守壽甯其氣尤烈兵敗被執拷掠無完膚加腦箍懸於樹罵不
絕口而死妻瞿氏聞夫被害投繯以殉皆順治四年事也後一年
劇賊王鎬擁眾萬餘犯漳平眞學偕泰陽嬰守彌月賊夜逾城入
眞學度不能禦乃入署手刃其妻謀突圍出賊得之剖其心泰陽
亦投水死事並聞各賜贈卹如例日賓籍無考

右 國史館本傳

國史館本傳

三三三

										1111
--	--	--	--	--	--	--	--	--	--	------

李可愛子化春
密念啟等

李可愛鑲黃旗漢軍人順治四年由貢生授山東陽穀知縣時壽張土寇丁維岳等肆掠十二月擁眾圍城可愛率子化春及縣人貢生密念啟生員李近蟾等轉戰自寅至辰殺賊無算賊自城西北隅入可愛化春密念啟近蟾俱陣歿賊剖可愛屍并戕其妻劉氏生員國運熙張光世孫重光縣役丁泰徐洪勲崔文貴平福增王成召布彥成布五典李逢春鄉民張丕顯俱同死賊旋攻日照知縣王明臣浙江山陰人設備固守賊屢攻不下舍去未幾復集黨來攻城陷明臣殉兗州府學訓導署張秋捕盜通判蔡廷璵以計擒維岳斬之賊稍平論功擢廷璵曹縣教諭五年七月維岳黨李

化鯨陷曹縣化鯨本兗西道標守備與賊通先遣騎三十餘至曹縣僞稱迎其家守門者納之賊薄城內應起廷棟禦之於東門戰歿訓導車軾英死於南門戕兗西道黃登孝於署黃河廳同知高元美督工於曹家口化鯨遣賊執之剄死曹縣南門外千總戴英典史余成信俱死之先是化鯨攻城武知縣宋賢都猝不及防以甘言誘之化鯨去攻曹縣賢都募死士夜薄其營化鯨覺還攻之賢都力戰死闔家二十八人化鯨皆斃之賢都既死教諭尙自察署縣事集民兵捍禦伺賊懈擊之旬月賊平自察以勞卒廷棟賢都俱奉天人自察四川人登孝正黃旗漢軍人元美河南祥符舉人軾英成信籍無考八年議卹 詔贈可愛按察司僉事登孝光

祿寺卿各廕一子入監餘卹如例

右 國史館本傳

中華民國二十九年五月

三三

--	--	--	--	--	--	--	--	--	--

阿囊阿 費揚住等

阿囊阿滿洲鑲紅旗人姓伊拉理順治元年以佐領隨和碩睿親王多爾袞進山海關敗流賊旋隨都統葉臣征山西用紅衣礮攻克太原城三年隨豫親王多鐸追騰機思擊敗土謝圖汗及碩羅汗兵授雲騎尉世職四年隨副都統圖占駐防山東東昌府擊土賊與雲騎尉費揚住同歿於陣費揚住滿洲正黃旗人姓甯古塔崇德三年從貝勒杜度征明至山東用雲梯攻夏津縣先登授雲騎尉至是中槍歿 詔贈阿囊阿騎都尉子阿岱襲費揚住 贈騎都尉兄渾柱襲先後征山東土賊陣亡者順治三年有騎都尉瑚紐隨副都統覺善擊賊戰歿於平陰五年兗州營守備李化鯨

通賊陷曹縣有干泰者於順治二年隨大兵追流賊三年從征湖廣俱有功及是隨英親王阿濟格討化鯨戰歿於曹縣又有護軍校尙吉圖以順治十五年從征雲南隨大兵敗李成蛟於涼水井又敗李定國於潞江至十八年從靖東將軍濟席哈勦賊于七於棲霞戰歿瑚紐滿洲正黃旗人姓扎庫塔 贈騎都尉兼一雲騎尉子穆成額襲干泰滿洲正白旗人姓瓜勒佳 贈雲騎尉尙吉圖滿洲正紅旗人姓納喇 贈雲騎尉弟薩欣襲

右 國史館本傳

國朝耆獻類徵初編卷三百三十四目錄

忠義四

張文衡

林維造

金印

張鵬翼等

翟大有等

達賚

托鈕等

黎樹聲

尚香策等

李芝桂

張泰瑞等

趙允振

周載緯

鄭國佐

夏可升等

丁啟震

何衡泗等

劉方至

吳夢鼎等

遲變龍

劉金柱等

布達理

阿桑等

俞一鷺

子觀生 謙生 郭自修等

鍾固

納能額等

宋子玉

王家珍等

李允昇

佟學詩等

李向禹

吳希賢等

王昌齡

劉澤溥等

王希舜

夏廷印等

張懋勳

李士麟等

鄒引昌

袁夢吉等

塗廓

張必科等

鄭宏圖

李因之等

武韜 王廷衡等

司九詔 錢法裕等

周文煜

索甯 克什特

國朝耆獻類徵初編卷三百三十四

通奉大夫前署江西巡撫江西布政使司布政使相陰李桓輯

忠義四

張文衡

張文衡遼東開平衛人初爲明諸生天聰八年 太宗文皇帝親統大兵由宣化府入明張文衡自大同走謁言在明爲代王府參謀見明國諸臣結黨貪財專意罔上嚴刑厚斂民不堪命臣審時度勢知天命有歸成大事者必在 聖主故徒步來歸又疏陳進取之策以收服人心爲本 上嘉納之授祕書院副理事官 賜田宅銀幣以大臣雅希禪女妻之隸鑲黃旗漢軍 世祖章皇帝

順治元年七月授山東青州府知府甫之任總兵柯永盛率青州駐防兵征高密招撫侍郎王鼐永至青州籌備軍餉流賊李自成裨將趙應元由長山縣結土賊數千掠民馬數百踰青州兵少佯就鼐永招撫請置其家屬於城中而自率眾助征高密既入城以乏餉鼓譟執鼐永殺之文衡分遣官吏告急於永盛及登萊巡撫陳錦自往見應元許以保奏畱鎮青州卽草疏佯詆鼐永激變謂應元殺鼐永由部眾所倡願立功自效遣人齎奏應元信悅搜庫金與羣賊縱飲會自京出征登萊之副都統和託李率泰統師至駐營於城之西北文衡誘應元至軍營通款和託等慰勞遣還密令我兵隨文衡入城分布防守乘夜擒斬應元及其黨數十人徧

諭脅從者弗罪賊遂平二年調淮安府知府時豫親王多鐸統師
征揚州過淮安文衡請禁兵卒入城市俾居民安堵軍糧戰艦及
芻秣皆應期立辦三年總督洪承疇奏擢徽甯道淮安士民籲留
漕運總督王文奎疏 聞不允時徽州土賊汪張飛劉祥等猖獗
蔓延文衡助諸將勦平之四年四月擢江南按察使八月授甘肅
巡撫五年二月至蘭州受事三月陝西總督孟喬芳調蘭州鎮兵
征四川逆回米喇印丁國棟既降復叛窺鎮兵憚於遠征陰結中
軍參將蔣國泰等詭言會議邀文衡至米喇印家文衡將至賊集
矢射之遂遇害時年四十有七總兵劉良臣西甯巡道林維造守
道張鵬翼副將毛鎮潘雲騰遊擊黃得成都司王之儁守備胡大

年等皆同時殉節事 聞並 賜卹有差文衡 贈都察院右副
都御史廕一子入監康熙二十一年入祀開平衛鄉賢祠雍正十
二年入祀昭忠祠

右 國史館本傳

林維造 張鵬翼等

林維造福建晉江人尙書學曾子順治四年廕甘肅鞏昌府知府
有惠政擢西甯道副使流賊李白成餘黨潛蹤山谷維造勦除之
五年四月戊戌逆回米喇印陰結涼州逆回丁國棟肅州逆回土
倫太等叛會陝西總督孟喬芳調蘭州鎮兵征四川米喇印窺鎮
兵憚遠征煽中軍參將蔣國泰誘殺甘肅巡撫張文衡佯言兵變
擁維造至北關搃殺之庚子陷涼州執西甯道參議張鵬翼不屈
死文衡自有傳鵬翼山東東平州人甲寅賊渡河分寇臨洮鞏昌
諸郡縣臨鞏兵備道李絮飛死之絮飛遼東人同時以身殉城者
有杜懋哲王札趙衝學趙紳徐養奇李滄周盛時白旗國學錦懋

哲直隸寶坻人初知山西長治縣有惠政除驛站派累諸弊遷甘肅岷州知州逆回脅之降懋哲曰有讀聖賢書而臨難苟免者乎札直隸平谷人與懋哲前後任岷州知州同死之衝學正白旗漢軍任蘭州同知鞏河南鄭州人官蘭州知州或勸棄城去鞏曰身與城存亡死吾分也養奇官臨洮撫民同知籍無考涇直隸定興人順治二年官涇源縣知縣五年遷臨洮同知未之任城中奸民應賊被執遇害盛時籍無考知秦安縣勦賊黨於通渭縣之圍子山被創卒旗陝西郿縣人學錦正白旗漢軍俱任蘭州訓導事平議卹 詔贈維造鵬翼絮飛光祿寺卿懋哲養奇按察司副使鞏布政司參議涇盛時按察司僉事各廕一子入監祭葬如例旗國

子監學錄學錦廕卹無考

右 國史館本傳

日本書紀卷之六

四

金印 翟大有等

金印甘肅甘州人順治五年任甘肅都司僉書署阿壩營游擊甘州回人米喇印者起卒伍累官甘肅副將素著異志值關中甫定搜捕餘孽賊黨不自安喇印乘機與涼州丁國棟肅州土倫太高自龍臨洮闖塌天諸逆回陰相結會調兵征蜀喇印知士卒憚遠征因煽亂殺巡撫張文衡事詳文衡傳國棟等聞喇印反亦聚眾連陷涼州肅州渡河寇臨洮鞏昌諸路四月賊圍阿壩印鏖戰斬賊甚眾賊不退力竭陷陣死賊遂攻擺壩川莊浪參將翟大有戰歿於裴家營旋破蘆塘營游擊王應將死之方喇印反甘州時執南古城守備李廷試授僞官不從賊手刃之士倫太陷肅州時守

備陳九功李承澤同守九功戰死城中承澤被縛至嘉峪關殺之
闖塌天陷臨洮時臨洮道中軍守備王世德劉繼祖俱巷戰死狄
道州生員李文煒李毓秀王興孫三傑死之尋總督孟喬芳督兵
至鞏昌誅喇印國棟竄至肅州擒斬之事平議卹 詔贈印九功
俱都司掌印大有都督僉事廷試承澤俱都司僉書餘卹如例大
有應將廷試俱直隸人世德甘肅河州人餘籍無考

右 國史館本傳

達賚 托鈕等

達賚蒙古鑲藍旗人姓鄂禮克初任閒散章京順治元年偕侍衛鄂哈騎都尉托鈕佐領圖薩閒散額布亨莽郭等從睿親王多爾袞入山海關流賊李自成眾二十萬猝至大兵奮擊托鈕圖薩額布亨中礮歿鄂哈莽郭亦陣亡達賚隨都統葉克舒戰益力大敗賊眾敘功授雲騎尉是年冬隨豫親王多鐸追賊至潼關賊擁馬步眾來犯達賚先設伏關外連敗之尋隨貝勒博洛至浙江敗敵兵於嘉興回師攻崑山下之五年甘肅逆回米喇印丁國棟等倡亂達賚隨大兵赴剿奮戰中礮歿 詔贈達賚騎都尉又一雲騎尉子扎穆素襲托鈕滿洲鑲黃旗人姓富察先襲騎都尉世職崇

德三年隨貝勒岳託征明擊敗明馬總兵渡渾河時明兵躡我後
擊走之比出關殿後明兵復來追又敗之至是加 贈一雲騎尉
弟蘇拜襲圖薩蒙古正藍旗人姓烏朗罕濟勒們 贈騎都尉子
鄂齊邁襲額布亨蒙古鑲黃旗人姓科爾遜 贈騎都尉子奇塔
忒襲鄂哈滿洲正紅旗人康熙二十年追 贈護軍參領莽郭滿
洲鑲藍旗人姓尼拉 贈騎都尉襲無考

右 國史館本傳

黎樹聲 尚香策等

黎樹聲浙江烏程人順治三年征南大將軍貝勒博洛由浙征閩
樹聲以舉人從軍屢著勞績奏授福州府推官四年委署興化府
事時明魯王朱以海令其大學士朱繼祚句結諸寇連陷郡縣遂
偪興化城樹聲偕劄委游擊尚香策晝夜巡守不居署者十餘月
守道彭遇颺蓄異謀爲賊內應城中僚屬自通判推官以下皆附
和獨樹聲香策與劄委都司雷世清張天才守備游宗選等不從
遇颺深恨之先以計誘世清天才宗選三人殺之五年四月十七
日遇颺開門迎賊入香策巷戰力竭死樹聲被殺於十字街興化
府司獄林又鑒莆陽縣丞廖正澄通仙司巡檢張用賓大洋司巡

檢李有芳同時不屈死賊之圍郡城也巡撫佟國爾遣署參將路
運皞守備許國楫自福州赴援運皞沿途勦賊至興化屢有戰功
既而國楫留郡協防運皞被調回福州至烏龍江遇賊運皞逆戰
中礮歿於陣兵張仁梁才胡啟雲皆從死先後事 聞 贈樹聲
按察司僉事廕一子入監讀書 贈香策爲實授游擊世清天才
爲實授都司運皞實授參將令子弟一人赴部酌用餘 贈卹有
差

右 國史館本傳

李芝桂 張泰瑞等

李芝桂奉天人順治五年以貢生授山東東平知州抵任甫二十日汶上騎賊四五百營於楊柳店四出劫掠芝桂聞警令州同萬方遠等守城率家丁出城瞭探抵城東柳林村遇賊四十餘即迎勦賊敗竄時分守兗東道劉可徵亦來援同追賊至三官廟樹木叢雜賊伏騎五百餘步賊無算芝桂奮勇入殺馬賊數人可徵兵亦殺賊十餘暮收兵芝桂已入重圍負傷陣亡事聞 贈山東布政司參議廕一子入監是時大兵新定山東土寇猶竊發前後陣亡者有紳士張泰瑞趙良輔孫贊元杜之棟千總孫可誦齊振海等泰瑞淄川人明生員順治四年賊謝遷攻淄川泰瑞倡義抵禦

城陷被執脅以刃厲聲曰死則死耳肯從賊爲亂耶賊攢刺之罵
不絕口死六年賊李梗攻新泰生員趙良輔以罵賊被殺八年謝
遷復聚黨劫長山經淄川會功令各縣舉縉紳中才略君一人練
鄉兵備寇淄南推生員孫贊元贊元聞賊肆劫單騎往禦矢斃賊
二十餘矢盡以佩刀殺賊數十力竭自刎是年山寇王肖吾破郟
城舉人杜之棟不屈罵賊死可誦振海並隸兗東道標千總可誦
勦賊於兗州府城振海勦賊於柱子山皆力戰陣亡可誦振海俱
蘭山人

右 國史館本傳

趙允振

公諱允振字麟生姓趙氏濟南齊河人始祖居敬居敬生禮禮生廣廣生禎禎生宿宿生崇仁崇仁生三子季慎行公之曾祖父也祖來秦父之蘭趙氏自崇仁始爲諸生累世家學不就外傳故公習舉子業最蚤乙酉舉於鄉丙戌成進士授阜城知縣時 國家初定奉 旨圍屯禁旅阜城故在屯外忽有數騎妄稱圍屯冀厚賂公遽索部檄竟斂戢遁去未幾調衡山縣既至見城垣傾圮民苦盜往往伏篁箐中公招徠其守禦賊首汪一煥率其黨掠村落公設伏禽之渠帥有佟秦二姓者據新開嶺爲巢穴近二十年官吏莫誰何公統民兵張左右翼突至其營眾駭散衡山乃平頃之

流賊李自成餘黨自江西來眾數十萬人攻陷湘潭扼衡永咽喉所至郡縣輒潰賊渠遣人陷以美官公不聽捕而斬之賊大怒悉眾來攻衡故無城郭公北望泣拜聚士民誓以忠義賊至巷戰猶斃賊兵千餘既被執備極荼毒終罵不屈遂見殺子男二人長瑞吉廩生次瑞晉甲戌進士公殉難時瑞吉兄弟甫八九歲無力上聞故卹典不之及昔張巡以睢陽抗賊死議者或罪巡以食人愚巡以死守嗚呼甚矣小人之不成人之美也向使督撫上之朝則卹死之義彰又使瑞吉兄弟成立如今日亦必能力請於督撫惟趙氏無強近之親而國初法制草創大吏視死事爲適然故四十餘年來公之英魂碧血已與江霧蠻煙同其變滅雖公以七

尺之軀甘付鋒刃何有於區區身後名然不表而出之何以爲人
臣處變者之勸語曰玉剖而良桂伐而芳言士不遭隄其節末見
也豈不信哉

右傳李澄中撰

按閩賊餘黨擾湖南順治五年事

周載緯 夏可升等

周載緯湖南湘潭人順治初流賊掠縣率鄉勇守禦賊不敢犯逾
年賊復至詐敗誘執之迫脅萬狀至死不屈又有夏可升沅陵人
黔寇王進才馬進忠攻陷城邑可升奉辰沅巡道檄率鄉兵扼於
黔陽屢與賊鏖戰陣歿巡道重其戰烈爲殮葬之後其孫諸生禹
德過黔陽乃封墓樹石誌其事黃金龍桂東人紅寇掠境金龍率
鄉兵禦於扶村賊不得越逆民曾某引賊藏箬洞前後夾攻人馬
俱陷淖死張進者新化人張尙禮僕也王進才之亂尙禮命進往
偵被執僞言其主所在進給曰主固有在但劫之以眾恐驚竄耳
信之遣二卒同往至則大呼曰主速避緩則無及矣我祇辦一死

耳尚禮舉家遁去頃之賊眾至一卒言其故械赴賊營割舌抉眼拔筋抽腸而死

右傳李元度撰

按流賊掠湘潭在順治五年

鄭國佐

歲庚戌子得締交鄭山公其爲人外英潤而內精朗矯然不同流俗與人言必勉以忠孝子心知其學有自也往叩之山公曰此子先人之遺訓也言未畢輒嗚咽伏地若不克舉其辭者子亦惻然不忍竟其說後山公歷官皆卓然有聲洊至卿貳晉秋官侍郎今年春以其府君暨太淑人行述來請詳述殉節始末其嗚咽伏地者如故且乞一言以書隧道之石夫匍匐哀號以冀顯揚其親者人子之心也人臣有身殉大義必褒以殊典命史官書之者朝廷之事也若闡幽顯微彰淑善節烈以風世勵俗亦秩宗之職也子烏敢以不文辭按狀公諱國佐字振華先是自河南徙閩之建

安代有名儒以正學傳家至建州公諱世敬者生三子公其季也
生而天資穎異通經術少卽以砥節礪行爲志自建州公早棄世
母黃太淑人矢節撫孤公娶徐太君爲配亦以閩德著聞與之偕
奉事黃太淑人春秋高每有疾輒焚香告天請以身代事伯兄正
甫公尤極誠敬蓋其孝友出於天性有過於人者順治丙戌秋
王師已定閩矣金壇人王祁者黃巾青犢之尤也潛於山谷聞嘯
聚羣不逞窺郡城單弱於丁亥秋八月攻陷城踞而有之時公先
已挈家出城避於西鄙久之因太君病困須醫藥復偕太君入城
當是時賊劫掠士紳至慘毒固已人心不附而賊堅壁以守不使
一人得出勢日窮蹙大兵又雲集城下旦夕卽克復無計自脫將

洗城以竄公曰吾甯死於國不死於賊且生不能手刃逆徒願速以滅賊手書數語於赫蹏置之壁間遂舉火自焚太君亦從容同赴蹈以死焉嗚呼始終者萬物之大節達人知命志士成仁遭遇不同有不可苟焉以處者今適丁厄數獨捐生勵節白首同歸公以布衣而守不辱之義太君以羸笄而全從一之貞雖長算未伸遠跡是頓而大義凜然如火烈烈豈可易得哉聞公嘗卜築三十六峯之下借二三逸士讀書談道吟風弄月其學以格物致知窮理盡性爲歸是其從事聖賢之學已久見危致命舍生取義胸有定見是豈一時氣矜慷慨一烈之徒可同年語哉事平之日少司寇入城於敗瓦頽垣荒燐殘礫中痛抱遺骸號天泣血絕而復甦

者再四顧旁皇從牆隙中得手書有望吾兒勉爲忠孝上報君父
下撫弟妹之語今司寇爲望郎爲名卿行將有霖雨鹽梅之任移
孝作忠少司寇固無忝所生而公與太君亦可含笑於九京矣公
生於前辛丑八月二十日辰時太君生於前壬寅正月初一日同
歿於順治戊子四月初三日以子貴 誥贈通議大夫刑部右侍
郎太君 誥贈淑人至旌門祀典則尙有待也男子二人長重戊
戌進士官刑部右侍郎次默歲貢生山東萊州府濰縣知縣子與
少司寇爲同年友則於公亦有子弟之誼敢竊取大招之意以爲
銘銘曰

閩中逖祖來太梁龍池築室遠芬芳條分葉散著潭陽州人指點

鄭公鄉書帶草生開講堂深山大澤生非常公侯袞袞世卜昌景
天胡爲降不祥炎炎烈烈延崑岡疾風勁草正氣張身蹈紅燄日
爭光鹿車泉路雖茫茫怡然猶對梁孟光是宜穿冢要離旁松楸
萬古永相望烏頭棹楔志其藏琬琰大書姓字香

右墓誌銘徐倬代某撰

丁啟震 何衡泗等

丁啟震陽信人順治四年知城步縣明年賊陳友龍陷武岡遂攻城步七月城陷啟震死之時有何衡泗順天人知武岡州賊陳友龍來攻衡泗拒守三月餘食盡城陷與鎮將賀雲同登清渠門樓縱火自焚死又文運亨遼陽人知新田縣值猺賊犯城運亨率民兵拒守城陷因遇害陳之奇山陰人任新甯典史峒苗易漢字煽眾爲亂橫劫城庫之奇死焉

右傳李元度撰 按賀公雲
狼山人

劉方至 吳夢鼎等

劉方至山東掖縣人順治元年恩貢生二年十一月選浙江紹興府推官時明魯王朱以海據紹興方至從總督張存仁於杭州佐調兵食三年魯王遁入海方至始莅任時山寇多遙奉魯王封號犯蘭谿署知縣吳夢鼎死之夢鼎錢塘人山寇攻秦順縣人曾三鳳率鄉兵邀擊與弟三重三益並爲所殺惟紹興以方至善守禦寇不敢猝發五年總督陳錦檄方至署上虞縣魯王據舟山分遣所署侍郎王翊李長祥擾內地方至聞警卽偕駐防千總孔大有禦之西匯嘴且請援師錦方勦海寇於福建援未至長祥以海舶乘潮入曹娥江薄上虞方至嬰城守而王翊自大嵐山突破城方

至大有俱戰歿錦疏言舟山餘孽連踪偏紹郡躡上虞方至等以眾寡不敵殉節死非失陷城池者比 詔贈方至按察司僉事廕其子涵之國子監學錄涵之仕至紹興府知府大有卹銀八十兩自魯王漂竄海外浙東州縣多被擾其所署侍郎張煌言久踞海島十四年圍台州知縣劉登龍守備鄭之文並以殉節死登龍奉天人由監生授黃巖知縣之文江南休甯人以武進士任甯台海防道中軍守備煌言以巨艦泊台州外洋守將馬信爲內應台州遂陷知府齊維藩臨海知縣黎嶽詹俱降之文率眾巷戰力不敵奔還署令家屬皆自盡語未訖追者縛去誘降不從被殺遂犯黃巖汎弁王戎議降登龍叱之曰三尺土尙可守汝謀叛我當與城

俱亡耳我執登龍迎降繫於舟脅以刃不屈縛投於江十五年
贈登龍按察司僉事廕一子入監之文 賜祭葬廕一子騎都尉

右 國史館本傳

遲變龍 劉金柱等

遲變龍漢軍正白旗人天聰時由生員授 國史院副理事官順治元年擢山西糧道三年升江西布政使時封疆初定變龍招集流亡整飭學校五年金聲桓王得臣據南昌叛執變龍誘之降不屈縛全家以脅之變龍罵益厲賊怒割舌剜目碎其尸於市其家十八人繫石沈之江康熙三十四年 詔入祀名宦祠聲桓分犯吉安南康撫州吉安知府劉金柱嬰城守力屈死之金柱本名昌直隸定興人以生員順治二年授開州知州擢知府至是力屈死之靖安知縣楊泰聞兵至奮然曰吾守土臣分當死授兵登陴晝夜守禦城陷死之泰山山西偏關人順治初由選貢生授知縣賊掠

星子縣知縣周如春率士民守禦糧盡援絕城陷被殺妻張氏妾
吳氏縊死家人二十一口殉如春山東金鄉人由歲貢生授知縣
金谿知縣王顯聞聲桓叛知賊必分掠先完城守未幾賊至環攻
之顯多方守禦援絕死之顯直隸望都人明末貢生遇變棄妻負
母以逃順治二年除金谿知縣土寇起單騎入巢降其巨魁至是
遇害聲桓遣僞將白之裔潘永禧吳高等陷九江江南宿松與九
江接壤賊突至縣丞遲大魁乘城守或勸之逃大魁曰官雖微義
不苟免力戰死大魁奉天人金柱泰如春顯大魁等廕襲俱無考

右 國史館本傳

布達理 阿桑等

布達理滿洲正紅旗人姓赫舍里崇德三年以參領從貝勒岳託
證明猝遇敵佐領齊明阿所部兵撒爾沙墜馬布達理衝陣入援
之出六年隨鄭親王濟爾哈朗圍錦州敗明經略洪承疇援兵松
山兵來奪紅衣燄復擊走之順治元年隨睿親王多爾袞入山海
關破流寇有功十一月隨豫親王多鐸南征屢敗賊於潼關二年
至江南擊偽總兵王某於青浦縣獲戰艘三十二年敘功授雲騎
尉世職六月隨豫親王多鐸征騰機思連敗賊眾又擊敗願羅汗
兵五年江西總兵金聲桓叛 命征南大將軍譚泰討之布達理
偕一等輕車都尉阿桑及七品官肯特閒散阿爾都俱從征偽總

兵洪某據湖口縣布達理擊敗之聲桓率其黨王得仁引馬步兵
七萬薄大營布達理出禦中箭歿阿桑阿爾都俱陣亡聲桓遣僞
將白之裔陷饒州譚泰偕都統和洛輝進剿肯特力戰死大兵復
饒州進攻南昌六年斬得仁聲桓中矢投水死事平議卹 詔布
達理加 贈一雲騎尉子屯岱襲阿桑加 贈一雲騎尉以從子和
善襲阿爾都 贈騎都尉弟阿達哈襲肯特 贈雲騎尉襲無考
阿桑蒙古正黃旗人阿爾都滿洲鑲白旗人姓瓜勒佳肯特滿洲
鑲藍旗人

右 國史館本傳

俞一鷺

子觀生謙生
郭自修等

俞一鷺江南江甯人順治四年任建昌參將時江右土寇連歲竊發武甯賊鄧打卦掠建昌一鷺嬰城守令二子觀生謙生分汛抵禦賊引去五年復率眾猝至一鷺力不支比城陷易朝服觀生謙生侍賊入父子同罵賊死七年山寇張自聖攻石城知縣郭自修以大義激士民固守城陷被執怒罵不屈自聖手刃之邑人爲殮葬其孫維屏往迎櫬歸郊祭者數十里不絕同時萬應龍圍樂平知縣尹衡禦之賊乘夜毀城入衡率家丁格鬪殺數賊身中矢并刃傷死姪又新及二僕俱戰死眷屬爲賊害又東鄉縣知縣汪基遠聞巨寇王君寵肆劫捕其黨胡和尚雷正諸人置獄君寵集羣

盜夜攻縣漏四下用雲梯越城擁入署基遠率家丁禦之力屈被
害八年崇仁縣黃堯入劫亂蓄器械據巢穴糾黨將攻城先焚掠
近村徐登一元允十家二人亟告變知縣夏謨率鄉勇往擒賊偵
知之預設伏於中途之三山廟出不意執謨不屈死家丁劉梅五
李奇三等三十餘人同時殉先後事 聞各 賜贈卹如例衡浙
江歸安人基遠湖北黃岡人俱順治己丑進士自修山西絳縣貢
生謨直隸平鄉舉人

右 國史館本傳

鍾固 納能額等

鍾固滿洲鑲紅旗人姓舒舒覺羅氏崇德六年以戶部理事官隨大兵證明圍松山明總督洪承疇率兵來犯鍾固擊敗之順治元年隨睿親王多爾袞進山海關擊流賊有功授雲騎尉世職四年加騎都尉五年遣往大同催餉與運糧戶部員外郎納能額先後至大同適總兵姜瓖據城叛鍾固知事急率從役巷戰竟日身受數十創回寓自焚時納能額寓左衛城聞變率從役十七人欲出戰賊圍而盡殺之得勝路參將管一舉知大同變嬰城固守所屬鎮營守備徐紹先陰與賊通執一舉脅降不從殺之其長子致忠子婦孫女等十三人皆遇害幼子承業生數月乳母竊以逃得免

時駐馬路參將李向堯以驍勇著賊憚其威名誘執之脅降不屈
闔家七十口同日殉保德州守備牛化麟叛應瓌征西大將軍敬
謹親王尼堪率大兵攻城三等輕車都尉郭名望先登中槍歿七
年議卹 詔鍾固加一雲騎尉一舉 贈副將向堯 贈都督僉
事名望 贈二等輕車都尉子汝龍襲後陣亡自有傳一舉漢軍
鑲黃旗人向堯名望俱漢軍正黃旗人名望初任驍騎校崇德八
年隨大兵征明克前屯衛順治元年隨豫親王多鐸平定江南用
紅衣廠克揚州又隨貝勒博洛征浙江以功授雲騎尉世職三年
加騎都尉旋加三等輕車都尉納能額滿洲正黃旗人廕卹無考

石 國史館本傳

宋子玉 王家珍等

宋子玉遼東人官山西兵備道駐朔州順治五年十二月大同總兵姜瓖叛遣其黨入朔州子玉密與通判楊達知州王家珍謀禦之而守備張英潛通賊達以計擒英錮於獄翌日登陴有康某者英黨也怒視達達立起奪其刀英子復鼓譟賊眾乘之入城遂陷子玉具衣冠升堂呼曰我道臣爲 朝廷守疆土豈肯從逆然與其死於賊毋甯自決手刃愛子乃自殺家珍直隸容城貢生順治二年官知州聞變率士民奮力巷戰全家被害吏目王京亦死京直隸順德人也會明廢紳萬鍊襲踞偏關瓖卽以鍊爲僞偏關道甯武汾州太原相繼失守甯武中路同知張國賢亦經死國賢順

天宛平人蒲州土寇踞中條山與瓌遙應犯夏縣知縣劉之屏直隸保定人登陴守城陷手刃賊二歸署埋印於地公服坐堂上賊索印不得擁至城隍廟殺之之屏順治三年進士有惠政署平遙縣知縣高士達太原人甯鄉縣知縣王昌運直隸河閒人臨縣典史王之佐浙江山陰人俱殉焉署忻州知州何顯祖以運糧遇賊抵禦不支歿賊勢益猖六年五月太谷縣知縣李成配陰與賊通聞我兵將至遁攝其篆者按察司照磨楊其籍六月奸民田登魁密糾成配以賊四十餘由東門潛入城破其籍抗節不屈與典史王自亮俱被監禁死自亮安徽歙縣人署交城知縣布政司都事周邦翰典史鄭運昌亦死之運昌江南人八月賊犯渾源州知州

榮爾奇山東德州人明季進士順治四年分守冀南道以失察王和尙結銅柱寨賊馬成抗敵官兵事降補知州政簡刑清士民德之聞變親率鄉勇抵禦力竭與原任冀北道童可選吏目周官俱遇害可選四川巴縣人明季舉人寄居渾源與西路同知張肇斌縣丞項一科襄垣訓導王奕葉五臺人壺關教諭崔珩絳縣人均不屈死經歷陳瑞麟屠大棟威遠衛經歷陳光世均以不受僞職被羈死獄中事 聞 詔贈子玉光祿寺卿家珍爾奇布政司參議國賢按察司副使之屏按察司僉事各廕一子入監其籍按察司知事邦翰顯祖經歷運昌自亮主簿士達昌運之佐可選肇斌一科官贈廕均無考

國史館本傳

右 國史館本傳

十一

李允昇 佟學詩等

李允昇奉天人以貢生知長子縣順治五年大同總兵姜瓖叛路安太原代州絳縣俱震土賊張光斗自稱瓖副將擁眾二千餘犯長子陰結縣役衛銀常壽馬興等內應伏其黨高度等於城內賊渠沈烈夜半薄城衛銀高度等開門縛允昇送賊營羈禁數月不屈死瓖分兵犯襄垣知縣佟學詩聞賊至自度不能守乃懷印赴府請兵兵未至而城陷學詩馳赴賊殺之途祁縣知縣王之鼎聞大同叛諸邑繼陷曰祁爲太原藩籬無祁則太原危矣嬰城固守賊至出奇擊之生擒賊將范計賊遁走復合銳來攻城陷被執死之時以學校官殉節者賈道醇周遠祚張化樞黃縉方大同飯時

道醇任太谷教諭太谷叛應瓌邑令被擄巡撫檄道醇暫理縣事
逆黨田登奎率眾入城脅之降不屈罵賊死遠祚爲繁時教諭逆
黨劉遷攻城遠祚誓死守城陷偏投僞官不從與訓導張化樞俱
死之縉爲垣曲縣訓導城破罵賊死事 聞議卹 詔贈允昇之
鼎俱山西按察使僉事廕一子入監道醇 贈國子監助教餘優
卹如例學詩正藍旗漢軍之鼎浙江山陰人順治四年進士道醇
山西永濟人遠祚西臨汾人順治二年舉人化樞山西偏關人
縉山西靜樂人

右 國史館本傳

李向禹 吳希賢等

李向禹正黃旗漢軍順治二年由貢生任山西陵川知縣五年十
二月姜瓖叛於大同土賊應之聚數千人夜圍陵川向禹嬰城守
射殺數十人妻王氏亦率家丁登城捍禦矢盡援絕城垂破王氏
回署自縊兩女從死向禹被執罵不絕口遂遇害至十五年 特
旨遣順天府府尹羅繪錦致祭 贈山西按察司僉事廕其弟向
旭以知縣職其先後死於姜瓖之難者六年六月瓖遣賊攻臨晉
縣丞吳希賢守南門城破死之七月貝子滿達海勦賊黨於太谷
雲騎尉達自瑞中敵陣亡八月偽總兵楊振威等斬瓖首出降其
餘孽猶四出剽略九月破山陰城典史施邦政遇害十一月攻夏

縣丞汪光祖力戰死七年四月游擊鍾汝達剿賊黨於五臺山之瑚羅莊賊自山徑衝出汝達挺身鬪槍傷死把總王世宰力救同殞先後事 聞 詔贈希賢鑾儀衛經歷自瑞騎都尉子有禮襲光祖鑾儀衛經歷汝達參將餘卹如例希賢浙江山陰人自瑞鑾藍旗漢軍光祖籍無考

右 國史館本傳

順治初年陵川有殉節邑令曰李公陵川城彈丸踞太行頂石會關奪火鎮卽古孟門白陘含笏一綫扼三河腰膂天下有事凡批亢擣虛以爭大勢者皆由城奪隘道出入田悅所謂腹中眼險不小明季流賊破砦入晉焚掠最慘公至兵燹甫定招徠撫綏悉心

籌畫民恃以安未幾大同降將姜瓖叛三晉騷動將由邑隘道窺
山東至城下招公降公立敵樓叱罵曰爾釜底游魂天子賞爾
罪仍授節鉞何負於爾而背恩反爾肉行且饒狗鼠鴟鴞爾何敢
越吾境吾卽爲厲鬼必剉爾太行坂下賊叛後守土皆望風逃獨
公嬰城抗罵氣稍奪且恧圍益急城經喪亂不固竟陷賊執公甘
言誘降公罵不絕口遂遇害公妻王氏知城必陷先二日率二女
一婢同縊死署後堂而王師已從潼關渡河進剿大同賊悉其
黨迎戰平陽盡殲焉逆瓖伏誅公以弱書生守危城倉卒遇變手
無寸鐵赫然奉威靈憤數其罪甘蹈白刃使叛帥計沮膽警不
敢出隘道窺山東一步城雖暫失王誅速成統論大勢次捍障

功與全城等公死後八年 朝廷始聞其事 贈公按察使僉事
妻恭人二女皆有卹祀公名宦祠廕一子入國子監讀書公諱向
禹奉天鐵嶺貢生

湘潭張九鉞曰明季澤潞副使王肇生禦陵川流賊陷陣死其裨
將董時增甯朝鮮陳承業張承寵皆殉之見諸史 國朝定鼎甫
六年而公隻手城城闔家死難悲夫視前史更烈矣余獨怪公死
八年後鄆城黃君名燦始上其事豈前之令茲邑者皆洪忍竊祿
見義不爲者耶若黃君者可謂勇於義矣書之亦以慰公於地下
也

右傳張九鉞撰

王昌齡 劉澤溥等

王昌齡遼陽前衛人順治元年由諸生授山西屯留知縣時山西版圖新附部議擇遼東人士有才幹者分授以職於是以貢生崔尙質爲繁峙知縣官生曹之賢文水知縣監生祝文光定襄知縣諸生張耀祖臨縣知縣旣而推軍營效用從入山海關者以劉澤溥爲分巡冀南道金元祥甯武兵備道徐溥岢嵐兵備道楊致祥潞安府知府先後之官皆遼東人也昌齡尤以才著山田多饒廂言於大吏奏除其賦以治行優異擢太原府知府四年遷分巡冀甯道汾州土寇李本清任自興等據永甯銅柱寨時出焚掠巡撫申朝紀檄昌齡偕參將張國纓率兵往勦昌齡與國纓設犄角直

抵銅柱賊抗拒昌齡等發槍殲賊無算擒本清自興等五年大
同總兵姜瓖叛偏關多賊黨脅眾從逆潛被執不屈死甯武兵變
元祥死之大兵進大同昌齡轉餉六年正月與太原營參將賈恩
俱檄赴代州巡防行至原平驛僞總兵姚舉等驅賊三千餘突至
恩先走官兵潰昌齡手搏賊被擒奮罵賊戕之瓖連陷郡縣勢益
猖獗耀祖募鄉勇守臨縣城孤勢不可守耀祖登陴誓士親冒鋒
鏑城陷自經之賢守文水捍禦甚力賊益兵攻之突門入之賢遇
害賊進陷繁時尙質舉家自焚陷定襄文光不屈死賊黨沈遙應
屯聚太行窺潞安聞澤溥爲政清靜民愛之嚴兵設備賊不敢犯
澤溥議討之繼昌齡爲屯留知縣者陳思忠亦遼東人澤溥知其

能俾籌兵餉畱致祥守潞安自率兵剿賊破其前隊遇伏澤溥沒於陣賊破潞安并陷屯畱致祥思忠及漳澤驛丞吳崇信俱不屈死七年敬謹親王尼堪疏言王昌齡賈恩並奉調巡防齋餉萬九千有餘恩以武職大員喪師失餉從賊偷生而昌齡獨能以身殉恩罪在不赦昌齡可予旌部議從之會有司以澤溥等死事狀聞詔贈昌齡澤溥光祿寺卿致祥太僕寺卿淳元祥光祿寺少卿文光之賢耀祖思忠按察司僉事並廕一子崇信贈濟源縣主簿

右 國史館本傳

王希舜 夏廷印等

王希舜奉天遼陽人以貢生隨都統李國翰軍中遂隸鑲藍旗漢軍順治四年議敘從征功授陝西西安府知府時流寇餘孽竊發民多流亡希舜悉心安集與延安知府宋從心河南杞縣人明末舉人未仕 國初授刑部主事擢知府巡按陝西御史劉明傑疏薦希舜撫民仁愛莅事精詳從心純樸老練河南巡鹽御史佟鳳彩亦疏薦希舜五年擢希舜分巡河西道駐鄜州延綏巡撫王正志檄希舜偕神木道夏廷印榆林道夏時芳分繕邊堡並如期竣廷印時芳俱廣甯監生以軍功擢用時芳先爲山東濱樂分司運同擢兩淮鹽運使旋以運同任內土賊焚官署不能防禦改授道

員六年二月正志聞大同總兵姜瓖叛遣參將王永強赴援永強
挾眾反逆黨王永吉劉登樓高友才等應之正志檄時芳赴懷遠
防守道遇永強被執時芳奮罵賊攢刺殺之陷榆林正志遇害正
志自有傳友才攻神木廷印偕神木知縣徐之龍城守賊薄城典
史章德英親發石傷其渠賊憤併力突門入之龍德英自縊賊執
廷印脅之降不屈被害盡殺其家屬及之龍之子廷綸寵綸賊分
馳僞檄誘州縣降從心得檄立碎之嚴守備永強攻延安不能下
乘夜襲破安塞知縣黃瑤死之進陷宜川知縣尤一德死之登樓
攻宜昌知縣賈士璋以城久圯保雲陽寨賊四面環攻寨破索其
曰士璋曰印 朝廷所授孰敢索又孰敢與耶躍起大罵賊殺之

典史方一御從死賊攻白水同州府同知趙瀚署縣事率鄉勇捍禦三日城陷賊執瀚說降瀚曰吾守土官城亡與亡耳罵不絕聲割舌斷手以死希舜以賊氛日偪令鄜州知州李芳濬練士兵與從心相犄角自率兵進勦永強永吉連兵至眾寡不敵戰敗被執賊黨知希舜有惠政不忍加刃希舜正衣冠北面拜自縊永強復攻延安從心守益堅永強永鎮潛城中內應城破從心死之芳濬晝夜巡警索誅城中閒謀并斬賊游騎遣人齎蠟書赴西安請援賊遮得其蠟書使其黨張大幟僞爲援兵狀城中望見幟開門迎幟至皆賊州兵潰芳濬被執罵賊遇害之龍江南江陰貢生德英浙江會稽人瑤四川忠州舉人一德遼陽前衛貢生士璋直隸延

慶州拔貢瀚山西榆社貢生芳激直隸永平人九月定西將軍李國翰等收復郡縣賊皆伏誅八年三月巡撫董宗聖上希舜等死事狀 詔贈希舜廷印光祿寺卿時芳從心太僕寺卿芳激山西布政司參議之龍瑤士璋一德山西按察司僉事各廕一子入監德英 贈河南濟源縣主簿俱 賜祭葬瀚一御贈卹俱無考

右 國史館本傳

張懋勳 李士麟等

張懋勳正藍旗漢軍順治五年由拔貢生授江南海州知州先是邳州土寇楊秉孝王君實等嘯黨攻邳州城淮揚漕運總督沈文奎擒斬之至是餘黨復煽分隊十餘環攻州城民物懼懋勳偕州同李士麟設守禦具甚備督鄉勇出奇擊走之已而賊大至晝夜攻不輟懋勳士麟率署西海所官胡崇禮百總李奕蔭分門抵禦城陷士麟被執不屈賊殺之於陶許廟殺懋勳於西門外水關崇禮奕蔭於城下時順治六年二月也七月湖廣麻城賊陳伯邵等率眾千餘北犯江南霍邱知縣吳國用聞警卽取印付其妻鋪貯躍馬出率縣丞莊應舉教諭廖辰訓導包宏圖分門守會久雨城

多圮賊初攀南城入應舉被創棄馬遁國用射殺數賊賊稍卻分
踰西城國用急赴西門手刃賊二而南城賊復集國用往來巷戰
斷賊將臂逸去賊自後發火槍國用揮以刀馬忽蹶於石羣賊叢
擊之奪其馬國用墮賊以長戟刺之仆遂遇害家丁吳世貴民人
邢文兆等從死者百餘賊肆掠遁士麟山西定襄人由拔貢任海
州州同國用遼東貢生巡按張濩上其事 詔贈懋勳布政司右
參議國用按察司僉事 賜祭葬如例各廕一子入監國用子世
顯以廕官至六安州知州士麟 贈海州知州崇禮奕廕不由部
選無卹籍貫均無考應舉禠職辰等以學校官無守土責免議

右 國史館本傳

鄜引昌 袁夢吉等

鄜引昌浙江諸暨人順治元年拔貢三年授沂州州同恭順王孔有德南征知其有幹材檄隨營時流賊餘黨李錦劉體純郝搖旗及左良玉故將馬進忠等附於明總督何騰蛟分十三營爲連絡拒守計錦等淫掠如故土寇乘閒竊發明廣大擾進忠攻武陵知縣袁夢吉先事集流亡繕城堞練民壯捍禦月餘城陷被執罵不絕聲進忠殺之於西關土寇破當陽戕知縣扈坤雞籠山紅旗賊李榮在土寇中最桀驁夜襲孝感知縣郃炳元典史郎元振集鄉勇守禦榮驅眾圍城矢石交集炳元志不懈賊內應夜半火起城陷炳元不屈被害妻李氏罵賊死元振亦爲賊所殺榮旋犯雲夢

大兵擒斬之引昌言於有德曰王當以全力拒騰蛟其鄉堡竊發者請奉檄曉諭士民俾各練屯聚人自爲戰士寇不難破也有德從之引昌薦南漳知縣姚延儒才請與俱延儒浙江歸安人與引昌並以拔貢授職者也引昌聞攸縣諸生陳六禮以率鄉勇擊山賊被執死請表其閭遂偕延儒徧涉鄉堡曉以大義土寇多解散五年大兵擊走騰蛟收復諸郡縣有德將班師引昌請畱兵守有德不從引昌旋授永州府通判有德去而湖廣復擾十一月騰蛟遣將攻永州引昌城守三月大小三十六戰城遂陷引昌同妻黃氏子尙英俱被害體純搖旗等犯南漳延儒已擢山西大同府同知未行聞寇至亟設守搖旗以礮摧城麾眾突入延儒奮罵被殺

訓導賀泰來典史濮昌國並死之時流寇出沒無常繼延儒知南
漳者唐士傑奉天人甫莅任招流民復業而寇復至士傑度不能
支自焚死 詔贈引昌夢吉延儒按察司僉事 賜祭葬廕一子
泰來國子監學錄昌國濟源縣主簿餘分卹有差夢吉山東榮城
人坤奉天人炳元直隸長垣人泰來湖廣景陵人元振昌國籍無
考

右 國史館本傳

臣等謹將所請各款開列於左

三三三

塗廓 張必科等

塗廓奉天鐵嶺諸生善騎射隨豫親王多鐸營順治二年從下江南以功授鎮江知府時江陰據城抗拒太湖盜出沒道路爲梗廓分設鄉兵守禦郡境以甯大兵征浙東取道京口城廓預儲舟楫供億無闕民不知兵流亡漸集課農桑新學校巡按御史史詒疏薦之三年擢按察司副使分巡河北道駐磁州先是河南盜劉洪起李際遇結山寨掠郡縣磁州當寇衝蹂躪尤甚廓初至加意捍禦時洪起際遇已死而餘黨尙多匿山谷乘閒竊發擾河北延及直隸四年正月賊掠慶雲知縣張必科率丁壯擊之擒賊渠三斬以徇賊合眾攻城必科堅守三日奸民內應夜啟門賊大至必科

巷戰賊辟易必科氣益厲忽弦斷傷手擲弓曰命也賊環圍之不
敢逼必科還署舉火自焚六年三月賊掠鉅鹿署縣事照磨周維
翰死之四月掠隆平武安兩縣廓聞警率游擊俞三奇千總蘇宏
道馳勦由縣南野河鋪追至縣西趙二莊駐營賊退據小店村廓
進襲之賊勢蹙乃糾黨力鬪槍矢齊發廓馬蹶棄馬步戰遂遇害
三奇奔宏道奮勇力救創重卒都司孫承業以守城未赴援事

聞禡三奇職承業奪俸十二月議卹 詔贈廓光祿寺卿祭葬如
例子應泰以廕官至江西按察使必科鑲黃旗漢軍由貢生知慶
雲縣莅任六十五日有惠政民懷之 贈按察司僉事子一魁以
廕官直隸河閒知府維翰江蘇武進人廕無考宏道資銀八十兩

右 國史館本傳

參政塗公名廓字容宇遼東人讀書負氣節兼善騎射順治初由生員擢知鎮江府時江南新定山澤多負固不率化更將平定浙江福建廣東西大兵日交錯鎮江道城中兵雜民居公振紀綱撫凋敝招流亡嚴法輯悍兵不得滋害民數持折總兵官犒軍之費牽舟楫馬之役措給各有方客兵亦憚服公毋敢騷然煩擾民以是安其室而農工市貿亦得各復其業如故先是知鎮江者數折辱諸生公至新學宮朔望日率諸生拜謁先聖廟登明倫堂說書問民利弊宜興革者施行之居一年以廉幹擢磁州參政去之日民頂焚香遮道大哭公亦哭參政治磁如治鎮磁境外故多山賊

勢寢熾參政曰此緣地方官懼死耳因糾合州兵官往殺賊兵官果懼不敢往參政迺遂慷慨率家壯丁百餘人挾弓矢佩刀以往或阻之曰此武臣事公職文何往爲參政大叱曰下爲民上爲國殺賊何分文武率百餘人馳六七十里遇賊前鋒參政獨先躍而入殺賊賊奔潰參政益追殺賊數千級一日夜馳二百里越磁境盤山谷入賊老營兩山環夾石門參政獨奮勇先入賊眾奔參政逐殺入石門血汚手矢盡馬力疲竭無援遂遇害已而得其屍神色凜凜若生初公在鎮江時有賊聚曹山夜寇高資鎮公請總兵官發兵往救總兵官以夜辭公力爭之得發兵公先馳以往禽賊首賊潰解去公歷任二爲政務持大端不爲煩苛刑平允然法

立必行不少撓以殺賊死聞於朝 賜葬特祠地方官歲春秋致
祭蔭一子應泰累官至江西按察使而磁兵官論失援以法誅

右傳何絜撰

鄭宏圖 李因之等

鄭宏圖奉天遼陽人隸鑲藍旗漢軍順治初以生員授河南光山知縣四年三月擢直隸廣平知府尋遷山西運同五年十二月大同總兵姜瓖叛謀窺運城掠庫六年五月擢宏圖爲河東陝西都轉運使以守之宏圖與運判李因之知事王存整繕城修械爲守計因之山東長山人刑部尙書化熙子以廕充侍衛旋以通判用改授運判存整山東邱縣貢生授河南息縣知縣以大計才力不及降知事宏圖見存整誠樸尤倚重時降調官任山西者李三元鑲黃旗漢軍以生員授直隸豐潤知縣擢河南道監察御史歷登州知府分巡登萊道緣事降大同府陽和衛通判王來觀奉天廣

甯監生初以軍功授河南衛輝知府擢河南巡守道以失察降霍
州知州瓌以左遷官或懷怨望騰檄煽誘三元來覲存整俱力拒
之霍州爲南北孔道瓌驅衆力攻來覲拒守不下賊將姚舉犯朔
平通判楊達倡軍民守城守備張英潛通賊誘殺達明廢紳萬練
乘變踞偏關通判馬維熙方拒瓌練躡其後維熙兵潰被執死賊
分兵四出花馬池同知邱希孔垣曲知縣李榮宗興縣知縣李昌
沐各激厲鄉勇嬰城固守城陷俱死之賊復攻霍州來覲力不支
城破力戰死臨縣旋陷三元被執不屈死於是運城勢益孤宏圖
令因之請援於陝西總督孟喬芳師未至因之還將渡河猝遇賊
赴水死瓌遣賊黨虞允韓宣昭圍運城百道進攻運判張希傑逃

去宏圖誓死力守與存整晝夜不懈經歷張學知受賊運副僞職
潛引賊入城遂陷宏圖被執脅取印宏圖奮罵賊遇害存整亦以
罵賊被掠死遼河南沈邱人維熙直隸山海衛人俱以拔貢投職
榮宗山東費縣人順治三年進士希孔絳州生員昌汴直隸豐潤
人俱由薦舉用賊陷花馬池希孔踞坐罵賊賊怒斷其頸危坐不
動賊驚爲神羅拜之乃仆喬芳遣援至隨敬謹親王尼堪收復郡
縣瓌及賊黨皆伏誅方賊之未平也巡鹽御史劉達劾因之假請
兵擅離職守宏圖擅遣應分別治罪八年二月宣大總督佟養量
山西巡撫劉宏遇合疏言宏圖請兵未爲失策因之奉檄請援遇
賊力竭投河宏圖以身殉城均應議卹旣而有司以三元等死事

狀具奏 詔贈宏圖布政司右參政因之布政司右參議三元達
希孔榮宗昌沐俱按察司僉事維熙忻州知州各廕一子入監存
鑿 贈布政司照磨

右 國史館本傳

武韜 王廷衡等

武韜山東齊縣人順治三年一甲二名武進士四年授山東蒲州
游遊擊五年大同總兵姜瓖叛韜嚴設城守十一月瓖據太原晉
祠銀都司王廷衡繕戰具謀攻之賊覺燒其戰具廷衡焚死六年
二月解州生員張傲等聚眾千餘應賊殺里居員外郎侯佐與其
父嗣晉而蒲州接壤之絳州聞喜夏縣相繼告變五月賊薄蒲州
城韜身先士卒開門迎戰大敗之越數日賊悉精銳來犯城外軍
民悉爲脅從城中馬步卒不滿八百韜誓以死守與守備許世德
守北門知州錢法裕守備賈斯明封汝宦守東門河東道楊千古
守西門千總王綸守南門六月賊渠虞允韓昭宣等驅眾萬餘合

攻汝宦陰通賊啟關叛將王躍龍縛斯明去賊大至奪法裕印據倉庫一城大擾千古偕從者數人懷印出西門渡河乞援輟轉戰出重圍適官舟相迎揮涕曰封疆失守不死非忠也有母在而棄之非子也願決死戰再入重圍殺賊百餘力竭被執猶誓不絕聲遂遇害賊勢益張徇諸郡邑執平陽鎮標都司魯學禮迫以僞職不受俾供芻秣亦不與賊怒殺之巡捕營都司謝應舉奮臂大呼令居民勿從逆遇環於太平樓力戰死妻孥並殉惟子天龍以先期入都獲免沂鎮營遊擊劉懋德奉檄運馬至平陽偕其弟千總懋謙及聽用官江山定等巷戰死同時死難者又有右營守備位進學大同前衛署守備徐進第楊和道中軍守備耿煥威遠署守

備李良臣殺虎堡守備趙坤威魯堡守備李長盛助馬堡守備楊
宏祖守備李進忠千總宋國中甯道營千總王命新垣曲縣防城
百總張從義俱不屈遇害廷衡山西陽曲人順治二年舉武鄉試
第一以千總累遷都司事平議卹 賜祭葬學禮應舉 贈遊擊
懋德 贈參將進忠 贈都司廷衡進學進第煇良臣坤等俱
恩卹如例

右 國史館本傳

皇朝通志

--	--	--	--	--	--	--	--	--

司九詔 錢法裕等

司九詔河南內黃人由拔貢生授山西潞安府推官順治五年總兵姜瓖據大同叛遣僞巡撫姜建勛僞布政使劉炳業等結陝西僞都督平柴擁眾數萬犯汾州端重親王博洛擊之退六年賊攻潞安參將周炤迎戰於褫亭驛標下材官李桐逃從賊炤遣帳前卒羅貞偵之貞亦從逆引賊南下炤退守屯畱把總郭天祐啟門延賊入炤全營俱陷賊脅之降五月抵府城九詔堅守六晝夜不能啟把總李世雄張國威苗雲峯潛通賊六月壬辰黎明賊從西門斬關入九詔被械置密室齧指血作書請援賊覺殺之長治知縣靳秉璋直隸甯晉人也賊入畧搜靳秉璋逸賊追殺之城外東

嶽廟經歷周洪甯典史張綺達教諭張文星皆從逆賊益猖土寇
趙聯芳胡尙文遙應之陷黎城知縣李雲起匿境外聯芳縛殺之
河南懷慶府通判姜汝俶山東掖縣貢生順治元年投直隸河間
府推官二年調潞安五年遷懷慶通判未去值變以運糧抵甯郭
驛聞賊至慨然曰我當以死拒之解佩刀殺數賊力絀遇害瓌旋
攻蒲州執知州錢法裕不屈死垣曲典史周茂覺永和典史鍾夢
豹大甯典史徐士鶚俱死之法裕遼東籍浙江人茂覺浙江山陰
人夢豹宛平人士鶚浙江人八年巡撫祝世昌以九詔等死事狀
聞 詔贈法裕布政司參議九詔按察司僉事 予祭葬子司琨
應授國子監學錄累遷兵部郎中分巡淮徐道值吳三桂叛琨以

軍營勞瘁卒夢豹 贈山東夏津縣主簿部議秉璋死非禦賊雲
起不能與城存亡應不予卹汝俶茂覺士鶚贈廕俱無考

右 國史館本傳

四庫全書
月表
卷之三十三

三

周文煜

公諱文煜字穆仲號元隴高祖諱書明聘君澹齋公第四子也分
居峽石故公爲峽石人幼失父母居喪以孝聞年十四補諸生沈
勇有大志順治三年丙戌浙江開科由恩貢登鄉薦丁亥成進士
己丑謁選得湖廣辰州府黔陽縣今屬湖南沅州府者也挈家赴
任黔故梁龍標地與瀘沅五溪鄰民苗雜處號巖險明末爲闖賊
所竄王師平楚瘡痍未復值靖州陳友龍叛肆行劫掠公下車
僅一空城耳聚殘黎數百家繕葺固守時方盛暑公步行赤日中
巡視城堞勞守陣者與民同食宿士咸感奮誓死不從賊而友龍
勢益橫初友龍以僞總兵降於我未幾悉眾數萬反圍靖州城急

會提學僉事彭而述將巡撫貴州率兵三千人駐靖與決戰城西門外南山下始合不利副將賀進才戰死城中鼓譟閉門欲與友龍合而述退保寶慶定南王遣副將熊嘉夢以兵三千益之相持紫陽河上歲餘而述嘗分守永州道永陷於賊坐免去賊益猖獗無忌分掠郡邑獨公所治秋毫不能犯賊至城下矢檄如雨皆走遁聞出奇兵擊其怠誠其數十人賊相戒曰周公書生用兵神速乃爾勿妄干也三閱月餉絕七月某日公薄暮率輕騎赴會同催辦兵糧猝遇賊洪江洪江一名雄溪五溪之一也被圍數日我兵不盈百公奮槩率所部四面衝突槩絕手格殺數人友龍服公義勇輒麾已卒免之平朋友龍兵益大合見執厚禮誘降公瞋目叱

之館於別室復使人勸之怒罵不已遂遇害計至署妻施氏自經
死妾王氏投井死左右賓客兵壯死者凡八十餘人縣遂陷迨康
熙三十年黔人士向文煥等始上其事於縣令金壇于公棟如爲
請於當事事竟寢然黔人益思之不置乾隆十五年公從孫廷元
請於本縣轉詳咨楚未覆廷元卒不果二十一年黔令蘭谿柳公
秉謙復以祀名宦及載省志請於楚撫咨查到浙嗣孫光錦以事
上大憲據覆而已又不見報子姓式微故 旌卹猶有待也公萬
厯年生順治六年七月日卒年四十有五女一適海鹽庠生徐豫
貞嗣子儒兄子也邑庠生工詩生光輪無後嗣廷元之子朝鼎又
歸宗於絕今復以光錦繼孺光輪有從中表爲陝西臨潼丞往依

焉因乞殉節記於粵東黃天祐時爲三水令云

右家傳周廣業撰

周文煜字穆仲浙之海甯人順治丁亥進士謁選得楚黔陽令黔陽故梁龍標地地鄰五谿民獠雜處王師平一海內辰沅獨後屬以降將陳友龍鎮靖州而文煜始來爲令旣而友龍背義復叛邑有羅翁山周五百里四面險絕絕頂一池縱廣千頃友龍窟宅於是頻出圍城文煜聚殘黎二三百家悉力固守來則輒擊退之相持六旬一日西出略地卒遇賊金橋橋距邑二十里而士卒不滿百賊眾我寡被圍而里文煜率所部奮殺一日夜矢盡援絕平明賊益大合服公忠義不忍加刃誘令倒戈文煜瞋目大呼罵不

絕口遂與左右賓客等八十一人同時被害時順治六年七月也
年四十有五妻妾在縣署報聞一自經死一踊身入井死

補史氏曰文煜無子死事後其宗人爲立一子曰孺而大吏未之
知也故不得贈卹後孺之子光錦號於當事又不見報錢唐顧之
珽撰殉節記予特取而刪潤之爲後之有史職者告也

右傳杭世駿撰

公姓周氏諱文煜字木仲浙江海甯人也由進士於順治六年令
黔陽值靖州降將陳友龍之叛嬰城固守賊眾奪氣事起倉卒外
援不及殉難金橋計莅任三月餘日與賊相持夫人施側室王及
實從僕婢死者八十餘人功偉而節烈邑人思之建廟以祀康熙

五年前張明府扶翼始採入縣志乾隆二十四年柯明府支樹請入祀名宦祠而此祠初甚隘王明府光電稍修葺今郝牧曾刺史鉅前令茲土拓而大之其兩廊翼室則項明府逢堯復增飾之惟公不徒以大節著神爽靈赫求無不應又足以張耀里庶而水旱疾疫之救尤大有功德於民於祀典爲允王太史金策改宰斯邑道光二年爲請於 朝 封靈佑伯忠靈以妥潛德畢彰爰倡議與邑士益拓祠宇甚盛舉也東平客黔有年歷考邑乘碑碣記載甚詳因思公生能守土歿猶庇民功在一時靈昭千古固宜祀事修明永垂勿替乃刊斯石彙記顛末亦以誌欽敬之忱

右祠碑記倪東平撰

索甯 克什特

索甯滿洲正黃旗人姓他塔爾世居察哈爾 國初來歸從征黑龍江擊敗其眾崇德八年偕護軍校克什特從貝勒阿巴泰征明入關遇明督師范志完兵克什特力擊敗之大兵下山東攻萊蕪索甯先登克之 賜號巴圖魯授騎都尉加一雲騎尉順治元年索甯克什特從英親王阿濟格討流賊時李自成尙據陝西大兵至延安賊犯鏤黃正白兩旗汛地克什特率前鋒兵迎擊賊敗走二年自成奔湖廣克什特從破賊於荊州進圍承天府敗賊六百餘僞國公田見秀屯九宮山索甯克什特擊敗之復追破逸賊千餘人三年克什特從肅親王豪格征四川僞總兵賀珍據興安負

山爲固克什特破其衆大兵平張獻忠凱旋賊餘黨躡貝勒尼堪
後克什特還擊敗之生擒六人敘功授雲騎尉尋加騎都尉五年
十二月大同總兵姜瓖叛護軍校班第被害索甯克什特等從英
親王阿濟格討之六年三月賊黨劉遷犯代州護軍參領薩哈達
赴援力戰歿於陣四月攻左衛前鋒侍衛顧倫陣亡八月大兵招
諭大同瓖嬰城死拒旁縣賊多遙爲聲援索甯請先勦賊黨以孤
其勢驍騎校陽靄攻朔州越衆登城被戕未幾代州孝義俱下敬
謹親王尼堪攻大同賊出拒雲騎尉那爾泰突陣爲賊刺死其二
子噶達渾那什庫在軍中奮鬪均歿進薄城城上礮石如雨閒散
卓納傷重卒前鋒校翁愛佐領色楞巴岱六品典儀官五爾哈薩

開散拜俱歿於陣克什特奮勇破其關廂中礮歿索甯偕參領能
額護軍參領鄂赫分攻渾源州能額躍登堞被戕索甯鄂赫力戰
歿賊黨斬環出降事平索甯 贈三等輕車都尉子巴圖襲克什
特蒙古鑲黃旗人姓西喇加 贈一雲騎尉子拜音岱襲班第滿
洲鑲紅旗人姓王佳 贈騎都尉薩哈達滿洲鑲黃旗人姓佟佳
贈雲騎尉子海蘭襲碩倫滿洲鑲藍旗人姓納喇 贈雲騎尉陽
靄滿洲鑲黃旗人姓李佳 贈騎都尉那爾泰滿洲正黃旗人本
姓溫徹亨 賜姓烏魯贈廕無考卓納滿洲正藍旗人姓伊爾根
覺羅 贈雲騎尉子赫達色襲自有傳翁愛滿洲鑲紅旗人色楞
蒙古正藍旗人姓烏朗漢濟勒默特 贈雲騎尉弟扎穆素襲巴

岱滿洲正黃旗人姓完顏 贈雲騎尉子景柱襲五爾哈薩滿洲
鑲藍旗人拜滿洲正白旗人姓佟佳先以軍功授副都統從征瓦
爾喀部平定河南江南俱有功緣事革職 贈騎都尉子卓克圖
襲能額滿洲正黃旗人姓赫舍里 贈雲騎尉子喀拉襲鄂赫滿
洲正紅旗人姓棟鄂 贈雲騎尉子富喀襲

右 國史館本傳

國朝耆獻類徵初編卷三百三十五目錄

忠義五

洛多理 董文魁等

袞楚克固英

鄭世英 宋應顯等

孫光耀 何斯盛等

佟國仕 張國纓等

李汝澄 段勳等

程瑾 崔對等

王棐

李文學 劉運泰等

馬嗣煜

楊佐 陸大勳等

傅永吉 王曉

馬如璧

楊珍 魏鎬等

李懋祖 李永忠等

陳武

段上彩 侯憲武等

許鴻儒 弟重然
子承昊

甘禮垣 郭進敬等

陳錦

王荃可 華鍾等

曹盛祖 李養性等

馬騰龍 張順等

周永緒 尹明廷等

同治丁丑年... 卷之...

金漢軍 郭良志等

李永華 劉德源等

劉昇祚 王任杞

國朝耆獻類徵初編卷三百三十五

通奉大夫前署江西巡撫江西布政使司布政使湘陰李桓輯

忠義五

洛多理 董文魁等

洛多理滿洲正白旗人姓佟佳世居查昆木崇德五年以閒散從
征明錦州攻克其外城七年復圍錦州貝勒尼堪馬蹶洛多理授
以己馬奮勇進戰敵駭遁順治元年隨豫親王多鐸討流賊李自
成至潼關賊夜犯大營洛多理偕參領勞漢等擊敗之又破賊步
兵敘功授雲騎尉二年大兵下江南取高淳縣三年攻福建延平
府洛多理俱在事有功五年十二月逆鎮姜瓖據大同叛和碩巽

親王滿達海英親王阿濟格敬謹親王尼堪先後率兵討之時賊黨散處遙爲聲援軍營議先攻之以孤其勢六年正月都統巴顏率騎都尉董文魁等攻太原文魁奮勇登城中矢卒八月守備張鴻猷攻渾源州以紅衣礮克之進取中衛戰歿英親王阿濟格敬謹親王尼堪遣洛多理及參領張登雲甘應舉王國臣騎都尉王騰高進攻大同瓌嬰城拒登雲司火器營豎雲梯先登與洛多理騰高均中槍卒國臣歿於方家臺應舉亦陣亡登雲正白旗漢軍應舉正藍旗漢軍國臣鑲紅旗漢軍騰高鑲白旗漢軍文魁與騰高同旗鴻猷正黃旗漢軍九月和碩巽親王滿達海遣佐領王自明劉應舉等攻汾州應舉圍北關越眾先登歿於陣自明攻汾州

城以傷卒我兵圍益急賊力竭斬瓌出降事平洛多理 贈騎都尉兄子洛喜襲文魁世居遼東 贈一雲騎尉子旒錫襲鴻猷初隨豫親王多鐸南征平定河南攻江南揚州及浙江嘉興等城均克之至是 贈騎都尉子興德襲登雲於順治三年隨都統巴顏墨爾根侍衛李國翰敗流賊將孫守法賀珍李錦於西安又破賊將劉文炳兵旋從肅親王豪格勦張獻忠擊賊首袁韜兵敗之贈雲騎尉准襲二次甘應舉與鴻猷先後從征河南江南等處以功授雲騎尉七年遇 恩詔加騎都尉八年因陣亡加一雲騎尉弟子體裕襲國臣 贈雲騎尉弟國用襲騰高世居遼東 贈雲騎尉子永輔襲自明正黃旗漢軍順治三年隨征陝西遇流賊孫

守法敗之賊將賀珍率馬步兵五千列陣於山自明從定西大將軍何洛會破之 贈騎都尉子棟襲劉應舉與自明同旗初任佐領從大兵攻明朔州左衛克其城至是 贈騎都尉加一雲騎尉弟應德襲

右 國史館本傳

袁楚克固英

袁楚克固英姓和勒依忒氏初爲察哈爾宰桑 太宗文皇帝天聰六年察哈爾林丹汗聞我軍往征竄奔土默特部其舊部人眾相繼潰散八年 上征明大同凱旋出尙方堡二十里駐營袁楚克固英率二百餘人同察哈爾宰桑德伸濟汪等來歸分隸八旗袁楚克固英隸正紅旗蒙古任參領崇德元年五月授一等男爵二年七月緣事降一等輕車都尉三年隨貝勒岳託征明由牆子領入邊駐營明兵自密雲來犯將薄我營袁楚克固英偕眾卻避論罪應黜革籍沒 上念其率眾投誠功免罪止籍其牲畜分給察哈爾大臣六年大軍圍明錦州明總督洪承疇率眾赴援自松

山連戰衮楚克固英整兵破敵陣尋敵騎突犯鑲紅旗汎地衮楚克固英同副都統察哈爾模海擊卻之八年九月隨鄭親王濟爾哈朗征明甯遠連敗敵馬步兵 世祖章皇帝順治元年大軍入山海關擊流賊李自成衮楚克固英與都統恩格圖合兵奮戰敗賊二年敘功晉三等男三年隨肅親王豪格征流賊張獻忠屢戰克捷六年隨英親王阿濟格討大同叛鎮姜瓖薄城賊出犯土默特營衮楚克固英趨援力戰中流矢歿於陣 賜卹如例晉爵二等男世襲罔替以其子垂本襲

右 國史館本傳

鄭世英 宋應顯等

鄭世英浙江人以行伍累官陝西高家營遊擊與鎮靖營守備宋應顯並善撫士卒順治五年延綏巡撫王正志疏薦之時參將王永強以父事正志爲正志所倚潛要結諸營世英不爲用六年正志聞姜瓖據大同叛檄永強援山西永強與瓖相應中道反兵向榆林中營遊擊梁國棟從總兵沈朝華追襲之賊黨高友才伏隘口國棟先擊破之旣入隘賊四合朝華中矢仆國棟救之俱被殺時諸營多爲永強煽誘世英守神木諭士民以大義人有固志賊合攻榆林參將劉國祚偕鎮標旗鼓魏國效等分城守夜半城樓火賊黨啟門賊入國祚國效並死之左營守備劉興宗鍾汝祿中

營守備王存智前營守備郝時言旗鼓守備李嘉科率眾巷戰爲賊所執俱不屈死賊進攻神木說世英降世英戰益力城陷復脅降世英以死自誓遂遇害清水營守備陸守謙黃甫營委署千總張科皆以誘降不從爲賊戕永強陷靖邊應顯退保民舍賊追躡之驅出城應顯不肯行殺延安營守備萬廷貴佐知府宋從心守禦屢敗賊城陷從心殉難廷貴自縊妻從死朝華國祚並附見正志傳應顯奉天廣甯人國棟國效順天大興人興宗江南贛榆人汝祿山東歷城人存智順天涿州人時言直隸寶坻人嘉科大興人守謙山東汶上人科神木人廷貴直隸人八年巡撫董宗聖上其事 詔贈世英國棟國效都司興宗嘉科汝祿存智時言應

顯守謙廷貴科各給卹銀如例

右 國史館本傳

孫光耀 何斯盛等

孫光耀奉天人屯畱知縣孫奎之父奎迎養至畱順治五年奎行取御史入都光耀畱署中六年姜瓖叛土寇許守信詐稱瓖兵來圍城光耀率眾禦之眾內變開門納賊縛光耀殺之時土寇許定國等亦乘亂圍翼城何斯盛者陝西鎮番衛人兄斯美知翼城縣斯盛隨之官適賊圍城九晝夜斯盛與兄悉力守斬其渠於馬柵橋賊引去城獲完八年定國復合上黨賊數萬來戰斯盛禦之於澮東殺數十人賊環攻遂遇害方瓖叛遠近應者蜂起郡邑皆練鄉勇以禦賊廣靈縣奸民李青等勾賊攻縣城邑生員李冀周千德千德弟千道同應邑令范發愚召率鄉兵邀擊賊千德千道奮

牙大呼入賊壘死焚馳救亦遇害甯武營兵叛攻崞縣之太陽堡
邑生員張琳貢生李旦時及子含玉率鄉勇禦之琳殺賊三賊大
至力戰死之旦時被擒賊勸降不屈遂遇害含玉亦同日殉又土
寇犯浮山武生秦士鳳喬謹率鄉勇劉波靈石人何思祥思祥子
起蛟騰蛟戰於北石村敗之次日逐賊於邢村翟先春衝陣揮刃
連殺數賊以誤踐危石蹶被殺先春子金娃亦戰死時賊據南山
爲險懸崖陡峻眾莫敢上士鳳獨奮勇先登賊勢卻以後軍不繼
被殺謹波奮身救之亦戰歿思祥與其二子俱被執先是賊見思
祥父子驍勇誘入黨堅拒不從至是被執猶憤詈不絕聲賊怒並
磔之張射斗者山西保德州廩生州守備牛化麟潛通瓌於五年

十二月統眾圍州署執知州徐效奇據城嚴刑督吏民以拒官兵射斗憤甚日夜思誅之未發賊黨泄其謀誘射斗入文廟殺之趙居甲者直隸廣昌縣人順治六年舉人寓大同瓌叛被執不屈死後土賊圍喜縣城武生李齊白單騎入賊圍身中流矢力戰死

右 國史館本傳

因事... 名三百三十五

十

佟國仕 張國縷等

佟國仕奉天人任山西井坪路參將順治五年大同總兵姜瓖據城叛分兵陷郡縣遠近土賊應之六年瓖遣其黨周世德夜襲井坪國仕聞賊至躍馬出率眾巷戰手刃數十人賊不敢偏既而城內外舉火聲四應國仕知兵變策馬陷陣死偏關大同左衛接瓖黨萬練思據之以應瓖乘署參將張柱石調朔土寇出與其黨孫珽蘇繩武猝爲亂原任偏關參將張國縷已乞病將歸聞變強起曰吾雖去官不當爲國救死耶率僕從邱裕民等十餘人思誘執練而城中從賊者眾共執國縷羈二十日終不屈爲賊將燕元楨所殺時甯武協標營卒趙登舉楊成等三百餘人素爲瓖所陰

國朝通志卷之三十三
結者亦執其副將李吉使降吉怒叱之知不免投縋死把總邱登
戎戰歿河保營參將石登仕聞變登城守禦家丁賈邦虎亦黨賊
率左右共執登仕脅降不屈爲邦虎所殺外委把總李茂劉世臣
亦以不降遇害土賊張五虞允應瓌圍蒲州河東道楊千古率中
軍許世德禦之兵內變開門迎賊千古率親兵巷戰奪門出世德
力戰陣亡方瓌初叛時有佟養昇以章京管牧馬事駐大同聞變
率從役巷戰死之事 聞議卹 詔贈國仕副將餘優卹如例國
纓奉天人順治二年武進士登戎山西甯武人石登仕佟養昇俱
奉天人李吉李茂劉世臣許世德籍無考

右 國史館本傳

李汝澄 段勳等

李汝澄直隸人任陝西提標遊擊順治六年土賊何可亮等嘯聚大谷口汝澄同都司段勳勦之賊敗入谷大兵追擊三十里殺賊百餘拯難民三百餘焚賊糧及奪牲械無算賊窘甚分其眾爲二一踞箭谷一踞大谷內王鬍子嶺官兵深入賊巢日暮道險至箭谷賊矢石並發汝澄勳均陣歿兵丁宋明奉焚自成皆從死時陝日屢有寇警先汝澄而殉難者四年有署靈州營參將張紀守備李繼祖以征螺山賊戰死與汝澄同時殉難者洛川知縣郭燦以賊高有才陷城死護軍校張進學亦以隨征有才被傷死八年三月賊何柴山據商州雒南進犯龍駒寨大兵擊走之尋復聚黑和

國朝通志卷之三十三
尚寺千總馬國明楊芳聲把總韓科隨征官馬守雲分道夾擊擒
賊渠十五人賊遁尋糾黨復來擾國明等偕潼關營千總王光祖
擊之飲馬槽賊敗奔入山大兵追擒劉虎等七人賊以死拒國明
芳聲被礮石擊死科中槍死守雲光祖及兵丁孫文相等俱陣亡
十二年靜甯州土寇起參將黃洲赴援擒賊首五人餘賊遁洲追
至田鐵帽堡賊弩齊發洲面中三矢越三日死議卹 詔贈汝澄
參將廕守備進學雲騎尉餘卹如例紀直隸人進學鑲藍旗漢軍
洲直隸宣化人明崇禎丁丑武進士順治初官山西平路衛遊擊
六年大同總兵姜瓖叛脅洲降不屈乘閒投將軍幕下隨營擊賊
有功十一年擢陝西固原參將餘籍無考

右 國史館本傳

因月香伏覓役刀屬
卷三十三 忠義五

國朝三才類事卷之三十三

程瑾 崔對等

程瑾奉天錦州生員隸正紅旗漢軍順治三年任山東館陶縣知縣有政聲初土賊李少亭等率眾攻縣城瑾身督禦殺賊無算賊黨駭走六年擢浙江金華府知府舟次陽穀縣阿城下聞口賊黨素仇瑾集馬步兵各千要截之瑾曰我 朝廷命官焉避害今決一死戰率丁役等奮戰槍箭并發自午至未斬百餘級賊馮河蜂擁入船遂遇害賊燔其船子式焚死時山東寇盜肆擾死蒙陰縣者有崔對死樂安縣者有蔣元彥死范縣者有孫養廉對直隸長垣縣人順治三年進士任蒙陰縣事縣四面皆山距青州府城五百里地僻四年青兗盜起賊首丁明吾率騎三百步賊七百自白馬

關圍城梯攻對率捕官臧士英教諭江見珠訓導陳文斗督鄉勇
竭力守禦五鼓賊縱火燒東南二門比明城陷對投井死士英被
殺於署妻劉亦遇害貢生秦璿秦琮生員秦之驕曹際飛公縱王
銓練長陳逢時等俱被創卒賊入對署索金不得惟圖書數卷分
掠新泰費縣遁元彥江南上元人樂安縣知縣土賊張介石率眾
攻縣城元彥抵禦不支被殺養廉漢軍鑲白旗人范縣知縣賊陷
城養廉闔家俱遇難事 聞 詔贈瑾山東按察司副使廕一子
入監瑾無子廕其弟憲官至山西潞安府知府對士英元彥養廉
贈卹均無考

右 國史館本傳

王棐

大清定鼎之六年有死難之臣曰王棐由江南壽州知州赴陝西鞏昌府通判道遇賊死之是時國家百度初立下隱或未通封疆大吏既無人爲報聞其子孤幼不能列諸史官使大節黯然當世莫顯僅存於其家人之口垂七十年於茲嗚呼其可慨也夫棐字非木山東之長山人世爲邑望族祖某父某咸有名行棐少負異稟卓犖諸生間順治初貢於朝試入優等卽除知壽州自以遭遇清時不次被用得展布其所學若史傳所紀循良直平視之耳甫至官卽著聲績好獨行己意不與僚屬俯仰眾皆貌敬而心銜之鎮將毛某者出身卒伍性尤閹鄙棐動加凌侮毛怒陰圖中

傷會雍髮之令方嚴毛出獄八公山下得犯者數人輒捕送之不使斐知上官移檄責問斐以事非故有蔽匿自恃素廉直且政事修舉得士民和無所庸乞憐求請上官不憚眾莫之助毛又力持之竟坐失察左調鞏昌判以去州人惜焉時河北流寇餘黨猶熾斐便道過家旋東裝西上抵荏平聞賊氛甚惡從者請入城斐不可曰吾奈何避賊吾眾殆百餘足抗禦既而賊至者數千人遂被執窘辱備至斐不屈且訶之曰新天子當陽與天下更始汝曹不早自湔洗爲良民顧仍作賊須臾王師至盡殺汝曹矣賊魁怒遂遇害其家以閒歸葬未幾賊陷淄川卒撲滅無遺如斐言斐長子廷揚爲名諸生廷揚子應統舉康熙戊辰武進士上親試之

擢第一人連被進用至河南通省總兵官方大駕時巡應統冀以閒得奏對言大父之節幸而邀寵命慰幽壤會以非意得罪棐事竟不聞

趙執信曰天之報忠臣也於其孫不忍其泯沒也應統與余友每恨不早自陳訴或有觸忤以此伏斧鑕無所苦今痛負先人言發嗚咽余迺爲作傳然千古義烈奇士其於身後蓋亦有幸不幸哉

右傳趙執信撰

172-464

111

李文學 劉運泰等

李文學奉天貢生順治六年任山東定陶縣知縣先是逆弁李化鯨陷曹縣殺知縣蔡廷琬攻城武殺知縣宋賢都署縣事教諭尙自察伺賊懈擊之旬月賊平自察尋以勞卒至是賊黨王心茂王希純等復聚眾擾城武殺訓導劉運泰於城東知縣李廷樞赴定陶請援沂州駐防遊擊杜國慶率兵會勦國慶素驍勇陣擒心茂希純等戮之師旋定陶而心茂黨邢可觀猶負固榆園警國慶集馬賊千餘四面圍攻時文學抵任甫三月飭士民設備嚴守偕國慶出戰振臂大呼奮入其陣賊披靡斬殺無算轉戰至白塔坡援兵不至賊復合圍國慶馳突不得出與文學偕歿於陣新委管干

國朝文獻通考卷之三百三十三
總事吳建成被創卒文學雖死城嚴守如故賊不敢入肆掠而去
其時同死者國慶標下馬兵郭貴陳魁王大成尹成功劉國志白
忠馬宗貴張洪光文學家丁袁起明何季菟李得劉明臣運泰山
東人初任城武訓導升博平縣教諭以赴任中途被戕國慶山西
大同人以武舉累官遊擊順治七年議卹 詔贈文學按察司僉
事廕一子入監讀書國慶 贈參將建成廕卹無考

右 國史館本傳

馬嗣煜

同州馬先生諱嗣煜字元昭號二岑以古學自任通判山東權守武定州賊兵攻城城破死之二曲李先生謂馮恭定而後咸推二岑先生

右學案唐鑑輯

楊佐 陸大勳等

楊佐福建人任總兵鎮福建漳浦順治六年鄭成功犯漳浦之佛潭橋進據新亭寨佐率兵勦之身搏戰力竭陣沒尋圍城參將陸大勳戰死賊又犯雲霄鎮副將包泰興以城圯不可守移駐莆尾堡堡破泰興自縊守備張國柱出擊賊死之時福州汀漳諸郡土寇多應成功武平生員饒其彥練鄉勇爲備賊至其彥與千總鍾和宇擊之賊遁窮追遇伏其彥與同邑生員王際泰朱先球皆戰死和宇免尋奉檄招撫禾坪隘賊被執脅爲鄉導不從自刃死永定人孔念厚順治三年進士賊陷城欲殺其父念厚以身捍父得免念厚死之士賊攻漳平守城死者守備顧雍土官遊擊盧泗土

官守備張奇賊攻平和城陷而死者知縣陳一太賊陷甯洋力戰而死者士官干總吳麟十一年成功復陷漳州脅文武官降水師營參將柳朝麟手刃妻孥自經死時台州海門遊擊徐元吉督舟師過定海遇賊力戰死十三年成功犯閩安鎮鎮無城眾保土堡水師遊擊劉應田同遊擊潘廷縉守備沈杰干總楊加茂王孝黃福純把總孫伯鯨李明沈國鎮出堡擊賊皆陣沒十四年犯福清生員何履鈺率鄉勇禦之賊執其父履鈺冒死鬪弗及救抱父屍死十五年犯浙江平陽城陷縣丞王牧民死之十七年建甯知縣溫光涵以叛弁據城遇害撫標守備林炫以勦賊戰歿於安定里十八年連江營把總閻榮以捕賊戰歿於保安里先後事 聞並

賜卹如例一太河南鄭州人順治六年進士朝麟鑲藍旗漢軍元
吉江南寶山人應田山東平度人牧民山西浮山貢生光涵山西
沁源人餘籍無考

右 國史館本傳

四庫全書

十一

傅永吉 王曉

傅永吉鑲紅旗漢軍順治六年 命漢軍子弟讀書者皆赴廷試
永吉入選爲鑲紅旗第一授福建長泰縣知縣時縣甫定山海多
寇民弱兵強永吉加意撫訓兵民相悅海寇鄭成功既陷漳浦海
澄詔安平和諸邑分徇漳郡盤據江東橋且窺長泰永吉使千總
劉彪等告急於郡仍募民堅守令貧者登陴富者給餉躬自履堞
晝夜巡督是時撫標參將馮君瑞提標右營守備于和自省城被
檄援漳行至長泰界賊梗遂引兵入縣城助守賊偵知兵至乃盡
撤江東橋夥黨聚長泰圍攻復驅鄉民刈甘蔗細積城南兩隅欲
履以登城永吉偕君瑞等相持六晝夜督敢死士力戰連殪賊渠

三賊蹙卻次日賊架大礮二十餘轟摧東南堞四面豎木城環諜
攻之勢甚洶涌官兵人人用命抵拒愈力永吉登城方抽矢射賊
忽礮中腹洞背急昇歸而城上兵民猶死守無懈會郡所遣總兵
王進功副將王進援師至賊圍解永吉創不能起日常呼殺賊經
三日始卒縣民愛哀而祠之事 聞 賜祭葬 贈福建按察司僉
事子登瀛以知縣錄用同時有王曉者河南太康縣人順治三年
投總兵范紹祖軍從定浙江温州屢有勞績擢爲效用官協守泰
順城賊攻之不下竟解圍去大兵入閩曉仍從之賊犯江東橋曉
率兵赴援歿於陣 賜卹如例

右 國史館本傳

馬如璧

馬如璧遼陽東甯衛人隸正藍旗漢軍 太宗文皇帝崇德五年
任驍騎校隨睿親王多爾袞圍明錦州敵以千餘騎出城迎犯如
璧隨侍衛李國翰戰卻之復擊敗松山步兵及杏山騎兵尋進攻
杏山松山兩路臺堡並隨都統石廷柱等以紅衣礮破之六年隨
鄭親王濟爾哈朗圍明錦州攻克駱駝山寨敵兵自十三站乘夜
來襲我營佐領禧福率甲士出戰如璧同參政碩詹馳馬陷陣殺
敵甚力會明總督洪承疇等合步騎十三萬來援錦州 上親統
大軍駐營松山 指授方略如璧隨都統巴顏石廷柱等循塔山
路以紅衣礮攻下附近諸臺七年授佐領隨鄭親王取塔山杏山

二城八年復隨鄭親王取中後所及前屯衛皆以紅衣礮攻城有功 世祖章皇帝順治元年敘功授騎都尉世職兼任參領二年隨英親王阿濟格剿流賊李自成於陝西追至湖廣屢戰皆捷與參領劉仲錦等擊走偽總兵馬進忠等於武昌獲賊船十有一六年鄭親王征湖南時明桂王朱由榔據武岡自成遺黨李錦劉體純王進才皆附之分踞寶慶衡州如璧由岳州進長沙趨衡州屢擊敗賊兵復同副都統金維城破賊寨於靖州賊眾奔如璧奮力窮追遇賊伏步戰力竭歿於陣七年遇 恩詔予騎都尉加一雲騎尉尋議卹晉三等輕車都尉子純德襲 世宗憲皇帝時以如璧入祀昭忠祠

右 國史館本傳

國史館本傳

二

楊珍 魏鎬等

楊珍山東蘭山人順治三年以武生從軍積功至遊擊六年設直隸河南山東三省總督駐大名珍爲督標遊擊時土寇猖獗總督張存仁選勇士往招撫珍毅然將命挺身入賊穴諭以大義賊負固不服繫之珍罵不絕口死大名道旗鼓守備魏鎬委防南樂縣亦以勦土寇陷陣歿時畿輔左右土寇未靖山海關都司吳盡忠聞寇至乘夜擊走之城賴以安賊又率騎掠郊外盡忠擊賊追至邢家灣單騎入賊圍馬蹶被執不屈死事並聞議卹如例鎬直隸南樂縣武舉人盡忠直隸任縣人其衿士鄉勇先後死土賊之難者又有王奎璧田浹澤竇彘李尙賢奎璧魏縣人寇犯大名奎

璧知事急負母逃賊執之不屈死浹澤平鄉人寇圍平鄉城浹澤率眾防禦城破遇害多吳橋人聞賊圍吳橋之于家集率壯丁二十餘往援賊辟易圍解遂言於有司練鄉兵屢設伏獲賊賊畏之後伺隙集眾大至多往關賊圍之數日多力不足眾勸其突圍出多大呼曰兵敗則死耳何面目復見人短兵格鬪賊攢射之遂死尚賢慶雲人賊圍慶雲城尚賢突圍出赴鹽山乞援賊追執之賢給曰我當扣門獻城賊擁至城下尚賢呼曰奉使無狀被賊執今死矣賊單弱堅守城無虞也賊怒殺之奎璧浹澤俱生員多尚賢俱鄉勇

右 國史館本傳

李懋祖 李永忠等

李懋祖奉天人明甯遠伯李成梁之曾孫隨父驃騎將軍懷忠遷居山東蘭山縣順治元年以廩貢授平度知州洵擢衡永兵備道僉事六年孫可望擾湖廣破靖州殺知州林爾張次年賊黨一隻虎亦乘勢犯永州時懋祖方擢陝西布政司右參議未赴任與總兵余永忠嬰城守圍久援絕永忠出戰兵敗墮水死城破懋祖爲賊所得久之有官兵從賊中逸出言懋祖在賊營不屈遇害湖廣總督羅繡錦以狀聞詔贈懋祖光祿寺卿廕一子入監十年一隻虎攻遠安總兵鄭四維遣都司僉書汪吉守備馬得勝千總王瑚把總張仁李珍等統兵二千往勦遇賊百餘於磨旗坪殲之

乘勝進賊設伏來拒大兵方追逐伏起布滿山谷大兵血戰賊愈
取會日暮吉突圍不得出馬傷步戰力竭攷得勝瑚仁珍並戰死
十二年可望又遣其黨譚義等犯彝陵城破訓導張作肅不屈死
先後事 聞 詔贈吉雲騎尉世職作肅國子監學錄餘卹如例
爾張廣東惠來歲貢生吉江南鳳陽人得勝等籍無考

右 國史館本傳

陳武

陳武號助寰河南睢州人明末流寇犯睢州武糾鄉勇捍里門賊環射之矢如雨集不能中武以一矢中賊首賊驚潰國初隨征有功授副將協鎮金華所掠婦女輒贖歸其家後隨平靖兩藩收東粵前後戰績甚著高州陷力戰而死

右傳查岐昌撰

皇朝詩林卷之三十三

三

段上彩 侯憲武等

段上彩山西陽城人順治三年進士四年任江南沈陽知縣時大
江南北多寇警績溪知縣侯憲武廣德州同知任佐君溧水生員
劉虔俱以二年土寇陷城死太平副將林中瑜署吳江知縣孔允
祖金山縣鄉勇范來良郭中涯俱以三年勦土寇死潛山生員鄭
之僑以六年土寇亂脅降不屈死七年上彩獲山東竊牛賊四並
賊婦二置獄其黨謀劫去潛通山東榆園寇寇是年掠鄰郡贛榆
縣殺荻水營把總黃世爵次年三月馬步賊千餘自西北至夜襲
城上彩據北門守時城中居民四十餘家防兵僅三百或謂兵寡
且防具未整曷移家屬於城外而親謁郡請援畱空城給賊賊慮

援兵至必速竄上彩曰城亡與亡遑恤家率僕及防卒登城守十九日賊樹雲梯上彩揮眾斬梯奪刃格殺數人力竭城陷賊放獄中囚執上彩奪印索銀物上彩怒罵以拳擊賊魁賊怒剖其腹妻劉氏幼子公樞僕柴國強溫自明俱同日殉訓導趙起芳與其子亦死難先後議卹 詔贈上彩憲武俱按察司僉事廕一子入監餘卹如例憲武河南永城拔貢生佐君河南鹿邑人中瑜奉天人勦土寇於官坪擣賊巢斬首二百有奇生擒賊首二賊合圍遇深塹馬陷被害允祖山東曲阜人以貢生任經歷署吳江縣事時縣經兵火城無居民允祖招撫勤卹又以兵駐邑爲民患請上官撤去之起芳江南武進人世爵籍無考

右 國史館本傳

國史館本傳
五

許鴻儒 弟重然 子承昊

故 贈按察司僉事柳州羅城知縣許公鴻儒順治八年不屈於賊死距康熙二十二年太平修邑志僅三十餘年紀載者不知考据謬撰事蹟余少採鄉里舊聞補爲公傳亦未得實續姻戚李文秋水宦廣西卽公殉難處託訪始末又得公同時至親季冰軒先生遺刻內有哭公詩題下敘公事甚詳於是乃得舉從前諸譌而一正之蓋公死於西師之變不死於土酋其死在到縣一期非之任日桂林卽失守援絕與公同死者惟長子承昊若幼子承薦則病歿長沙其弟重然又自沙鞏趨羅城中道先歿於賊云弟男五人俱遇害者亦誤也公先居邑之松門松門明季爲衛城濱海重

地嘉靖間數有倭患其地之人多以戰功顯公亦將家子故被服
儒素而於孫吳料敵及攻戰防禦之術皆所熟諳順治己丑以明
經舉時大師未進克粵西大將軍以公才請公隨行軍中密謀公
多與焉辛卯桂林既下同事分方之任公得羅城攜承昊同往民
情未定賴公綏靖諸廢具舉縣有起色壬辰西兵驟入省會告變
定藩自焚州縣一時皆潰獨公猶爲 國守當是時縣兵不過百
人糧亦不能支一月外無援兵賊來益眾孤城危於累卵而公顧
與承昊日夜督民繕完召父老激以忠義間出奇兵撓賊賊益怒
悉眾來攻勢迫或勸公易服走公曰 天子命我守城城亡與亡
有死法無走理蒙恥求活奇男子不爲也城陷給賊取朝服北望

拜遂罵賊死承吳亦遇禍初公偕二子一弟相率之官先後罹凶
無一存者踰二年廣西事定仲子圭始萬里奔喪哀請贈蔭葬祭
得 旨贈廣西按察司僉事 諭祭一通文略具邑志中入鄉祠
並蔭一子入監而圭未久流寓江西貧窶甚蔭遂懸順治十六年
海寇松門被遣公諸孫族人轉遷澤庫及他處踰三十年松門新
氓無能言公事者繆襲傳會蓋亦有由也公之後人南英與余同
里新請於上憲得奉公祀余爲之喜因爲考公殉難之實而正乎
其傳之譌並錄冰軒詩及小敘俾藏之於家以俟後之修邑志任
紀載者而余舊所爲傳亦可以弗存

右辨正殉難事戚學標撰

東洋書院
大正十一年
三月三十一日

三

甘體垣 郭進祿等

甘體垣奉天人順治初從大兵入閩八年三月巡撫張學聖委署海澄知縣時海寇鄭成功方猖獗五月二十五日由廈門犯海澄泊舟浮宮港侵豐田白埕查竈諸輿連營十餘里體垣籲府求援二十八日漳州鎮中軍守備郭進祿把總吳海龍率馬步兵迎戰賊銳甚進祿乃析軍爲二欲夾衝賊營賊槍礮噴筒火箭四面攢發其山坳伏賊起助擊官兵進退受創進祿海龍力竭殞於陣兵殉者二百餘賊虞大兵續至急拔營登舟去是年九月復犯浮宮港入豐田南谿至漸山橫口體垣嬰城守時參將赫文興逆節未形隨副將王邦俊等禦賊賊二萬餘乘夜進黎明圍營邀關別遣

賊扼馬口截官兵歸路兵驚潰提標千總王得成把總周平陶惟
皆戰歿而文興遂叛降於賊賊進破唐北甘棠諸寨焚馬口及埔
尾村莊十二月陷漳浦縣城明年正月初三日文興返襲海澄陷
之執體垣欲污以僞命體垣不應文興百計強之體垣瞑目不視
亦不食賊知不可屈乃縛而沈諸海邑民招其魂祀焉是月賊乘
勝趨平和署平和縣知縣王顯謨浙江慈谿人初由拔貢生授河
南歸德府推官以讞獄明允擢福建漳州府同知適縣乏員顯謨
與體垣同時受委攝平和甫八月賊驟至圍城顯謨率士民固守
力屈城陷賊生得顯謨欲降之顯謨罵賊不已賊怒埋其身而露
其首數日死先後事 聞並 賜祭葬體垣 贈按察司僉事顯

謨加 贈按察司副使俱廕一子入監餘卹如例

右 國史館本傳

陳錦

陳錦遼東錦州人初爲明大凌河都司 本朝天聰五年 太宗
文皇帝征明下大凌河城錦率所部降授騎都尉世職又加一雲
騎尉崇德七年編漢軍八旗俾隸正藍旗任佐領順治元年

世祖章皇帝定鼎京師由內院副理事官授登萊巡撫值青州土賊
楊威秦尙行結連明總兵劉澤清聚眾爲亂錦遣兵進剿擒威等
斬以徇捷 聞 賜金帛有差二年賊渠張廣焚掠掖濰諸邑錦
遣兵擊敗之廣奔投劉澤清受僞職復聚賊眾寇平度州萊州錦
分檄登萊膠州諸將投計設伏自三埠進擊追賊至徐家疇伏發
射殪張廣盡殲其眾尋擢操江總督與招撫大學士洪承疇並駐

江甯三年江甯城中有謀亂者遙結僞瑞昌王朱誼石等來犯爲內應錦同承疇察知之閉門捕斬賊黨誼石糾眾至大敗竄遁四年疏言圖山爲鎮江咽喉江甯門戶請建立礮臺遣兵更番防守其江北要口設臺亦如之兩岸兵船接哨分防卽結寨於臺下明初沿江皆設烽墩民夫守之給餉於所屬州縣迨及明季民夫應州縣私役烽墩遂廢今請復舊額使聲勢相通章下部議從之是年十一月調閩浙總督時海賊鄭成功寇掠閩地延平有將軍寨者地勢巍峭俯瞰諸邑賊據其上大兵屢攻不能破錦命壘土高與寨等乘以登陴遂攻克之會福州大饑郡縣多陷於賊錦遣兵次第收復撫輯流徙民賴以安五年海賊鄭彩連鯨千餘入踞

長樂連江諸縣錦與靖南將軍陳泰等分兵夾擊恢復二縣連軍興化斬僞總兵顧世臣等十一人六年正月遣總兵官張應夢馬得功等復羅源永春德化福安諸邑平三百餘寨以福清等二十縣士民能效死守城奏免本年丁徭以示鼓勵七月江西山賊突入延平攻陷大田尤溪錦調兵會剿復其地擒斬僞新建王朱由模及其黨朱由模等七年疏陳進剿舟山機宜曰舟山及各山負固者皆以擁戴明魯王爲名水賊登岸則山賊爲之接應山賊初被剿則入海以避兵鋒交通閩粵侵犯蘇松爲數省之大害臣已多方咨訪盡得舟山情形及進兵路徑今圖併力大創必由定關出海定關距舟山纔百餘里乘風半日可到攻其不備可決必勝

前此以招撫爲名莫敢言剿甚爲非計宜就臣標及提鎮標撥選合定關水陸之兵相機督剿此一要也舟山到海直接定關不但沿海奸民伺我動靜卽今賊黨阮進王朝先等俱屯桐嶠南田諸處機事不密彼必求援閩寇爲隄防宜密會撫提諸臣合力迅擊庶克成功其蘇松台温等處水師應調遣者或壯聲援或資堵截俱俟臨時審度而行此二要也蕩剿之後巢穴雖空而畱兵防守實爲急務可撤錢塘水師一營改駐舟山濟以定關水師別設陸兵一千副將一員統之仍令定關總兵官於定關至舟山適中之金蕩山駐兵以扼其衝使餘孽不敢窺伺而浙省之門戶胥固此三要也疏入 上是其言明年錦與都統金礪劉之源提督田雄

等由定關出師敗賊於橫洋擒僞侯阮進遂進攻舟山毀其城賊
縱火竄遁我兵擒斬無算舟山平移陸兵一千水兵二千駐守之
九年七月鄭成功入寇漳浦平和錦提師赴援戰江東橋失利退
次同安夜宿帳中爲賊所刺中要害遂卒事 聞追 贈兵部尙
書 賜祭葬如典禮

右 國史館本傳

王荃可 華鍾等

王荃可山東益都人順治三年進士授行人八年六月擢湖廣道
監察御史七月巡按廣西時廣西新附明桂王朱由榔故將胡一
青馬寶等尙嘯聚山谷居民一夕數驚巡撫王一品以疾告歸荃
可乃巡視旁縣糾吏貪墨者給民耕具流亡漸集富川知縣華鍾
平樂知縣涂起鵬有惠政還言於定南王孔有德檄獎勉之起鵬
練土兵鍾增設屯堡守禦始固會李定國降於桂王以兵援湖南
續順公沈永忠告急有德將大發兵救之荃可進說曰定國劇賊
意在窺廣西兵盡出會城單弱非計也有德曰永忠方急援少恐
不集事且賊以全力注湖南我悉出銳師內外夾擊挫其鋒賊膽

破矣師旣行俄聞定國分兵窺全州入廣西界荃可請率民壯扼大榕江以牽賊勢有德畱之共守會城定國以千餘兵綴官軍於全州自率健卒由閒道日夜馳二百餘里薄桂林荃可悉發民兵隨有德乘城晝夜守不懈有德爲流矢中額扶歸荃可請曰城危視王爲進退奈何寢疾有德卽裹創出視事定國驅眾緣城北山嶺躍入城遂陷有德自縊荃可被執不屈死之定國旣陷桂林勢大熾一青寶等俱出與相應攻平樂起鵬率土兵迎敵力戰援絕城陷被執不屈死進陷富川鍾赴水死鍾本姓秦江蘇無錫人起鵬湖北潛江人俱以歲貢生授知縣十年 贈荃可太僕寺少卿鍾起鵬按察司僉事並 賜祭葬荃可子松鍾子沘起鵬子勛以

廕入國子監

右 國史館本傳

明史紀事本末卷之五十五 忠義五

三

曹盛祖 李養性等

曹盛祖遼東人祖紹中明副將 本朝天聰七年隨孔有德自登州航海來歸仍授副將隸有德麾下紹中卒子德先襲以功晉職三等子順治六年有德開藩廣西德先從爲右翼總兵官八年六月卒有德奏以其子盛祖襲九年七月李定國陷桂林有德力竭自焚死盛祖率妻子同殉母楊氏庶母董氏王氏皆死焉時郡邑寇陷死者多無考守臣于時躍等皆奏盛祖死衡湘間而德先從弟二先爲靖南王耿繼茂副將言亂後潛探桂林兄家見屍骨溷雜已不可辨識矣是時奉部牒詰隨定南殉難者必不止盛祖一人旣而原護衛李茹春稽覈藩屬死事官子弟俱無者王府長史

李養性一等護衛白雲龍二等護衛徐士恩一等男程希孔楊承先輕車都尉洪文昇備禦王薦賢什長樸五幸存子弟者一等護衛王世祥二等護衛馮應麟一等男袁道光騎都尉孫應元備禦孟有才又王女孔四貞揭部言有德部將胡光先故三等男胡萬明次子承文職從征桂林之變光先闔門盡節獨萬明長子光裕奉差東粵是以尙存其三等男孫延世輕車都尉孫延連皆同日從死惟二等男孫龍則先一月接餉全州中途遇賊死又總督李率奏言定南王閒散護衛線成信乃提督線國安次子幼隨有德軍營當李賊攻城日與前鋒參領芮成功驍騎校周志元等十一員及什長辛光玉等三十五人俱歿於陣後線國安又奏言定

南藩下副將張士舉遼東蓋州人初隨孔有德來歸授副將有德死難之次年正月偕臣從梧州恢復桂林四月僞總兵十三鎮餘黨並僞國公胡一青等復犯桂林西臣率兵出城抵殺士舉奮勇當先被賊礮傷左乳數日創潰死此則國安所目擊者奏並入詔盛祖加贈一雲騎尉以叔義先襲闕以子延齡襲延世以弟延昌襲道光以弟道祿襲均加贈一雲騎尉餘無子弟者優予祭葬有子弟者廕卹如例

右 國史館本傳

國朝通志卷之三十三

三

馬騰龍 張順等

馬騰龍直隸宣化人順治初以武舉隨定南王孔有德屢立戰功累擢至桂林提標遊擊九年七月李定國犯桂林騰龍竭力守城陷與鎮標都司張順撫標旗鼓守備暢大理提標千總楊光先把總王國用劉祿皆巷戰死騰龍弟從龍妻郭氏皆殉大理出戰時家屬並自縊官署後其僕李喜收骨歸京師光先父母見勢迫先自刎死光先乃手刃其妻妾及二幼子然後挺身出關殲賊五人順江南上元人大理漢軍鑲白旗人光先江甯人國用順天人祿昌平人先是五月間李定國連陷靖沅武岡有德檄諸道兵集梧州爲桂林聲援是時山谷要隘已爲敵據柳慶副將何九成方

慶遠見檄卽提兵急衝出日夜鏖戰甫達梧城身殞羅河副將沈邦清駐防羅城孤軍被困屢突不能出與把總張志雄皆力戰陣亡邦清子亦殉於桂林失其名有李養成周雄者並以千總署守備戰於融縣之沙鞏村敗俱死又有把總沈敬池州人先一月戰歿於全州許泰易州人先一年戰歿於湖南新田縣皆以禦定國死先後奏聞議卹騰龍贈一級其同時死難諸員惟九成以不係陣亡部議無卹光先闔家慘烈詔優贈守備餘依例贈卹有差九成邦清志雄養成雄里籍俱無考

右 國史館本傳

周永緒 尹明廷等

周永緒安徽盱眙人順治六年進士八年定南王孔有德以廣西
新定請速簡道府以安輯兵民於是部銓永緒爲府江道而以尹
明廷爲平樂知府沈倫爲梧州知府明廷江南吳縣人倫湖廣天
門人皆六年進士與永緒並在部觀政故簡用之永緒駐平樂偕
明廷悉心拊循民逃者盡來歸設屯堡行旅無恐巡按御史王荃
可以永緒善安輯疏薦之梧州爲廣東西孔道倫儲芻蕘大兵往
來供億無匱而閭閻不擾時明桂王朱由榔遁安隆其故將多招
集亡命聲言復取廣西居民驚徙倫乃葺學校課士予以安人心
九年七月李定國陷桂林乘勝破平樂永緒不屈死明廷被執定

國分兵攻梧州倫守禦力竭城陷死之定國執明廷誘以官不屈
會定國移兵援湖南明廷得脫歸巡撫陳維新新至明廷上謁備
言賊形勢會總兵線國安已復平樂維新傲明廷仍知府事明廷
星馳至曰民新被瘡痍稍緩恐不聊生矣取餘糧在敵營者賑恤
貧乏益嚴守備十年六月定國自湖南復攻平樂國安退廣東七
月城陷執明廷欲脅降之明廷大罵曰狂賊死吾分也何多言定
國怒去其衣束以魚網鬻磔之至死罵不絕口十二月維新以永
緒明廷死事狀 聞 詔贈永緒光祿寺卿明廷太僕寺卿各廕
一子入監明廷之死也居民感其惠政潛瘞骨於府治坊側廣西
平明廷子宗文赴平樂求瘞所傍徨無所遇有老媪指示之乃負

骨歸葬宗文後以廕官河南柘城知縣

右 國史館本傳

尹明廷

尹氏系出周吉甫始家齊之臨淄元末遷爲吳縣人累傳至君考諱天章始以儒顯君諱明廷字奠階孝謹溫秀尙氣誼所與游皆名士爲文揭揭耀一時順治己丑登進士除廣西平樂知府故事知府秩四品例不得初授是時 王師方略定兩廣官皆從軍地尤荒遠數叛服故特用異數人猶趑趑憚行君獨慨然亡畏色崎嶇長沙衡永間一歲如抵郡礪壤惡灘猺獞錯處兵火後白骨委地民竄走山谷間君招徠摩撫掩骼闢野申要約禮羈舊延秀良

毗庶蘇蘇若疋羸得藥粥兵卒有輜轆吾民者必力戢之弁者庇
兵至以身受齟齬不稍悔祿入不贍脫其妻子釧質米分守周公
永緒巡按王公荃可聞之改容稱歎曰是真良二千石而握兵吏
頗不懽順治九年秋七月寇陷桂林定南王自剄死潰兵浮尸自
灘江接招潭遠近震駭君募勇士誓死固守十餘日而郡城庫薄
呼援兵無一至賊入脅降罵不屈斷一股一臂至死猶踞地罵郡
人爲泣而瘞之死所事聞 天子嗟悼 詔贈太僕寺卿 賜祭
葬廕如禮初平樂之聞亂也刑部主事施閩章奉使在郡歸必道
桂林君謂省會危機不可蹈留治裝東下蒼梧已而桂林報陷乃
置酒與閩章訣曰君使客也宜亟行某守是死矣余泣下君猶強

飲語笑如平時其志定也死之日爲順治壬辰七月十八日年四十三夫人徐氏明翰林詹事沂之從孫女生二子長正始吳縣諸生今以廕入監讀書次正雅女一嫁虞山陸氏君殉難之明年六月正始從閒道奉君骨歸又三年走山左來乞銘余故君同門進士最相善君又嘗脫我難讀狀慟絕銘曰

生東吳兮死西粵嬰白刃兮氣不折昭之人兮復斷絕昭之水兮聲嗚咽振令名兮君莫哀 寵命卹兮天昭回遊大荒兮魂歸來君騰而上兮閭闔開

右墓誌銘施閨章撰

金漢蕙 郭養志等

金漢蕙浙江義烏人順治六年進士隨征廣西八年授分守右江道時李定國由湖南擾廣西九年七月圍桂林驅象來攻城陷百總郭養志戰死定國使其裨將李茂吉等分兵犯柳州漢蕙率士民拒守城陷執漢蕙赴衡州賊營十一月大兵復衡州漢蕙乘閒逸賊追及遇害於兩路口其腋下挾 敕書徧染血跡廣西巡撫陳維新收得之貯布政司庫定國旋犯梧州分三隊攻官兵亦分隊應之千總蔣應泰等隨總兵線國安爲一隊於龍母廟後高岡迎戰賊以象衝陣官兵逆戰多斬馘旋聞河岸一隊失利國安分兵救之勢益單被圍數日不能出應泰與把總李得祖金大成千

總趙興楚劉定邦俱陣沒大兵尋復梧州其餘孽猶據南隘美村
國安遣佐領王世富等進剿賊倚山拒戰世富擊走之追至山巔
有來援者槍洞腹死先後事 聞 詔贈漢蕙光祿寺卿廕其子
以琳入監世富 贈雲騎尉姪成功襲餘卹如例養志等籍俱無
考

右 國史館本傳

李永華 劉德源等

李永華漢軍鑲白旗人順治六年以四方平定州縣需員 特命
入旗漢軍中無論俊秀閒散凡讀書人俱赴 廷試選文理優通
者爲貢士除補牧令永華與焉九年四月授福建建安縣知縣五
月永華偕兄永柱奉母赴任八月抵閩界是時浙閩間山賊屢發
行旅多梗先一年有劇盜楊雙等嘯聚浙屬江山縣周村出沒漆
樹坑紅巖嶺諸處時入浦城界擄掠浦城防將令中軍守備劉德
源把總李有功率官兵七十前往剿禦至周潭口聞賊至德源度
兵少欲出奇取勝乃析其兵以四十人付有功趨扼安民關要隘
而自以三十餘兵向周潭擊賊賊兵散伏坳僻及叢箐中誘德源

上高岡壘戰良久德源手刃數賊伏突起官兵驚奔竹林內槍礮
迸發德源中槍死其親兵虞正官李魁徐正元楊汝明金福張廷
祚皆陣亡有功自安明關還救不及奪德源屍歸賊由此益橫每
垂涎浦城至是賊族楊文率黨數百建大旗直劫浦城之漁梁鄉
永華攜眷入閩方憩漁梁之旅店見賊勢迫卽偕永柱率家丁宋
朝等持械赴禦永華射斃數十賊矢盡力竭徧體受傷行數里身
殞家丁宋朝等力鬪同殉賊始退事 聞並 賜卹如例 贈永
華按察司僉事廕一子入監讀書德源里籍無考

右 國史館本傳

劉昇祚 王任杞

劉昇祚山西汾陽人明崇禎十年進士未仕 本朝順治五年鄭親王濟爾哈朗奉 命討定湖廣以昇祚及王任杞從行任杞順天大興人崇禎十五年舉人與昇祚稽覈糧餉簿籍無舛六年大兵底定湖南以辰州爲滇黔咽喉檄昇祚以參議銜分巡辰常任杞署辰州知府尋皆實授七年正月大兵凱旋以總兵徐勇守辰州時谿峒多反側城中民爲賊耳目煽流言昇祚示以鎮靜自賊來歸者開誠與語俾復舊業既乃籍其丁壯爲鄉兵而誅爲賊間者任杞勸民間墾濟溝渠資灌溉歸耕者日眾勇亦善輯士卒居民德之會張獻忠餘黨李定國降於明桂王朱由榔將窺湖南九

年九月定國令白文選犯辰州勇出迎戰昇祚率鄉兵伏城外五里橋任杞城守勇奮擊文選敗之昇祚合勢追勦俘斬甚眾勇以捷聞並列上昇祚任杞戰守狀上獎其忠壯十月諭曰朕覽徐勇所奏道府各官和衷協力堅守孤城大挫賊鋒朕心嘉悅劉昇祚著賞鍍金玲瓏鞍轡一頭等馬一王任杞著賞鍍金玲瓏鞍轡一二等馬一幷各給貂帽蟒衣鞵帶以示嘉勉旋擢任杞廣東按察副使巡海道未及行十一月文選驅眾五萬復犯辰州薄城下昇祚擐甲登陴立矢石聞任杞悉出家財爲守禦計相持十餘日不懈俄聞北門攻急勇力禦之文選列象陣自東門突入昇祚墮下城躍馬大呼巷戰力屈遇害任杞被執死於演武場十一

年八月經略洪承疇疏言辰常道劉昇祚城陷被執賊猶欲誘以
官職辱罵不屈立駢慘磔全門男婦遭戮無遺知府王任杞城陷
後罵賊觸怒碎骨而死其祖母自縊一門男婦被害者四十六人
死事之烈均爲可憫十月 贈昇祚光祿寺卿任杞太僕寺少卿
各廕一子並 賜祭葬勇自有傳

右 國史館本傳

國朝正康表右系列 四卷三十三

四

國朝書獻類徵初編卷三百三十六目錄

忠義六

額色 伊穆圖等

喀爾塔喇 于赫特赫 武京 都貝等

阿拉密

林爾張 李之秀等 周基昌 潘應龍等

屠洪基

楊國勳 徐朝官等 寶明運 茅生蕙等

鄔象鼎 慎似允等

應太極 王成義等 黃應乾

呂公義 王彬等

徐大用 李煌等 鄭朝肅 王應星等

藍銘璽

楊州俊 黃標 費揚古 外三

陳有虞 王嘉楨等

徐尙介 顧正笏等 殷壯猷 張鵬等

哈勒巴 博爾和圖等

巴都 色魯等 覺羅阿克善

鄭之文

傅進忠

劉良卿等

李宏德

謝仲武等

國朝耆獻類徵初編卷三百三十六

通奉大夫前署江西巡撫江西布政使司布政使湘陰李桓輯

忠義六

額色 伊穆圖等

額色滿洲鑲白旗人姓納喇崇德三年偕佐領伊穆圖隨大兵征明次吳橋乘夜設雲梯額色以第二人登堞克其城伊穆圖從下山東破明兵四年額色授雲騎尉六年大兵圍錦州明兵自松山來援額色偕佐領懇哲擊敗之順治元年額色伊穆圖懇哲暨章京伍遜泰從入山海關伊穆圖懇哲追流賊至望都大敗之復破賊於潼關伍遜泰亦多斬獲並授騎都尉二年額色從豫親王多

鐸南征取淮安敗其守兵明福王由崧之總督田仰率兵八千餘屯三里橋額色從副都統譚布敗之於海安又敗之於湖口橋進至如臯明兵屯鶯臺山隨副都統康喀爾擊取其砦旋破由崧將黃蜚於太湖遂從下福建六年江西總兵金聲桓叛額色從平南將軍譚泰討之同署參領根特破其前隊賊渠王得仁擁兵七千來犯同參領阿玉璽却其眾旋遇 恩詔額色伊穆圖加三等輕車都尉懇哲伍遜泰加二等輕車都尉九年七月敬謹親王尼堪爲定遠大將軍統師討李定國額色等俱從征時定國降於明桂王由榔假其封號陷廣西援湖南勢大熾八月大兵至湘潭伊穆圖同護軍校果渾韶贍絕其餉道由榔將馬進忠遁去十一月大

兵進取衡州去衡山縣三十里額色同頭等侍衛回色喀喇三等
輕車都尉瑪欣擊其哨卒敗之乘夜進未明抵衡州方列陣定國
驅眾四萬餘猝至尼堪麾前隊進擊護軍校海住法克戰歿額色
同三等輕車都尉莽儀祿雲騎尉劉國輔護軍校瑪祿衝其陣陣
動伊穆圖懇哲率護軍參領達海肅丹達爾布驍騎校莫勒洪音
達瑚齊護軍校彰庫善分左右翼夾擊達海肅丹達爾布瑪祿均
中礮歿額色伊穆圖等戰益力大敗定國逐北二十餘里定國伏
兵林菁城內復出兵助之軍中有請退師者尼堪曰大兵凡擊賊
無退者豈憚此小醜乎奮勇直入額色等隨之伏四起環合數重
尼堪率額色等縱橫衝決殺傷無數矢盡尼堪遇害額色伊穆圖

懇哲回色喀喇瑪欣果渾韶瞻莽儀祿劉國輔莫勒洪音達瑚齊
彰庫善皆戰歿王府一等護衛沙布三等護衛慕蘭聞尼堪歿復
陷陣被戕定國自知兵力已竭退入武岡伍遜泰襲其餘兵創重
卒十二年 詔議卹額色 贈一等輕車都尉子滿色襲伊穆圖
蒙古正藍旗人姓布爾克 贈一等輕車都尉子色勒襲懇哲蒙
古鑲藍旗人姓席魯克 贈一等輕車都尉子德靈格襲伍遜泰
蒙古正藍旗人 贈二等輕車都尉子素穆圖襲果渾韶瞻滿洲
鑲白旗人姓黨佳 贈雪馬尉子哈爾費顏襲回色滿洲鑲紅旗
人姓烏扎庫贈無考喀喇滿洲鑲紅旗人姓伊爾根覺羅贈無考
瑪欣滿洲鑲藍旗人姓薩克達 贈一等輕車都尉海住滿洲正

白旗人 賜卹如例法克滿洲正白旗人姓舒舒覺羅 贈雲騎尉以其兄哈格襲莽儀祿滿洲鑲藍旗人姓薩克達 贈二等輕車都尉子瑪爾岱襲劉國輔正紅旗漢軍先以從征姜瓖有功 贈騎都尉無子以兄子文通襲瑪祿滿洲正白旗人亦額色同族 贈騎都尉子邁蘭襲達海滿洲鑲黃旗人姓富察 贈騎都尉兼一雲騎尉子博羅爾襲肅丹滿洲鑲白旗人姓瓜勒佳 贈雲騎尉子邁圖襲自有傳達爾布滿洲正白旗人姓烏扎祿子章祿 襲世職音達瑚齊滿洲鑲藍旗人姓赫舍里贈襲無考莫勒洪滿洲正藍旗人姓朱佳 贈雲騎尉子們代襲彰庫善滿洲正藍旗人姓烏蘇 贈雲騎尉以弟之子俄特海襲沙布滿洲鑲紅旗人

國史館本傳

姓那木都魯慕蘭滿洲鑲紅旗人姓棟鄂贈廕俱無考

右 國史館本傳

喀爾塔喇 子赫特赫

喀爾塔喇滿洲鑲白旗人姓章佳氏世居費雅朗阿父圖爾坤歡
詹當 太祖高皇帝時率子五人及百餘戶來歸授佐領使轄之
既卒喀爾塔喇仍其任 太宗文皇帝崇德三年任護軍參領隨
豫親王多鐸征明甯遠將入邊截擊敵兵生擒六人及還遇敵兵
又連敗之六年大軍圍明錦州城內兵出犯鑲黃旗所守壕墜左
翼護軍俱退避壕內喀爾塔喇及參領達木布等坐罪應論死
上命從寬罰鍰 世祖章皇帝順治元年四月大軍入山海關擊
流賊李自成喀爾塔喇率本旗兵敗賊騎追至望都盡殲其後隊
旋隨都統巴哈納等下河南懷慶擊敗賊兵進定山西破賊於黃

河渡口追至榆林二年自成遁走湖廣喀爾塔喇隨護軍參領釐拜攻安陸府克之復率兵追勦連破賊營獲船六十餘五年江西總兵金聲桓以南昌叛上命征南大將軍譚泰往討之大軍至童子渡賊據水爲陣喀爾塔喇奪其舟梁擊敗賊眾分兵趨饒州遇僞副將三人率眾三千迎戰喀爾塔喇同參領巴朗等擊敗之乘勝攻克饒州城進征南昌甫駐營賊眾來犯喀爾塔喇奮擊挫賊旣而大軍掘壕圍城喀爾塔喇駐守江岸賊以船運糧入城喀爾塔喇屢率眾邀擊獲船八又縱火焚其船七百餘六年正月大軍合攻城北路喀爾塔喇同參領良泰別率兵於城南樹雲梯破城凱旋得優賚九年八月擢護軍統領時流賊張獻忠餘黨孫

可望李定國等寇掠湖南 上命敬謹親王尼堪統師進剿喀爾
塔喇領護軍以隨十一月大軍至衡州擊敗賊眾我軍乘勝疾趨
遇賊伏喀爾塔喇力戰歿於陣先是敘平流賊功 子喀爾塔喇
雲騎尉世職嗣敘平金聲桓功並三遇 恩詔洊晉一等輕車都
尉及是議卹晉三等男 賜祭葬如典禮諡忠壯立碑墓道子赫
特赫襲十六年任參領隨大軍征海賊鄭成功於福建擊敗偽總
兵黃昌等尋率舟師進攻廈門歿於陣議卹 子騎都尉世職以
其兄赫仲襲弟格爾德襲三等男

右 國史館本傳

國朝考廣勅從初編

卷三十三

三

武京 都貝等

武京蒙古正黃旗人天聰三年隨大兵征明至通州戰屢捷又敗其經略盧象昇軍六年從征察哈爾至興安伊喀偏多斬獲崇德六年從大兵圍錦州有功授佐領世職洊加二等輕車都尉擢副都統順治九年孫可望掠湖廣 命敬謹親王尼堪爲定遠大將軍征之武京與護軍參領都貝從十一月進師衡州去衡山三十里敗賊哨卒乘夜追襲未明至衡州大兵方列陣賊眾四萬猝至尼堪麾首隊進擊大破之追北二十餘里林內賊伏發城內復出應師欲退尼堪謂武京等曰我兵臨陣無退者我爲宗室何面目歸乎與武京等奮勇入賊圍數重尼堪縱橫馳突矢盡拔刀力戰

歿於陣武京都貝皆戰死十年正月 命隨征多羅貝勒吞齊爲
定遠大將軍勦之六月可望率眾來靖州其部將馮雙禮來武岡
從征一等輕車都尉伊爾格德二等輕車都尉韋徵隨吞齊率大
軍向寶慶偵雙禮等賊四萬餘營岔路口三十里外周家坡可望
在寶慶大兵進岔路口次日抵賊壘以日暮天雨罷攻是夜可望
率全軍來與雙禮軍合眾十萬下山環陳進拒大兵伊爾格德等
分兵奮擊大敗賊眾獲馬七百象一軍器無算伊爾格德韋徵俱
受重創死先後議卹 詔贈武京韋徵一等輕車都尉都貝雲騎
尉伊爾格德三等男都貝滿洲鑲紅旗人世居興佳以地爲氏伊
爾格德滿洲正黃旗人姓扎庫塔初任佐領隨征呼爾哈有功順

治元年 詔世其職擢工部理事官四年加雲騎尉五年以從征
叛鎮金聲桓功加二等輕車都尉晉一等又加一雲騎尉子殷達
理襲革徵蒙古正黃旗人姓齊岳噶穆忒天聰三年征明破其經
略盧象昇軍崇德六年攻錦州收其經略洪承疇軍韋徵俱在事
有功累加至二等輕車都尉子博洛齊襲武京都貝襲無考

右 國史館本傳

國朝文獻通考卷之三十三

阿拉密

阿拉密滿洲正黃旗人姓舒穆祿氏世居混丑父那木泰從太
祖高皇帝征伐積功至總兵官坐事革職 太宗文皇帝復擢都
統從大兵征明攻遵化朔州應州平魯等城並有功授三等副都
統世職病卒以阿拉密襲晉加一等輕車都尉順治七年僞秦王
孫可望據滇黔爲寇九年我 大清兵出湖南阿拉密從征至衡
州與可望遇於岔路口率所部奮勇深入殊死鬪斬獲不可勝算
可望力竭乃退還貴陽阿拉密轉戰而前歿於陣議卹 贈三等
男以其子哥藍布襲

右傳王鳴盛撰

林爾張 李之秀等

林爾張惠來人順治九年知靖州滇寇攻城守禦兩月城陷不屈
闕門殉節民立祠祀之又李之秀山東人順治五年知瀘溪縣叛
民姚啟虞結峒苗掠縣民盡逃竄之秀獨守空署被執不屈死周
晉英仁和拔貢生八年知瀘溪縣九年土寇姚啟唐等爲亂晉英
奉檄招撫率子之篋家人陳盛等入賊巢諭以大義賊不應脅晉
英降不從斷其五指猶不屈遂殺之於小塘溪之篋抱尸痛哭罵
賊同日死陳盛等十三人俱遇害

右傳李元度撰

本草綱目卷之六

九

周基昌 潘應龍等

周基昌陝西城固縣貢生順治初從大兵至延安招撫諸砦有功三年賀珍倡逆漢中基昌從討賊事平授直隸保定通判七年大兵下川南調基昌從征八年擢四川敘州知府九年孫可望將圍成都乃遣其將劉文秀由永甯出敘州白文選由遵義出重慶文秀率萬餘騎薄敘州城稔知孤城無援攻益急城陷基昌自縊重慶副將潘應龍偵文選兵至逆戰於亭溪盛久賊驅象衝陣官兵失利應龍受重傷被執不屈賊褫其衣不食死事 聞 詔並加優卹時蜀中餘孽未靖先後死事者順治五年潼川賊起四川巡撫李國英勦之隨征千總洪希才戰歿同時射洪縣叛將鮮可強

武定縣志卷之三十三
十一
詔應賊巡西道中軍周新岐射洪知縣楊於朝死之又賊武大定
犯廣元撫標左營游擊王禹奉檄駐防賊夜踰城入禹率兵三百
巷戰逮曉矢盡挺槍力戰首中三刃身受槍歿十三年龍山逆番
焚劫砦堡松潘副將王明德勦之隨征守備楊國柱陣亡十六年
新甯賊李應魁等作亂撫標副將劉國宰出勦受槍落馬死十八
年雅州賊郝承裔叛撫標左營游擊胡其僕守備李邦佐隨勦賊
以象突陣其僕邦佐俱中傷歿先後議卹王禹 贈參將仍錄其
子弟一人其僕 贈參領廕一雲騎尉邦佐不加贈廕一雲騎尉
餘卹如例其僕順天武進士邦佐甘肅靖遠人餘籍無考

右 國史館本傳

署洪基

皇清順治九年粵東亂寇陷廣州陽山縣知縣事屠洪基死之越
明年孤又良號哭旬數千里奔赴喪所至則陽山新令郭君名
升業殮葬立碑表墓又良啟藏扶柩歸葬錢塘之鳳凰山康熙甲
戌府君元配沈太孺人卒以某年月又良舉母太君喪合葬府君
之阡變府君年子也又良屬變誌而銘之謹按府君屠氏諱洪基
字潛之家世大梁宋南渡遷居浙之明州傳至明成化丙戌進士
諱瀟官吏部尙書諡襄惠再傳至萬厯丁丑進士諱隆官禮部主
事爲越望族府君高祖諱璋生孫諱俊始遷杭州俊生子諱養德
府君考也自高曾以來世耕讀弗仕府君少好讀書見天下多故

樂章句學研究經濟用世具順治二年 王師南下府君挾策干
大帥帥奇之試署錢塘簿遷新昌丞檄知上虞縣時浙以東寇充
斥府君所至擒戎首散脅從全活甚眾官上虞時上官發巨盜五
禁縣獄賊黨數千謀夜穴城劫之府君謀之不待申報立梟五首
懸樓櫓大書之榜列炬火燭之賊遠望駭遁上官獎其能 王師
南征粵帥聞府君定亂才辟與俱行順治八年署知陽山縣不朞
年邑大治明年賊馬寶擁數萬眾攻城府君悉力拒守二旬賊攻
不克去旋復來以象兵乘城城陷府君被執賊才府君欲降之繫
以俱去府君挽道旁樹不行賊再三慰諭府君叱之且罵賊怒揮
刃斷右臂中數刃死閱七日援兵至獲府君尸於河南坪大樹下

陽山典史李昂同被執得脫歸述其狀云郭令既葬府君之明年
又良扶櫬歸浙陽山士民請葬府君衣冠邑舊有唐韓文公祠以
府君配食事載廣州府志配太孺人沈氏錢塘望族歸屠事舅姑
以孝聞府君善交遊凡奉賓客周姻族太君竭力以佐不言詘不
辭瘁府君被難陽山太君家居聞難不能行自投於地極荼苦艱
凶狀孤又良僅成童勉之力學敦行康熙癸卯又良舉浙第一人
庚戌成進士太君益勉之曰而父爲忠臣古人移孝作忠今爾勉
作忠以成孝可慰而父矣又良謁選得河南扶溝令寬仁廉惠著
於其土太君教也 覃恩封太孺人又良遷雲南曲靖府同知未
行旋論罷太君無戚容曰免萬里崎嶇歸老邱壑願足矣抵家貧

逾又良在仕時益無粟澹如也府君生某年年幾十太孺人生某
年卒某年享年八十子一又良娶何氏孫男履嘉早夭曾孫耘銘
曰

越之族望襄惠肇屠勳旂常澤衍分符爰有貞臣莅於南服纓
結貫虹驂挂不祿淑配允嘉曰懿曰慈頌洽比閭問昭令嗣聿躋
大壽貧以安之碩哉休名子孫永之銘者年子弗野弗史旣固且
安襄惠載起

右墓誌銘葉燮撰

楊國勳 徐朝官等

楊國勳奉天人順治九年二月以副總兵守湖南駐靖州時器械馬匹多缺國勳罄家資營補又募勇敢士四百以備戰五月明桂王朱由榔遣其將李定國馮雙禮由黎平窺靖州分五路來犯國勳與總兵張國柱亦分五路應之左一等輕車都尉徐朝官營北山口守備高成功把總郝世祿爲別隊右騎都尉任景貴驍騎校韓思禹營南山口署都司僉書黃鼎鉉千總王吉祥蔡應法爲別隊國柱與千總張自功把總艾成林居中策應而以國勳與靖州知州沈一恆駐城防禦官兵進至謳陽遇定國前鋒方交戰敵兵大至我兵爲所乘朝官景貴思禹成功世祿鼎鉉吉祥應法自功

成林皆歿於陣國柱僅以身免定國雙禮乘勝陷靖城一恆赴水
死國勳與副將卜世龍俱被執雙禮囚世龍於湘潭定國囚國勳
衡州俄而世龍脫歸國勳獨抗節被拘次年三月大兵至衡州定
國殺國勳而去事 聞 詔贈國勳都督同知鼎鉉都司並 子
雲騎尉世職朝官景貴加 贈一雲騎尉成功廕雲騎尉一恆布
政司參議廕一子入監餘卹如例朝官景貴俱正白旗漢軍一恆
直隸人餘籍無考

右 國史館本傳

寶明運 茅生蕙等

寶明運山西沁水人順治二年以獻策豫親王多鐸留軍營四年授廣東撫標中軍遊擊時粵東甫定東山白水多盜紅旗賊梁標相等掠州縣明運署都司僉書率兵五百擒賊渠周瓊飛張易能羣盜潰散八年平南王尚可喜攻廣州明桂王由榔遣將馬寶襲清遠以救廣州可喜擊敗之九年由榔遣李定國窺兩廣連陷桂林柳州而廣西寇王之邦高州案鷺山土賊悉應之九月攻連州知州崔思唯設城守明運偕三水守備唐文豹白守富從副將茅生蕙出擊斬馘無算之邦以步騎萬餘犯陽山知縣屠洪基率教諭張堯典邑人莫之倣堅守生蕙明運守富等擊之發礮殺賊甚

夥鏖戰二十餘日城陷執生蕙至衡州被殺守富歿於陣堯典之
倣巷戰被擒觸石死賊挾洪基至河南坪不屈死之惟明運得脫
十月寶之邦合攻連州思唯守益固寶等屢攻不下遁去思唯旋
以勞卒十年四月定國遣其黨驅峒丁犯肇慶可喜調文豹協防
文豹奮勇拒戰力不支墮馬脅之降不從遂遇害五月犯羅定可
喜調明運協守城圍合明運振臂大呼突陣峒丁驚潰復由楊柳
河暗渡偪城夜梯城我兵驚覺礮石并發峒丁退六月潛埋礮地
下併力來攻明運率眾衝出奪礮還峒丁尾至河我兵驟不得濟
遂失伍明運橫戈馬上鬪益力矢盡伏劍卒洪基浙江嘉興人由
舉人官陽山知縣思唯江南江都人堯典三水人十一年七月議

卹明運加一級生蕙加二級 贈官俱 賜祭葬錄其子守富文
豹並錄用子弟一人洪基思唯蕙典贈廕俱無考

右 國史館本傳

鄔象鼎 慎倣允等

鄔象鼎浙江仁和人順治六年進士時以兩廣新附丞需道府簡用新進士象鼎投廣東羅定兵備道搖擗多反側象鼎偕羅定知州慎倣允練鄉勇斬其渠撫餘眾搖擗遠徙民賴以安九年倣允以逋賦失徵議革職未離任十年三月明桂王將李定國窺廣東連陷州縣五月定國遣其黨吳子聖攻羅定象鼎倣允及署州同金芳署吏目陳炳新分設守禦子聖驅其眾梯登象鼎等擊却之外委把總張九貴斃於礮六月子聖對城築礮臺飛彈入城如雨士卒多死象鼎集僚屬曰困守無益當死戰乃立賞格募死士遣中軍郭宗振及城守都司陳一明守備冷時乘等出迎敵子聖驅

鄉民爲疑兵自率銳卒力鬪時宗振等戰敗俱潰圍走子聖遂入城執象鼎倣允於城樓道遇芳炳新遣人繫守之芳知守之者具也給入火藥局擲火焉藥發屋轟芳及凶渠俱斃平南王尙可喜遣兵救羅定子聖挾象鼎等至迎灘象鼎倣允罵不絕聲以死自誓子聖並殺之炳新亦以不屈死象鼎子元祿姪聯珠元珦倣允妻莘氏殉焉十一年三月定國窺高州可喜檄遊擊陳武赴援武河南睢州人從下江南以功授金華營遊擊赴調廣東可喜知其勇令同守高州土寇有陳武者迎定國城被圍遊擊陳武方議兵食而城守副將張月懷異志與語輒不應圍益急遊擊陳武憤率兵出拒敵月卽以城降遊擊陳武轉戰數里中數創死六月定國

使土寇陳武驅眾渡海破昌化外委千總李耀祖戰死攻臨高知縣劉承謨厲居民分堞守而乞援於總兵高進庫進庫方巡海洋還救不及城陷外委把總郝進山被殺土寇陳武執承謨至高州定國誘之降不屈定國怒驅象躡殺之倣允浙江歸安人承謨湖廣沔陽人俱恩貢生芳浙江義烏人炳新山陰人九貴耀祖進山籍無考巡撫李棲鳳以象鼎等死事狀聞部議倣允係革職之員芳炳新醫事部冊無名九貴耀祖進山俱外委例不予卹象鼎贈光祿寺卿承謨按察司僉事俱賜祭葬廕一子入監讀書遊擊陳武賜參將廕雲騎尉

右 國史館本傳

國朝文獻通考卷之六十八

十一

應太極 王成義等

應太極鑲白旗漢軍人順治五年授雲騎尉六年隨耿仲明征粵東屢著勞績九年正月委署參將防守化州吳川石城十月朱出榔將李定國犯化州太極統兵力戰陣斬其帥並獲僞印八顆十年六月定國復遣其將周金湯等擁眾數萬將徧城太極率師出與戰於婁墟自寅至午合戰者三力竭歿於陣事 聞 予祭葬贈騎都尉以其子天爵襲定國旋犯德慶德慶副將王成義統防兵百餘與知縣饒崇秩等守禦偵敵兵數十萬將徧城崇秩以孤城無援難久恃帶印赴府求援成義以責在守城登陴誓眾城將陷成義赴水死四會亦相繼陷守備周啟元被縛至七星巖賊營

遇害十一年定國攻高明騎都尉曾大名統兵協守叛弁紀大良等開東門納敵兵大名力戰歿於陣旋陷新興委守河口守備白進安死之是年十月定國遣兵分犯高雷諸府自率兵圍新會調防新會潮州營都司李興龍督兵守登城指揮項中礮歿事聞詔贈成義興龍俱雲騎尉大名加一雲騎尉各以其子襲餘卹如例大名正藍旗漢軍人成義啟元進安興龍籍無考

右 國史館本傳

黃應乾

當明運告絕永麻據彈丸之地思以恢復爲計斯時 國家方務
生全不肖專尙兵力益乃跳刀走戟狂越不已近南諸縣鄙日來
侵軼甚有惑於邪謀爲所招誘而吳川令黃公應乾守土一文弱
吏能執干戈竟以捐軀 仗節死義而不顧其事弛久行狀未
上於史館其孫某介余友沈君賡堂來請立傳按狀公字元甫一
字元公浙江上虞人由歲貢謁選令廣東化州之吳川孤懸海外
祇氛猖獗肉薄登城援絕不支猶率民巷戰以死時順治十年八
月十七日也公首尾爲令凡三載有異政民感之不衰死時年五
十有七

史官曰忠孝之子孫必復其始黃之先有名發者仕宋高宗時爲武經大夫隸統制楊沂中軍高橋之役馬蹶被殺子哲拾其遺骸葬於蘭芎山麓廬墓三年文禽日集虎不夜驚是實爲黃氏遷虞之祖君子萬年永錫祚允余傳發事可以補宋史之闕傳應乾事可以備國史之遺黃之後人庶幾勉守此令緒哉

右傳杭世駿撰

呂公義 王彬等

呂公義江南江甯人撫標把總順治十年署崇明營千總七月海寇張名振顧忠阮四等將由浙犯蘇松吳淞營千總王彬把總董有才華本德等率舟師赴援王彬於八月抵金塘山遇賊當洋進擊歿於陣有才等偵賊將犯崇明因率兵赴崇偕公義防禦九月賊連船至施翹河口公義誓死殺賊徧體書姓氏謂其屬曰我死以此爲識河口墩臺貯大礮三賊艘迎卽然以擊賊十八日晚潮賊舟西抵高橋洪公義收兵入城約賊船東下墩上然三礮爲號城兵卽出是夜名振率千人登岸出僻徑殲墩兵平明城中聞墩上礮聲以爲賊東下公義單騎先出中途遇名振兵發矢殪二人

賊攢刺之中創墜馬死董有才華本德暨軍卒張新吳應龍等三十五人並戰歿名振乘勢薄城儼擊之乃退十二月江南提督張天祿率水師出勦天祿子參將其業率鐵甲四十人偕中軍千總劉自臻隨征守備王義忠劉自什鄭貴至施翹河遇賊艘六百奮勇進攻沈其船五十餘自午至晚追一百二十餘里至大洋天薄暮賊回船抗拒其業等俱被害十一年二月賊乘濛霧駕艘數百復犯劉河並七了等汛七了駐防中軍守備呂珍力戰陣亡其子清才同把總王自新等擊敗之賊乃遁其業陝西潼關人餘籍無考總督馬國柱巡撫周國佐先後奏聞詔賜公義彬有才本德其業自臻義忠自什貴珍等卹如例

右 國史館本傳

忠義六

三

徐大用 李煌等

徐大用奉天遼陽州人順治五年任山東萊州知府擢萊州道副使十年膠州總兵海時行奉調南征大用至膠督行時行素驕蹇有異志犒師日激眾生變偪大用同入海大用厲聲叱之時行曰不殺徐公吾事不成遂遇害並執署膠州知州李煌誘降不屈死膠鎮旗鼓司張思選者是日在閱臺聞變以刀擊柱曰國家養兵有年聞征調不發乃謀逆耶當速戢不戢有如此柱眾踊登殺思選於臺其妻妾子女皆闔戶自焚時行聞膠州生員匡如櫛負重名招之降不從擁出東門環刃脅之如櫛罵益厲其子蘭兆順治三年進士官監察御史抗直有聲授浙江巡按差滿歸省聞父被

執奔救賊並縛之俱罵賊死高允茲明崇禎七年進士順治初爲完縣令擢御史巡按蘇松丁憂回籍與蘭兆同日殉又貢生張啟先廩生張若斂同死難皆膠人也膠州旣陷時行遂犯江南睢甯境睢甯教諭王相呂與訓導李之實聞兵至率邑人呂爾占等固守賊火西門城陷爾占奮勇大呼奪刀殺賊賊怒攢刺之中數創與相呂之實俱被害十二年議卹 詔贈大用光祿寺卿煌按察司僉事各廕一子入監相呂國子監助教之實國子監學錄餘卹如例煌江南宣城人順治九年由恩貢授萊州推官署膠州事思選陝西延安人相呂江南泰州舉人之實江南壽州歲貢爾占睢甯歲貢授蒙城訓導未赴任及於難

右 國史館本傳

列傳卷之六

三三

Vertical text on the right side of the page, likely a page number or title, written in Chinese characters.

Small vertical text or mark on the right side of the page.

鄭朝肅 王應星等

鄭朝肅奉天鎮黃旗人順治十年任湖南桃源知縣土賊印象鼎掠鄉堡朝肅率典史王應星巡檢王浩禦之於高橋賊以計緩我兵邀其黨蹇玉環爲助玉環夜渡江與象鼎糾賊二千餘集洞溪坪朝肅率鄉勇六十餘人赴之賊蜂至朝肅應星俱被殺浩轉戰至界金坡亦受創死是時明桂王朱由榔轉徙兩廣屢遣將擾湖南北土寇乘閒竊發守土官多被害有何衡泗賀雲丁啟震周文煜崔燦李承鑛文運亨季還春嚴學宮楊來鳳先後死衡泗順天文安人明崇禎壬午舉人順治四年任湖南武岡知州五年叛弁陳友龍降於由榔糾眾犯武岡衡泗與副將賀雲力守閱三月食

盡圍益急城陷衡泗登清渠門樓命縱火與雲俱焚死友龍旋犯
寶慶及沅州城步知縣可啟震力禦之城陷不屈死黔陽知縣周
文煜聞賊至禦之於金橋賊圍之三而被執至洪江誘降不屈殺
之妻施氏自經妾王氏投井死幼子及賓從同遇害者八十餘人
是年土寇起衡州耒陽知縣崔燦死之六年流賊餘黨犯鄖陽李
承鏞知房山縣縣城先爲賊所毀承鏞居羊角砦募兵爲守禦計
賊潛山谷中一日夜行三百里破砦執之不屈死猺賊犯新田知
縣文運亨率民兵守賊大至城陷死之弟及子皆遇害教諭邯鄲
王鑄亦同時殉節季還春者順治六年進士授澂浦縣知縣因長
沅道梗搆慈利縣事甫莅任土賊猝至慈利無城可守遂遇害由

椰諸將假封號相煽惑山砦多不靖江南英山土賊陳元與湖北賊通聲援英山知縣史良植回海州營千總劉伸捕剿遇賊數千奮戰力竭被執噴血罵賊賊攢刺之死並執劉伸斫兩手復害之七年由椰將馬進忠窺城步縣知縣嚴學宮禦之城陷被執不屈死九年由椰遣白文選攻沅陵知縣楊來鳳嬰城守十一月城陷被殺於教場先後議卹 詔贈朝肅來鳳良植按察司僉事廕一子人監浩應星 贈主簿餘卹如例應星順天大興人啟震山東陽信人文煜浙江海甯人順治四年進士燦直隸棗強人承鑛直隸宣化人運亨奉天遼陽州人還春山西長治人順治六年進士良植河南洛陽人順治三年進士雲學宮伸籍無考來鳳四川巴

州人

石 國史館本傳

藍銘璽

公諱銘璽字玉書福建漳浦人家貧落魄以族兄侍御紫濤公占籍粵東之普甯往依之遂家於普性好讀書立志節爲人冲雅無疾言遽色弱冠備弟子員登順治辛卯賢書潮帥郝尙久叛聞公名使人召致之公楚然曰作亂也此豈可哉其人曰非也復明耳公曰我天朝舉人不知其他固強之弗赴人還報郝逆怒遣其黨以兵蹙之公守義不出集鄉壯據守東山砦賊晝夜環攻砦破死焉闔門皆遇害鄉壯同死者八十餘人子士旌在外得免邑人哀之

論曰公守義嚴正而詞氣不迫真可謂冲雅矣出之以和平方行之

以果決至於闔家殉雖鄉閭手足亦皆視死如歸抑又何其烈烈
也名教干城庶幾無愧

右家傳藍鼎元撰

揚州俊黃標

揚州俊廣東大埔人父開令湘陰崇禎癸未張獻忠陷長沙爲賊
楊天住所執至湘潭誘降不應授以長沙知府罵賊挈妻子六人
沈湘江州俊其次子也順治辛卯舉人癸巳郝尙久之亂謂同年
生黃標曰吾等受 國恩何論祿仕與否義不爲逆黨所污遂棄
家之廣城至鐵江值他賊不屈死之標亦遇害蓋父子前後殉節
云
論曰湘陰罵賊沈湘江從屈原遊得死所矣乃子州俊復能不爲
逆污鐵江遇害何楊氏之世忠節也受 國恩何論祿仕與否二
語可爲千秋之寶訓其說行天下無復有不義者

德政通志卷之三十三

右小傳藍鼎元撰

三

費揚古 外三

費揚古滿洲正黃旗人姓瓜勒佳崇德七年以八品官隨和碩睿親王多爾袞征明錦州攻松山杏山塔山等城旋從征山東北京俱有功順治十一年征廣東時李定國使其裨將馬雄董仲民王宏勳等犯電白費揚古鏖戰歿於陣 詔贈雲騎尉子多爾遜襲十三年定國自粵走滇明桂王朱由榔令定國屯雙河口李成蛟屯涼水井時有佐領外三隨安遠大將軍信郡王多尼軍與成蛟遇破其象陣七戰皆捷定國引全軍據雙河口外三等奮勇勦殺定國敗走十六年由榔奔騰越大兵追勦渡潞江定國設伏於磨盤山外三先蹂其伏殲之十八年山東土賊于七等作亂據棲霞

之鋸齒牙山靖東將軍都統濟世哈往勦外三率本旗兵奮勇先
入殺賊無算康熙十三年吳三桂叛遣族人吳應麒陷長沙外三
隨甯南靖寇大將軍多羅順承郡王勒爾錦勦之於岳州敗賊眾
七萬餘是年廣西將軍孫延齡叛應三桂犯梧州府之懷集縣外
三隨大兵進力戰陣亡 詔贈雲騎尉男云保桂襲外三蒙古正
白旗人

右 國史館本傳

陳有虞 王嘉禎等

陳有虞陝西富平人順治壬辰進士授福建仙游知縣時海寇鄭成功破漳州及泉州六邑仙游與泉接界而城中缺武備有虞修器械集民夫使告急於府於是署遊擊王嘉禎率兵至嘉禎順天宛平人由山西大同守備調浙江台州水師以功擢都司署福建興化營遊擊順治十一年三月抵任十月調駐仙游城十二月十九日賊數萬圍仙游有虞偕嘉禎乘城守有十餘賊持冠帶望城招降有虞令擲石擊之乃合城中官民設壇歃血誓死守百姓爭出資佐軍費時嘉禎所統兵僅三百有虞精募鄉勇得二百家丁縣役咸入隊伍民人皆協力故兵雖無多而相持累日有賊謀先

已入城懷火藥有虞獲斬之賊環城植木柵爲久困計民張選等
冒死奮擊斃賊五百餘有虞立賞之又命堞設懸架以護民益感
激用命賊被殲者三千餘人二十九日賊從島上添兵至復遣人
持書約降有虞射殺之賊憤甚填平濠塹梯衝排比如櫛日夜奮
攻陰使人穿地入城約期縱火又潛埋火礮於城下至次年正月
賊攻益急槍礮矢石如雨兵民方捍禦忽地雷轟發陷城數丈城
中煙燄四起兵民震駭而賊已蜂擁入有虞揮刀巷戰中箭仆賊
亂斫死於城中之廣橋嘉禎力竭猶手刃一賊死於東城分防中
營把總徐高東營把總陳曰上南營把總馬以賢同日死北營把
總葉勝與典史沈顯卿皆被虜脅降不從被殺百姓死者計二萬

餘人有虞家丁柳光擢趙啟遜朱世傑耿三啟馬汝騏高昆陳龍
賓正寶陳福王成德李彪黃元芳韓昶張奇皆殉事 聞 詔贈
有虞按察司僉事廕一子入監嘉禎遊擊給雲騎尉世職餘卹如
例徐高等籍俱無考

右 國史館本傳

西曆一千九百零九年三月三十一日

三

徐尙介 顧正笏等

徐尙介浙江德清人出歲貢任蘭谿縣訓導順治十一年擢知廣
東靈山縣時靈山已爲李定國所陷乃移署海豐至十三年抵靈
山任先是土賊陳制祿與其黨韋國全同肆劫國全先投誠制祿
憾之會國全父至制祿處以馬制祿殺之來降國全控之縣制祿
匿不出復匿在逃之縣書檄智芳尙介索之急制祿遂糾眾山檀
墟抵城外尙介率縣丞顧正笏委署訓導平貞署巡檢陸耀龍委
署典史張開先城守時十三年之七月丁巳也夜四鼓守備陸國
相通賊城陷賊索尙介尙介厲聲曰我靈山知縣也格以刃刃絕
格以手手創血濺衣顧其子修曰我爲守土官不能捍一邑毋收

我背賊執之罵不絕口死修及僕朱貴皆遇害縛正笏等去殺貞
於雙鶴嶺正笏開先雜龍於檀墟會橫州遊擊趙連城援至賊遁
去時溽暑於城南得尙介屍面如生事 聞 詔贈尙介廣東按
察使僉事廕一子入監讀書正笏 贈鑾儀衛經歷並 賜祭葬
餘卹如例

右 國史館本傳

殷壯猷 張鵬等

殷壯猷直隸豐潤人順治三年武進士任湖南臨藍營都司委署
參將順治十三年賊孫可望犯臨藍汛壯猷先期築城繕甲爲守
禦計賊至屢敗劔可望怒全力來攻圍月餘勢不能支妻李氏出
簪珥衣飾犒軍士卒皆願死戰壯猷冒圍出殺賊無算城陷執至
桂陽誘以僞職誓不絕口遂遇害妻李氏及子助啤護愚因門殉
難者四十八人先是九年可望掠沅靖明桂王朱由榔亦遣將窺
辰州參將張鵬署遊擊吳光鼐陣斬其將張景桂王尋復遣將白
文選糾眾五萬來犯鵬光鼐迎戰俱陣歿同死者都司周良三李
塤薛自成都司僉書張奎署都司僉書守備尤廉守備吳伯文千

總張啟才符應秀李思佩史西蛟萬卷張義庫把總崔自恭李成
名胡勝金一簡馬涼陳友貴柳正瀆趙友德陳宗禮陳丹衷劉良
漢李于元李竟成袁敬甫先後事 聞議卹奉 旨殷壯猷贈遊
擊廕雲騎尉張鵬贈都督同知廕騎都尉又一雲騎尉吳光鼎贈
參將周良三李垣辭自成贈遊擊張奎贈都司俱廕雲騎尉餘卹如
例自成河南唐縣人奎河南鄧州人餘籍無考

右 國史館本傳

哈勒巴 博爾和圖等

哈勒巴滿洲正白旗人姓伊爾根覺羅順治三年以護軍校從豫親王多鐸追騰機思敗羅碩汗兵五年從征南大將軍譚泰征金聲桓以雲梯攻九江先登克之 賜巴圖魯號授一等輕車都尉順治十一年鄭成功寇漳州 命濟度爲定遠大將軍赴閩防勦哈勒巴與三等輕車都尉錦珠五達圖雲騎尉吾庫海祿洪二等侍衛滿圖護軍博爾和圖並從征成功統兵十餘萬來拒奪我紅衣轍哈勒巴奮擊連敗之十三年哈勒巴與博爾和圖攻海澄成功爾其將黃梧守禦甚力我兵環攻之哈勒巴中槍死博爾和圖亦陣亡是年七月梧以城降十四年正月吾庫隨副都統覺羅阿

善率師沿江由山徑趨福州遇賊吾庫擊敗之師至福州賊列水
師於烏龍江戰艦蟻聚吾庫左右衝擊賊大敗追至大漳河口獲
其船吾庫中傷歿時賊據漳浦銅山海祿洪等率師往勦銅山峙
海中值風逆難渡賊乘風突至海祿洪等奮勇衝殺賊不退與錦
珠五達剛滿爾俱被害事 聞議卹 詔哈勒巴加贈一雲騎尉
弟滿都襲吾庫滿洲鑲黃旗人世居甯古塔以地爲姓 贈三等
輕車都尉子阿拉密襲海祿滿洲正白旗人姓佟佳 贈騎都
尉子周世襲錦珠滿洲鑲藍旗人姓舒魯 贈二等輕車都尉子
葉庫納襲五達剛滿洲正紅旗人姓葛濟勒 贈二等輕車都尉
弟薩爾帕襲滿爾滿洲鑲白旗人姓納喇 贈雲騎尉子常圖襲

博爾和圖滿洲正黃旗人姓瓜勒佳 贈護軍校

右 國史館本傳

阿育王傳卷之三十一

三

巴都 色魯等

巴都滿洲正白旗人姓董鄂順治元年以護軍參領從大兵入關
敗流賊授騎都尉遇 恩詔加至二等輕車都尉二年隨英親王
阿濟格連敗流賊於綏德延安擊走賊渠一隻虎五年隨征南大
將軍譚泰征江西叛鎮金聲桓破之童子渡抵南昌賊將王得仁
以眾七萬拒巴都率本旗兵先進擊敗之時聲桓方圍贛州聞南
昌急還救趨得仁連戰敗於七里街乃盡撤屯兵入城巴都率所
部先登克之斬得仁聲桓中矢死十二年鄭成功犯福州巴都率
左翼兵連敗之考崎屯烏龍江斬偽總兵都司各一獲船十二十
三年賊將甘輝等圍羅源巴都往援力戰陣歿先是順治二年明

唐王朱聿鍵據福建明年征南大將軍貝勒博洛往征執聿鍵於汀州進圍福州城有三等護衛色魯者越眾先登克之色魯歿於陣聿鍵既死鄭芝龍降芝龍子成功遁入海糾數千人據南澳時明魯王朱以海從紹興敗遁入海桂王朱由榔稱號肇慶成功遙奉由榔年號屢劫緣海郡縣順治五年護軍校席達從大兵往征力戰死後以海爲成功所殺其餘黨阮思等據浙江舟山甯海大將軍宜爾德進剿護軍參領博啟從克舟山尋隨安南將軍達素攻成功於廈門陣歿事 聞巴都加 贈一等輕車都尉又一雲騎尉子武靈阿襲色魯席達俱 贈雲騎尉色魯襲無考席達子拉瑪達爾襲博啟騎都尉兼一雲騎尉子拜思呼朗襲色魯滿洲

正藍旗人姓伊爾根覺羅席達蒙古正黃旗人姓科爾沁博啟蒙
古正紅旗人

右 國史館本傳

國朝禮典類例卷三十三

三

覺羅阿克善

覺羅阿克善滿洲正黃旗人 景祖翼皇帝兄索長阿之三世孫也崇德六年以參領隨大軍征錦州敗明總兵吳三桂及松山杏山援軍師還副都統索海爲敵所襲阿克善同護軍統領伊爾德往援奮擊卻之又隨大軍連敗明總督洪承疇兵授雲騎尉世職八年鄭親王濟爾哈朗征明甯遠分兵攻前屯衛阿克善先登克其城晉騎都尉 世祖章皇帝順治元年隨睿親王入山海關擊敗流賊李自成敘功加一雲騎尉遇 恩詔晉三等輕車都尉七年三月擢正黃旗滿洲副都統七月兼任工部侍郎八年調兵部再遇 恩詔晉世職至一等輕車都尉九年同都統噶達渾征勦

鄂爾多斯部叛逃蒙古多爾濟等殲其眾於賀蘭山初興安總兵任珍以家屬淫亂擅殺多人賄囑部臣寢議十年春事覺降阿克善世職爲騎都尉兼一雲騎尉解兵部任管副都統事如故十一年七月署都察院左都御史尋仍專任副都統隨征湖廣敗賊兵於湘潭常德龍陽十三年鄭親王世子濟度征海賊鄭成功阿克善率兵從大軍至烏龍江以水險難渡乃潛取道山閒徑趨福州未至聞鄭成功在高齋卽分兵令佐領褚庫等先往迎戰擊走賊眾千餘又分遣署護軍統領伊色克圖率兵往候官征勦水路賊眾敗之遂至福州偵知賊船三百餘尙泊烏龍江阿克善自由水路約營總星爾等由陸路合擊追至三江口斬僞都督總兵等俘

獲甚眾明年賊犯羅源縣我駐防兵被圍阿克善率兵赴援遇賊力戰陣亡十六年三月晉三等輕車都尉世職子塞克森襲

右 國史館本傳

--	--	--	--	--	--	--	--	--	--

鄭之文

鄭之文者休甯人也字貞卿其爲人武勇有直氣中順治己丑兵部進士官浙江甯紹台道中軍守備駐守台州自明之季世海寇常往來虜掠沿海諸郡縣而台州地瀕海多山奸民乘寇氛未靖時時竊發爲亂叛服不常之文曰山寇雖偏其禍小海寇雖遠其禍大譬之疾疹山寇疥癬耳一日遽率麾下兵指寇所在盡捕殺之之文在台州五載當順治之十三年叛將馬信作亂之文討平之以功著名海上先是福建泉州民鄭芝龍者年少美姿貌爲海寇所獲由是往來海中盡知其俗尙人情而諸盜奉以爲渠帥明之將亡唐王在閩晉爵芝龍南安侯及大清兵至芝龍以其部降

遂使提督闡浙而芝龍之子鄭成功猶聚徒海中數入寇十四年賊眾大舉以寇台州之文與戰不利乃登城自守其家人或曰城且陷矣之文曰吾職在守城城一日不破未可死也相持一月餘而城陷成功聞之文名欲生得之以刃脅使降之文不屈不食五日不得死罵賊不已賊乃出攻城梯倒縛之文於其上而鞭笞之鞭之愈急罵愈厲遂見殺而其家同時死者至十有八人賊退之文家有故奴朱氏取其尸將斂而賊攜之文頭歸海中奴遂入海詣賊營求之賊初不許奴哭日夜不絕聲賊以奴爲義乃擲還之文頭而奴以歸斂焉之文每一飯盡米一斗及戰所向無敵以故賊愛其武勇而欲生致之之文死時有妾二人女子于一人二妾

請先自經死其女見母死亦碎首而死於階下康熙二年我朝
加恩死事者而之文一子承恩早卒乃以其兄子以祝爲其後世
襲拖沙喇哈番以祝死子賢政嗣雍正二年天子念其忠賜祭
乾隆三十二年復加恩世襲恩騎尉永永無替雖至今台州人
猶立廟祀之不絕云

劉子曰鄭君用牧與余交最善爲言其族人之文死台州事甚詳
因請爲之傳余謂傳者史官之職也余不可以侵其官而用牧以
國史所書爲里巷之人所不見終以請聊爲述之如此

右傳劉大櫟撰

傅進忠 劉良卿等

傅進忠直隸河間人順治十二年任廣東徐聞營遊擊時海賊陳奇策等乘李定國之亂率艘犯廣州殺水師左營遊擊劉良卿官兵擊敗之奇策竄雷州十四年與其黨鄧耀糾眾數萬劫徐聞之麻涯村進忠聞警介馬疾馳道遇水止急策馬先渡兵不及隨賊竄至遂遇害是年定國已隨桂王朱由榔奔滇而其黨王興受由榔虎賁將軍號據新甯縣之文村十五年百總張文初等隨都司周真等攻之於陡門水陸夾擊殺賊三千餘文初及把總張明俱陣亡次年巡撫董應魁督兵再剿千總許易文及領催王芝秀把總李三才百總周應龍俱力戰陣亡興勢窮蹙遣子獻印自焚死

其遺孽李常榮等尙據海陵總兵侯襲爵進勦守備王臣與百總黃仕俱陣歿先後死於土賊及猺獠者又有許鴻儒劉天福車君乘劉日襄陳儲王進翁旦等七人鴻儒浙江太平縣歲貢任羅城知縣以曾大輝陷城殉天福四川人任永清知縣以陳邦傅陷城殉事俱在順治三年君乘浙江德清縣歲貢任武宣知縣石羊山大藤溪寇陷城被執不屈死事在六年日襄湖北武昌縣歲貢任賓州知州以土寇陷城巷戰死闔門十三人殉事在九年儲任都司僉書管平鎮遊擊事謝上達之亂儲與標官魏知興千總邱宦把總林約入賊寨搜緝俱遇害進任三里營守備上林縣覃朝相謀叛進捕置獄其子破城放囚進被戕事並在十三年旦浙江壽

昌人順治十二年武進士任三里營守備上林縣剝折峒猛獠出
山劫殺且迫勒深入蠻峒遇害事在十八年先後議卹 詔贈進
忠騎都尉鴻儒按察司僉事日裏布政司參議餘卹如例良卿等
籍俱無考

右 國史館本傳

李宏德 謝仲武等

李宏德漢軍鑲藍旗人原籍山西陵縣順治五年姜瓖叛其黨僞
總兵郭忠傑分據陵縣大兵進討宏德越眾投誠編入旗籍畱軍
效用屢有戰功累升至浙江台州海門營水師遊擊十五年九月
鄭成功率賊數萬聯踪將犯台州宏德巡哨海上與遇一擊之於
椒江再擊之於拗嶺殺賊頗多賊大恚誓屠海門時台州總兵張
杰出防三江口而副將張德俊遊擊賀國柱亦移守蔡橋海門衛
城獨以宏德畱守合之中軍守備謝仲武衛守備王朝鼎千總王
瑞中軍千總蔣助把總姚時商應捷僅有兵數百賊揚帆直入至
三江口馬鞍山釣魚嶺諸處值陰雨連日港汊潮漲賊踪布滿凡

道路橋梁俱毀斷張杰遣兵還救路梗不能達是月二十五賊急圍海門宏德竭力抵禦至十月初六日城陷宏德率兵巷戰死之仲武朝鼎瑞勛時應捷皆與賊相持力竭死事 聞宏德 子祭葬 賜雲騎尉世職以其子世貴襲餘卹如例仲武等籍俱無考

右 國史館本傳

國朝耆獻類徵初編卷三百三十七目錄

忠義七

熊應龍

子天琳
劉國泰等

李柱國

李一元等

拜察

索丹等

沙理布

琿錦

羅明昇

游王彪等

瑚伸布祿

子愛音察
額色等

猛格圖

安塔錫等

王祐光

王先中等

吳璠

陳慎

許立達等

伊勒圖

巴拜等

佟濟

赫虎等

鄂勒布

鄂滿等

何瑞

張興等

楊麟武

褚唐俊

武君相

郭文亮等

張略

楊昇雲等

李允

孟淑孔等

陳綺

李吾貴等

郝爾德

張承志等

張占鼈

趙一柱等

李進臣

劉定邦等

劉傳 劉光明等

國朝耆獻類徵初編卷三百三十七

通奉大夫前署江西巡撫江西布政使司布政使湘陰李桓輯

忠義七

熊應龍

子天琳
劉國泰等

熊應龍四川鄆都人順治初年任浙江温州盤石衛水師游擊十五年十月海寇鄭成功聯船二千由泥粵山曹田窺温州十一月朔突至盤石衛登岸迫衛城應龍方請兵於外適台州遊擊王有進來援合主客兵得二千三百更番出戰者三賊來愈多乃議嬰城守以待外援有進守北門東門應龍守西門南門次日賊布長圍攻之應龍用礮轟斃騎四往來督戰無少懈又次日賊夜半樹

雲梯攻東門應龍率千總尹士奉把總蔣元與戰斃賊三百獲其械及火箭噴筒賊驚卻初五夜賊潛運柴草填河攻北門有進不能禦應龍馳助之賊始退初六日賊以大礮擊城西北隅圮者二丈應龍急運土石塞之其夜賊密布雲梯四面攻我兵矢石並發繼以長斧斃賊無數初七日賊偵應龍在北門突於西門毀堞口數十施噴筒火箭騰涌入應龍趨赴眾寡不敵遂被執應龍禦賊凡七晝夜賊欲降之卒不屈妻陳氏妾繆氏先自縊初八日賊遂殺應龍及其幼子二暴屍於南門縛其長子天琦次子天琳而去琦琳皆中道逃歸有進士奉元並重傷爲賊所擄紹興協左營把總劉國泰右營把總郭應邦山西營把總李時育俱以應援力竭

死之事 聞應龍 贈副將給雲騎尉世職子天琳襲食俸温州
衛康熙十五年耿逆僞將曾養性攻温州康親王傑書遣貝子傅
喇塔率兵往禦大破之天琳力戰歿於陣 贈游擊子煌襲世職
遷至廣東三江口副將國泰應邦時育籍無考

右 國史館本傳

國朝文獻通考卷之三十四

--	--	--	--	--	--	--	--	--	--

李柱國 李一元等

李柱國河南人順治十五年任浙江台州協左營都司十六年海賊鄭成功犯台州太平縣柱國與金華標都司李一元奉檄防守閏三月賊二百餘乘夜雨緣城入柱國宿城上驚起單身步戰至署始騎賊大至力竭死之一元亦巷戰歿台協標百總董士鼈率步兵二十餘衝鋒殺賊亦陣亡時海氛勦未靖十七年杭州賊渠張闊嘴沈公起等因大兵會勦勢急遁入嘉興湖州接壤地句連蘇松逃兵及土寇陳彪等乘潮聚散橫行湖泖間七月突犯崇德縣之芝村嘉興協標守備鄭鈺赴崇德進勦偵言賊數百屯聚五杭涇及霞代村鈺不俟兵集卽輕騎抵賊巢賊以火槍籐牌拒戰

鈺兵寡爲賊衝散惟親丁數人從奮力轉戰歿於陣把總王標聞
鈺單師出亟赴援賊初匿空屋中標至賊三百餘持弓箭槍牌從
屋中出標力鬪遇害十八年浙江有白頭賊入新城縣肆劫典史
洪有度率眾抵禦賊敗遁追至子母嶺賊竄山谷間乘夜出國之
數市遂遇害其妻聞之亦不食死先後議卹柱國一元 賜祭葬
鈺廕雲騎尉餘卹如例鈺順天大興人有度山西人餘籍無考

右 國史館本傳

拜察 索丹等

拜察蒙古正藍旗人姓巴魯特世居喀爾沁崇德三年以騎都尉隨貝勒杜度征明真定府用雲梯攻饒陽縣以第三人登城拔之七年復隨貝勒阿巴泰征明以步戰敗明馬步軍於渾河岸順治二年隨靖遠大將軍英親王阿濟格追李自成餘黨殲之於安陸三年隨征南大將軍貝勒博洛征福建明唐王朱聿鍵遣兵來拒拜察一敗之於泉州再敗之於安溪累功至三等男十二年從征湖廣孫可望遣其將劉文秀攻常德拜察設伏敗之晉二等男十五年征雲南明桂王朱由榔遣其將李成蛟屯涼水井李定國屯雙河口拜察與前鋒侍衛索丹參領曹丹護軍校色勒蘇塔簡秦

進勦拜察率本旗前鋒兵與成蛟遇首陷陣七戰皆捷索丹以創
重歿定國引全軍據雙河口以兵千用繩繫脛列陣死戰拜察與
曹丹色勒簡泰奮勇勦殺定國大敗撤寨遁歸色勒受傷陣亡十
六年大兵克雲南由榔奔騰越大兵追勦渡潞江簡泰與守兵戰
中槍歿參領尼堪受重傷後以傷發卒護軍校庫爾庫德陣亡定
國設伏於距潞江三十里之磨盤山官兵偵知之分兵先蹂其伏
拜察曹丹孫塔與護軍參領石漢佐領巴陵護軍校雅思哈訥勒
屯代俱力戰陣亡曹丹受重傷旋卒先後事 聞 詔贈拜察一
等男以姪扎木素襲索丹滿洲正黃旗人姓納喇 贈騎都尉孫
納明襲曹丹滿洲正黃旗人色勒滿洲鑲黃旗人姓瓜勒佳 贈

雲騎尉子牛鈕襲菽塔滿洲鑲紅旗人姓棟鄂 贈雲騎尉子綏
哈襲簡泰滿洲鑲白旗人姓托立 贈雲騎尉子松山襲尼堪滿
洲正白旗人姓扎思瑚理 贈三等輕車都尉世職子甯泰襲庫
爾庫德滿洲鑲黃旗人姓兀扎喇 贈雲騎尉以兄子聶色爾德
襲雅思哈滿洲正藍旗人姓錫林覺羅 贈雲騎尉子常保襲訥
勒滿洲正紅旗人姓鈕祜祿 贈雲騎尉襲無考屯代滿洲正黃
旗人姓扎庫塔 贈雲騎尉襲無考石漢巴陵姓氏廢襲俱無考

右 國史館本傳 按尋察公一作拜才

沙理布

沙理布姓博爾濟吉特氏 太宗文皇帝崇德二年自察哈爾率
丁壯百餘來歸使轄之爲佐領隸鑲白旗蒙古尋授一等待衛任
參領 世祖章皇帝順治五年擢鑲白旗蒙古副都統九年遷本
旗都統遇 恩詔子雲騎尉世職時流賊張獻忠餘黨孫可望李
定國劉文秀竄匿黔蜀開降附明桂王朱由榔與其將盧明臣馮
雙禮等並侵掠湖南十年十一月沙理布奉 命同甯南大將軍
陳泰統兵鎮守湖南十二年劉文秀盧明臣馮雙禮等以賊眾數
萬分犯岳州武昌沙理布同護軍統領蘇克薩哈設伏邀擊大敗
之賊復犯常德戰船千餘蔽江而下沙理布指揮軍士截擊六戰

皆捷縱火焚其船斬獲無算明臣赴水死雙禮被創遁文秀走桃源沙理布與護軍統領都爾德等協力追勦文秀竄貴州十五年隨信郡王多尼征雲南朱由榔與李定國敗竄永昌十六年四月我師克永昌渡路江定國踞磨盤山拒戰我前鋒統領白爾赫圖等領眾敗之破其木柵斬偽伯寶名望沙理布乘勝先驅遇賊伏力戰歿於陣十七年十二月喪還 賜祭葬如典禮諡襄壯晉騎都尉世職子伊勒篤襲後以襲次滿停襲乾隆十五年 詔覈八旗世職之以死事卹敘而襲次已滿者 特予恩騎尉世職世襲罔替復以沙理布之曾孫德明襲

右 國史館本傳

琿錦

琿錦姓薩爾圖氏世居敖漢部當 太宗文皇帝收服敖漢時琿
錦隨眾來歸迷失路竄入明錦州崇德六年大兵圍錦州琿錦同
蒙古台吉諾木齊武邑什等縋城來降授騎都尉世職隸鑲藍旗
蒙古任參領 世祖章皇帝順治元年四月隨睿親王多爾袞入
山海關擊走流賊李自成署副都統事督後隊兵有功加一雲騎
尉六月與都統覺羅巴哈納征山東七月移師山西僞伯陳永福
據太原琿錦單騎略城下城中兵突出琿錦擊敗之已而我軍攻
克太原城其屬五州十縣皆降以功 賚白金二年同都統都賴
勳自成於武昌追至九江口獲賊船明年隨肅親王豪格征流賊

張獻忠時叛鎮賀珍擾漢中以步騎二千踞雞頭關琿錦率右翼兵隨貝勒尼堪擊敗之珍遁走追斬無算遂進征四川同都統巴特瑪等屢擊敗獻忠拒戰賊眾獻忠既滅移師涪州與護軍參領希爾根擊賊袁韜於涪江西岸賊皆潰竄五年敘功晉三等輕車都尉尋擢鑲藍旗蒙古副都統隨鄭親王濟爾哈朗征湖南時寶慶沅州爲自成餘黨馬進忠王進才袁宗第等所踞六年琿錦同前鋒統領努山副都統拜音岱等攻克寶慶屢敗賊兵進征沅州領本旗兵擊賊於洪江斬僞總兵二僞副將四賊兵二千餘獲船九七年凱旋得優賚三遇恩詔晉一等輕車都尉兼一雲騎尉十五年隨信郡王多尼征雲南明桂王朱由榔與其將李定國

等敗竄永昌十六年四月大軍克永昌渡潞江定國設伏磨盤山
我師旣破其木柵瑄錦同都統沙理布乘勝追擊遇伏力戰歿於
陳賜祭葬如典禮諡曰壯勤兄子古錫襲職

右 國史館本傳

國朝通志卷之六十三

卷之六十三

羅明昇 游王彪等

羅明昇河南南陽人以投誠隸饒黃旗漢軍任鎮江巡江營守備時江南患海寇吳淞水師提督中營守備游王彪先於順治十四年出勦陣亡十六年海寇復犯鎮江明昇分守譚家洲洲介大江中阻南岸一二里北與瓜洲對六月賊至瓜洲奇兵營遊擊左雲龍太平右營遊擊賈質太平左營遊擊晉紳甯國營守備賈大第太平營守備趙維新等率眾禦之十七日黎明賊攻瓜洲東門左雲龍等血戰紳陷陣死雲龍以兵寡失利被害於東門外礮臺賈質趙維新死於便益門賈大第死於拖板橋池州營把總盧邦柱死於新港溝把總程文進死於礮臺三江營把總柳逢春死於新

河橋瓜洲營把總高桂重傷死尸爲江水漂沒又有江都生員閔文仲適在瓜洲城中城陷被執不屈賊怒刀割其面赴井死瓜洲失明昇勢孤賊馬信環攻之明昇乃以印付其屬與僕趙登科惠四趙九兒等奮身戰皆死之踰月徽州叛弁李芝與海寇鄭經通圍婺源邑庠生王廷昇傾家募鄉勇拒守城將陷廷昇縋城出諭以大義賊殺之同邑民人王祐光率眾出殺數百人誅其渠董玉等力竭陣亡康熙三年議卹 詔贈明昇大第俱雲騎尉雲龍質俱參將加一雲騎尉餘卹如例王彪江南寶山人質順天大興人明癸未武進士餘籍無考

右 國史館本傳

瑚伸布祿

子愛音察
額色等

瑚伸布祿滿洲正藍旗人姓吳雅天聰五年從大兵征明攻遵化克其城授雲騎尉順治元年從睿親王多爾袞入山海關擊流賊又從都統葉臣等進取山西敗賊於太原並有功二年從英親王阿濟格追勦流寇至九江多斬誠晉騎都尉世職三年從征騰機思擊土謝圖汗及碩羅汗兵敗之五年從征江西金聲桓十一年從征浙江舟山海寇累功至一等輕車都尉兼一雲騎尉十六年以協領駐防江甯五月海寇鄭成功連踪北犯踰崇明陷鎮江湖流犯江甯駐防將軍喀喀穆率瑚伸布祿及佐領額色巴薩禮薩爾泰等禦之成功擁戰艦數千眾十餘萬登陸攻城連營八十餘

安設地雷雲梯復造木柵爲久困計瑚伸布祿等晝夜守禦副都統噶褚哈馬爾賽率騎都尉索博多雲騎尉多內等自貴州凱旋過江甯入城協守七月援兵至喀喀穆噶褚哈馬爾賽率瑚伸布祿等出城夾擊賊離營據山槍礮齊發我兵自下仰攻鏖戰良久多內奮身登受創死我兵生擒其僞提督甘輝賊大敗順流遁瑚伸布祿等疾追至鎮江瓜洲賊殊死戰瑚伸布祿及索博多額色巴薩禮薩爾泰俱陣亡事 聞議卹 詔贈瑚伸布祿三等男子愛音察襲額色滿洲鑲黃旗人姓無考 贈雲騎尉子綽爾巴襲巴薩禮滿洲鑲白旗人姓瓜勒佳 贈騎都尉子色德立襲薩爾泰滿洲正藍旗人姓溫都 贈騎都尉子佛保住襲索博多滿洲

正白旗人姓富察 贈雲騎尉子揚書襲多內蒙古正藍旗人姓
喀爾諾忒 贈騎都尉加一雲騎尉子嘉木索襲

右 國史館本傳

胡申布魯滿洲正藍旗人姓吳雅氏世居哈達父瑚琛布率所部
來歸天聰五年胡申布魯與薩穆哈圖從大兵征明攻遵化州克
其城授雲騎尉順治元年從睿親王多爾袞入山海關擊流寇又
從都統葉臣等進取山西敗賊於太原並力戰有功二年從英親
王阿濟格追勦流寇由湖廣沿江東下至九江斬馘無算進牛叢
章京世職三年從征騰機思擊土謝圖汗及碩羅汗等兵敗之五
年從征江西叛鎮金聲桓十一年從征浙江舟山海寇累功至一

等輕車都尉兼雲騎尉十七年以協領駐防江甯從將軍喀喀穆
 擊海寇鄭成功力戰沒於陣事平 贈三等男爵世職以其子愛
 音察襲愛音察從征逆藩吳三桂於長沙擊賊陣亡 加贈二等
 男以其子雅岱襲

右傳王鳴盛撰

按公名瑚伸布祿
一作胡申布魯

猛格圖 安塔錫等

猛格圖滿洲鑲白旗人世襲佐領順治五年金聲桓據南昌叛猛格圖隨征南大將軍譚泰往討至南昌府擊賊高總兵步卒再擊偽建武侯王得仁馬兵四戰皆捷遇 恩詔加至二等輕車都尉十六年鄭成功連踪入犯陷瓜洲圖江甯時猛格圖隨安南將軍明安達理駐守湖廣荊州府率師往援成功偵知之令偽都督楊文英逆戰猛格圖奮勇衝擊受創死 賜祭葬成功旋敗遁入海上命內大臣達素爲安南將軍十七年五月進攻廈門成功招海島賊黨抗拒驍騎校安塔錫隨水師奮擊獲賊船一旋中殿死成功親率戰艦六百列海上達素令一等護衛雅圖等攻之戰不利

與二等護衛鄂邁三等護衛達蘭嵩伊納長史鄂善驍騎校納瑪爾岱俱陣亡七月 命貝子洛托爲安南將軍達素以尙書參贊軍事時成功據臺灣守廈門洛托令一等護衛納穆桑額率本翼兵先攻之舟抵廈門賊拒戰納穆桑額與長史穆舒躍登岸斬賊甚眾賊益兵圍之納穆桑額穆舒均力戰陣亡尋成功病死師還議卹如例安塔錫滿洲鑲紅旗人姓完顏 贈騎都尉子達爾襲雅圖滿洲正藍旗人姓布吉爾根 贈雲騎尉子濟山襲鄂邁達蘭俱滿洲正紅旗人鄂邁姓納喇達蘭姓吹霍克親均 贈雲騎尉鄂邁以兄孫明肅襲達蘭子登德襲嵩伊納納瑪爾岱俱滿洲正藍旗人嵩伊納姓伊爾根覺羅納瑪爾岱姓兀扎拉嵩伊納

贈雲騎尉子富爾敦襲納瑪爾岱 贈騎都尉以弟登奇襲鄂善
滿洲正紅旗人姓富察 贈騎都尉子鄂齊禮襲納穆桑額滿洲
正黃旗人姓博爾濟吉特二等伯明安之第五子 贈騎都尉兼
一雲騎尉以姪希扈爾襲穆舒滿洲正藍旗人姓赫舍里 贈雲
騎尉子富察襲

右 國史館本傳

王祐光 王先中等

王祐光婺源中雲人目雙瞳子平居喜談忠孝節烈之事見不平則義形於色順治己亥海上鄭成功犯金陵婺源守將李芝因調發叛逃遂與叛兵唐士奇合圍縣城索餉城中義士王廷昇傾家應之以紓邑人之難芝猶貪索無厭廷昇詰責遂遇害祐光糾集村眾赴城救援芝分劇賊攻中雲以遏其兵祐光連殺數百人因火藥不發力竭死於陣芝聞懼復有援兵遂解圍遁同時中雲王氏死事者七十餘人其可稽者曰先中起麟良郡良消寄孫尙春尙詩良助良賜良蒙良譽良湘時孫望光鼎光旭光旨光光賜光範義德繼明必大成大欽美廷宿廷實廷芝廷荷廷僖廷佐震聲

龍光邦慶共三十二人又以子殉父者一人曰龍光之子起生以婦殉夫者二人曰必大之妻張氏光範之妻程氏祐光死無嗣餘皆耕氓樵豎子孫式微故其事雖偶見邑乘而不能上達咸豐元年八月婺源縣教諭當塗夏斨將爲之請卹於朝先爲此傳以具梗槩云

論曰順治己亥海上之變乃殘明之殺運猶未盡也鄭成功么麼醜種跳躑海隅其父刀俎之不恤而狡焉蠢動叛逆遺嗣無足責矣司馬蒼水張公不度時勢受命荒朝始潰師於江上又被執於崇明瑣尾閒關偷息島嶼乃復赴成功之約直犯金焦頓兵鎮江長趨白下旬月之間傳檄而煽動者四府三州二十四縣之多事

定之後無辜駢戮之人不可勝數其時大江南北承平已十有六年矣百爾服官四民樂業豈真輸誠送款者之都都相望邑邑相承哉徒以一二叛兵降弁因亂思逞勝則恣其蹂躪敗則羣焉踰伏耳婺源居萬山之中有賢邑宰張侯宏美以鎮撫其民人而李芝唐士奇輩尙騷然不靖非得王祐光諸義兵以挫其鋒彼蔓延者鮮不徧於巖墟壑聚矣假令四府三州三十四縣之中咸有忠勇義烈如王祐光及其族七十餘人者以爲之扞衛雖百張司馬又奚益哉

右傳夏炘撰

圖書集成
卷三十四

三

吳璠

韶石君既葬之明年其嗣君玉樹持從父滌元所述君狀請于詮
次其風烈偉行而爲君傳以藏家乘君諱璠字珍魯號韶石按家
系出唐御史少微公後由海陽之石舌山自宋遷臨溪由臨溪遷
歙之篁南諱宗者其篁南始祖也雲裔蕃盛奕葉纓組歷十八傳
而至君父文學浮休公式廓貽謀明經修行士大夫尊之如太邱
通德公中年舉君君生而穎慧姿儀秀整舉止嚴重浮休公每奇
之督勵家塾日不少懈弱冠令肄業太學時中土康阜海內鄉校
拔尤之彥及華胄英雋子弟皆橫經負笈盛集南雍醉君聲氣傾
蓋握手歡如平生而鉅公鄉衮耆舊高流以文章氣節風雅翰墨

震耀江左如太史求仲韓公臺長衣白鄒公徵君仲醇陳公處士
孟陽程公與君商推今古徵逐晨夕尤稱款洽君襟懷豪邁器識
宏遠而敦倫慕義拯急援危僉根至性值浮休公春秋高君以家
子秉持家政承歡子舍友愛同氣多順色導意以怡悅堂上歲辛
巳郡大饑君解橐率眾酌古良法修振族里勤恤備盡不漏不濫
閱二百日都鄙之間鵠形菜色恍遊暘谷值浮休公偶客平江甚
以故鄉歲凶爲念得家書大快曰是兒可謂能養吾志者矣壬午
浮休公捐館舍君痛毀幾殆與諸弟勉襄大事鄉人侈頌其盡哀
範禮會宗祊以小隙啟釁再歲不解君悚然於中曰以同堂而雄
市井之競不祥莫甚遂殫力消弭一門之內雍睦如初惑於前者

交相愛重乙酉秋聲言大兵入郡山寇竊發君散金棄產召募壯士密布方略率鄉人嚴飭垣砦精備楛械曉夜防堵賊至皆斂息而退是時賊氛洶涌所過糜爛獨篁南耕鑿晏然君之力也已亥海兵熾京口郡營將叛自星源嘯聚屯溪郡聞賊警猝至當事蒼黃遣儒官慰諭賊益張鄉民望風奔竄彌山堙谷君與族父老曰賊志在剽掠無賴烏合罕請行伍吾鄉須內固眾心外嚴守禦堅壁以待勿爲懦者所惑賊卽犯此擊之必敗且祖宗祠寢室廬與俱存亡去之非義諸父老姑應且疑然料郡兵旦夕必至已而賊偵監司駐郡寂然作壁上觀遂乘夜長驅篁南劈砦而入大肆焚鹵禦敵者悉遁君猶伏矢斲設險狹巷家人環泣促行君叱之

而不顧方族孽與君有夙怨者悍爲賊俵必得君而甘心焉君始見獲而遇害之慘有不忍言者篁南千室數百年之儲粟君死而與之俱盡矣使當事能壯君之義亟應聲援藉君力以遏賊鋒而郡之西鄙屠毒尙可衰止嗚呼君之存亡闔閭之安危且係之矣君究心經術淹洽羣籍日手一編不屑以雕蟲小技屈首呶吾竊榮當世而吐言揮翰流迸音藻老生夙儒對之神聞至於倔强性成顯者要人欲以聲勢相撼如干將鏌鉞之不可犯寒素相得則虛懷傾倒解襦割氈所不惜獨其夙負膽幹勇於任事疏待匪人豺狼在腋而君每豢之如犬豕卒至禍罹叵測不獲行其胸臆儻命與才偶志顯於時魯連田疇之事固君所優爲也若夫生平受

用風雅豪華一身兼有而義風仁澤流入里黨難更僕數迄今父
老談及韶石君乙酉己亥之事皆相顧隕涕子交君二十年無閒
誼寂曾幾何時而元龍之氣化爲萋宏之血茲得於白雲滅沒處
解劍吮筆而爲君傳所謂延陵十字之碑永作千斛之價君足當
之尙以俟夫作者

論曰己亥江上之事東南震動欽爲山邑賊倉卒起上游當事持
鼠首以觀莫敢撓鋒君以布衣毅然奮臂與封豕長蛇偪爭此三
戶之士遂及於難是君之死於寢猶然死於公也夫以布衣而死
公不無有越俎之嫌故時論譁之祇以俟夫後之南史跡君碧藜
特書而憑弔焉以慰君之魂魄悲夫

右傳許楚撰

陳慎 許立達等

陳慎直隸文安人順治十年由貢生授江南崇明知縣時明魯王朱以海據金門島遣其將張名振自海道窺崇明慎練鄉勇堅守副將梁化鳳自蘇州來援偵名振踞平洋沙汊港多淖不利進攻慎令民戶輸門扇一草束一夜填路化鳳出其不意擊之慎率鄉勇爲應斬五百級沈其船七名振敗走化鳳旋擢總兵移鎮崇明偕慎築文成壩聯合平洋沙守始固十六年六月海寇鄭成功及魯王舊臣張煌言連艘入犯謀取崇明爲巢穴煌言曰崇明已設重兵宜以偏師綴之而徑趨金陵成功遂突入海門登瓜洲斷橫江鐵索陷鎮江圍江甯總督卽廷佐嚴守禦會貴州凱旋兵至入

城同守成功併力攻不能下乃分擾旁縣犯江浦駐守把總崔應
透聞警先遁知縣許立達典史蔣上達分門防禦海寇梯城入執
立達上達至舟脅降不屈俱投水死浦口都司吳應昌調防譚家
洲陷陣歿原任壽春營把總張育才戰於滁之烏衣鎮被創卒七
月犯天長縣奸民韋樂宇納之知縣王辛引佩刀自裁被救復懷
印自經死時沿江州縣多殘破烽火達安慶寇燄益張化鳳聞江
甯急委城守於慎自率師赴援偕廷佐合擊大破成功於江甯遂
復鎮江煌言竄化鳳之赴援也寇覘崇明虛攻益亟慎督士民堅
守相持四晝夜城旋圯旋葺慎語其眾曰賊欺我城孤民寡有
我心可破也乘間簡鄉勇出擊化鳳亦遣兵還救斬獲無算圍解

慎積勞嘔血卒立達湖廣通山人莅江浦有政聲辛順天宛平人
順治六年進士居官九載勤於撫字應昌江南通州人順治九年
武進士由徐州守備擢都司廷佐請治沿江州縣失陷城池罪爲
慎等請卹 詔贈慎布政司右參議 予祭二壇辛立達 贈按
察司副使各廕一子入監應昌 贈雲騎尉子宗起襲育才卹銀
六十兩上達 贈主簿

右 國史館本傳

伊勒圖 巴拜等

伊勒圖滿洲正藍旗人姓納喇以世襲佐領授護軍參領先是大兵克舟山明魯王朱以海遁海島大兵凱旋徙舟山居民於內地曠其城未幾魯王故將陳六御阮思復踞舟山與鄭成功通聲援順治十三年甯海大將軍伊爾德勅之伊勒圖及護軍校巴拜沙克習叟色驍騎校傅納署護軍校綏哈巴圖禮從十四年會師於甯波海口伊爾德以巴拜沙克習叟色傅納巴圖禮屬前隊伊勒圖綏哈屬二隊六御遣其黨張洪德列海船拒戰於橫水洋巴拜先登爲洪德戕叟色中礮歿沙克習巴圖禮傅納左右衝擊均歿於陣伊勒圖綏哈奮勇繼進大軍乘之擒洪德進薄舟山斬六御

思舟山平十七年伊勒圖綏哈從安南將軍達素勦鄭成功於廈門成功遣其黨分據險隘以賊船六百餘來犯分路擊之署參領納海護軍校夏穆達偕伊勒圖擊賊於城堡畧燬碎其船夏穆達納海復沿岸追襲俱中創歿伊勒圖中流矢復手戮一人爲賊所戕綏哈戰於蓋峙山陣亡二等待衛查克丹隊長琉住擊賊於浦澄畧奪船二賊益眾查克丹琉住奮擊不退俱戰歿明年達素還京上其事 詔贈伊勒圖騎都尉子禪布襲巴拜蒙古正藍旗人姓卓巴魯忒 贈雲騎尉弟巴圖襲沙克習滿洲鑲紅旗人姓瓜勒佳 贈雲騎尉子安錫襲叟色蒙古鑲藍旗人姓巴林 贈雲騎尉弟昂阿海襲傅納滿洲正黃旗人 贈雲騎尉從子索拜襲

巴圖禮蒙古正藍旗人姓巴岳圖 贈雲騎尉廕無考級哈鑲黃
旗包衣姓完顏 贈雲騎尉子特舜襲納海滿洲鑲黃旗人 贈
騎都尉襲無考夏穆達滿洲鑲黃旗人姓奇塔喇 贈雲騎尉子
常孫襲查克丹滿洲正藍旗人姓伊爾根覺羅 贈廕無考琉佳
滿洲鑲白旗人姓富察 贈雲騎尉弟春拜襲

右 國史館本傳

百三十三

卷三十三

三

佟濟赫虎等

佟濟滿洲鑲白旗人姓富察初任佐領從大兵征明克錦州松山
後隨睿親王多爾袞入山海關屢立戰功順治十五年擢前鋒參
領十六年海寇鄭成功犯江甯 命內大臣達素爲安南將軍率
師赴勦佟濟與一等待衛赫虎二等待衛納岱三等待衛海色達
喇馬納青前鋒侍衛鄂爾吉納副參領滿都護二等輕車都尉雍
貴郭汝龍三等輕車都尉金州騎都尉覺羅滿丕噶布喇雲騎尉
傅進忠古蘭泰赫達色空銜前鋒侍衛董安長史璽圖及張彥洪
並從征至則賊已敗遁入海退據廈門侵擾內地十七年五月
達素率師進勦由同安出海成功自引兵十餘萬登陸來犯洪義

塢滿丕率本旗兵步戰連敗之古蘭泰襲圖亦擊敗賊將吳英兵
四千餘人滿丕追賊至海澄中礮死進至廈門賊列戰艦六百餘
佟濟率舟師奮擊斬偽參將林登奪其艦獲偽印一時海島賊蟻
集我兵左右衝擊賊不退赫虎納岱海色達喇馬古蘭泰襲圖納
青鄂爾吉納滿都護金州傅進忠赫達色俱受創死達素以賊多
聚蓋峙山分兵遣佟濟等往剿賊據險施槍礮佟濟與噶布喇董
安張彥洪均陣亡時賊圍羅源縣達素遣雍貴郭汝龍往援途遇
賊力戰死事 聞議卹 詔贈佟濟騎都尉以次子穆什欣襲後
以孫福敏官都察院左都御史時遇 恩詔贈如其官赫虎姓張
佳納岱姓畢得俱滿洲鑲白旗人 贈雲騎尉赫虎子奇雷襲納

岱子頤色襲海色姓赫舍里達喇馬姓無考俱滿洲正紅旗人
贈雲騎尉海色子圖爾法襲達喇馬子登德襲納青姓納喇滿洲
鑲白旗人 贈雲騎尉以其叔額宜圖襲鄂爾吉納滿洲鑲紅旗
人姓伊爾根覺羅 贈雲騎尉襲無考滿都護滿洲正藍旗人姓
扎拉里 贈騎都尉子瑪爾漢襲雍貴滿洲正黃旗人姓瓜勒佳
贈一等輕車都尉子赫色襲郭汝龍正黃旗漢軍 贈一等輕車
都尉子朝政襲金州滿洲鑲藍旗人姓舒穆祿 贈二等輕車都
尉姪葉庫納襲覺羅滿丕滿洲正黃旗人 贈雲騎尉姪烏納純
襲噶布喇滿洲鑲白旗人姓富察 贈二等輕車都尉子噶林襲
傅進忠襲黃旗漢軍 贈騎都尉以兄子天祐襲古蘭泰蒙古正

藍旗人姓蘇默爾 贈三等輕車都尉以兄洛代襲赫達色滿洲
正藍旗人姓伊爾根覺羅 贈騎都尉以弟卓克錫襲董安滿洲
正藍旗人姓他塔喇 贈雲騎尉子托多理襲圖滿洲正藍旗
人姓納喇 贈騎都尉子勒布襲張彥洪正黃旗漢軍 贈輕車
都尉官襲俱無考

右 國史館本傳

鄂勒布 鄂滿等

鄂勒布滿洲正白旗人姓噶努崇德九年以前鋒校隨征明錦州有功順治元年從人關旋借親軍校鄂滿護軍校尙機圖達度護駐防荊州流溪賊王嘉郭甲作亂尙機圖達度護及護軍校瑪喇奇從大軍擊敗之十六年海寇鄭成功入犯破瓜洲驍騎校巴哈里戰歿成功遂陷鎮江圍江南驍騎校阿哈尼從禦賊江口歿於陣 上命內大臣達素爲安南將軍率師赴勦鄂勒布鄂滿達度護瑪喇奇及前鋒校瑚星阿護軍校巴蘭三等侍衛噶賴王府典儀貝屯護軍參領多穆星阿等並從至則賊已敗遁入海據廈門侵擾內地十七年五月達素進勦由同安出海遇賊哨舟擊破之

護軍校穆雅納戰歿進至廈門賊恃險招海島賊黨聯六百艘拒
戰鄂勒布先登殲其渠獲偽印一瑚星阿與前鋒參領噶布喇擊
沈賊艘一達度護同前鋒侍衛阿思哈等衝擊賊習舟楫倏合倏
分勢益猖獗噶賴躍入賊船被戕巴蘭擊賊於鵝首中矢創卒尙
機圖瑪喇奇貝屯多穆星阿及護軍校希岱阿里善海通阿驍騎
校哈尼皆戰歿達素以水戰不利遣二等輕車都尉齋三率鄂勒
布達度護瑚星阿及驍騎校五爾護蒙額圖攻賊壘於蓋峙山賊
舟來援均力戰歿於陣七月 命貝子洛託爲安南將軍達素以
尙書參贊軍事時成功據臺灣遣賊將守廈門洛託以鄂滿詣海
道令署參領借二等侍衛岱穆參領尼什哈護軍校季達禮廕德

禮莫洛洪攻廈門鄂滿先發越入旗兵船躍登岸斬馘甚眾尼什哈督船連進登岸擊賊賊卻入水季達禮涉水搏之復追賊及岸岸頽爲賊所害鄂滿身被重創歿尼什哈廢禮莫洛洪岱穆俱以奮勇力戰陣亡尋聞成功死師引還鄂勒布 贈雲騎尉子吳喇納襲鄂滿與鄂勒布同旗姓佟佳 贈騎都尉子那穆齊襲尙機圖滿洲鑲白旗人姓瓜勒佳 贈雲騎尉子羅多禮襲達度護滿洲正白旗人 贈雲騎尉子伊沙納襲巴哈里滿洲鑲黃旗人 姓費摩 贈雲騎尉無襲阿哈尼滿洲正白旗人姓富察 贈雲騎尉弟瓦丹襲瑚星阿滿洲正白旗人姓他塔理 贈雲騎尉弟索博色襲哈尼滿洲正藍旗人姓伊拉理 贈雲騎尉無襲巴蘭

滿洲正白旗包衣姓富察 贈雲騎尉子巴圖襲五爾護滿洲正
白旗人姓唐古 贈雲騎尉弟華色襲希岱滿洲鑲白旗人 贈
雲騎尉子惺格禮襲阿里善滿洲正藍旗人姓扎拉理 贈雲騎
尉子烏爾山襲海通阿滿洲正白旗人姓卜雅齊 贈雲騎尉子
拴住襲蒙額圖蒙古正藍旗人姓輝雅 贈雲騎尉子索援襲瑪
喇奇滿洲正藍旗人姓他塔喇 贈雲騎尉弟分岱襲噶賴滿洲
正紅旗人姓薩爾圖 贈雲騎尉子薩賴襲貝屯滿洲正藍旗人
姓兀扎喇 贈雲騎尉無襲齋三多穆星阿俱滿洲正白旗人姓
瓜勒佳齋三 贈一等輕車都尉子阿爾法襲多穆星阿 贈騎
都尉從子德清額襲穆雅納尼什哈均滿洲正白旗人姓贈襲俱

無考季達禮滿洲正黃旗包衣姓金 贈雲騎尉子公保常襲岱
穆滿洲正黃旗人 贈雲騎尉子三丹襲磨德禮滿洲正白旗人
贈雲騎尉襲無考莫洛洪滿洲正紅旗人姓納蘭 贈雲騎尉子
牛鈕襲

右 國史館本傳

國朝詩林卷之三十三

三

何瑞 張興等

何瑞直隸元氏人由武進士任廣東博羅城守營守備順治十八年增城流寇蕭都等劫博羅瑞率兵堵禦殺賊十餘瑞亦被刃傷猶殺賊三力竭與百總張興俱陣亡是年賊蕭國隆等踞肇慶之豐村肇慶水師營中軍守備陳昇攻寨礮傷歿自是海賊土寇連歲不靖康熙元年海寇楊二等犯雷州白鴿砦水師營守備房星擊走之會夜賊復率眾來攻星督戰中礮墜馬死二年楊二等由雷州擾高州高雷總兵粟養志等統兵水陸夾攻電白把總張俊信宜把總趙成功俱歿於陣是年以禦海賊周玉等而死者有都司僉書管廣州鎮標右營游擊張可久守備司馬興龍以禦恩平

縣士賊鄭亞什而死者有千總羅起鳳三年高灘峒賊張右吉劫從化增城茅田巡檢黨重瓚禦之中礮歿四年海賊李榮等犯龍門海安營都司王福陷陣死八年守備李應登討土寇戰歿於新會千總李德把總屈勇陳龍韜討海賊戰歿於潮陽瓊州鎮左營千總楊廷以調征王之銑死十七年吳川營千總袁其忠以捕洗彪死先後事 聞 贈瑞昇星俱雲騎尉可久遊擊興龍都司僉書餘卹如例星山東濟甯人順治十五年武進士可久直隸威縣人順治十二年武進士興龍直隸人重瓚陝西富平人 贈主簿福河南杞縣人 贈遊擊應登河南洛陽人 贈都司僉書廷廣東潮州人其忠湖北安陸人餘籍無考

右 國史館本傳

國史館本傳

三

楊麟武

楊公振名麟武荊州江陵人少有異姿讀書一目十行九歲做洛神十三行有子敬風骨稍長隨父任理維揚得徧交東南知名之士貧者贈以膏火滯者飾以名譽三吳之士翕然推之已而父沒於官公振哀毀逾禮楚人比於江夏黃童服闋大肆力於文章每試必冠軍然公振名族宦裔家素封又名高一世以故惜廉名者不敢薦取累科竟不第有王參元之阨焉明末全楚蹂於賊人不聊生公振遂流寓吳越間又數載入閩時旅愁日蹙篋瓢蔬水不繼而楚之賢士大夫從龍列顯達者指不勝屈公振則獨守清操終不以可憐之色向人大兵入關黃臺師潰流寓土著並令投誠

公振乃出見當道當道傳其人試以文辭大見賞識遂刺化州化
爲高雷要衝依山爲治大兵所臨民多負固公振急於自見無所
撫綏以故兵去而盜起數犯州城城中哀鴻未集戒嚴不解外救
又不至賊遂乘勝入縛官於廳冀一俯首下卽生全之公振屹然
如山嶽罵不絕聲賊眾割其舌公振又以血噴之賊怒鬱於市化
人多惜之 本朝死節之臣自楊化州始制府聞之匿不報而以
病卒達部將以掩其失城之咎也嗚呼惜哉

右傳韓程愈撰

褚唐俊

褚唐俊字南來浙江錢塘人貢生官福建將樂知縣
賊寇將樂南來率壯士鏖戰賊甚眾次日賊益集遂戰死年二十
九歲

右杭郡詩輯張維屏錄

172-678

172-678

武君相 郭文亮等

武君相河南嵩縣人順治十七年任湖廣荊州鎮標中軍遊擊康熙二年正月西山賊李來亨等作亂君相隨提督董學禮進剿賊先於坡澗設伏君相偕把總郭文亮前偵至李家店伏起君相奮身戰中礮墜馬死文亮追賊過嶺亦陣亡襄陽鎮標前營遊擊王進忠由李家店深入山箐峽口賊四路蜂起約二十餘隊首尾截殺我兵鏖戰殺賊將七賊大敗進忠乘勝入賊巢中礮死鄭陽鎮標前營千總蔣成忠宜彬營把總許啟同日陣亡辰常鎮標把總郭大有常德協右營把總李啟龍澧州把總田旭盛由缺里坪進行近火石嶺偵知賊屯白廟山巔約萬餘我兵由山左上槍礮並

國朝通志卷之三十一
施賊遁追及兩架山嶺斃賊百餘生擒數十人大有啟龍力竭陷陣死白廟山險旭盛由狹路先登受創死三月來亨等猶據險死守我兵由長坪進三坂壩及雙龍關兩路進攻山路峻險路僅一線賊復分拒險要官兵大呼奮勇登隘殺賊無數奪其二隘兩桂營千總范邦龍沅州鎮標把總張大賢及千總王維奇俱受創死事 聞君相 贈參將進忠 贈遊擊餘卹如例王進忠直隸人范邦龍四川人餘籍無考

右 國史館本傳

張略 楊昇 雲等

張略山西右玉人任四川提標右營遊擊順治十八年逆賊郝承
裔據雅州略隨提督鄭蛟麟往勦遇賊於邛州擊走之康熙元年
川陝總督李國英調略赴川東征李來亨郝搖旗袁宗第劉二虎
諸寇二年正月隨大兵復大昌殄賊於茶園坪四月總兵梁家琦
率兵五千營於夔州府之三會鋪分路進勦略及提標千總楊昇
雲守備管把總事李振麟由左路進遊擊蔡承用守備劉遇春千
總管把總事陳正國暢愛龍邱維泰由右路進督標遊擊郭進祿
遵義鎮標千總柳連芳把總楊羔素劉希才守備管千總事蕭勝
守備管把總事李成貴外委官李政茂劉應根由中路進值風雨

大作賊乘夜衝突略率本路兵迸力血戰自子至辰賊益眾略身
被斃矢手刃數賊殞於陣承用進祿昇雲振鱗遇春正國愛龍維
秦連芳羔素希才勝成貴亦均陣亡政茂旋以追賊死於茅麓山
應根以捕賊死於巫山賊尋犯陝西商州商雒道中軍遊擊梁士
禦於州西之胭脂關直前搏擊被圍不解力戰死事 聞並議卹
如例梁士順天大興武舉餘籍無考

右 國史館本傳

李允 孟淑孔等

李允山西隰州人順治十七年以都司僉書管湖廣提標左營遊擊事康熙二年正月茅麓山賊李來亨煽亂允隨提督董學禮往剿至黃連山允率所部進遇賊萬餘麀戰竟日生擒賊將六及賊數百賊潰走同時鄖陽守備孟淑孔戰於李家店辰常水師遊擊段琦戰於白廟俱有功三月大兵移駐長坪分兩路進允等向雙龍關鄖陽守備管遊擊事朱光祚等向三坂埡賊分眾抗拒允生擒賊將三賊棄關遁光祚等亦奪得三坂埡自是賊退踞七連坪官兵乘勝深入七月來亨糾郝搖旗劉二虎等併力抗拒允偕琦率所部擣巢血戰三晝夜眾寡不敵援絕允語左右曰此吾致命

國朝通志卷之三十三
之秋也遂自到琦亦戰死同死者有提標守備閻懋功孫繩統千
總姜進忠馬國奇把總劉名奇徐承祖董明心王元李及第張魁
辰常鎮標千總周朝旺把總張好王理及辰常鎮齋疏差官李上
進時光祚淑孔分兵與賊戰於黃龍山及南陽河亦力竭陣亡同
時死者有襄陽鎮標遊擊李長龍李安藍進祿劉光耀鄖陽鎮標
千總朱之藩任貴韓貴把總許登雲周文科黃應哲劉登標事
聞並議卹 詔允淑孔琦俱贈遊擊光祚懋功繩統俱贈都司
僉書餘卹如例琦鑲紅旗漢軍光祚山西大同人懋功鑲黃旗漢
軍繩統山東人餘籍無考

右 國史館本傳

陳錡 李吾貴等

陳錡江南高郵人順治九年武進士任山海關守備洊擢湖廣提標前營遊擊康熙二年值李來亨嘯聚興山縣茅麓山二月錡隨提督董學禮往勦賊萬餘設伏山澗錡奮擊其伏賊敗竄追殺十餘里斬賊將二十五人賊千餘獲械無算賊退踞李家店左營遊擊李吾貴守備盧天寵率所部分左右進斬首四百級擒僞遊擊蕭四僞都司陳旺僞守備劉奇賊眾遁走三月來亨招西山賊黨傾巢來拒官兵移駐長坪分兵由雙龍關三坂埡兩路進山削入雲路止一線賊密布礮石官兵奮力仰攻錡吾貴及彝陵守備曹光啟等攻得雙龍關襄陽鎮都司僉書管遊擊事楊九成宜彬營

守備毛石柱亦奪得三坂埡賊敗竄七連坪復竄黑山譚家老寨
七月來亨糾郝搖旗劉二虎等併力抗拒綺爲前鋒焚林箐破其
四峒乘勝深入猝遇伏從騎皆傷綺轉戰三日手格數百人馬力
不支嘆曰吾今有以報國矣遂自剄吾貴天寵光啟九成石柱
俱戰歿督標千總楊應魁朱自友朱必盛把總金應魁李賢王名
玉邵忠閻三光襄陽鎮標把總李茂吳楚奇侯用錫宜彬營把總
馬起蛟彝陵營千總薛有功薛應奎同時陣亡事聞詔贈綺
參將廕一子千總吾貴正白旗漢軍贈參將九成奉天人贈
遊擊石柱山西大同人天寵光啟皆直隸人俱贈都司僉書餘
卹如例應魁等籍俱無考

右 國史館本傳

國朝書狀頁數刀眉

三〇

郝爾德

張承志等

郝爾德鑲白旗漢軍父效忠明副將隸左良玉部下順治二年隨左夢庚投誠五年充湖南右路總兵八年勦李定國於靖州陣亡十年爾德襲三等輕車都尉洊推都督僉事擢湖廣安陸副將康熙元年九谿西山賊劉僞亂隨總督張長庚進勦有功長庚以其地要隘調爾德爲九谿協副將二年正月會襄陽總兵于大海征茅麓山賊李來亨遇於李家店爾德奮勇追擊多斬馘同時岳州營參將張成志黎靖協都司趙進禮均房協守備馬猶龍與國營守備劉本善黃州協把總羅定國兩桂營千總王君實各擊賊有功又天柱營守備錢斌元把總趙啟明澧州千總劉得勝率兵由

開道抵白廟遇賊萬餘亦擊敗之賊復集西山逆黨抗拒三月分
兵兩路進攻爾德等由三坂埡入斌元等由雙龍關入賊潰竄七
連坪七月賊復糾郝搖旗劉二虎等分路來拒爾德等率師深入
戰於鄖西之黃龍山山峻險賊合圍爾德等轉戰三晝夜與標下
把總何明蛟俱陣歿成志進禮猶龍本善定國君實斌元啟明得
勝亦均戰死同時陣亡者又有荆鎮營遊擊張應坤把總牛總昌
徐宏李燦李金黎靖協把總馬起蛟均房協千總苗芳傑把總胡
成德永州協千總王新把總徐得功興國營把總張明榜寶慶協
守備潘可官道州營把總劉貴事 聞爾德 贈右都督于世勳
襲三等輕車都尉成志遼東人 贈都督僉事進禮順天人猶龍

福建人本善陝西高陵武舉斌元江南人可官河南人皆贈都
司僉書餘卹如例

右 國史館本傳

張占鼇 趙一柱等

張占鼇陝西雒川人由拔貢生任湖廣荊州府通判康熙二年七月四川流賊郝搖旗等嘯聚湖廣鄖陽山中 上命都統圖海爲定西將軍會楚蜀之師討之時占鼇督餉從同督餉者鄖陽鎮行營則安陸府經歷蔚之煥辰常鎮行營則鍾祥縣縣丞鮑瑞魁沔陽州州同趙一柱彝陵鎮行營則長沙府經歷王賜元大兵抵賊巢賊突犯大營官軍失利占鼇堅守軍儲不爲動被執賊露刃脅降占鼇怒叱之遂遇害不獲其屍一柱亦見殺於三里堽之煥從人備騎促之去不從賊使降書不絕口支解之賜元中毆傷墜巖死瑞魁亦爲賊戕陝西興漢總兵于奮起赴楚會剿抵房山縣之

橫水搖旗率賊萬餘踞險以抗督標左營遊擊馬希驊首先撲擊立斃數賊與興安鎮標遊擊丁可貞把總安虎李友俱中傷陣亡襄陽鎮總兵于大海追勦入山委守備張所蘊及千總李三畏把總孫繼剛督餉賊黨袁宗第郝永忠等四面攻劫所蘊率所部禦於萬朝山山隘援師不得入轉戰三晝夜兵少矢盡與三畏皆中箭繼剛亦中礮俱陣亡 詔贈占麓湖廣按察司僉事廕一子入監一柱浙江餘姚貢生 贈知州之煥順天大興人 贈知縣賜元浙江桐廬人 贈府知事瑞魁浙江鄞縣人 贈經歷希驊陝西延安人 贈參將可貞陝西府谷人 贈遊擊所蘊直隸高陽人 贈都司僉書均 賜祭葬三畏河南鄧州人繼剛河南新野

人虎友籍無考

右 國史館本傳

李進臣 劉定邦等

李進臣直隸宣化人任湖廣守備管彝陵鎮標水師後營遊擊事
康熙元年西山賊李來亨分據歸州巴東諸邑進臣奉檄逆戰龍
馬溪賊敗退值賊黨聚香溪隔江轟礮卽過江潰賊焚其棚百餘
所歸州巴東盡復二年三月來亨踞七連坪進臣從大兵冒險奪
隘賊退踞譚家寨並通茅麓山周數十里犄角相聯十二月靖西
將軍穆里瑪提督董學禮分布鄖陽辰常襄陽彝陵四鎮攻取三
年正月進臣從本鎮總兵金萬鎰攻茅麓山中路山梁奪木柵三
座石梁二層直抵頭關山峻險賊以滾木插石拒進臣受傷殞澧
州營守備劉定邦都司僉營管兩桂營守備事劉芳周由黃草梁

攻茅麓山上路奪白石巖乘勝攻石筍俱先登陣歿又有永州協
把總陳啟四川成都遊擊李邦棟俱同時受傷死提督董學禮旋
復房縣之房山長沙參將雲福履力戰殞事 聞進臣定邦俱
贈都司僉書芳周 贈遊擊餘卹如例定邦江南旌德縣武舉人
芳周直隸臨城縣武進士啟江南人邦棟甘肅靖遠人福履山東
臨清州武進士

右 國史館本傳

劉傳 劉光明等

劉傳陝西三水人由行伍累官雲南義勇前營總兵康熙三年調征湖廣賊李來亨三月行至貴州之水西倚喇噶適遇土賊安如鼎叛傳力戰敗賊誤入深箐馬陷淖賊環射之把總劉光明率馬兵趙萬英等力救俱陣亡五年六月猺賊李癩子犯城步縣武岡營千總張起鳳出戰中藥箭死十三年逆藩吳三桂犯湖湘土寇亦乘機竊發彝陵鎮標中營遊擊馬之迅守城時鎮帥悉統精銳會討吳逆城中唯老弱數百寇至之迅出奇擊走之尋復集之迅被創死其討三桂死者竹溪營參將劉斌賊攻城斌七戰皆捷圍解論功擢副將後仍戰歿於竹溪湖廣左營守備李方坤恢復岳

州有功尋戰歿於常德二十年雲南提督標千總郭進戰歿於辰
龍關沙子哨雲南提標左營把總黃起龍千總馮啟奉戰歿於洞
庭湖其以招撫吳逆而殉節者爲漢川巡檢章啟周啟周從順承
郡王勒爾錦軍以劄委通判往撫吳逆被害於松滋事在十六年
其以生員殉節者爲李廷填張一元廷填爲三桂黨夏國相所執
不屈死事在十五年一元隨將軍穆占守永興被執於耒陽罵賊
死事在十七年其以討黔賊吳旦元而死者爲李成功成功任靖
武協把總旦元犯靖州成功戰死於鸕鷀事在三十七年此皆先
後於湖廣死事者也議卹 詔贈傅右都督之迅參將啟周主簿
餘卹如例起鳳河南新野人之迅山西長治人順治十二年武進

士斌江南上元人順治十五年武進士方坤河南杞縣人進雲南
昆明人起龍啟奉俱陝西人啟周浙江會稽人廷垣湖廣瀏陽人
一元湖廣永興人成功湖廣江陵人光明籍無考

右 國史館本傳

皇朝通志卷之三十三

三

國朝耆獻類徵初編卷三百三十八目錄

忠義八

瑚尼雅 桑以等

劉澤厚 趙家駿等

胡存仁

張起鳳

武君烈 唐銓等

朱國治 李興元等

甘文焜 子國斌
和善等

楊應鸞 馬宏儒等

王之儀 除三畏等

蕭震 張松齡等

陳啟泰

吳萬福

劉愈奇

李成功 張善繼等

劉欽鄰 武佐鼎等

李永昌 子名芳

劉超鳳

國朝書目考卷之三十三

--	--	--	--	--	--	--	--	--	--

國朝耆獻類徵初編卷三百三十八

通奉大夫前署江西巡撫江西布政使司布政使湘陰李桓輯

忠義八

瑚尼雅 桑圖等

瑚尼雅滿洲鑲白旗人姓索綽絡崇德八年隨大將軍貝勒阿巴泰證明克霸州順治六年隨鄭親王濟爾哈朗征湖廣敗賊袁宗第等十二年僞安南王劉文秀分兵犯岳州武昌瑚尼雅從將軍陳泰討之敘功授雲騎尉十五年從證明桂王將李定國李成蛟等至貴州屢捷於潞江涼水井康熙三年湖廣賊李來亨煽亂瑚尼雅從定西將軍圖海勦之賊踞大山築垣自固瑚尼雅與輕車

都尉桑圖騎都尉兼一雲騎尉覺羅蟒色襲賊巢殺賊三百餘攻
克大山嘴乘勝襲山門其門下突出賊五百餘官兵奮勇搏戰瑚
尼雅桑圖蟒色皆力竭身殞驍騎校薩弼護軍校哈瑪海白思護
亦戰死自是賊併力堅守偽總兵四偽副將四各率千餘人設礮
石抗拒雲騎尉賽音圖率本旗擊敗之賊更遣其黨二千餘立柵
釘椿以死拒賽音圖力攻殞於陣二等男科普索一等輕車都尉
孟額圖佐領拉布士喜郎中薩賽防禦額護德護軍校特穆德俱
陣亡瑚尼雅 贈騎都尉兼一雲騎尉子瑚沙琥襲桑圖加 贈
一雲騎尉子薩克信襲蟒色 贈三等輕車都尉從子吳他哈襲
薩弼 贈雲騎尉子積周襲哈瑪海 贈雲騎尉弟色爾特襲白

思護 贈雲騎尉襲無考賽音圖 贈騎都尉弟賽音叩襲科普
索 贈一等男兼一雲騎尉弟和倫子華色分襲孟額圖加 贈
一雲騎尉子呼魯克襲拉布士喜 贈騎都尉兼一雲騎尉襲無
考薩賽 贈雲騎尉子常德保襲額護德 贈雲騎尉子額爾色
襲特穆德隆襲俱無考桑圖滿洲正藍旗人姓鄂卓覺羅蟒色滿
洲鑲白旗人薩弼滿洲鑲白旗人姓托謨哈瑪海滿洲鑲黃旗人
姓納喇白思護滿洲鑲黃旗人姓蒙里賽音圖蒙古正藍旗人姓
布爾哈齊忒科普索滿洲鑲紅旗人姓納喇孟額圖蒙古正藍旗
人姓託爾必思拉布士喜蒙古鑲紅旗人姓烏蘭薩賽滿洲正紅
旗人姓李佳額護德滿洲鑲白旗人姓瓜勒佳特穆德滿洲鑲紅

旗人姓無考

右 國史館本傳 按科普索公一作賀布索

劉澤厚 趙家駿等

劉澤厚直隸吳橋人順治十六年進士年十五遇流寇被重傷卒負母以脫難康熙三年任四川江安知縣有治行土寇白應龍等焚劫城郭澤厚登陴守禦城陷死之其後死難於四川者又有趙家駿等十三年逆藩吳三桂黨犯南溪家駿知縣事百計拒守城陷自縊死賊至永甯隨征固原提標遊擊郝全善被執絕食死甯夏鎮標右營千總杜呈源被重傷力戰死時僞總兵彭時亨率眾犯廣元總督周有德赴勦中流矢提標中軍副將張登科陷陣救之馬被槍死步戰殺賊甚眾脫有德於難而身爲賊害監生郝熊嘉亦隨有德軍督餉至廣元遇賊劫力戰與外委遊擊熊天福同

死之其以被執不屈死者雲南騰越州副將周元三桂初給僞總
兵職不受聞大軍至四川乃舉兵爲應被執不屈死鹽井衛經歷
姚開先爲僞將王鳳岐等所執自縊死事平議卹 詔贈澤厚按
察司僉事廕一子入監登科總兵廕守備天福給五品廕餘卹如
例家駿山西忻州人順治十八年進士呈源陝西甯夏人登科鑲
紅旗漢軍熊嘉鑲黃旗漢軍天福鑲藍旗漢軍元江西上饒人開
先陝西涇化人全善籍無考

右 國史館本傳

胡存仁

公諱存仁字遇叟號竹溪上谷容城人始祖福元進士參知政事再傳文範公炳南元進士以理學配祀劉靜修先生明有光祿質處士世臣以產讓弟高義載邑乘至仁齋公爲公會大父多隱德大父蓋明公明辛酉舉於鄉歷刑部尙書郎父信山公博稽好古隱居不仕娶陰太宜人生子二長卽公次卽今郡丞絹庵先生也公生而惇篤嗜學讀書不閒寒暑師從伯天根公治毛詩爲文迅爽如水瀉三峽事親孝曲盡其誠親疾審醫檢藥皇皇至廢寢食兄弟疑義相質動履咸規於正蓋得之庭訓者然至與人接物雖閭里庸愚靡不霽然相洽也平居好施子重然諾濟人之急卽己

國朝通志卷之三十三
所需者亦必以先人鄉里稱善士云丙戌補邑弟子員督學鳴駿
張公擢諸首入闈不第辛卯闈中爲同考韓公璵鑑拔入彀數日
而主試以經藝違式置之又不第乃以明經入成均一時文藻籍
籍公謂丈夫甯無所表見於世乃謁選得輔刺忠州忠粵西地或
謂地遠而俗悍難理毋往公曰臣子甫入王家輒思便利委艱鉅
孰任粵雖難治吾治以 朝廷法遂攜家行資蕭然無辦時郡丞
公令香山爲具舟車衣裝得莅忠忠守土司民皆化外隸守隸流
官者僅四寨蓋 朝廷初制以土官治土民 特命流官者欲漸
其化而革其俗也故盜賊獄訟皆土司主而殿最則流官任其責
土司驕悍多不法前此輔守者咸依違無可否甚則比附和同俟

遷秩而已故士民愈橫暴不可馴至白晝搜人道路劫殺比見告
公奮然曰天子一海內聲靈所及卽闕遲諸國莫不震疊況粵
西車書內地爲刺史縣令之所治吾受天子命輔此方也一官
卽卑弱亦惟知有三尺安能負所學爲朝廷辱諸橫暴者悉置
之法傷人及盜抵罪法不貸會土司值襲立諸土人主長公獨主
嫡諸頭目爭之叱曰國有典制孰敢干名亂舊章哉於是諸大吏
咸是公議遂立嫡而忠之上下憚公明威其不軌者咸思禍公矣
時上思州缺守上官廉公才檄攝州州地僻隘民寥落無幾公莅
事招流恤殘息訟黜蠹講課勸學數月化大行事竣乃回忠公雖
忠久奸梗無顧忌所爲益不軌懼不自安謂不法死逆死等死耳

乃謀糾黨以逞公遂遇害孺人亦被創二子一女皆以驚悸卒嗚呼悲哉余謂國家建官如荒遠邊闊之域當令文臣兼武備授以兵如漢制刺史守令皆握兵符無事足以震殊俗消邪心有事則可以誅亂首直行其法濟政教不及而振國威何至以文弱微吏委之魍魎瘴癘之鄉而致令力屈氣竭壯志不伸抑鬱受禍以幾於斯難也昔韓昌黎謫潮州鱷魚爲民害驅之以文而鱷魚徙何忠人頑冥無知覺亦鱷魚之不若乎嘗稽忠古屬邕州唐蘇緘知邕寇陷城合門焚死一夕眾見大兵從北來呼曰蘇城隍督兵賊懼遁今公亡未幾諸賊四十餘人皆伏誅公之靈爽殛之哉郡丞公出其貲扶柩歸里里人爲墮淚公生天啟丙寅卒康熙乙巳年

四十一歲昔從吾友劉公勇薛義甫聞孫徵君爲世大儒嘗自海
岱歸道衛原西望蘇門擬謁先生廬而以雨雪阻至今企慕未忘
公狀徵君有阻雨畏軒詩知公大父蓋明公與徵君爲執友
公常侍左右其漸摩砥礪固有素而自顏齋曰畏軒所謂嚴氣正
性者非耶然生平孝友敦篤循循然醇謹之君子也及觀治忠抗
節執法雖古強項吏何以加焉使獲大用其建豎應表表當世乃
齋志以卒道不行於時也雖然公之德之行偉於世矣吾於公之
家學有足多者是宜銘銘曰

何干將之試而鏘缺也何驂驅之步而途厥也彼德彼行而修而
潔也厥用弗竟而志獨絕也吁嗟才嚴方而氣激昂年不永名則

彭千秋萬禩松朋玉藏源之遠兮流其長

右墓誌銘楊端本撰

張起鳳

張起鳳南陽人康熙初任武岡營千總五年駐防城步賊李癩子等率眾攻城起鳳單騎出敵斬賊首以力竭卒

右傳李元度撰

國朝名臣言行錄卷三十三

武君烈 唐銓等

武君烈河南嵩縣人少力田奉母避流寇居中山遇土賊將殺其母君烈願以身代賊義而釋之順治初出行伍從荊州鎮總兵鄭四維駐荊州累擢至鎮標中營都司時土寇姚黃等犯荊州眾號數十萬攻城甚急君烈縋出拔其纛率偏師誘敵斬獲無算寇怒積薪填壕君烈投火焚其薪賊又穴城君烈發火器中賊首立斃賊駭不敢偏數日援師至君烈乃開城夾擊賊大敗擒其僞將張有才姚黃逃匿夔州山中屢出肆擾君烈揚帆直上抵白帝城大破賊獲其渠魁以還湘南土寇王進才以二十萬眾犯澧州君烈奉檄往躬身先士卒突入賊營斬首數十級賊驚潰降者數萬人

督撫上其功授前營遊擊鎮襄陽康熙七年鄖陽山賊竊發君烈
勦之戰死西山下車 聞卹如例其先君烈而死者又有唐銓成
溥劉應科銓任提標左營都司溥任撫標中軍都司順治五年黃
州土賊起銓溥攻之打鼓寨賊三萬餘以死拒溥奮身入銓繼之
賊圍之數重皆力戰死十三年山賊據龍峒魯公寨辰常鎮總兵
楊遇明遣水師營中軍都司僉書劉應科往勦賊來犯應科迎敵
中槍死 詔銓溥俱贈遊擊應科加一級廕一雲騎尉銓溥應科
籍俱無考

右 國史館本傳

朱國治 李興元等

朱國治漢軍正黃旗人 世祖章皇帝順治四年由貢生授固安知縣洊擢順德知府霸昌道十五年內升大理寺少卿十六年四月遷大理寺卿十一月擢江甯巡撫明年春劾布政使陳培正庸劣累民罷之時海賊鄭成功盤踞外洋出沒江南濱海州縣國治疏言鄭逆未靖欲破狡穴先度形勢賊眾負險我師遠涉風濤其勞逸不同賊眾熟識海道我師弓馬便捷其素習不同水師舟楫較之賊船大小懸殊其攻取器用不同臣謂以守寓戰凡海邊海口多設墩臺待賊勢困援絕乘閒攻之自能擒渠獻馘下所司議行十八年疏言海防緊要請移蘇州海防同知於常熟移松江海

防同知於上海各令其督修沿海橋梁馬路墩堡與各營汛將弁相機策應使任專而事無歧誤 從之又疏言蘇松常鎮四府錢糧抗次者多因分別造冊紳士一萬三千五百餘衙役二百四十人 敕部察議部議見任官降二級調用矜士褫革衙役照贓治罪有差時妖言惑眾吳縣有潘應祥等溧陽縣有端應用等國治先後捕誅之康熙元年丁父憂不候代歸部議擅離職守革職 聖祖仁皇帝既親政 詔起用十年補雲南巡撫時吳三桂以平西王畱守滇南收畜亡命潛謀不軌十二年七月詭請移藩錦州上念三桂久握重兵恐滋蔓生變特允所請 遣侍郎哲勒肯學士傅達禮至雲南經理其事三桂期以十一月二十四日啟行國

治方疏請增設驛堡協撥夫馬以待遷移而三桂與逆黨胡國柱
夏國相馬寶等密謀叛逆舉兵扼守關隘先期三日邀國治及按
察使李興元雲南知府高顯辰同知劉崑脅之叛皆不屈國治罵
賊尤烈遂遇害二十年雲南平 上命驛送國治櫬及家屬回京
二十一年 諭曰朱國治當逆賊吳三桂反叛之初抗不從逆遂
被殺害捐軀殉難深爲可憫其從優議卹乃加 贈戶部右侍郎
賜祭葬如典禮廕一子入監 世宗憲皇帝時入祀昭忠祠

右 國史館本傳

甘文焜 子國城
和善等

甘文焜其先江西豐城人後遷瀋陽父應魁從世祖章皇帝入關隸正藍旗漢軍官至石匣副將文焜由兵部筆帖式累遷禮部啟心郎聖祖仁皇帝御極改大理寺少卿康熙二年遷順天府尹六年正月授直隸巡撫先是左都御史郝惟訥以督撫親蒞屬邑官吏因緣派累民間奏罷巡歷例七年六月文焜疏言巡撫不一城而苛屬擾民之事正多若果賢必自愛名節減省從役絲毫不以累人而年歲豐歉民間利病有司貪廉悉無遁情請仍敕令巡視但申嚴苛擾禁例則不肖之人知儆而實心任事者得盡

職守疏下部詳議部臣執郝惟訥前奏寢其事 上曰各省遇有水旱等災督撫減省從役速行履勘庶不至顛倒輕重且可察訪貪官蠹役重加懲治於苦累兵民之事驗時卽行更改其允文焜請著爲令九月文焜疏報履勘涿霸安祁等州大興高陽文安武清東鹿清苑等縣田地數萬頃秋雨爲災請全蠲歲賦已征夏稅流抵來年部議按例減免有差得 旨朕聞保定眞定二府及霸昌道所屬州縣被災特甚勘報十分九分者其盡行蠲免內有已征者流抵來年文焜復劾昌平順義懷柔密雲交河各州縣官遲報水災得 旨下部處分如例會總督白秉眞以賑費浩繁請聽官紳等輸納銀米文焜輸銀三千助賑議敘加銜工部侍郎旋擢

雲貴總督八年五月受事奏禁各驛站於額設夫役外派民協助
時吳三桂鎮雲南雲貴總督駐貴陽三桂欲藉邊釁以固兵權詭
報土番康東入寇又陰趨凱里諸苗煽亂羽檄交馳以覘文焜措
置文焜料康東無能爲患凱里近在肘腋不制恐滋蔓難圖先督
兵進剿擒斬無算連破賊巢遣副將冶秉忠搜剿阿魯山陣斬賊
酋阿戎餘黨悉平乃以進剿康東師期移檄雲南而三桂果以康
東遠遁來告文焜尋以滇疆遼闊疏請巡視因徧歷各府州十年
三月疏言滇黔山路崎嶇且多瘴癘官員卒於任者請給勘合由
驛歸棧疏下部議行七月以病求罷 上溫旨慰畱九月丁母憂
命在任守制十一月臻剖逆苗阿福倡亂文焜遣兵擣其寨陣斬

千餘人擒阿福誅之文焜再疏乞歸葬 許給假治喪十二年十月還貴陽任事時方 允三桂撤藩之請三桂期以十一月二十四日起行陰結黨羽謀反先期三日戕雲南巡撫朱國治分遣逆黨偪貴陽文焜聞變卽繕疏遣族弟文炯齎馳入告復致書川湖總督蔡毓榮趣其集兵沅州聯絡楚黔聲援先是文焜回京治喪三桂請以總督印付雲南巡撫署理假訓練爲名盡調督標弁兵赴滇厚結之至是煽誘潰散莫聽文焜調遣文焜旣牒提督李本深領兵扼盤江上流以拒賊適本深以書來覘文焜意中多遁辭文焜復爲手書荅之略曰黔省安危責在提督逆賊受 國厚恩罔思圖報乃弄兵一隅自取滅亡我輩忠孝自矢建樹正在今日

尙其同心協力手足相依萬一不濟惟有效張巡南霽雲以身殉國斷不稍存攜貳也本深得書弗顧竟踞安順府從逆貴州巡撫曹申吉亦降賊文焜見城中將吏無一可與謀者度貴陽不能守惟鎮遠地勢險阻外可號召荆楚之兵內可抗拒滇黔之隘堵遏凶鋒力圖剋滅猶事之可爲者因令妾盛氏率婦女等七人自經死卽輕騎馳赴鎮遠至則守將江義亦已從逆文焜至吉祥寺江義以兵環之文焜歎曰封疆之臣當死封疆事至此無能爲矣整衣冠望闕再拜遂自刎死年四十有二第四子國城及筆帖式和善雅圖從死焉後數年吳逆旣平貴州巡撫楊雍建疏陳文焜滇黔政績及遇賊死節事得旨甘文焜總督雲貴供職勤勞吳

逆反叛捐軀殉難忠節深為可憫下所司優卹並允直隸巡撫于
 成龍請遣其長子宣化府同知國均迎櫬還京至之日遣大臣
 迎奠於盧溝橋贈兵部尚書賜祭葬如典禮諡忠果廕子國
 璧入監二十五年貴州巡撫閻興邦以士民請建專祠於貴陽入
 奏御書勁節二字額其祠世宗憲皇帝時以文焜入祀昭忠
 祠

右 國史館本傳

甘文焜字炳如其先自豐城徙遼陽父應魁國初從入關為石
 匣副將文焜以勳臣子通書史大義善騎射自筆帖式擢禮部啟
 心郎屢奉使稱旨康熙初遷大理寺少卿晉順天府尹崇文門

權稅不平文焜劾之 廷議卽令攝稅務文焜曰臣言之而居之是利之也固辭 聖祖察其廉介命巡撫畿甸奏免眞定等四郡被水秋糧逾年 特簡總督雲貴當是時逆藩吳三桂勢張甚官吏懼其威莫敢枝梧文焜獨與之抗藩使所在騷動發平民佐郵傳謂之協夫文焜遽奏革之苗蠻凱里等九股四十二寨與三桂陰相結時出抄文焜議討之三桂詭稱康東蠻叛欲紿文焜移師而令凱里等乘其後文焜率師出不意直抵凱里殲其魁而置康東不問三桂計不行亡何文焜丁內艱請終制不許請歸葬許之事畢卽趣行甫入境而三桂叛矣文焜之歸也部議督標五營兵悉赴滇就節制三桂皆陷以利故將卒樂爲用而巡撫曹申吉提

督李本深等皆從逆文焜調募無應者乃手刃其妾獨與幼子國城引數騎從閒道疾馳至鎮遠欲扼其衝以圖恢復而守將江義已受僞命扼不納於是文焜下馬北向拜曰臣無所施力當死封疆卽拔所佩刀子國城大呼請先死文焜未忍遽奪刀自刎復舉刀若授父者文焜握刀屍乃踣血濺文焜衣文焜笑曰是兒勇過我遂自殺從者筆帖式二人亦死之康熙十二年十二月初八日也逆藩平事始 聞 詔贈兵部尙書諡忠果廕一子入監讀書賜祭葬如例其後滇黔皆建祠祀之 天子賜以勁節之額而所廕子國璧官亦至雲南巡撫

史臣曰予得文焜與李本深書詞義激烈至今誦之凜凜有生氣

論者或議其無應變才是不然逆藩久蓄異志羽翼既成而文焜
任事日淺其枝柱固難向使事權不移猶得而備之不幸復以憂
去遂藉寇兵再至而無所施其力豈非天哉當飛章告變自許與
城存亡卒踐其言可謂殺身成仁者矣

右傳陶貞一撰

天地休嘉之氣鬱爲孝子忠臣忠孝國家之祥瑞也世人不察以
全生爲吉殺身爲凶將勿求生害仁老以牖下死爲吉而成仁取
義誓不忘在溝壑喪其元者不得爲吉乎易曰過涉滅頂凶无咎
過涉之凶不可咎也孟子謂盡其道而死爲正命桎梏死者非正
命忠臣之死以桎梏爲正命順受其正也今有人患難迫於前戀

戀於富貴壽考則生凶矣何如死之爲吉耶 今上御極之十年
瀋陽甘忠果公由北直撫軍總制滇黔有善政在史乘不具述歲
癸丑逆藩吳三桂以滇叛脅公不從提督李本深帥師襲貴陽公
出走鎮遠謂是滇黔隘地守關引楚師爲援逆必可殲除先是公
問卜繇曰一路功名到吉祥公喜無虞也至鎮遠裨將江義夙怨
公執公不得脫公知勢不可爲北面稽首再拜曰人臣死封疆義
也乃自殺及其幼子是爲吉祥寺始信吉祥之卜凶讖也嗚呼詎
知死所以爲公之吉祥耶昔文天祥生時日者相之謂此子忠良
可大位然不利於家嗟夫不利凶占也天祥死以一身係三百年
綱常之重豈非所以利之耶甚矣吉凶之正非人世生死禍福之

見所能測識於公益信也公歿垂四十年第六子大中丞立軒公復撫吾滇踵公之任象公之賢發公之幽有數焉存於其間非人所能預定可以識天意矣公祠舊附前明靖難大司馬吳雲學士王禕爲二忠祠今大中丞允滇人士之請立祠五華山之趾爲專祠於是見大中丞之孝也能繼志也忠果公之忠也昌其後也其專祠也獨有千古也與二忠並後先相望也俎豆而祀之滇之人不與有榮施乎漢生晚不逮其時詢諸父兄得其事欲傳聞當時俾天下知鴻毛泰山爭於一死死則眞卿罵賊至今世猶存不死雖才如王維未嘗不爲帝宥赦而故宮秋槐凝碧管絃之句君子讀之猶有餘惜也維亦豈至今存哉漢以爲爲臣而貳其主卽謂

爲不祥之人可也

右祠記張漢撰

吾江右本朝人物遠遜前明康熙中葉後觀法錄所載祇熊一瀟李紱朱軾甘汝來裘曰修李湖六人而國初死吳逆之難者乃獨有甘傅二公甘公名文焜江西豐城人遷瀋陽父應魁從入關隸漢軍正藍旗文焜由筆帖式遷禮部啟心郎康熙七年累擢至雲貴總督時吳三桂鎮雲南雲貴總督駐貴陽三桂欲藉邊釁固兵權詭報土番康東入寇又陰趣凱里諸苗煽亂羽檄交馳焜文焜措置文焜料康東無能爲凱里近在肘腋不制將滋蔓先督兵剿破其巢斬其酋阿戎乃以勦康東師期檄雲南三桂果以康東

遠遁告旋丁母憂至十二年十月還任時 朝廷已允三桂撤藩
請三桂期以十一月二十四日起行先期三日反戕雲南巡撫朱
國治分遣逆黨偪貴陽文焜遣族弟文炯馳疏入告復馳書以告
川湖總督蔡毓榮集兵沅州聯絡聲援先是文焜旋京治喪三桂
請以總督印付雲南巡撫署理因假訓練爲名盡調督標兵赴滇
厚結之至是相煽誘莫聽文焜調遣文焜牒提督李本深扼盤江
上流本深懷貳以書來覘文焜意文焜手書報之期以效張巡南
霽雲以身殉國本深竟踞安順從逆貴州巡撫曹申吉亦降賊文
焜度貴陽不可守而鎮遠勢險可號召荆楚扼滇黔吭令妾盛氏
及諸婦女七人經死輕騎馳赴鎮遠至則守將江義已從逆文焜

至吉祥寺義以兵環之文焜知不可爲整衣冠望闕再拜自經死
傅公名宏烈江西進賢人明末流寓廣西順治間以薦授韶州府
同知康熙二年遷甘肅慶陽府知府七年許平西王吳三桂謀不
軌坐誣論斬 詔減死徙梧州十二年冬三桂果反廣西將軍孫
延齡提督馬雄應之宏烈募驍健陽附三桂而與平南王尙可喜
圖恢復十六年致書督輔理事官麻勒吉言大兵若速進南安宏
烈從韶州策應兩粵可定麻勒吉以聞 上嘉宏烈忠授廣西巡
撫加撫蠻滅寇大將軍時宏烈已敗賊於韶州進師廣西復梧州
潯州十八年正月宏烈自梧州分布水陸兵乘賊犯木城奮擊殺
賊二千餘人遂定平樂桂林疏言天下久安長治之策詔文臣事

權不宜太輕藩鎮兵權不宜太重乘此大兵在外應善爲布置解散又言尙之信歸心後臣隱忍調停欲導其爲國宣力豈料其怙終不悛竟不知有君父臣知之信反覆莫測故厚集兵力爲東粵東南之防今三桂已死遺孽蕩平在卽宜削之信藩封以授其弟所屬多兵設水師提督以分其權則兩廣得以久安 上並是其言密示議政王大臣等酌行先是馬雄死其子承蔭仍附三桂至是僞投順宏烈遣復柳城融縣十月宏烈疏言雲貴進兵之路廣西爲要臣專候 諭旨卽親帶官兵先奪楓嶺會合湖南大兵前驅 詔可十九年二月宏烈至柳州承蔭已叛召宏烈赴城議事既登舟承蔭伏兵劫其營潰遂挾宏烈至貴陽吳世璠誘以僞職

不從遂遇害夫三桂之謀逆久矣其聲勢極大其黨羽極眾顧貴州實塞其衝而文焜又確有智數不爲三桂所牢籠使不丁憂去任則總督印不得至雲南貴州兵亦不得赴調爲要結踞險扼吭聯絡蔡毓榮爲守禦或萬一有以制之而稍緩以待大軍之來亦或不至魚潰肉爛乃偏授此一隙使之束手無策不得顯功名於時此天之所爲而非人之所爲也三桂久蓄異志無人敢言宏烈以一邊遠知府侃侃言之可謂絕大風力坐誣徙梧三桂反延齡亦叛竟於謫戍中奮臂而起如顏平原之獨爲河北義士者然進取梧桂退防廣東其能使尙之信不卽猖獗者實宏烈有以制之也乘閒拜疏且爲言天下久安長治之策其志遠矣儻馬承蔭不

反噬使得合湖南大兵以進功名將不在趙良棟下乃過信降人
殞身非命若元之察罕帖木兒然此則人之所爲而不得歸咎於
天矣考三藩之變從逆者幾半天下而挺身殉國者亦不乏人在
督撫大臣中福建有范公承謨爲耿逆所害廣西有馬公雄鎮爲
孫延齡所害而甘公與傅公則爲吳逆所害甘公當賊勢初起從
逆者多獨當其鋒卽使丁憂不歸亦恐難以展布況復巧乘其隙
無兵無將死固其宜若傅公則自募驍勇陽附陰圖深心與大力
兼用兵鋒甚銳智計絕人又況三桂已死川陝湖南並皆平定定
遠大將軍彰泰自湖南進平南大將軍賚塔自廣西進勇略將軍
趙良棟自四川進埽除遺孽功在俄頃而竟不使獲與諸公共奏

平定之勳以同受五等之爵雖曰人事不可謂非天之有以提之矣然而二公先後死忠 贈卹皆厚甘謚忠果傳謚忠毅甘公貴陽有專祠傳則廣西與馬文毅公同祀炳炳麟麟耀丹青而垂竹帛於吾鄉亦大有光矣余故合而論次之以爲豫章續文獻略之一助

右事錄李祖陶撰

楊應鶚 馬宏儒等

楊應鶚鑲黃旗漢軍任貴州貴陽府同知康熙十二年逆藩吳三桂叛執應鶚送雲南錮之順甯應鶚密謀舉義僞將軍趙永甯縊死之同時有馬宏儒者直隸蔚州人順治十八年武進士任雲南都司三桂重其名脅之叛不從以鐵椎擊其齒齒盡落終不屈囚之昆明不食死其在滇先後殉節者又有鄭相等相江南江甯人以中書隨軍至雲南順治十六年大兵入滇委署石屏州事有惠政適僞總兵高應鳳作亂相死之先是大兵未定雲南時流寇四出剽掠有昆明人楊樹烈以四川南川縣知縣告休家居寇至北面再拜自縊死十八年勦流賊餘黨義勇營把總羅得勝戰歿康

熙四年迤東土酋龍韜祿昌賢分道剽掠甯州知州曹誠嬰城守
城陷死之阿迷州吏目郭維賢奉總督卞三元檄往撫賊遇害原
任曲靖府教授周起元被執不屈死同時生員殉節者又有唐方
齡張鷟羽事並在四年至十六年魯魁土賊作亂新岨營守備張
廷柱把總熊世貴隨巡撫石文晟往勦廷柱世貴皆中矢死先後
事 聞並卹如例誠江南青陽人起元方齡俱雲南建水人鷟羽
雲南石屏人廷柱直隸天津人世貴湖廣岳州人得勝維賢籍俱
無考

右 國史館本傳

王之儀 廉三畏等

王之儀正藍旗漢軍康熙六年任福建福州知府耿精忠藩下人肆惡羅源知縣張翀殺之精忠怒迫之儀劾翀之儀正色曰翀賢員黜之如公道何精忠不能奪十三年三月精忠謀逆執總督范承謨人咸震懼之儀獨奮呼曰皇天在上汝敢反耶賊刀架交下死之復劫其署媳張氏自刎建甯府同知喻三畏時在省與侯官知縣劉嘉猷俱不屈被殺于總廉有功手刃十餘賊死之時耿逆分遣僞將陷諸郡福甯總兵吳萬福與幕賓孫燧及百總潘騰鳳俱死之萬福詳見大臣傳十四年閏五月侯官武舉胡守謙以不從逆遇害妻黃氏飲醢殉六月尤溪知縣李埴以不受僞檄拘至

省殺之妻傅氏殉邵武知府張瑞午倡謀討之約邵武同知高舉
原任福州副將王進及督標材官楊起鵬姜山同舉事謀洩賊幽
繫之十五年九月均遇害瑞午子玘瑛珍珠玳瑜六人及媳王氏
李氏僕劉貴劉嵩舉子登選起鵬子潮山妻姚氏子文遇皆殉議
卹之儀瑞午俱 贈太僕寺卿三畏舉 贈按察司副使嘉猷填
贈按察司僉事各廕一子入監守謙廕千總餘卹如例三畏奉天
人嘉猷江西金谿舉人有功奉天人填河南湯陰人康熙九年進
士瑞午鑲藍旗漢軍舉鑲紅旗漢軍墩騰鳳籍無考

右 國史館本傳

劉嘉猷

甲寅閩變同日死節者三人侯官明府金谿劉天疇先生其一也
先生諱嘉猷字憲明宋釋褐劉堯夫裔世居金谿玉田里後徙容
坊父友山生明府最晚幼時父甚喜負貌臞神王氣象嶽立不可
狎前明庚午科鄉薦士 本朝署興國教諭復署新建以明道正
誼爲學爲教兩邑士多化之秩滿宰侯官逢大中丞范公攬轡澄
清明府廉能行其所學愜中丞意未數月而撤藩 命下旦夕隱
憂度其必叛先語家人曰閩難將作我宰茲上也義不可以污甲
寅三月亂果作逆紘文武赴藩府計事自大中丞以下咸往明府
從而後入見鋒刃交戟暫大中丞降大中丞以大義昌言次陳順
逆禍福逆弗聽勒降大中丞罵不絕口逆黨縛而去明府階下厲

聲曰范中丞 國家重臣素負清望豈肯從爾反若輩敢無禮逆黨叱之聲色益厲聲震階上知福州府事王太守之儀同知建甯府事喻貳守三畏忠義激烈罵賊皆不屈階上怒喝武士殺此三人眾股慄明府挺然髮指眦裂憤猛戟手有搏擊勢銳刃亟下王太守喻貳守齊殉於難三忠屍出逆府眾咸低首國人憐之有志者壯之妻子羈閩三年丙辰九月和碩康親王收復閩疆閩亂平褒忠節計口授食令其子扶柩歸金谿合疏題卹先生得 贈福建按察司僉事蔭一子入監讀書至是而同時附僞偷生者愧且悔康熙二十年遣官 諭祭曰烈士成仁齋志而歿忠臣報國捐軀以從爾劉嘉猷矢志忠貞服官敬慎值逆賊之起變勵臣節而

彌堅臨難捨生甘心殞命朕用悼焉特頒祭葬以慰幽魂爾如有
知尙克欬饗方庚午同邑同榜有王公士和爲延平守有曾公瀆
化爲六合令前朝身殉城社金谿是科得人爲盛明府於四十五
年後慷慨就義殺身成仁雖先後各殊而死於官守一也明府有
子四伯斯大仲斯茂叔斯集瀆樸不樂仕奉其母命讓季斯蕃人
監讀書初投河南西平尹時吾在京師絕不與選人接季知之乃
以金谿劉公子謁自言無他但乞先人一傳幸矣傳吾志也吾嘗
賦哭三君子行矣王太守喻貳守以弗得家狀未及傳有福州城
守千總廖君有功見逆殺忠義發憤大呼同被殺烈丈夫也后二
十年甲戌山西小石營守戎劉進士職以牘道其事籍貫未詳先

附識

右傳彭鵬撰

廖有功

古愚子彭鵬曰甲寅靖南耿逆以閩叛偽稱制封疆大臣死節拒
 偽者總督范忠貞尚矣同日死節文臣止三人王公之儀以福州
 府知府死喻公三畏以建甯府同知死劉公嘉猷以侯官縣知縣
 死繼此則嬰城死於福甯鎮者總兵吳公萬福也閩門死於漳州
 者巡海道陳公啟泰也繫組死於不赴召者龍溪縣知縣李公垣
 也武臣而以千總死者獨廖公廖公名有功別號雲山遼東廣甯
 衛籍 本朝定鼎從廣甯入關順治三年從貝勒王平闕遂畱闕

凡二十八年僅得一福州城守營千總數奇常鬱鬱范忠貞總制
入閩甫三月甲寅暮春之望逆藩佯召文武諸僚撫臣躬詣制府
請同往公知難已發以城守營千總棄韉從仰天歎曰往必不免
有功以身殉得死所矣所以愧高爵厚祿而懷二心者是日陰霾
黯昏隨制府後將入門門者訶之公目眦如炬橫視門者門者辟
易公入而甫立礮響賊徒執制府罵賊震天地左右縛制府去公
大呼曰城守千總廖有功以微弁不忍負君父王世受國恩
加至親藩國家何負於王而王忍此左右叱公公拔佩刀手刃
叱者一人鋒芒所向倉卒莫敢撓連殺十數人合圍交戰力竭而
死同日死者三人並公而四賊憚公忠義能爲厲不敢暴其尸得

蓋棺康熙十五年丙辰九月康親王南征叩仙霞關下建州延津
勢如釜魚始乞降大師臨榕城前此殉難文武臣子弟匍匐請親
王帳下咸加禮十七年丁巳督撫合疏會題 天子廉廖千總名
十九年庚申 天子念閩變死節諸臣給公優卹白金百五十廕
子一以衛千總用公有子三人長騰煌次騰焯三騰燦長方弱冠
從征以軍功授建甯鎮左營秩滿赴樞部材技稱最授清漳守戎
次襲父蔭得浙江海甯右衛千總三十五年丙子卞大中丞撫閩
表忠勵節請建祠西湖春秋致祀公與享不愧諸子皆有儒將風
能自樹立顯揚家聲余及門甲戌進士海鹽曹辰容先爲立傳遠
近士大夫和之賦詩投贈自此燕趙吳越無不知有死節千總廖

雲山嗟乎人生自古誰無死死有輕於鴻毛有重於泰山者其在斯人夫

右傳彭鵬撰

同本三月十五日

三

蕭震 張松齡等

蕭震福建侯官人順治九年進士任山西道監察御史丁父艱回籍康熙十三年逆藩耿精忠叛震謀討之事洩遇害妻林氏妾張氏媳鄭氏婢曾氏皆殉雍正四年督臣高其倬以狀聞詔入祀功臣廟林氏等建坊入節孝祠耿逆多誘致閩省紳士不屈而死者有張松齡等松齡莆田人順治十二年進士改庶吉士擢給事中尋轉四川參議時川省凋敝松齡加意撫綏流亡漸復後缺裁歸里值耿逆變迫以僞職不從羈數月終不屈死葉有挺壽甯人康熙九年進士耿逆叛避入南昌逾年由閒道歸省母賊知之迫以僞職潛走山中絕粒死施大晁福清人康熙十二年進士聞

變匿金芝山募壯士助大兵進討賊執之大晁嚼舌罵賊賊歐之
嘔血數升死莆田舉人劉渭龍建甯舉人謝邦協南平舉人原任
丹徒令鄒儀周皆不受僞職渭龍剪髮匿深山絕粒死邦協舉家
避村落中逆黨以火攻之不出闔門遇害儀周爲耿逆所執不屈
死光澤縣民毛錦生素有膽力賊躪其村邑當事飭爲練總導大
兵剿賊賊設伏誘戰被害於雲際關清流縣生員李亭聞賊薄縣
城隨邑令固守集鄉勇拒戰旋被執罵賊死其前後死於土寇者
又有胡寶任福州千總駐永福康熙五年四月與土寇戰歿張化
蛟任臨元營把總駐新平康熙八年亦以擊土寇陣亡先後議卹
如例錦生亭 詔並入祀昭忠祠

陳啟泰

陳啟泰遼東蓋州衛人也隸鑲紅旗漢軍順治四年由貢生任直隸滑縣知縣九年擢廣東道監察御史疏言滿洲部院各官遇父母喪離任守制以廣孝治部議從之十一年授蘇松糧道聖祖仁皇帝康熙三年調福建漳南道八年轉巡海道十三年三月逆藩耿精忠據福州叛傳僞檄至漳州啟泰與海澄公黃梧密謀拒守會梧疾篤爲賊誘降者接踵精忠復結海賊助逆啟泰度事不可支令其妻劉氏及妾婢幼女二十一人先就縊僚屬畢至啟泰慷慨陳義各慰遣之遂朝服再拜自經死十五年大兵入閩耿精忠降福建巡撫楊熙疏述啟泰誓死守城因四顧無援率妻妾

從容就義忠節萃於一門請 賜贈卹部議贈啟泰光祿寺卿並
廕一子入監 命從優再議於是 贈通政司通政使 賜祭葬
如例妻劉氏 予誥贈並致祭初啟泰之在漳州也其子汝器未
隨任及聞遇害赴漳迎櫬值海賊鄭錦遣其黨入犯劫之去越二
年乘閒脫歸事 聞 上以其父子忠義加贈啟泰工部侍郎授
汝器通政使司右通政二十年正月 上御乾清宮賜宴以汝器
及馬雄鎮子光祿寺卿世濟父皆殉難 特命至御座前 賜之
酒三十三年 予啟泰諡曰忠毅翰林院撰擬碑文入奏 上諭
大學士曰陳啟泰殉難與他人不同視其闔家之人各自盡畢然
後自縊而死甚屬慘傷海賊進城見其家棺櫬如許亦爲垂淚其

子汝器爲海賊掠去逾久乃還觀此碑文詞意尙未詳盡令改撰三十四年福建巡撫卞永譽以士民請建專祠於福州入奏御書忠義流芳以額其祠時汝器洊擢至刑部侍郎尋任安徽巡撫世宗憲皇帝時以啟泰入祀昭忠祠乾隆十七年上念啟泰爲國效忠前此未有世職特予恩騎尉世襲罔替以其孫陳履坦襲

右 國史館本傳

甲寅三月閩變閩分巡巡海道按察司僉事陳公啟泰闔門死之閩莆陽鄉薦士彭鵬爲之傳曰公家遼陽蓋州字與號未詳以丁亥貢士知直隸大名府滑縣事有聲行取擢侍御升八閩分巡閩

海疆也公駐節漳南日以弭盜救甯爲急務逆藩叛時諸郡望風納叛所不甯以城降者公與福甯總兵遼陽吳諱萬福二人耳公自度不能守告其夫人劉氏曰義不偷生忠不附逆死吾事也然身死而妻子爲僂吾何以瞑劉夫人曰忠不附逆義不偷生死君事也亦吾事也同死又何慮是日侍妾婢僕聞公夫人語二十餘人咸願從死乃設巨盆注酒置築劉夫人先飲闔門上下老幼次第飲公視之飲聞一穉子六歲持觴拜而受飲畢公出坐堂上召所屬而告以大義復令隨入署署內二十人絕命矣告以故屬僚莫敢仰視公具朝服北面稽首後與諸僚屬訣僚屬勸止公語之曰吾以遼陽貢士由邑令擢侍御史今分巡八閩受恩食祿舍一

死無以報且吾闔門爭自仰藥甘死如飴吾豈忍後須臾乎公等
自愛無多言諸僚屬出公引弦自絕事 聞逆藩咋舌入閩有志
者無不竄涕公死而福甯吳總兵嬰城固守爲納叛者所弑闔門
皆被殺其後海澄公守漳南不下麾下吳某弑之闔門亦被殺公
燭機先死從容就義忠且智

古愚子彭鵬曰此傳閩亂初平時作也後五年而公以死節 贈
廕又十六年而公以死節與浙江溫處道陳公丹赤同 賜諡公
諡忠毅閩人專祠祀公於丹霞 御書忠節表志四字 賜額於
祠與總督范忠貞先生同日并 賜范先生爲壬辰進士陳真亭
爲辛卯鄉薦士公爲丁亥貢士孰謂科目明經中無人哉

右傳彭鵬撰

吳萬福

吳萬福奉天遼陽人初仕明爲守備崇德七年大軍圍松山萬福隨副將夏承德來歸隸鑲紅旗漢軍順治元年從征流賊李自成敘功授騎都尉世職三遇恩詔加二等輕車都尉十五年加都督僉事充新設之福建福甯總兵康熙元年六月海賊僞總兵王士鼇僞副將李禮泊船沙埕青嶼山萬福遣使招撫士鼇禮悔誤投誠爲僞水師都督阮述陳文達圍阻不得達萬福親督兵夜馳踰嶺殺賊眾千餘援士鼇禮突圍出二年十二月海賊阮春雷以船二十餘竊據東蚶長腰外島窺福甯浙寇張煌言率五十餘船入閩與春雷合適僞鎮林國樑統三十餘船來歸機洩二逆合眾

圍之國樑斬煌言之弟嘉言復以礮碎賊船乞援於萬福萬福以福甯向無舟師議因國樑之船攻賊遣遊擊季應先劉成海等水陸夾剿擒斬數百級奪船械毀東蚶長腰賊巢春雷煌言俱遠遁事聞得旨嘉獎加都督同知三年三月春雷煌言復集百餘艘泊三都青山等嶼萬福約水師總兵李長榮夾剿長榮趨東衝口萬福統國樑船直抵官井洋箭礮齊發斬賊二百餘級焚其船五賊窘退出東衝口長榮師適至復進擊賊北潰遂合兵追至大洋陣斬及溺死者甚眾獲甲冑旗槍無數復窮搜三都青山各澳毀其巢春雷赴泉州降總督李率泰疏請錄敘部議長榮加二級萬福加一級上諭總兵李長榮吳萬福進剿一處賊寇攻戰無

甚懸殊再加覈議尋議各加一級得 旨李長榮加署都督僉事
吳萬福加右都督十三年四月逆藩耿精忠叛萬福嬰城固守城
破死之全家被害十九年 詔褒卹殉難諸臣 贈萬福左都督
太子少保 賜祭葬諡忠愍除所得輕車都尉襲替外復廕子弟
一人守備三十五年福建巡撫卞永譽請建祠於閩春秋致祭得
旨俞允雍正二年入祀昭忠祠會孫瑞麟襲輕車都尉十一年與
都統趙宏濟會飲革職銷去輕車都尉仍畱騎都尉世襲罔替瑞
麟子錕鑑鑑子國澍遞襲國澍今任廣西慶遠副將萬福次會孫
祥麟襲難廕守備

右 國史館本傳

172-768

172-768

劉愈奇

公姓劉氏諱愈奇字會遠山西大同靈邱人也先世多以武功顯
公童時讀書識大義好兵機多智勇年十五從數騎出獵大兵奄
至突驅以去及世祖入討李自成公從入關順治七年以戊子
鄉貢士選河南考城縣知縣兵燹後大河以南荆棘滿目狼麇狐
豕實成窟穴考城遭高許之變凋殘尤甚學宮城垣僅存敗陟日
夕卽聞鬼哭公下車設法開墾蒙茸化爲膏壤民有可耕之田修
學宮以教子弟亦漸聞弦誦聲又延僧道奏梵樂禳祭冤魂鬼哭
始息考境北連曹鄆有榆園賊王四者時入爲患公諭使降王四
謬爲大言曰公欲降我當獨自詣吾營公聞之笑曰顏真卿宣諭

李希烈郭子儀釋甲盟回紇彼何人哉遂單騎抵王四營四見公至大驚謂其下曰公真神人也即歸順公以四見於巡撫巡撫喜甚即以四爲轅門千總時巡撫爲吳公景道嘉公治績過人又念開歸兩府久爲戰場汙萊逃亡終日不見人煙非公總治之不可特奏置開歸興屯同知薦公爲之

按開封府志劉愈奇任開封北河同知

治在太康

考之父老子弟千百爲羣哭告若狂攀轅不可得遂留公子一人於考以作甘棠之愛公在太康循行郊野日出暮歸辛勤倍至三載荒蕪盡闢流民復業當是時大難初平朝議計天下大府號難治者凡三十浙之湖州其一也巡撫亢公以才能卓異薦公遂升湖州府知府至則剔弊鋤蠱風采益厲南潯鎮有土豪陸甲者自

稱善人挾上憲獎語數十紙來謁公公曰焉有善人而自詡者乎
遽命逮繫既而告受甲害者數千人公杖斃之豪右斂跡又疏通
城內碧浪湖以便商旅攝篆杭嘉湖分守兵備道諭降太湖賊張
三等又拔孤寒孫在豐於童穉中延至署飲食教誨卒成進士官
至內閣學士又翦滅惑眾道士以息譏言上官疏公異政以聞
世祖賜袍寵異焉既與糧道議折漕不合各鑄二級康熙五年左
遷江西饒州同知初公之至湖也有東阡沈氏饒於貲爲警誣通
海寇獄成公平反之沈冤得雪以酒米各十器餉公啟之皆黃白
物公讓其僕而還之沈謁謝曰昔楊震卻暮夜金懷中物耳公視
十萬若土芥豈不廉過古人乎及在饒鄱陽多盜嘯聚盤踞於大

連山中其渠魁則王跳鬼也公至才半載盜發七十餘案公曰此賊穴巖蕩波非昔王四可比必覆巢而害可除因練鄉士丁壯數百人親冒矢石擣其巢穴遂殺賊前鋒楊大旗生擒范質何明徐六公子等獨跳鬼逸去卒獲之湖灘中數十年積蠶一朝殄除督撫疏勦賊功調四川保甯府知府行裝已戒途忽報巨盜十八人白晝劫寨戶戶皆巨室公聞警單騎挾弓矢與素所善俠僧明健先往家丁官捕繼至遂生擒賊眾十八人無一脫者盜既捕之官保甯保甯南郭卽嘉陵江每歲山水暴溢壞民居公修壩禦之民始不病公在郡三年政尙寬平囹圄空虚飼鹿其中庭有雙鶴時翔舞園中山水佳麗暇則與幕義侯譚洪并二三僚友登臨徇

猗焉譚洪故明山賊降 本朝封募義侯時駐節郡治康熙十二年冬吳三桂反僞總兵王屏藩至川中公聞之卽約譚洪爲守城拒賊計曰吾輩受 國厚恩民社是託公又封侯爵爲 天子重臣不可不與此城共存亡也是時譚洪已陰降賊受晉國印綬聞公言陽諾而已賊將至密誘公降公不肯洪見公異已遂謀害公明年正月給延公公至卽執之公罵洪曰 大清侯不榮於叛賊乎何故從逆也洪曰事已至此勿多言遂遣人圍府署盡繫公家人於天竺堂勒兵守之次日以公至成都見於王屏藩藩謂公曰全川文武望風歸款何物太守敢抗我師公厲聲叱曰我受 國恩三十餘年已拼一死豈肯從爾逆賊罵不絕聲屏藩怒命斬之

會三桂從子吳應遴至曰吾甫興師而殺一好官失民望不可屏藩縱縛使人監羈公重誘之使降公絕飲食誓必死又二日巡撫羅森私過公曰我已約十二家兵俟賊攻秦隴從中制之彼首尾不相應全川可復也願少緩須臾死以求事濟公聞森言躑之復起飲食及屏藩兵向漢中公與十二家歃血定盟約四月望日起兵取成都直走川北燒南棧絕賊糧道謀已定會事泄僞通判束貞以告僞總兵郭壯圖梁凝謨遂收十二家公聞變仰天呼曰大事去矣卽飲藥嘔血卒時康熙十三年也十二家者撫標中軍副將畢成英撫右標副將王邦有提標前營副將段登仕威甯營參將葛立程城守副將楊嘉修錢法道曹禮先漢州知州董定國成

都知府錢受祺蘆山知縣張啟鼎城守守備徐士偉灌縣知縣范
儀森之次子羅四筵也森以黃金四萬兩賄屏藩得皆不死吳逆
平森至刑部陳其事逮東貞訊之果然夫公以孤童流離塞外幾
死者再卒能攀龍附鳳乘時利見一爲邑宰兩任同知再知大郡
豐功偉績在在可稽及見危授命髮指眦裂義憤河山氣吞逆孽
所謂睢陽齒常山舌又何多讓焉謹據公行狀次其顛末以供他
年太史之採前甲寅其子清甯清炎與孫相等扶公櫬發自川中
乙卯抵考葬於邑南王家橋北公子五長清珏武鄉科次清琬清
玫皆廩監次清甯清炎需次未仕卒皆葬於考清玫仕江南鳳陽
府盱眙縣縣丞有詩名著清嘯軒集鄧孝威選入詩觀

右記梁實撰

李成功 張善繼等

李成功奉天人順治六年武進士任廣東潮鎮中軍參將管遊擊事康熙十三年潮鎮總兵劉進忠叛附耿逆成功與遊擊張善繼等密謀討之事泄成功與善繼俱遇害同死者都司白虎及子崇質千總何亮把總羅華黃良旋執潮州知府魏槐祥幽之別室槐祥日拍案憤罵血流十指不食死千總鄧材遣子全勝馳赴署潮鎮總兵王國棟軍前請兵進忠覺縛材殺之時駐防潮州佐領于國廷巷戰射進忠中臂賊攢刺之陣歿賊圍饒平守備劉象亨隨大軍赴援次西山率三百人直攻賊營賊驚遁象亨追勦賊數千從閒道衝出象亨鏖戰陣亡順德鎮標守備周士英亦統兵堵截

戰歿於黃岡鎮時有隰州都司李其昌嘉應人因病回籍賊黨劉
永橋等脅之降其昌怒罵不屈賊殺其家屬十人縛其昌掘坎埋
之方進忠之亂潮也羣賊應之起山賊三百餘突入高明圍壩泔
督標副將黃相往剿戰死又海寇陸老初等結黨千餘沿海肆劫
千總張義把總劉忠往禦抵龍山奪賊艘百餘尋中礮俱陣歿
詔贈成功副將廕守備善繼虎俱 贈參將士英 贈都司僉書
相 贈都督僉事餘廕卹如例善繼江南徐州人康熙六年武進
士虎陝西秦州人亮良俱廣東嘉應人華廣東順德人樾祥直隸
柏鄉拔貢生材廣東海陽人子全勝後於康熙十四年捕海賊陣
亡國璉正白旗漢軍象寧廣東鎮平人士英陝西榆林人相福建

龍溪人義忠俱廣東人

右 國史館本傳

李成功 張善繼 白虎 何亮

李成功奉天鐵嶺人登順治己丑武闈歷官潮陽游擊調潮州鎮中軍以參將管左營事訓練有法能得士心康熙十三年總兵劉進忠叛成功仰天呼曰天步方艱臣心不改儻可誅賊九死何辭因潛與城守游擊張善繼續順公標防禦于國璉謀戮進忠進忠覺執之誘以同叛不可劫以兵刃弗懼進忠偪之成功曰頭可斷志不可奪進忠曰汝爲中軍我以猶子待之何無義至此成功曰祿山叛國死於豬兒朱泚叛國死於韓旻汝叛國賊臣不知死之

將至我何爲從汝反哉進忠令斬之罵不絕口而死時甲寅夏孟
二十有一日也事 聞贈驃騎將軍 賜祭葬廕一子李奕桂守
備

張善繼直隸彭城衛人幼習儒博覽羣書長爲孫吳學登康熙丁
未武科鼎甲第二人己酉授潮州城守營游擊甲寅吳耿盜兵善
繼赴省請餉爲出師備潮帥劉進忠陰遣腹弁楊希震赴閩獻款
耿逆授僞甯粵將軍印剪辮歸與進忠謀曰張善繼剛方固執深
得眾心宜亟散其卒進忠然之遂以所部眾分隸王承業李雲陳
璉約束焉迨善繼歸而麾下已虛無人矣謁進忠曰公不聞晉王
敦乎武昌犯順直抵江甯威勢未嘗不赫也兵敗身死發瘞斬屍

自古未有叛國而克令終者若至崩騰蒼莽震懾旄麾之下繫頸
求活晚矣進忠怒羈之馬王廟有明經林應璧者亦被羈善繼與
談古忠孝事相得甚歡並披覽史書不輟若不知刀俎之及也進
忠屢遣人諭降終不屈令斬之善繼臨刑歎曰生未統師誅叛逆
死爲厲鬼復深讐遂遇害事 聞 贈參將 賜祭葬廕子張大
陞守備

白虎陝西秦州人久典戎行著勞績康熙十一年授澄海協右營
都司簡閱戰艦製火攻諸具纖悉畢備文武同事者歎爲奇才遐
邇咸稱虎將云劉進忠將叛調虎與其子崇質入郡虎臨行謂妻
張氏曰慎黔閩楚相繼盜兵吾父子當立功以報 國汝善撫幼

孫無以我爲念蓋未知進忠有反謀也及至而進忠待虎加篤左右防範甚嚴越日乃知其事歎曰我以出師征討星月馳來豈虞變生意外悠悠蒼天彼何人哉因濟焉淚下進忠傳虎見令易帽虎曰頭可斷帽不可易令翦辮虎曰頸可截辮不可翦隨責進忠曰付託全潮任重榮極不圖報 國嘗爲叛首恐皇天弗宥也一旦師敗勢窮竄身茅簷亦不可得悔何及矣左右以虎搖惑軍心請斬之進忠愛其勇不忍刑曰此愚人不識時務耳復拘虎妻張氏孫士俊爲質虎與同志者密遣人赴省請兵恢復約爲內應謀洩將就刃謂崇質曰食君之祿死吾分也委身存祀惟在汝崇質曰父爲忠臣子從叛賊烏乎可苟就義以全貞豈不因忠而成孝

孟秋朔日縛至西市虎望北叩首曰君臣大義盡於此刻父子至情亦盡於此刻生不能提三尺手刃逆賊上報國恩臣虎有餘辜矣百姓觀者爲飲泣張氏士俊窮無歸貧無爨襤褸衣衫行乞於市事聞贈秩卹典如禮廕其孫白士俊守備

何亮潮州程鄉人澄海協右營千總也少充健兒每薄伐虜闕身先諸校戰功甚偉得授千夫長善馭兵量機決策頗洞中都閩白虎以腹心待之資籌畫焉劉進忠將叛檄全潮將士赴郡城亮隨虎至進忠以僞甯粵將軍印行事亮曰以逆犯順者亡進忠忘

國厚恩敢爲叛逆亡在旦夕耳誓誅此賊方快我心或告之曰任天下事易死天下事難如其敗天下之事死不足以塞責如其成

天下之事生亦可以有為亮曰否君猶父也子為父死無所怨人
固有志不可強耳虎遣亮訂李成功于國璉張善繼密請援師恢
復謀洩進忠縛亮叱之曰汝何敢作亂害我耶亮曰背義賊臣人
人欲誅豈獨亮哉我一片精誠上訴天帝當於冥曹待汝對質遂
遇害亮之兄弟妻子被殺者九人觀者多歎息泣下事 聞奉
旨賜卹廕其子何閣龍干總

論曰劉進忠之逆也同城將士為賊犬馬者多矣慷慨激烈取義

成仁獨李成功張善繼白虎何亮與防禦于國璉耳

于國璉奉天
人為續順公

沈瑞旗員進忠作亂瑞命璉偕都統宋文科鄧光明攻進忠戰於
太平街磨關三日璉身先士卒射傷進忠左臂賊披靡眾寡不敵
終為所敗瑞縛光明璉以降璉不屈繫之幽室論舊志為國璉立
降終不聽乃斬於市尸僞立不仆數日面不改容

傳而李張白何皆闕焉余竊歎進忠叛逆呼吸死生威勢赫赫而成功面斥爲祿山朱泚善繼比之王敦所以挫亂賊之鋒禡奸人之魄非淺尠也白虎曰頭可斷帽不可易頸可截辮不可剪虎子崇質曰苟就義以全貞豈不因忠而成孝之數語者可以垂千秋登金石矣何亮未弁一則曰國恩再則曰君父罵賊至死舉家殉之使天下守土之官人人倣此四君子雖有亂賊其誰與爲亂哉擎天柱礎端賴斯人余故表而出之

右傳藍鼎元撰

劉欽鄰 武佐鼎等

劉欽鄰江南儀真人順治十八年進士康熙八年授廣西富川知縣十三年廣西將軍孫延齡叛應逆藩吳三桂三月遣僞將李秀發陷平樂府旋圍富川欽鄰募鄉勇二百餘嬰城守與賊相拒五十餘日同城把總楊虎受延齡僞劄句土賊千餘助攻虎夜引賊入欽鄰率家丁力戰殺賊三十餘家丁死者七欽鄰被執賊加以毒刑罵不絕口縛送桂林延齡誘降不屈羈之欽鄰賦絕命辭死詔從優議卹部臣以贈布政司參議請 特命贈太僕寺少卿廕一子入監四十二年追諡忠節賊旋犯平南知縣周岱生典史武佐鼎迎戰於大峽口斬賊歐倫等數十人又斬吳飛龍於武林峽

李永昌 子名芳

今上十三年甲寅逆賊吳三桂叛滇中東南騷動 皇帝震怒命親王大將軍出視師下 詔暴逆狀申勵將士是時狂飈風煽江右界在兩湖閩粵間三面鄰賊若吉若袁若撫若盱所在姦宄糾聯結聚剽掠郡邑而李將軍以把總領兵守南豐與其第三子名芳力戰死賊事 聞贈卹封廕祭葬諸典於常例有加以爲天下將士勸 特恩也將軍姓李氏名永昌號鳳山祖籍奉新之南鄉人曾祖客游中州因家焉戊子將軍以從譚固山收江西起行閒積功至把總後復領兵防汎奉新遂歸籍甲寅檄守南豐五月閩賊犯城將軍鼓勵士卒同長子世芳三子名芳奮勇出戰自初八

至十四轉戰七晝夜斬賊四百餘級乘勝追逐至沙洲近賊巢將軍所將百餘人酣戰分擊所向披靡賊眾數千從林谷中猝出撞搗衝擊我軍不得合名芳以馬陷汙田中爲賊所害將軍戰益力絃絕矢盡猶手刃數十人乃顧謂其下曰事無可爲者吾惟以死報國耳遂遇害世芳將數騎從閒道突圍出尋父弟不得而將軍戰馬忽從賊中歸哀鳴躑躅若有所訴而後知將軍殉焉噫異矣後三日購屍以斂猶握刀甚固英氣凜然見者咸哀之嗚呼自甲寅變起其閒屈身附賊隨風委靡者不無其人將軍以一把總奮身擊賊斬馘過當及力竭父子同殉爲天下忠義倡非忠孝性成烏能如此嗚呼烈哉甲寅夏六月總督大司馬董公疏其事上聞

其略曰觀其項既斷而握刀將爲厲鬼以殺賊嚴將軍之頭於今
再見顏常山之舌亙古少聞云奉 旨贈永昌爲參將 予祭葬
卹金二百兩蔭子弟一人以守備用名芳 贈都司僉書 予祭
葬卹金一百五十兩蔭子弟一人以守備用蓋 特恩皆出自
上裁異數也將軍生平重義氣喜俠烈每戰必先登陷陣勇略冠
軍身長五尺面如鐵色鬚眉戟張人不敢犯而接士大夫以禮御
下有恩故人樂爲之盡力蓋有古烈士風焉長子世芳以己酉武
舉官守備從大司馬進勦雲南累功加左都督 誥封三代將軍
追 贈光祿大夫繼芳難蔭守備

論曰余與將軍諸子交最厚每爲余言將軍爲人忠信嚴毅雖小

事無苟者居恆課督諸子甚嚴勉以忠孝大義侃侃皆至性語令聞者聳然卒之臣死忠子死孝卓卓如是萬古綱常大節於一家備之豈偶然哉余故詮次其大略以傳嗚呼若將軍者豈但追從古名將抑亦維持名教蓋大賢之徒也嗚呼烈哉

右傳帥我撰

劉超鳳

劉公諱超鳳字元修號丹侯商邱人 贈榮祿公澄璽次子也生而長身偉貌稍長伉爽有大志每讀史至班定遠馬伏波諸公輒流連稱羨不能已與兄孝廉超凡弟廩生超萃共學一堂互相師友既以文見知爲諸生嘗慨然歎曰人生世上苟得仗劍秉鉞封侯萬里外方稱快意沾沾章句非吾志也於是橫經之餘兼學騎射通解秦漢以來用兵方略由順治丁酉武舉登辛丑進士公內行潔遇人不設城府尤樂善好施人以急難告輒傾貲振贍無吝情亦無德色康熙辛亥授福建詔安營守備既赴任蒐討卒乘勤訓練嚴步伐營伍肅然總兵官劉某深敬憚之甲寅耿逆倡亂全

閩煽動本營邵遊擊陰與賊通度公忠壯不順已百計說誘公正色曰少敦儒業忠孝大義聞之熟矣今日者勢能爲何敢死不能爲何容偷生臨難苟免非夫也上何以謝 朝廷下何以見先人於地下嶽嶽壯論力勸以死難不可奪之節詞氣激昂邵氣沮然逆謀已定終莫能移公察見其情歸語于官統曰事去矣止有一死官統進言曰閩省雖陷全廣猶存與其徒死何如借兵恢復但得潮帥許諾逆賊不足平也公奇其議遂爲蠟丸書使官統赴粵乞師邵廉知其事遣輕騎二十餘人追執之並縛公械送漳浦營劉總兵麾下劉素重公親釋其縛而謂之曰國事至此無可爲者兄雖忠義徒死何益不如僞順俟有機會圖報未爲晚也公厲聲

叱曰吾官不過守備猶義不負 國公總元戎何竟出此言邵遊
擊不知大義公發身鼎甲手握兵符縱不念 國恩獨不顧身名
乎劉帥唯唯亦竟無所動公知逆謀已合仗劍望闕叩首疾呼曰
君等悉從賊吾無能爲矣遂自刎越二年賊平官統拔身北歸以
功受知 聖祖爲山東總兵官 陸對日泣涕訴公死事 上嘉
其忠 覃恩贈榮祿大夫崇祀鄉賢

論曰人臣策名登朝何至甘心從逆所可患者身在人掌握間隱
忍以圖自全曰吾將以規後效也夫使後效果收而節行旣虧難
爲贖矣如劉公者力不能殺賊則斷頸絕脰辦一死以謝君父嗟
乎豈不毅然大丈夫也哉予從公宗人遊頗悉公授命本末爲撮

其要著於篇庶幾來者有所覽而感焉

右傳郭善鄰撰

國朝耆獻類徵初編卷三百三十九目錄

忠義九

陳丹赤 馬界等

王臨元 王應魁等

周岱生 子儒

臧世龍 陳豹等

成國樞 王攀桂等

李其昌

邁蘭 多博等

覺羅薩克素 森特赫等

楊春芳 魏萬侯等

薩哈連 岡爾渾等

魯仁圻 子世泰

祝昌 許文耀等

索諾穆 阿岱等

艾音查 瑚什等

業陳 吉那布等

安珠琥 布思塔等

國朝耆獻類徵初編卷三百三十九目錄

國朝不刊家範卷之三十三

--	--	--	--	--	--	--	--	--	--

國朝耆獻類徵初編卷三百三十九

通奉大夫前署江西巡撫江西布政使司布政使湘陰李桓輯

忠義九

陳丹赤

馬珥等

陳丹赤福建侯官人順治十七年由舉人選授四川重慶府推官康熙元年卓異授刑部主事三年丁母憂七年服闋補原官遷員外郎十年遷兵部郎中十二年授浙江溫處道尋署按察使十三年四月入覲至東昌聞逆藩耿精忠叛丹赤以溫州與閩接壤爲浙東門戶乃舍舟兼程赴溫州守禦時賊圍瑞安丹赤發兵援之五月二十八日賊犯溫州急攻南門丹赤督兵登陴以礮矢殺

賊無算會總兵祖宏勳陰通賊六月初一日集在城文武官至大觀亭會議開門迎賊丹赤慷慨責以大義誓死不貳宏勳執丹赤手好語慰曰公閩人也獨不念骨肉墳墓乎丹赤神色愈峻麾宏勳手曰吾知以死殉不知其他宏勳目干總高魁持斧擁丹赤出丹赤罵曰逆賊汝殺我 朝廷必寸磔汝魁以斧斷丹赤右臂遂遇害十五年左都御史陳鼓永疏請 賜卹 敕該督撫查奏十六年浙江巡撫陳秉直疏言溫郡當圍寇圍困時在城文武不思固守倡賊迎賊惟丹赤堅志不從慘遭斧鎖請優卹以慰忠魂 詔下部議尋議照例贈光祿寺少卿奉 旨陳丹赤殉難盡節殊爲可憫著從優議敘部議贈光祿寺卿奉 旨所議尙輕著再議

具奏於是議贈通政使司通政使廕一子入監讀書 賜祭葬
允之三十二年 賜諡忠毅三十五年 敕建雙忠祠於温州祀
丹赤及同時殉難之永嘉縣知縣馬瑛三十八年 上南巡駐蹕
杭州丹赤子一夔時爲湖州府知府迎 駕 賜御書名垂青史
額 諭曰爾父爲國殉難朕至今憫之賜此特表爾父之忠

右 國史館本傳

誥贈通議大夫通政使陳公丹赤字獻之別號眞亭一號津城
本朝辛卯科八閩鄉薦士也先李蜀之渝州以卓異薦授比部廣
東司主政遷陝西司員外郎再遷駕部尙書郎以賢能 簡命分
巡溫處駐節東甌甲寅逆藩踞閩溫守帥納叛公以奉政大夫分

巡浙江溫處地方按察司僉事死之 天子嘉公死節以故得贈
公閩侯官籍閩藩變亂脅從依附者不勝指震鄰及浙公以署浙
臬代 覲三月聞變裂眦髮上指曰東甌爲浙東門戶吾封疆吏
也吾不捍封疆誰爲捍者兼程趣行行至維揚聞溫處動搖海上
多盜卽乘舴艋三晝夜至嘉禾夜駕一葉逆飛抵武林謁撫軍亟
白馳去四月入東甌東甌將帥以僉事閩人也歸必同心甚喜比
見練鄉壯修城櫓備糗糧又甚忌或語公家在閩保無他慮公曰
封疆之臣守死封疆吾義與此城存亡他何恤也當是時平陽叛
弁司定猷以城降寇攻瑞安急公遣吏密告兩臺謂平陽叛矣東
甌領兵援瑞安者殊無鬪志同城將帥之心舉不可問大師不速

救丹赤報 國惟死耳五月二十七日援瑞安副將某撤兵歸人
情洵洵公獨居城上以忠義激勸父老子弟皆垂涕願爲賈勇六
月朔鎮帥陳兵溫城大觀亭露刃交戟請公計事巡捕守備姚某
跪勸勿往公從容攬轡慷慨勞軍軍中有言降者佯弗聞勉以大
義副將某厲聲兵乏餉匱誰戰誰守不降何待公正色而語曰提
軍渡江前鋒已集見合城守援勦可五六千人民樂爲用何云無
兵糧餉給至六月今遠近鄉民粟米盡輓入城何患無餉爭辯甚
力專閫知不可奪目語左右左右斧公臂臂裂呼 君父聲徹九
天臣丹赤事畢矣永嘉宰馬玘躍而起曰 國家豢養若輩一旦
弑封疆大吏開門迎賊吾恥與若俱生罵不絕口同被殺暴屍三

日國人斂之永嘉秦人也亂時道阻國人先設櫃購公歸閩公分
巡未數月國人感公以公死封疆故也初文學公期燿生二子長
曰丹蓋字口之次卽公同舉辛卯公年甚少戊戌闈瀆出太史秦
克繩房獲而復乙始就銓銓試第一授司李李蜀時蜀地初開川
東尙爲十三家竊踞三省會勦以李官署重夔二郡衆招順除逆
爲比部時議事以制多平反爲天津樞關時僅如歲額無羨爲比
部駕部郎署時屬以銓政纂修品級考以軍政纂修中樞政要推
舉賢能皆特選以此聲名夙著公之殉於難也內外聞者無不嘆
絕殉難二十一年後甲戌閏五月 天子追念忠烈同日與故巡
海道陳公啟泰特加 賜諡今稱忠毅公易名 君恩也公有子

四人一夔一呂一文一宣皆能讀祖父書一夔以難蔭今至二千石世稱八閩陳忠臣後

右傳彭鵬撰

陳忠毅公名丹赤字獻之閩之侯官人也登順治辛卯賢書起家重慶府推官時蜀初平迤東猶爲十三家所據三省合兵勦之凡饋餉與籌策皆出自公以才名著擢刑部主事丁艱歸服闋補本部推天津關陟兵部車駕司郎中公在郎署閒博學多通性和藹近人喜談諧及至論古今忠孝節義事輒慷慨激烈義形於色癸丑授浙江按察使僉事分巡溫處道甫莅任徧察形勢喟然歎曰甌巖疆也奈何單弱至此以兵巡名官而曾無兵民瀆於海而禁

其海之利猝有故何恃而無恐時以 覲入都欲繕疏上告會漢
亂聞 命地方官亟歸治所不得上甲寅四月道中又聞閩亂公
曰東甌爲全越門戶閩亂甌決不保急舍舟從陸戴星疾走自東
昌抵淮涉江歷吳越渡錢塘趨婺州下青田江約四千餘里二旬
卽至甌使公少有顧慮心知甌不可保而家室在甌宗族在閩俱
落虎口中徘徊觀望審事變若何則身居局外或可冀免於萬一
而公不顧也顛蹙以赴甌事已大壞不可支矣逆弁司定猷倡亂
於平陽侵瑞安又有海賊朱飛熊出沒山海以助賊逆將楊春芳
擁兵不救且導賊帥曾養性統兵直逼甌郡小南門而坐中權握
重兵者則逆帥祖宏勳也早與賊通思舉城以應公知之急飛檄

請援師指血淋漓羽書朱殷前後駱驛不絕至遠近居民爭避入城叛帥不許公開門納之聽其輸輓城中已有儲糧民所乘之舟皆繫之上流以待援師之至遣家丁羅世安潛至閩覘賊虛實部署既定入署沐浴望闕謝恩與家人訣曰吾與城存亡不爾顧矣公子欲從麾去以爲徒亂人意也卽登小南門固守身當賊鋒出示諭民以大兵且至爾等無恐有我在能發一矢射賊者賞之并計首論功焉公意以爲賊狂騃無能爲吾三衛有督師李公扼其吭我居東甌拊其背閩不難定也閩定而江右可保無虞東粵聞風亦懼不敢動則滇犛之羽翼亦翦矣蓋實有落落大志而非僅以一死立名也忼慨登陴略無怯容公儒生素不習兵乃智謀

方略雖元戎宿將不能及宏勳心甚公愈甚則欲死公益促屢檄取守備之具俱不應其所操矢石以應賊者則臨時募卒而已分堞守望者父老子婦而已扞擗擊柝者寥寥數家丁而已探敵哨軍者一衛員而已城下賊兵烽火燭天鼓聲振地公手發飛礮中其中堅賊爲之退聞援兵且至公大喜以爲賊滅在旦晚也宏勳密使遊擊馬文始誘公公罵絕之六月朔宏勳大陳兵仗集合郡文武大小羣吏於城東華蓋山之大觀亭邀公計事左右有阻公者公叱之至則全軍露刃環立以待宏勳曰彼眾我寡將若何公曰城內兵合有半萬且民心效死戰卽不足守且有餘瑞安兵氣尙銳可相犄角賊腹背受敵勢自瓦解提督親統大兵已至對江

吾此來與諸君商濟師船艘耳顧乃計多寡耶宏勳曰船安在公
立語郡倅白鼈宸曰吾覘城下有船泊河干者乃鄉民所棄爲數
不少爾急駕戰艦於下流截寇兵用民船於上流濟師何患無船
春芳曰無糧何以戰公曰今營餉已給至六月終鄉民蓄積水陸
輸入城者亦眾君何得以此言解軍士心耶且耿逆負固一隅衝
有重兵以制之雖跳梁兩月卒不敢踰杉關一步地夫何能爲吾
十載京華今春入 覲恭見 天子仁聖威武將帥效命逆不旋
踵且繫頸 闕廷諸君何無見及此其時開陳利害言詞激昂亭
之外環立露刃者亦皆俛首聳聽寂無敢譁突有出帛書示公者
公起裂其帛曰此物安得至我前哉蓋帛乃諭降書也宏勳作好

語給公曰公墳墓骨肉盡在閩卽不爲東甌全城生靈計甯不爲宗族計公曰爾亦知有宗族乎爾無爲我計且自爲計爾家夙有從龍之勳世受國恩高官厚爵冠蓋滿輦下爾一叛卽九族赤矣爾不自爲計乃爲吾計乎吾惟有一死而已我躬不閱遑恤我後宏勳聞其言以身背公目左右曰取飯喫實隱語也千總高魁卽持鋼斧擁公出白倅以身翼之刃加其額幾不免公指弘勳曰叛賊汝第殺我朝廷必寸磔汝復叱魁曰殺卽殺耳鼠輩乃以刃加我耶欲拔佩刀自決魁已揮刃傷公臂力不能拔兵刃交下竟遇害於華蓋山大觀亭下矣時永嘉令馬瑋大呼曰擅殺道臣如此竟反耶亦被害有前驅卒林義者聞變持槊從山下奮呼

馳上連殺數卒幾及魁亦爲逆兵所殺勳遂以城獻於逆公之配
曾淑人欲身殉顧視諸孤曰陳氏一綫尙存我忍使若敖爲不祀
之鬼乎遂截髮剪面悉散家財啖賊得免宏勳簿錄公之家口老
釋數十人驅赴闕公有少妾二人賊所欲得二人挾匕首相向凜
不可犯遂放之歸公暴屍於亭者三日其爲具棺舉火與茅藉之
者水師弁游仁甫山側資福寺僧也其持束帛詣死所哀慟且告
公子以六月一日事而述其語者郡倅白鼈宸也其提攜孤寡聞
闕困苦以還闕而卒不冑一屈者公之兄弟雲巖與廣之也督師
李之芳上其事 天子爲之震悼下所司議卹從優典 贈通政
司通政使 賜祭葬廕一子入監讀書諡曰忠毅建雙忠祠并祀

永嘉令馬琬之從公於死者又建特祠於華蓋山之岡爲公死所
命有司春秋致祭焉二十八年 皇上南巡其子湖州太守一夔
於道左叩頭謝 恩 上曰爾父盡忠報國朕見爾來益思爾父
親書扁額曰名垂青史 天語慇懃 奎章煥曜瞻仰者數萬人
咸曰 聖天子之激揚孤忠有若此嗚呼公不死矣

舊史氏曰予讀唐書至張中丞巡傳而歎公今日之事有相符也
公守東甌與巡守睢陽一也公有永嘉令同死卽巡之有許遠也
公有卒林義與白倅卽巡之雷萬春南霽雲也若夫巡之守睢陽
以保江淮公之守東甌以保全越此其丹心苦志先後同揆眞炳
耀於千古而不可磨滅者浙與閩比閩亂而浙人心所恃者以衛

有定武李公甌有公今李奏成績而公則身與城俱亡說者欲以
成敗論之此真不知時勢義理之爲言者也文臣例不統兵其所
以縮瑟巽輒者固無足怪公以一死壯天下文臣之氣凡爲守土
者聞公之風皆感慨激昂思以身殉國故吾浙之東西諸郡縣堅
壁不可動者實公之一死有以先之也巡欲爲厲鬼以殺賊聞公
死後高魁與馬文始畫仆見公椎擊之驚呼以死然則公之忠魂
義魄方盤結不可散安知公不排閭闔叩天帝敕五丁挾靈旗威
矢吳戈越犀暗擊賊於冥漠之中也哉公子爲湖州太守治郡有
廉能聲凡全省之大獄讞皆就決焉近復建公祠於西湖之濱與
范忠宣公祠並峙穹碑屬最前後相望過之者爲流連憑弔而不

國朝詩集卷之八

能去云

右傳徐倬撰

王臨元 王應魁等

王臨元山東聊城人順治六年進士任江西浮梁知縣康熙十三年七月饒州參將程鳳叛附耿逆陷浮梁奪臨元印齋降不屈自縊死賊犯南豐把總李永昌率子名芳出戰斬四百餘人追至沙洲賊數千突至永昌矢盡手刃數十人乃自刎名芳亦奮擊墜馬死賊黨萬餘復圍城知縣王應魁莅任甫四月禦賊陣亡家丁王祿等十一人同戰沒時上饒縣丞陳貞甯南豐協守城陷被執不降被縊死崖石寨土賊同時叛興國縣典史錢志泗偕其弟領鄉勇往勦弟被殺志泗進搆賊巢追至鯉婆寨下歿於陣甯州陷州同李成芳手刃數賊中槍死賊攻新昌典史諸士英被執不屈死

十四年廣昌陷安親王岳樂令白水司巡檢舒學文招撫被戕賊
寇安仁生員彭允升率鄉勇戰被執賊令招降邑人不從支解之
先後事 聞 詔贈臨元按察司僉事廕一子入監永昌江西奉
新人 贈參將子名芳 贈都司僉書各廕一子以守備用應魁
鑲藍旗漢軍貞浙江鄞縣人並 贈按察司僉事志泗浙江山陰
人 贈經歷成芳四川巴縣人 贈布政司參議學文浙江蘭谿
人 贈經歷俱廕一子入監士英浙江會稽人 贈主簿餘卹如
例

三 國史館本傳

周岱生 子篤

公諱岱生字青嶽一字兩山江西九江府德化縣人順治十一年拔貢康熙二年除知貴州平越府餘慶縣四年丁內艱七年補廣西潯州府平南知縣十三年會吳逆叛寇盜熾起有羅智吳懷玉黨緱成德爲亂夏六月破梧州府攻平南君倉卒練武生義勇鄉兵狼兵出討賊距城七十里曰大峽口與賊鏖戰三日陣斬渠魁歐倫賊稍退秋七月引眾來距城五十里曰武令峽口君擐甲躍馬陣斬賊吳飛千總吳飛龍而賊攻益急矢且盡義勇甘沛如黃琬謝可能馮登相黃洪統唐自勝賴勝盧耀經覃健標盧帝善何龍胡八李滿林貴周福劉兒賴鬍子余盛陳等三十餘人戰死君

退保城二十一日賊圍城援絕自寅戰至午城陷賊繫君往潯州
脅君降君罵賊不絕口二十五日經桂平和墟社妻楊氏自剄死
斂於路不及瘞有董經歷英瘞之墟場側八月初二日賊誘君降
君罵賊何不速殺我遂遇害長子儒且哭且罵賊慘戮死有楚人
吳建明殮君以棺瘞於潯州府城外西關上結塘官橋南儒藁葬
當是時君仲子儻在楚久之間變走廣西遇蒼頭周甲具知戰守
殉難月日尋父母兄瘞所詣巡撫都御史傅忠毅公軍門言狀檄
察周令被難家口俾完聚具疏且報 聞亡何忠毅亦殉難死二
十年夏五月儻具告潯州孟知府府上其事七月巡撫都御史郝
公面詢儻惻然傷之特章請卹十月儻收三骸殮以歸比行平南

人路祭巷哭紳士誄庶人扶柩走且祀君於廟儻歸里會 聖恩
追錄死難者吏部議得廣撫疏稱原任平南縣知縣周岱生闔家
殉難應照例贈按察司僉事蔭一子入監讀書禮部議給全葬價
行江西布政使給致祭銀兩 遣官讀文致祭 制曰可於是儻
入監讀書期滿監咨吏部聽除以知縣用二十三年春三月奉
詔命褒錄嗚呼君於是乎不朽矣君慷慨明豁勇而善斷其爲治
以興利除害立紀綱正風俗爲先務令察視鄉村戶口例遣衙官
君至餘慶則單騎行部里民不費一錢而民數具悉餘慶荒徼俗
信左道有妖僧以符咒禱祠惑眾一村民延至其家久之與其婦
通焉村民夜半自外歸偕方擁婦共臥驚起婦蒼黃披緇僧衷婦

相械至君所君庭訊案已具詰其人曰有婦如此盍鬻諸尙可再娶村民叩首曰不願也君壯其言出橐金賞之而姦僧姦婦立斃杖下是時君已丁內艱護理縣印僧黨誣訴於府君星夜馳報守廉其實檄縣捕僧黨杖之驅出境云其治平南也下令禁婦人之燒香寺觀者罪坐其夫已而有犯者逮其夫治之民匿其少壯而以羸老來冀倖免君曰稍姑息令不行矣竟扑之自是境內肅然道無游女縣署有樹大數十圍父老相傳數百年物常有怪若婦女然家僮扳而上若有拉其腰脅者言訖墜而死君怒大書張樹上詰朝某刻且伐樹家人惶怖樹若爲祟且有害君弗聽竟伐之而怪亦息先是縣民何某亡賴盜牛以爲生族眾惡之沈於河其

子勝雲尙幼也及壯不治產業其母誡之曰而知而父之所以死乎勝雲愕然母告之故遂誓爲父報仇夜入首謀者之家所其首而出尋擁火炬繞屋行大呼曰盜至我來救耳族人何之乾者素與勝雲有隙勝雲且詣縣以盜報且曰此必之乾所招君疑之遺捕役廉訪各村無所得及庭訊之乾竟弗服君乃齋戒牒城隍宿廟一夕夢呂仙投之以詩覆訊呼左右鄰人問曰若知勝雲之父爲何如人當年得死所乎眾叩頭曰盜情卽此可得矣呼勝雲上詰曰汝誠壯士爲汝父報仇有諸勝雲色變君念曰得之矣復至城隍所焚香拜禱而械兩造訊之勝雲色變君曰盜情已露勝雲叩首具服遂定案勝雲抵罪而之乾得釋平南人遠近傳誦以爲

神有老賊陳四者盤踞大同山垂三十年勦捕不可得君出奇計
招之復至其巢曉譬利害曰王師且至吾生汝賊感泣誓終其身
無反君曰盍隨我至縣城乎賊敬諾於是至縣署賜之食厚爲之
裝而遣之其後吳逆之變他縣賊皆響應唯陳四不受僞職云君
治平南一如治餘慶而平南市荒民少君捐俸招集始至城內草
屋數間九年商民大集平南俗窳麀居不產蔬菜君教以播種灌
溉之方而畦畝鱗次相屬田老荒弗闢君招撫粵東流民後先可
千餘家三年報墾事 聞紀錄至於再君嘗言起家儒術幸得專
城百里無以報 國恩惟勉爲廉能吏以免鰥曠其素所樹立
如此變起倉卒而以身殉蓋義不反顧矣按狀周世籍九江始祖

萬益娶郝生福三福三生旻山貢生旻山生勝宗貢生勝宗生繼
同知繼生仕高同知仕高生慶四川布政司參議娶陳封恭人生
在宏治甲子舉人雲南師宗州知州娶楊呂封宜人楊嫡也生鍊
庠生娶廖生瀚庠生娶王生之冕河南襄城知縣娶譚封孺人生
光俊廩貢生是爲君父配劉生子四長嵩生郡增廣生次卽君娶
楊宜人殉難者也次岐生德化縣庠生次幽生君生於前辛酉十
一月二十五日卒康熙甲寅八月初二日享年五十四楊宜人生
於前癸亥五月初八日卒甲寅七月二十五日享年五十二生男
二長儒次儵廩監生廣東鎮平縣知縣余先兄子壻孫男四世淳
庠生世濟世澤太學生世潮自世濟以下皆余外孫也孫女五曾

孫男口儻奉 旨營葬以某年某月某日葬君於某山之原楊宜
人耐焉儻以知君莫余若故以誌銘爲請余竊念君生平慷慨多
奇節鄉人稱之其居官所至有惠澤及於民而楊宜人賢有婦德
且臣道婦節無大於死難者故爲並書之俾藏諸幽宮之石銘曰
是爲忠臣烈婦之藏雲山蒼蒼星漢光保艾爾后熾而昌

右墓誌銘金德嘉撰

臧世龍 陳豹等

臧世龍鑲白旗漢軍任安徽撫標左營守備康熙十三年八月江西饒州土賊連閩寇犯徽州祁門等縣世龍奉檄與右營把總陳豹率兵二百守祁門比至賊已壓境世龍禦之渣口賊少卻會城守千總趙宗鼎陰通賊遣百總朱龍夜入賊營漏城內虛實并遣兵四十人導之攻城世龍督諸將分兵守宗鼎稱疾不起於是豹守東門世龍守西門三日賊愈眾世龍未悉宗鼎奸遂與諸將謀以賊眾我寡不出奇擊之城慮不可保部署諸將出北門躍馬揮戈自辰至午殺賊甚多宗鼎糾逆黨樹皐幟城上朱龍在賊隊中指世龍所在圍之世龍豹戰愈力世龍被數創猶射殺賊城上礮

國史館本傳

發世龍豹俱中礮墜陷田中為朱龍所殺城破良禾司巡檢張行
健拔佩刀戰被執誘降不屈賊斷其兩臂罵甚厲內坎中以刃刺
其腹行健呼曰我死必為厲鬼以滅汝遂死家屬咸遇害弓兵方
茂胡振亦同殉事 聞 詔世龍 贈遊擊廕衛千總豹廕衛千
總行健 贈經歷餘卹如例豹山東濰縣人行健浙江海鹽人

右 國史館本傳

成國樅 王攀桂等

成國樅浙江會稽人父溥官參將陣亡自有傳國樅廕江南撫標
守備遷提標遊擊康熙十三年耿精忠據福建叛遣僞將軍曾養
性擾浙江土寇應之總督李之芳請濟師於江南國樅奉檄率干
總王攀桂何鯉把總路魁胡威任豹援浙東時嵎縣土寇圍紹興
府城知府許宏勳練鄉勇多方捍禦賊解去宏勳追至白米堰賊
千餘據隘拒遁國樅至左右夾擊賊大敗追至蒿壩斬獲甚眾旋
偕參將洪起元破賊於樊江進兵棗樹灣偵賊據嵎縣宏勳率步
兵國樅率騎兵進勦離城數里賊迎拒宏勳設左右翼分其勢國
樅馳之斬五十餘級賊棄城遁國樅遣攀桂等率兵追賊至上楊

村擒十七人賊魁楊我玉遁遂復縣城宏勳以四鄉尙多賊砦而餘姚土匪據大嵐山聚眾萬餘賊恃以爲援故散而復聚宏勳乃白擣大嵐兩國梃搜四鄉賊砦國梃率魁威豹等勦賊富順邨賊斷橋阻水爲固國梃由閒道進僞總兵楊四驅賊數千拒戰我兵奮擊斬賊百三十餘級會宏勳已破大嵐賊巢賊奔潰國梃令攀桂等列兵隘口賊逃至輒擒之紹興土寇悉平之芳疏稱國梃身先士卒屢立戰功其所轄員弁亦勇往敢戰 上嘉之命事平議敘十月養性以賊數萬犯台州國梃自嵗踰山援台賊列營山麓衝破之賊退據水口國梃從上游渡戮賊百餘養性驅賊復至國梃擊敗之逐北十餘里賊從雲峯黃巖橋兩道夾圍乘高發礮石

如雨我師以戰地狹箭不能施部下勸潰圍出國樅不可下馬短
兵接賊來益眾國樅受數刃遂與攀桂鯉魁威豹均歿之芳疏請
卹 詔贈國樅參將卹銀四百兩廕子弟一人守備用攀桂鯉卹
銀一百五十兩魁威豹卹銀一百兩各廕子弟一人衛千總用國
樅子都官至福建廈門都司

右 國史館本傳

皇朝通志卷之三十三

三

李其昌

李其昌字遜伯廣東程鄉人父成材爲善於鄉賑貧濟乏里人德之以爲其後必有昌者因以其昌名昌偉舉幹喜韜略補武庠弟子員慷慨自矢有棄繻請纓志值鼎革王師入粵仗策隨征以功署平鎮營守備時潮疆初定土弁恣睢握兵雄鄉里昌弗之善也請於幕府願戮力疆場得題授武昌守備再補直隸楊村營遷隰州專防都司康熙十二年告病回籍其明年潮帥劉進忠叛賊黨聞風響應脅其昌從逆昌正色曰天朝用兵如神汝輩不知君恩亦當畏懼國威柰何背亂頑抗自取滅族吾受朝廷爵祿豈從而賊反耶賊怒掘坎活埋之終不屈焚殺其全家時仲冬

二十有一日也子以猷方十五歲得脫告之官官無如何越四年以大赦弗究猷呼籲不已當道憐之許自行緝捕卒得賊首以雪仇恨

論曰其昌明於六義舍生取之忠矣假當年畏死從逆賊平之後終亦不免一死泰山鴻毛相懸奚翅萬萬哉父爲忠臣子爲孝子百世而下凜冽存焉嗚呼其可敬也

右小傳藍鼎元撰

邁蘭 多博等

邁蘭蒙古人隸滿洲鑲黃旗姓博爾濟吉特康熙十三年以護軍
參領從征湖廣有功復隨定南將軍希爾根至江西耿逆僞將易
天錫犯撫州佐領多博雲騎尉鈕鈕護軍校愛塔戰歿於鍾家嶺
邁蘭率本旗兵擊走之賊自建昌來援與撫州賊夾攻官兵一等
輕車都尉諾羅布護軍校覺和托陳歿惟邁蘭戰屢捷又敗僞將
楊益茂六萬餘眾於七里岡周福洪等三千餘眾於界牌鋪之北
山賊據景德鎮又擊敗之戰至沈香山坡陣亡同時驍騎校何九
章戰歿於饒州佐領圖爾猛額戰歿於吉安參領額參特戰歿於
老虎口十四年騎都尉福拉塔擊賊於鄱陽湖中礮歿賊帥邵連

登據建昌七品官肯特擊敗之尋戰死於饒州佐領百杜於南昌陣亡護軍校照禮於景德鎮陣亡十五年七品官鄂爾賽與吳逆偽將馬寶戰死之十六年驍騎校瑪哈達索爾和諾克禮並隨征至吉安瑪哈達戰歿索爾和諾擊韓大任於螺子山被傷卒克禮擊大任於瑞金歿於陣署驍騎校喜達同時戰沒於饒州二等男色進寇同統領桑額領兵赴福州至撫州之鍾家嶺僞都督葉高率四萬眾來犯色進寇力戰死之邁蘭 贈雲騎尉孫多坡爾襲多博滿洲鑲黃旗人姓甯古塔 贈雲騎尉從孫薩克察襲鈕鈕滿洲鑲黃旗人姓瓜勒佳 贈騎都尉從弟色黑襲愛塔滿洲正白旗人姓舒穆祿 贈雲騎尉孫阿贊襲諾羅布蒙古人隸滿洲

正白旗姓博爾濟吉特 贈三等男子昂安巴襲覺和托滿洲正
黃旗人姓扎庫塔 贈雲騎尉以叔父之子保善襲何九章鑲黃
旗漢軍 贈雲騎尉孫何圖襲圖爾猛額蒙古鑲黃旗人額參特
滿洲正黃旗人 贈雲騎尉福拉塔滿洲鑲藍旗人姓兀扎拉加
贈一雲騎尉肯特滿洲正紅旗人百杜蒙古鑲黃旗人 贈雲騎
尉子班第襲照禮滿洲正白旗人姓富察鄂爾賽蒙古鑲黃旗人
姓克勒特 贈雲騎尉姪班第襲瑪哈達蒙古正白旗人 贈雲
騎尉子張保壽襲索爾和諾滿洲正紅旗人 贈雲騎尉克禮滿
洲鑲藍旗人姓瓜勒佳 贈雲騎尉子松鄂拖襲喜達蒙古鑲白
旗人色進楚蒙古正紅旗人姓博爾濟吉特 贈一等男子常舒

國朝書庫類律初編

卷三百三十九

六

襲

右 國史館本傳

覺羅薩克素 森特赫等

覺羅薩克素滿洲鑲藍旗人康熙十三年以佐領從平南大將軍
賚塔征耿精忠賚塔駐衢州遣薩克素防台州黃巖縣賊將曾養
性率眾六萬來犯薩克素堅守力攻不能下參將武瀨通賊獻城
薩克素力戰死之台州急三等侍衛森特赫赴援戰歿於台州南
浮橋養性遂犯衢州驍騎校固魯吾戰歿於紅橋協領舒書戰歿
於坑西養性知衢州有備退據天台自長石嶺至三江連營數十
里復遣其黨朱飛熊率水賊萬餘舟三百餘泊小梁山下十四年
甯海將軍傅拉塔統師進擊佐領赫德理諾穆啟署參領禪拜法
特哈布思泰鄂齊拜瑚穆西楊齊八品銜瑪爾翰俱戰死於梁山

驍騎校俞珥隨提督常進忠以舟師攻海門戰死大兵旋擊斬飛
熊養性退據茂平嶺大兵閒道濟師驍騎校固魯赫七品銜劉璜
擊之土木嶺賊敗走進勦半山嶺又敗之遂繞出茂平嶺背賊驚
潰乘勝趨黃巖養性棄營據城圍之養性突圍走且闕固魯赫劉
璜窮追俱戰死議卹薩克素 贈騎都尉子素赫襲森特赫雲騎
尉子賚格襲舒書二等輕車都尉子素住襲赫德理雲騎尉子瑪
爾秦襲諾穆啟雲騎尉子塔必圖襲禪拜雲騎尉法特哈雲騎尉
子喀濟海襲布思泰雲騎尉子布朗襲鄂齊拜雲騎尉兄阿玉襲
瑚穆西楊齊俱雲騎尉瑪爾翰雲騎尉子福壽襲俞珥雲騎尉孫
廷瑤襲固魯赫雲騎尉弟之子鄂爾濟拜襲劉璜雲騎尉兄之孫

垣襲森特赫滿洲正黃旗人姓吳雅固魯吾蒙古鑲白旗人舒書
滿洲鑲黃旗人姓納拉赫德理滿洲正藍旗人姓他塔拉諾穆啟
蒙古鑲白旗人姓芒格努忒禪拜滿洲鑲藍旗人法特哈滿洲正
黃旗人姓瑪佳布思泰滿洲正白旗人姓喜塔臘鄂齊拜蒙古正
白旗人姓塔他爾瑚穆西滿洲正藍旗人楊齊鑲白旗漢軍瑪爾
翰滿洲正白旗人姓富察俞珥正白旗漢軍固魯赫蒙古鑲紅旗
人姓翰褚劉墳鑲紅旗漢軍

右 國史館本傳

西華通志卷之六十三

七

楊春芳 魏萬侯等

楊春芳四川萬縣人任溫州城守副將康熙十三年耿精忠叛偽將曾養性等陷平陽攻瑞安溫州鎮標遊擊魏萬侯請兵赴援總兵祖宏勳遣春芳同往賊踰桐嶺拒萬侯率子棟奮擊多斬獲以後軍不至退營李棠嶺相持半月請益兵宏勳不應賊奄至圍數重萬侯偕棟力戰死同死者樂清營百總崔堯龍春芳棄馬步戰退歸溫州宏勳倡從逆永嘉知縣馬琿不屈與從子穎姿俱死之
羈春芳宏勳遂攻台州康親王傑書貝子富喇塔統兵分路勦春芳密遣人赴大營請兵宏勳知之執春芳春芳怒罵被磔死賊方遣其黨攻掠諸州縣慶元人吳詔功吳壽男練鄉兵守禦賊大至

詔功壽男俱戰死浦江生員吳尙鉉亦率鄉勇戰歿於浦江之松
村賊偏武義署知縣事徐喆募勇士守守弁張寄章通賊獻城賊
執喆護印不予脅降喆厲聲曰吾守土義當死肯苟活耶絕食自
縊死賊至象山邑貢生謝逢以教習授知縣歸里被執不屈賊擁
至彭姥嶺觸石死常山人徐光皓由山東新城知縣歸里城陷偏
受僞職罵賊死又有常山舉人徐光旭任黃巖教諭賊破城予僞
職光旭裂劄擲地大罵自縊死處州陷雲和訓導謝廷謨募鄉勇
勦賊賊執之絕粒死處州協右營把總左朝極分防景甯縣賊突
至朝極鏖戰被執罵賊死十四年大兵進取温州錢塘生員汪士
嶠獻策軍門以軍功給同知劄康親王傑書令偕都司蔡佳招撫

賊黨至永嘉八字坑入賊巢責以大義賊怒縛之與佳俱不屈死
同時臨海人余煜臨安生員洪恩宣俱以應募招撫賊黨遇害十
五年賊謀襲甯波樂清人侯贈祖偵知之走告樂清知縣知縣令
赴郡告急爲賊邏獲重囚辱之贈祖罵賊死先後議卹 詔贈春
芳太子少保左都督萬侯副將俱廕守備瑯布政司參政詰按察
司僉事俱廕一子入監詔功壽男朝極俱廕千總餘卹如何詔功
壽男煜贈祖 詔俱入祀昭忠祠萬侯奉天人武進士堯龍直隸
人瑯陝西武功人副榜貢生詰江西廣昌人廷謨浙江於潛人朝
極陝西鞏昌人佳浙江蕭山人

右 國史館本傳

按徐氏倬撰陳公丹赤傳有逆將楊春芳擁兵不救且導曾逆偏既都並詰陳

國朝通志卷之三十三

公無糧何以戰等語據此傳可正徐氏之謬

三

薩哈連 圖爾渾等

薩哈連滿洲鑲黃旗人姓富察任員外郎康熙十三年借郎中國爾渾祝表正主事巴克塔桑阿布長殺筆帖式納穆僧額穆爾泰穆魯那桑阿隨經略大學士莫洛由陝西進勦吳三桂兵次甯羌州值陝西提督王輔臣叛突至經略營莫洛戰歿乃害薩哈連等而幽表正於營幽至秦州輔臣尋復具疏附表正還奏 上復遣表正齎 諭慰之表正至賊營多方曉諭輔臣仍畱弗遣比大兵至秦州僞總兵巴三綱謂其黨曰表正屢勸吾輩投誠是其心終不附吾今大兵分路來畱之必爲禍遂害表正又有參領趙繼善者投略陽鎮總兵甫抵任輔臣猝至城陷脅降不從死之薩哈連

國朝書林典故卷之三十三
贈雲騎尉子三台襲圖爾渾巴克塔那桑阿繼善俱 贈雲騎尉
圖爾渾蒙古正紅旗人姓明阿從姪克什依襲巴克塔滿洲鑲白
旗人姓納喇子喀薩理襲桑阿布滿洲鑲黃旗人姓索綽絡子五
十八襲長綬滿洲鑲白旗人姓伊拉里子常安襲納穆僧額蒙
古正紅旗人姓喀出特弟諾敏襲穆爾泰滿洲正黃旗人姓賴卜
弟倭舒襲穆魯滿洲正黃旗人姓董鄂從兄噶爾什襲那桑阿滿
洲鑲黃旗人姓費莫兄雅圖襲繼善正黃旗漢軍子國琦襲表正
鑲紅旗漢軍以未與薩哈連等同時盡節議不與卹

右 國史館本傳

魯仁圻 子世泰

當吳三桂反吾宗元長公死其官事 聞 天子賜祭葬官其一
子嗚呼烈哉公諱仁圻元長其號也系出宋參知政事肅簡公南
渡遷越之餘姚復遷會稽魯家涇郡倅某公之父也公好讀經尤
邃春秋學能馬上左右射補博士弟子員順治辛丑入都與安總
兵官喻明簡能知公者挾之入秦遂以百夫長隸戲下明簡去代
之者王懷忠又能知公者授漢鳳營千夫長康熙十三年滇黔既
叛秦隴大震征南將軍穆某鬪場大閱公慷慨力請討賊將軍壯
之定西大將軍多羅貝勒又能知公者賜之首鎧魚甲太乙之刀
將任以南征未及發是年冬十二月會漢鳳參將蘇興叛附吳三

桂將襲殺訶賊筆帖式布爾格以滅口公憤甚度倉猝未能制賊
輒衣朝服北面再拜慟哭懸父遺像祭且告入訣妻子出上馬馳
叩輿營氣發於面力爭毋殺布爾格狀與大怒縛公急牽之所頭
公大罵賊死爲是月之十五日嗚呼死生亦大矣雖然人各有死
唯公能獲死所也夫春秋之義莫大於討賊令公須臾死帥師
入蜀轉戰湖南扼賊衝戰而勝功莫大焉戰而不勝死必大創賊
死亦烈而塵死蘇與手爲可惜也雖然三逆方張當時大臣能死
賊者惟范公承謨甘公文焜朱公國治其能擊賊者則有哈公占
蔡公毓榮李公之芳然史美擊賊者又何敢輕死賊者則公之死
可以不恨矣公既死莫敢收其尸先是公畜一犬甚馴大護尸傍

終不去尸僵於雪飛鴉集啄犬輒咋逐之故吏梁玉收而葬焉妻
孔氏遁蔣氏被掠死子世泰亦死世德陷賊中公友袁豹以財贖
歸其弟仁城以公歸葬於會稽之品字山公有春秋評解傳於世
並銘之銘曰
烈烈我公死而不死死而不死其不死而死者盍視此

右墓誌銘魯曾煜撰

皇朝通志卷之三十三

三

--	--	--	--	--	--	--	--	--	--

祝昌 許文耀等

祝昌河南固始人順治六年進士由中書出爲福建興化府推官未赴任以父憂歸服闋除湖廣黃州府推官時滇黔用兵大軍駐江南檄催各府糧運昌豫增價採購供額贍足以最擢戶部主事升廣西僉事道分巡右江未及任裁缺補湖廣辰沅道逆藩吳三桂叛昌在長沙灑涕諭眾曉以大義皆感泣堅守康熙十三年賊大至城潰昌北面再拜自經死三桂之叛也所在蠢應鄖陽降調通判許文耀與在城文武士民竭力堵禦旋奉檄入山招撫叛鎮楊來嘉洪福等遇害事 聞 贈復原官十四年七月三桂攻漢中城陷同知汪化鰲不受僞職賊繫之十五年九月復給僞劄偏

攝縣事化鰲痛哭望 闕遙拜自經死十七年十月揚威大將軍
簡親王喇布檄益陽縣知縣徐錫往衡州招撫三桂黨至泉溪渡
爲僞將軍吳國貴所殺事 聞以冒險招撫捐軀盡忠可憫 詔
贈湖廣按察司僉事廕一子入監讀書文耀福建貢生化鰲江南
涇縣貢生錫江西安義舉人

右 國史館本傳

索諾穆 阿岱等

索諾穆蒙古正藍旗人姓烏朗漢濟勒們兄色楞以騎都尉於順治元年隨睿親王多爾袞入關敗賊積功至二等輕車都尉索諾穆襲職併本身騎都尉爲一等輕車都尉兼一雲騎尉康熙十三年逆藩吳三桂叛索諾穆從大兵往剿上賜弓馬銀兩以寵其行至湖廣僞將吳應麒柯鐸高起龍廖進忠等引賊四萬拒於岳州索諾穆越眾三入其營力戰陣亡靈柩旋京上遣內大臣巴特瑪奠茶酒並賜祭葬如例加世職三等男以其子福三寶襲時相繼歿於陣者雲騎尉阿岱護軍校巴爾哈孫萬達理雅哈里托金驍騎校默爾庫勒圖爾蒙克親軍校強文均議卹如例阿岱

蒙古人隸滿洲鑲黃旗姓布爾哈齊 贈雲騎尉子旺武襲巴爾
哈孫蒙古正黃旗人姓杭阿特 贈雲騎尉子巴圖襲萬達里滿
洲鑲藍旗人姓瓜勒佳 贈雲騎尉子花理雅遜襲雅哈里滿洲
正黃旗人姓伊爾根覺羅 贈雲騎尉子薩哈里襲托金滿洲正
藍旗人默爾庫勒滿洲鑲黃旗人姓額蘇里 贈雲騎尉子傳壽
襲圖爾蒙古蒙古鑲白旗人姓卓齊普楚特 贈騎都尉子瑪尼
襲強文滿洲正黃旗人姓鄂卓 贈雲騎尉子吳三泰襲托金贈
廕無考

右 國史館本傳

艾音查 瑚什等

艾音查滿洲正藍旗人姓兀雅父瑚伸布魯以佐領擊海寇鄭成功陣亡加世爵三等男自有傳艾音查襲父爵康熙十三年逆藩吳三桂遣賊將陷長沙入江西陷萍鄉艾音查與護軍校瑚什從大兵敗賊於萍鄉尋進軍長沙俱力戰陣亡同時一等輕車都尉白顯正戰歿於二郎岡騎都尉何現圖戰歿於長沙三等侍衛署參領猛保戰歿於岳州前鋒侍衛嘉爾都戰歿於湘潭護軍校額爾臣戰歿於洞庭又有輕車都尉兼參領俄內護軍參領西圖庫阿三泰重魁署前鋒參領額楞楚護軍校圖武爾薩岱前鋒校巴爾喀護軍校管護軍參領事博洛俱以是年戰死十四年死綏甯者

驍騎校蘇巴什達死長沙者護軍校委署參領諸穆齊七品廕生
張承烈十五年死長沙者雲騎尉胡從聖十六年死長沙者二等
輕車都尉高永運議卹艾音查 贈二等男子雅岱襲瑚什騎都
尉從孫樸廉襲白顯正雲騎尉子邦元襲何現圖加一雲騎尉子
應龍襲猛保雲騎尉從子海壽襲嘉爾都騎都尉子旺恪襲額爾
臣雲騎尉襲無考俄內輕車都尉世襲罔替西圖庫騎都尉阿三
泰重魁額楞楚圖武爾俱雲騎尉襲俱無考薩岱巴爾喀贈襲俱
無考博洛雲騎尉子雷保襲蘇巴什達雲騎尉襲無考諾木齊雲
騎尉子達齊納襲張承烈雲騎尉子倫襲胡從聖騎都尉子世寶
襲高永運一等輕車都尉襲無考瑚什滿洲鑲紅旗人姓完顏白

顯正何現圖俱鑲藍旗漢軍猛保滿洲正藍旗人姓納喇嘉爾都
滿洲正黃旗人姓錫克特理額爾臣蒙古正黃旗人俄內滿洲正
黃旗人姓瓜勒佳西圖庫滿洲正藍旗人阿三泰姓瓜勒佳重魁
姓納喇額楞楚姓珠爾根俱滿洲正藍旗人圖武爾蒙古正黃旗
人薩岱滿洲正白旗人姓瓜勒佳巴爾喀滿洲正藍旗人博洛蒙
古鑲黃旗人蘇巴什達蒙古正紅旗人姓齊穆克圖諾穆齊滿洲
鑲藍旗人姓瓜勒佳張承烈鑲白旗漢軍胡從聖高永運俱鑲藍
旗漢軍

右 國史館本傳

國朝通志卷之三十三

三

業陳 吉那布等

業陳滿洲正黃旗人姓索佳順治十五年以護軍參領從信郡王多尼征貴州敗桂王朱由榔將李成蛟於涼水井又敗李定國於雙河口十七年從征東將軍季什哈剿山東土寇于七等於錫齒巖有功康熙十三年四川提督鄭蛟麟總兵吳之茂譚洪叛附吳三桂與僞將王屏藩合 詔安西將軍都統葉赫等進討業陳與防禦準推護軍參領巴朗隨征至野狐嶺賊伏千人於林中樹幟以誘業陳等隨前鋒統領穆占擊敗之復陽平關僞將石存禮聚賊萬七千於朝天關連營二十餘業陳等復隨穆占大敗之時有署護軍校吉那布博喜圖陣歿屏藩遂擁眾四萬踞蟠龍山復分

繞大兵後業陳準推巴朗等慶戰陣歿同死者前鋒校奇塔爾六
十八驍騎校薩齊渾巴爾都華色護軍校色爾古楞百和圖依爾
泰淮色又有驍騎校塔爾海護軍校回唐阿死於娘娘廟驍騎校
博岱死於府谷縣大兵進取保甯佐領布達喜等迎糧槐樹驛遇
賊截劫布達喜與護軍參領烏納哈佐領阿蘭驍騎校瑚爾奇阿
余什雲騎尉戴啟俱戰歿議卹 詔贈業陳騎都尉兼一雲騎尉
子哈達襲博喜圖雲騎尉子阿玉錦襲準推騎都尉子雲和推襲
巴朗騎都尉子華色襲薩齊渾巴爾都華色俱雲騎尉依爾泰騎
都尉淮色雲騎尉塔爾海騎都尉博岱雲騎尉布達喜雲騎尉弟
布達里襲烏納哈雲騎尉孫烏爾賽襲阿蘭二等輕車都尉戴啟

騎都尉子巴圖爾襲餘卹如例吉那布滿洲正白旗人姓諾勒特
博喜圖蒙古鑲黃旗人姓古爾默特準推滿洲鑲藍旗人姓卓佳
巴朗滿洲正黃旗人姓科本奇塔爾蒙古正紅旗人薩齊渾滿洲
鑲藍旗人姓赫舍里巴爾都蒙古鑲藍旗人姓巴於特華色滿洲
鑲黃旗人姓薩馬拉色爾古楞蒙古正黃旗人百和圖蒙古鑲黃
旗人姓蘇吉勒伊爾泰滿洲正藍旗人姓瓜勒佳准色滿洲鑲藍
旗人姓鈕祜祿塔爾海滿洲正黃旗人姓富察回唐阿滿洲鑲藍
旗人博岱滿洲鑲紅旗人姓他塔喇布達喜蒙古正藍旗人姓薩
爾圖烏納哈滿洲正藍旗人姓瑪佳阿蘭瑚爾奇俱滿洲正紅旗
人阿余什蒙古鑲紅旗人姓伯爾格吉特戴啟蒙古鑲藍旗人姓

國朝書影題詞類編

三

薩喇塔克

右 國史館本傳

安珠琥 布思塔等

安珠琥滿洲正紅旗人姓伊爾根覺羅襲三等輕車都尉初從征大同及貴州屢著戰功康熙十三年吳三桂叛遣僞將攻四川安珠琥偕署護軍參領布思塔佐領色楞俱隨安西將軍赫業師敗僞將石禮等於朝天關是時上命將軍瓦爾喀前鋒統領穆占分路進剿佐領托勒弼驍騎校岳納隨瓦爾喀師護軍校瑚什屯署護軍校布爾哈隨穆占師遇賊於朝天關瑚什屯布爾哈戰捷托勒弼岳納俱陣亡安珠琥旋敗賊於蟠龍山娘娘廟等處色楞亦敗賊於野狐嶺師次延平關有僞總兵率眾萬餘據山連營拒戰色楞擊敗之至是戰於蟠龍山與布思塔俱陣亡娘娘廟之役

瑚什屯與布爾哈死之安珠琥進次槐樹驛與僞將王屏藩等力
戰歿同時署護軍校奇里布戰歿於仙逸關八品官索那戰歿於
益門鎮佐領奇蘭普隨副都統綽克托戰歿於重慶府。上命兵
部郎中托畢泰往諭四川總督鄭蛟麟等甫至成都而蛟麟等已
叛附三桂托畢泰遂爲王屏藩所殺刑部郎中伊成額亦戰歿於
成都佐領和濟格爾初偕副將張登科與僞將吳之茂等戰於廣
元縣敗之又與僞將賀騰龍戰於二郎關與王屏藩戰於西猴子
嶺與陳奉煥戰於張前湖營俱捷僞將譚洪以眾來援復敗之旋
以擊僞總兵楊應芳於溝家營歿於陣七品官額爾隊初征四川
在小梅嶺龍潭驛西山坡等處擊賊有功十四年隨定西將軍棟

鄂破王屏藩兵於漢中府之西長寨旋隨總督周有德敗譚洪師
還屏藩等復率賊數千來追額爾隊陣亡安珠琥 贈二等輕車
都尉弟存柱襲布思塔滿洲鑲白旗人姓西林覺羅 贈雲騎尉
子福森保襲色楞蒙古正紅旗人 贈雲騎尉子扎爾布襲托勒
弼與安珠琥同旗姓格濟勒 贈雲騎尉弟蘇單襲岳納滿洲正
黃旗人姓圖喇 贈雲騎尉子覺和托襲瑚什屯與岳納同旗姓
赫舍里 贈騎都尉子蘇伯臣襲布爾哈與托勒弼同旗姓鈕祜祿赫
勒 贈雲騎尉弟戴音達襲奇里布滿洲正藍旗人姓兀扎喇
贈雲騎尉子安泰襲索爾與布爾哈同旗姓舒舒覺羅 贈雲騎
尉子西扎布襲奇蘭普滿洲鑲黃旗人姓費莫 贈雲騎尉襲無

573327 K320.49

蒙古通志卷之...

蒙古通志卷之...

考托畢泰蒙古鑲白旗人姓博和羅特 贈騎都尉孫花色襲伊

成額滿洲正白旗人姓賴卜 贈雲騎尉子伊大成襲和濟格爾

蒙古鑲藍旗人姓鄂爾敦 贈雲騎尉孫吉雅圖襲額爾隊蒙古

鑲藍旗人姓烏朗哈濟勒們 贈雲騎尉襲無考

右 國史館本傳

